



VI.



85







HISTORIA ECCLESIASTICA VARIIS COLLOQUIIS DIGESTA

U B I

PRO THEOLOGIÆ CANDIDATIS

*Res præcipue, non solum ad Historiam, sed etiam ad
Dogmata, Criticam, Chronologiam, & Ecclesiæ
Disciplinam pertinentes, per breves Interroga-
tiones, & Responsiones perstringuntur,
& in præclaro ordine collocantur.*

TOMUS QUINTUS

Complectens duo Ecclesiæ sæcula
Decimum tertium, & Decimum
quartum.

A U C T O R E


FR. IGNATIO HIACYNTHO
AMAT DE GRAVESON

Sacrae Facultatis Parisiensis Doctore, & Collegii
Casanatenfis Theologo, Ord. Fratrum Præd.



ROMÆ MDCCXIX.
Apud Franciscum Gonzagam.

SUPERIORUM PERMISSO.



NOS FR. ANTONINUS C L O C H E

Sacrae Theologiae Professor, ac totius Ordinis
Fratrum Prædicatorum humilis Magi-
ster Generalis & servus salutem .


Tenore præsentium nostrique auctoritate Officii li-
centiam facimus Reverendo admodum Patri Fra-
tri *Ignatio Hiacynto Amat de Graveson* in Sacra Fa-
cultate Parisiensi Doctori ac in Collegio Casanatenſi
Conventus Sanctæ Mariæ super Minervam de Urbe
Theologo, Provinciæ nostræ Provinciæ Alumno ty-
pis edendi Opus in plures Tomos distributum, cui ti-
tulus est: *Historia Ecclesiastica variis Colloquiis dige-
sta, &c.* dummodò prius approbatum fuerit à duobus
Ordinis nostri in Theologia Magistris, & aliis servatis
de jure servandis. In quorum fidem &c. Datum Ro-
mæ in Conventu nostro Sanctæ Mariæ super Minervam die 8. Martii 1717.

Fr. Antoninus Cloche
Magister Ordinis.

Loco † Sigilli :

*Fr. Bernardus d'Arcet Magister,
& Socius,*

Registr. fol. 79.



NOS FR. ANTONINUS C L O C H E

Sacræ Theologiæ Professor, ac totius Ordinis
Fratrum Prædicatorum humilis Magi-
ster Generalis & servus salutem .

TEnore præsentium nostrique auctoritate Officii li-
centiam facimus Reverendo admodum Patri Fra-
tri *Ignatio Hiacyntho Amat de Graveson* in Sacra Fa-
cultate Parisiensi Doctori ac in Collegio Casanatenſi
Conventus Sanctæ Mariæ super Minervam de Urbe
Theologo, Provinciæ nostræ Provinciæ Alumno ty-
pis edendi Opus in plures Tomos distributum, cui ti-
tulus est: *Historia Ecclesiastica variis Colloquiis dige-
sta, &c.* dummodò prius approbatum fuerit à duobus
Ordinis nostri in Theologia Magistris, & aliis servatis
de jure servandis. In quorum fidem &c. Datum Ro-
mæ in Conventu nostro Sanctæ Mariæ super Minervam die 8. Martii 1717.

Fr. Antoninus Cloche
Magister Ordinis.

Loco † Sigilli :

*Fr. Bernardus d'Arcet Magister,
& Socius,*

Registr. fol. 79.

DUobus verbis comprehendi potest munus ejus, qui lucubrationibus suis de litteraria republica quàm optimè studet promereri : Videndum enim est, quid doceat, & quomodò. Prius illud eam vim habet, curandum esse ei, primùm ut vera doceat; Tùm ut propria ejus argumenti, in quo versatur, aut certè cum eo quod agitur, conjuncta & coherrentia. Modus autem pulchrè scribendi is est, ut perspicuè scribat, quod duabus rebus conficitur, ordine, & genere sermonis ad res enodandas & enucleandas accommodato. Hæc omnia qui præstet, ut in scribendo & vera tradat, & pertinentia ad argumentum quod versat, & ea distinguat, ut suo quodque loco digerat ac colloceat, & verbis propriis, significantibus, ab eorum qui purè ac nitidè loquuntur consuetudine haud abhorrentibus, ei ego nihil omninò ad eximii authoris laudem deesse statuo, dignissimumque esse puto, cujus honestissimos conatus, & industriam ad præclara tendentem bonorum omnium perpetuus applausus approbatioque committetur. Has boni Scriptoris partes implet Rev. P. *Fr. Ignatius Hyacinthus Amat De Graveson*, Sacra Facultatis Parisiensis Doctor, Collegii Casanatensis Theologus, & Historiæ Ecclesiasticæ variis Colloquiis digestæ Author. Unde post anteriorum voluminum Commendationem nostram, hoc quod historiam Sæculorum XIII. & XIV. complectitur, dignum omninò publicâ luce, ac eruditorum cognitione judico, cum nihil in eo nec à recta fide, nec à bonis moribus alienum sit, sed totum variæ, reconditæque eruditionis plenum, multamque præferat verborum elegantiam, & rerum copiam. Datum Romæ vi. Kalendas Octobris anno 1719. in Conventu Sanctæ Mariæ super Minervam.

Fr. Antonius Bardon in Sacra Facultate Parisiensi Doctor Theologus, & Catedraticus Casanatensis, Ordinis FF. Prædicatorum.

Supre-

Supremi Ordinis nostri Archimandritæ mandatis obsequuturus, quintum Historiæ Ecclesiasticæ Volumen à Clarissimo Viro *Fr. Ignatio Hiacynto Amat De Graveson*, Sacræ Facultatis Parisiensis Doctore, & Collegii Casanatensis Theologo elucubratum, datâ operâ perlustravi. Quo quidem in Opere, tantum abest, ut quidpiam offenderim, quod sive Aristarchi grave supercilium, sive mordacem *Zoili* linguam pertimescat, ut potius omnia, quæ ad exactam accuratamque decimi tertii, & decimi quarti Ecclesiæ Sæculorum Historiæ notitiam faciunt, præclaro certè ordine digesta positaque invenerim. Istud prætereà in præstantissimo Concinnatore, tum olim, tum præsertim impræsentiarum haud semel observavi, quod meo equidem iudicio vel maximam laudem promereatur: Is scilicet inter obscuritatem & prolixitatem incedens, atq; Regiam captans viam, claritatem cum brevitate summâ prudentiâ, summoque studio componit: Id quod Lectorem, mirum quantum rapiat, neminem latere puto. Nam, ut pulchrè monet *Hugo à Sancto Victore*: lectio duobus modis animo fastidium ingerere solet, & affligere spiritum. Et qualitate, videlicet, si obscurior fuerit: & quantitate, si prolixior extiterit. In quo utroque magno uti moderamine oportet: ne quod ad refectionem quæsitum est, sumatur ad suffocationem. Quocircà, cum Opus huiusmodi nihil demùm contineat, quod sanæ doctrinæ dogmatibus, & Christianæ Moralis documentis non sit consentaneum, ut in Theatrum litterarium prodeat, dignum omninò censeo. Datum Romæ in Conventu Sanctæ Mariæ super Minervam, die 25. Septembris, Anni 1719.

*Fr. Patricius Plonket Ordinis Predicatorum,
Sacræ Facultatis Parisiensis Doctor, & Collegii Casanatensis Theologus.*

IMPRI-

IMPRIMATUR,

Si videbitur Reverendissimo Patri Magistro
Sacri Palatii Apostolici.

T. Episcopus Heracliae Vicesgerens.

APPROBATIO

D. LEANDRI DE PORZIA

Abbatis Sadrensis.

*Ordinis Sancti Benedicti, Sac. Indicis Congregationis
Consultoris, necnon S. Officii Qualificatoris.*

JUSSU Reverendiss. P. Gregorii Selleri Sac. Pal. Apost.
Magistri perlegi librum inscriptum : *Historia Ec-
clesiastica &c.* Tomus Quintus : Cùmque illum inve-
nerim quolibet nomine, laude, & publica luce dignif-
simum, ideò censeo typis vulgandum, ut ex hoc Ope-
re litteraria Resp. ejus commodi accessionem percipiat,
quod ex aliis à celeberrimo Authore exaratis & edi-
tis hucusque percepit. Romæ ex Ædibus Sancti Cal-
listi die 26. Septembris anno 1719.

D. Leander de Porzia Abb. Sadrensis Congr. Cosin.

IMPRIMATUR,

Fr. Gregorius Selleri Ordinis Prædicatorum
Sacri Palatii Apostolici Magister.

IN-

INDEX COLLOQUIORUM

Quæ continentur
IN HOC QUINTO TOMO.
COLLOQUIA

In Historiam Ecclesiasticam Sæculorum XIII. & XIV.

COLLOQUIUM I.

D*E statu, seu loco, quo erant res Ecclesiæ Sæculis XIII. & XIV. tam in Oriente, quàm in Occidente sub Imperatoribus, & Principibus Christianis.* pag. 5.

COLLOQUIUM II.

In quo textitur Series Episcoporum, qui Illustriores Ecclesiæ Sedes Sæculis XIII. & XIV. tenuerunt. 73.

COLLOQUIUM III.

De Hæresibus & Controversiis, quæ Sæculis XIII. & XIV. enatæ sunt in Ecclesiâ. 171.

COL-

COLLOQUIUM IV.

De Conciliis tam Occumenicis , quàm Nationalibus , in quibus gliscentes Sæculis XIII. & XIV. Hæreses fuerunt damnatae , & restituta est Ecclesiæ Disciplina . 261.

COLLOQUIUM V.

*De Viris Illustribus , qui doctrina , vitæ-
que Sanctimonia Sacula Ecclesiæ XIII. & XIV. illustrarunt .* 367

COLLOQUIUM VI.

De Doctrina Fidei , de Disciplina tam Ecclesiastica , quàm Monastica , & de Ethices Christianæ Doctrina , quæ Sæculis XIII. & XIV. in Ecclesia obtinuit . 471.



HISTORIA ECCLESIASTICA

Sæculorum XIII. & XIV.

Variis Colloquiis digesta.



ISTORIAM Ecclesiasticam,
Sæculorum XIII. & XIV. con-
tinuâ serie describemus, quia
Ecclesia in utroque Sæculo
gravissimis turbis atque diu-
turnis bellis miserum in mo-
dum fuit funestata. At enim,
Sæculo decimotertio occasio-
ne dissidiorum, quæ Romanos

Pontifices inter & Imperatores non raro emerse-
runt, duæ in Italia infensissimæ excitæ sunt fa-
ctiones, videlicet *Gibellinorum*, qui ab Imperatori-
bus stabant, & *Guelphorum*, qui obtentu tuendi jura
Pontificum acerrimè decertabant. Hæ duæ arma-
tæ factiones tot clades, funera, perfidias, parrici-
dia, & sacrilegia invexerunt, ut tota Italiæ facies
suorum discerpta manibus, suis convulsa sedibus,
& populorum mutuis cœdibus in se irruentium,
ubique sanguine inundata cerneretur. Nec minùs
Ecclesiæ fatalis fuit gravis illa dissensio, quæ eo-
dem Sæculo XIII. *Bonifacium VIII.* Pontificem Ma-
ximum inter & *Philippum pulchrum* Galliarum Re-
gem vehementer exarlit, ut nihil in præsentia dicam.

de *Vesperis Siculis*, seu de occulta illa, & post hominum memoriam crudelissima conspiratione, quâ Siculi octo millia Gallorum inermium, nihilque minus cogitantium die xxx. mensis Martii, in quam eo anno, seu mclxxxii. incidit Dominica Resurrectio, absque ullo ætatis, sexusve discrimine, immaniter trucidarunt, & Siculas mulieres, quæ de Gallis conceperant, plusquam Scythicâ barbarie exenterarunt, ut, excussis earum fœtibus, nihil prorsus Francici seminis in Sicilia superesset. Tot turbas Sæculo XIII. excitatas cumularunt Hæreseon procellæ, quibus jactata est Ecclesia, præcipue Albigensum, qui bello flammâque in Catholicos atrociter sævientes, nonnisi bello sacro, ac multorum profuso sanguine in ordinem redigi, atque penitus exterminari potuerunt. His haud levioribus malis & calamitatibus sequenti Sæculo, seu decimoquarto, exagitata est Ecclesia. Romanæ siquidem Sedis per *Clementem V.* Pontificem Maximum in Gallias translatio, quam Itali appellavere *Babylonicam*, quod LXX. annos duraverit, Orbem Christianum conturbavit. Accessit insuper Italarum discordia concitata Florentinorum dissidiis, Longobardorum Regulorum bellis, *Ludovici Bavari* Imperatoris Schismate, *Petri de Corbaria*, seu *de Corvario* Franciscani Antipapæ intrusionem, Gibelinorum & Guelphorum factionibus, *Ochami* tumultibus, *Beguardorum*, *Beguinarum*, & *Vvicleffitarum* exitiosis pestibus, quibus tandem cumulum omnium malorum addidit nefandum illud Schisma, per quod post mortem *Gregorii XI.* Papæ Christianus Orbis sub incerto Capite per quadraginta annos divisus est, uno videlicet Pontifice Romæ, altero Ave-

Avenione sedente. In tam alto tot bellorum, Hæresum, discriminumq; pelago Ecclesia Sæculis XIII. & XIV. variis fuit agitata procellis, & tantum non fluctibus operta, nunquam tamen divinâ opitulante providentiâ demersa est, sed potius eò magis emicuit Summorum Pontificum, Pastorum, & Doctorum in remigando labor, quò proximius periculum imminebat. Sævas bellorum tempestates in optatam tranquillitatem convertit Deus Optimus Maximus. Obortas Hæreses Romani Pontifices in Conciliis, Doctores suis eruditis Operibus, & Principes Christiani sacris bellis feliciter obtulerunt. Postremò, accessit ad fidei victoriam & fidelium solamen pietas in Occidente renovata per novos religiosos Ordines, qui in honorem Dei & firmissimum Ecclesiæ præsidium Sæculis XIII. & XIV. excitati, collapsam vitæ Regularis disciplinam, & solidam pietatem in Claustris jam ipsâ senectute labantem repararunt, quorum ingentes fructus non solum in Sanctis *Thoma Aquinate*, & *Bonaventura*, aliisque Luminibus claruerunt, verum etiam in tutandis, ac vindicandis Sedis Apostolicæ juribus haud parvo adjumento fuerunt. Hæc omnia, quæ ad Historiam Sæculorum XIII. & XIV. spectant, brevitate cum claritate conjunctâ, juxta methodum nobis à principio præscriptam in sex Colloquiis expendemus, & in his nihil, quod ad Sanctæ Ecclesiæ publicam administrationem, dogmata & disciplinam pertinet, omitemus; nullam Hæresim, nulla Concilia Generalia, Nationalia, aut Provincialia, intacta relinquemus; Romanorum Pontificum, ac præcipuarum Ecclesiæ Sedium Episcoporum, necnon Imperatorum cum Orientis, tum Occidentis,

& Regum Christianorum successiones ac nobiliora gesta referemus; illustriorum Virorum Opera, & Ordinum Regularium institutiones atque in Ecclesiam promerita indicabimus; uno verbo, omnia, quæ in Historia utriusque Sæculi vel scitu utilia, vel lectu delectabilia existimabimus, summatim attingemus in nostris Colloquiis, in quorum primo ostendemus, quo loco Sæculis XIII. & XIV. essent res Ecclesiæ tam in Oriente, quàm in Occidente, sub Imperatoribus & Principibus Christianis. In altero dabimus seriem Episcoporum, qui illustriores Ecclesiæ Sedes tenuerunt. In tertio recensibimus Hæreses, quæ Sæculis XIII. & XIV. ex orco prodierunt, & Ecclesiam infestarunt. In quarto differemus de Conciliis, tum Oecumenicis, tum Nationalibus, in quibus vel serpentes Hæreses damnatæ sunt, vel restituta fuit collapsæ Ecclesiæ disciplina. In quinto Illustrium Virorum, qui doctrinâ, vitæq; sanctimoniâ magnum Ecclesiæ splendorem conciliarunt, Opera examinabimus. In ultimo Colloquio Doctrinam Fidei, Disciplinam tam Ecclesiasticam, quàm Monasticam, & Moralem Christianam utriusque Sæculi XIII. & XIV. perstringemus.



COLLOQUIUM PRIMUM

De statu, seu loco, quo erant res Ecclesiæ Sæculis XIII. & XIV. tam in Oriente, quàm in Occidente sub Imperatoribus, & Principibus Christianis.

DISCIPULUS.

Res Ecclesiæ pessimo loco in Oriente decimotertio Sæculo fuisse, facile conjicio ex tristi, infaustoque exitu, quem tot à Latinis Crucesignatis contra Saracenos susceptæ in Oriente Expeditiones habuerunt ob perfidiam, & æmulationem Græcorum, Imperatorum, qui Latinos exosi, nec eorum auxiliis, nec armis ad saniolem mentem revocari potuerunt, sed potiùs, per summam & à sæculis inauditam ingrati tudinem, illis ad Terram Sanctam recuperandam suppetias ferentibus occultas pararunt insidias, & societatem cum Saracenis inire maluerunt, quàm eorum excindere tyrannidem suis cervicibus imminentem. Verùm, quò magis perspectam habere possim Historiam Byzantinam, & pleniorlem assequi notitiam rerum, quæ ab Imperatoribus Orientis XII. Sæculo gestæ sunt, necesse est, ut resumamus in præsentì Colloquio seriem Imperatorum Orientis, quam in Colloquio I. in Historiam duodecimi Sæculi perduxisti usque ad Imperatorem *Alexium IV.* Isaacii Angeli filium, qui à patruo suo *Alexio III.* tyranno in carcerem detrusus, & ex eo dilapsus confugit ad Venetos, & à Crucesignato Latinorum exercitu fuit anno mille-

simo ducentesimo tertio Imperio restitutus, patremque suum *Isaacium Angelum*, qui à fratre suo *Alexio* tyranno exauctoratus & excæcatus in carcerem conjectus erat, inde extraxit, sibi que Collegam factum gubernaculis Imperii rursùm admovit.

MAGISTER. Orientale Imperium variis decimotertio Ecclesiæ Sæculo turbis ac dissensionibus Græcorum concussum, venit tandem in potestatem Francorum, qui eo per spatium quinquaginta septem annorum, trium mensium & undecim dierum potiti sunt. Franci siquidem cum Venetis fœderati Constantinopolim ceperunt die XII. Aprilis anni MCCIV. & Imperium Orientis obtinuerunt usque ad diem XXV. mensis Julii anni MCCLXI. quo Michael Palæologus Græcorum Imperator Latinos Regiâ urbe eiecit, & Orientale Imperium ipsis ereptum ad Græcos revocavit, sicut fusè describitur in *Historia Constantinopolitana sub Imperio Francorum*, quam Gallico idiomate ex Scriptoribus cœvis, præsertim ex *Gunthero*, & *Godefrido Villarduno* Campaniæ & Romanæ Mareschallo, concinnavit clarissimus *Carolus Du Fresne Du Cangius*, ex quo pauca nunc deflorabo, quæ ad illustrandam Historiam Byzantinam, & texendam seriem Imperatorum Orientis multùm conducere possunt.

Junior *Alexius* hujus nominis IV. Orientis Imperator, *Isaacii Angeli* filius, anno millesimo ducentesimo tertio à Francis cum Venetis fœderatis captâ urbe Constantinopoli, & expulso *Alexio* tyranno, restitutus Imperio, supremam in Oriente, unâ cum patre *Isaacio Angelo*, dominationem obtinuit, sed eam diù non retinuit. Orta quippè est Constantinopoli anno millesimo ducentesimo quar-

to atrox seditio Græcos inter & Latinos, cujus præcipuus author fuit *Alexius Ducas*, ob conjuncta, & imminetia supercilia *Murtzulphus* cognominatus, qui, cum esset ingenii subdoli, & animi capeffendi Imperii impotenti cupiditate flagrantis, juniori *Alexio* Imperatori ac benefactori suo ingratus malè rependit vicem. At enim, cum tumultuans populus adolescentem *Nicolaum Canabum* inaugurasset Imperatorem, insignis proditor ille *Alexius Ducas*, dum sive dolore rerum præsentium, sive, ut creditum est, veneno potatus animam ageret *Isaacius Angelus*, pater junioris *Alexii* Imperatoris, sub specioso obrentu juniorem *Alexium* Imperatorem eripiendi è manu furentis plebis, cum nihil diffidentem in carcerem conjecit, Orientale Imperium invasit, moxque victo, & custodiæ tradito *Nicolao Canabo*, qui, ut mox diximus, à tumultuante plebe Imperator salutatus fuerat, eò crudelitatis prorupit, ut junioris *Alexii* Imperatoris, quem bis in carcere veneno frustra tentaverat, propriis manibus fauces laqueo fregerit, sicque arreptam tyrannidem confirmare ausus fuerit. At non permisit Deus, ut scelestus ille tyrannus *Alexius Ducas* Imperium, quod tam injustè & crudeliter sibi arrogaverat, diù occuparet. Prælium siquidem, præviâ Imagine Beatæ Virginis, quam Græci *Παροικον*, seu *Victoriæ effectricem*, appellitare solebant, cum Francis Crucesignatis committere ausus, tam infelici Marte pugnavit, ut Græci cæsi fugatique victoriam amiserint & sacram Imaginem B. Virginis, quam ab Orientis Imperatoribus *Joanne Zemisce*, & *Joanne Comneno* olim curru triumphali post adeptas victorias deferri solitam esse, jam in

præcedentibus Colloquiis observavimus . Latini
 tam prospero belli exitu animati, & præcunte Ima-
 gine B. Virginis, quæ à Græcis ad ipsos transierat, in
 spem ulterioris consequendæ victoriæ erecti, actu-
 tum communi consilio viribusque Constantinopo-
 lim regrédiuntur, eamque denuò terrâ marique
 adorti, brevi temporis intervallo expugnant die
 xi. mensis Aprilis anni mccciv. sicut fuerat quibus-
 dam Oraculis antehac prænunciatum, quæ legi
 possunt apud *Henricum Spondanum* Continuatores
 Baronii ad annum mccciv. Hanc urbis Constantino-
 politanæ direptionem à Latinis factam, Sacrorum
 profanationem, aliaque scelera in ejusmodi urbium
 expugnationibus patrari contra fas justumque so-
 lita tragicè describit, ac ultrà modum exaggerat
Nicetas. Sed profectò mirum videri haud debet,
 quòd hic Scriptor Græcus in Schismate pertinax,
 & inexpressibili in Ecclesiam Romanam odio actus,
 Latinos tot probris oneraverit, totque horrenda
 flagitia eis affinxerit. *Niceta* itaque hac in re te-
 stimonium, utpotè viri græcæ, ac subleste admo-
 dum fidei, contemni meritò debet. Non negave-
 rim tamen aliquot scelera & sacrilegia in hac urbis
 Constantinopolitanæ expugnatione à Latinis com-
 missa fuisse, cum Scriptor anonymus vitæ *Innocen-*
tii III. Pontificis Maximi id candidè fateatur. Ca-
 ptâ à Latinis Constantinopolitanâ urbe, rebusque
 pro tempore compositis, de Latino eligendo Im-
 peratore actum est, & communibus suffragiis, an-
 nitente potissimum, & promovente *Dandolo* Vene-
 tæ Classis Præfecto, *Baldwinus* Flander à duodecim
 designatis Electoribus creatus est Imperator By-
 zantinus, *Alexius* verò *Ducas* cognominatus *Murt-*
zul-

zolphus, qui, occiso *Alexio* juniore, Imperium invaserat, &, captâ Constantinopoli, sibi à Latinis timens in Peloponesum fugerat, ab *Alexio* tyranno, patruo *Alexii* junioris, & socero *Alexii Murtzolphi* (qui ejus filiam *Eudociam* sibi matrimonio copulaverat) ibidem proditoriè captus & oculis orbatus in Latinorum manus incidit, à quibus Constantinopolim reductus, & ob eadem, quam *Alexio juniori* Imperatori suo nefariè intulerat, extremo capitis supplicio damnatus, gratas Græcis perinde ac Latinis pœnas, suis tamen sceleribus mitiores, pependit, & ex altissima columna præcipitatus, humique allisus ac membratim discerptus miseram efflavit animam. Hoc pacto in potestatem Latinorum venit Orientale Imperium, distractum tamen, & exiguis angustisque finibus conclusum, eò quòd Principes Græci Constantinopoli à Latinis expulsi, quasi vectores in communi naufragio, tabulas, quas fors offerebat, arripientes, varia sibi Regna per ejusdem Imperii Orientalis regiones constituerunt. *David*, & *Alexius Comneni* Trapezuntinum Regnum fixerunt in Ponto; *Theodorus Angelus* Thessalonicæ dominatum usurpavit; *Theodorus Lascaris* Nicææ in Bithynia Imperii quamdam imaginem fundavit, cùmque esset strenuus belli Dux, Turcas ab *Alexio*, socero suo, quondam Imperii invasore, contra se concitatos, iteratis præliis fudit, superavit, ac magna strage delevit, eorumque Principi *Jatathini* Iconii Sultano suapte manu caput amputavit, quo in sublimi elato, & hostibus ostentato insignem de illis retulit victoriam. Nec solum Principes Græci, verum etiam Latini varias Imperii Orientalis regiones
suam

suam in potestatem redigentes, angustiores ejus fines reddiderunt. Veneti quippè, plerasque tum maris Ægæi, tum Mediterranei Insulas retinuerunt. *Bonifacius* Marchio Montisferrati Peloponesum, quæ vulgò *Morea*, cum Regis titulo occupavit. *Godofridus* trecentis Athenas sibi asseruit, aliique alia loca suo dominio armis subjicientes, tot in partes Orientale Imperium dilacerarunt, quot olim in frustra infelicem Orpheum Bacchæ mulieres discerpserunt. Ad has angustias redactum Orientale Imperium anno ætatis suæ trigesimo secundo gubernare cœpit *Balduinus* inter Latinos Imperatores Byzantinos hujus nominis primus, quem virum, fuisse fortem, pium, modestum ac justum, non solum Latini, sed & *Nicetas* Scriptor Græcus & Latinis infensus, ingenuè fatetur his verbis: *Nondum Balduinus annum ætatis xxxij. concesserat, & alioqui vir erat pius & modestus, nec impudico quidem aspectu mulierem intuitus, quamdiu à sua conjuge abfuerat, vacabat divinis laudibus, necessitatibus conflitantes sublevabat, suæ sententiæ adversantes æquo animo audiebat; & quod maximum est, bis qualibet hebdomada vesperi proclamari jubebat, ne quis in suo palatio cubaret, qui alienam mulierem attigisset.* At, quod maximè dolendum est, *Balduinus*, Imperator omnibus numeris absolutus, periit in ipso ætatis suæ flore. Adrianopolim quippè, urbem Thraciæ munitissimam, quò se Græci perduelles receperant, strenuè oppugnans, à *Joannitio*, sive *Calojoanne* Bulgarorum Rege, qui cum ingentibus suorum, Scytharumque copiis huc advenerat, ut Græcis Latinorum jugum excutere molientibus auxilium ferret, in paratas incidit insidiâs *Balduinus*, captusque à Bul-

à Bulgarorum Rege, captivus in Bulgariam abductus est anno mcccv. ubi mensium sexdecim spatio in carcere detentus obiit ex morbo, ut Rex ipse Bulgarorum in litteris ad *Innocentium III.* Summum Pontificem, à quo pro ejus libertate urgebatur, datis, & *Godefridus Villarduinus*, qui rebus à *Balduino* Imperatore gestis interfuit, testantur, quibus magis adhibenda fides est, quàm Græcis, qui post *Nicetam Choniatem* scribunt, *Balduinum* Imperatorem cruribus, brachiisque truncatum, projectum, esse in vallem, ibique post triduum expirantem volucris & feris relictum esse prædam. Nec enim verosimile est, *Joannitium* Bulgarorum Regem, virum alioqui suopte ingenio crudelem, tantam immanitatem in *Balduino* optimum Imperatorem, exercere voluisse. Sic *Balduinus*, Heros invictissimus, post æquatas pugnis victorias, post tot perduellium Græcorum urbes uno armorum impetu & continenti serie triumphorum domitas, acerbo & omnibus piis luctuoso casu occubuit.

D. Quis *Balduino* in Imperio Constantino-politano successit.

M. In *Balduini* demortui locum successus est à Latinorum exercitu *Henricus*, ejus frater anno mcccvi. Fuit Princeps prudentissimus, & tum domi, tum foris rebus gerendis aptissimus. Rem adversus Bulgaros & Scythas, qui perpetuis incursionibus ejus Imperium infestabant, strenuè gessit. Vivente adhuc fratre suo *Balduino*, sed captivo, Imperio præfectus, illud administrare cœpit, nomine tamen Imperatoris & Insignibus abstinens, donec anno & mensibus sex ab illa captivitate exactis, postquam mors fratris sui comperta est, in Imperii

rii nomen & ornamenta tūc demū consensit. Quā occasione *Nicetas Choniates* moderationem, cæterasque *Henrici* virtutes commendat, ac simul detestatur ambitionem & immanitatem suorum popularium Græcorum, apud quos hi, qui Imperio erant designati, non expectatā prædecessoris morte, per cædes ad tyrannidem grassabantur. Obiit *Henricus* Imperator Constantinopolitanus die xi. Junii anni mcccxvi. cū annos decem, novem, menses & dies xxii. imperasset. Ei sine prole defuncto successit *Petrus Corteniacus*, Antisiodorensis Comes, qui illius sororem *Jolantam* in matrimonium duxerat, & ab *Honorio III.* Pontifice Maximo Imperii coronam Romæ accepit quinto Idus Aprilis anni mcccxvii. Sed Romā discedens, cū Constantinopolim contenderet, in Albanæ montium angustiis à *Theodoro Angelo* Græco, Epiri Principe, perfidiosè captus, in carcere, vel, ut alii volunt, prælio peremptus est. Successorem habuit *Robertum* filium suum, qui die xxv. Martii anni mcccxxi. Constantinopoli coronatus Imperium tenuit usque ad annum mcccxxviii. quo è vivis excessit, & *Balduino* hujus nominis II. filio, aut, ut alii volunt, fratri suo, Imperii successionem reliquit. Verū, cū *Baldwinus II.* juvenis adhuc decennis esset, ac subindè regendo imperio impar, *Joannes Bryennius*, qui Regis Hierosolymorum nomen ferebat, ex Italia accitus est, ut junioris *Balduini* tutelam, & Imperii Constantinopolitani administrationem ac defensionem susciperet. Imperio autem Constantinopolitano *Baldwinus II.* annos circiter triginta, duos à morte *Roberti* potitus est, hoc est, ab anno mcccxxviii. usque ad annum mclxi. quo an-

no *Michaël Palaologus* , Urbe Constantinopoli ,
Alexii Strategopuli artibus cum DCCC. haud am-
 pliùs militibus proditione captâ xxv. Julii , *Bal-*
duinum II. ultimum inter Latinos Imperatorem
 Constantinopolitanum, Imperio ac Regia Urbe eje-
 cit , atque Imperium Constantinopolitanum in
 Græcorum potestatem denuò redegit . Vixit tamen
Balduinus II. suæ calamitati superstes annos XI.
 filiumque unicum *Philippum* nomine reliquit , cui
Beatricem filiam *Caroli* Siciliæ Regis despondit ,
 Constantinopolitano promisso Imperio , si illius
 ope recuperari posset . Hoc pacto Franci , seu La-
 tini , Imperium Constantinopolitanum , quo , ut
 jam diximus, per quinquaginta septem annos, tres
 menses , & undecim dies potiti sunt , penitùs ami-
 serunt , ita ut *Philippus* filius *Balduini II.* & alii de-
 incepti Latini , qui Imperatores Constantinopoli-
 tani appellati sunt , fuerint dumtaxat solo nomine,
 & titulo tenùs Imperatores , ut videre est in *Histo-*
ria Constantinopolitana sub Francorum Imperio scriptâ
 à viro jam laudato clarissimo *Carolo du Fresne* , Do-
 mino *du Cange* , cujus studiis & eruditione & By-
 zantina & Francorum Historia plurimum illustra-
 ta est .

D. Expone , quæso , uberius , quibus artibus
Michaël Palaologus Orientis Imperium , Francis
 ablatum , restituerit Græcis , & quos successores
 habuerit ?

M. Ut artes detegamus , quas *Michaël Pa-*
laologus Imperator adhibuit , ut Francos Imperio
 Constantinopolitano privaret , illudque restitueret
 popularibus suis Græcis , rem altiùs repetere de-
 bemus . Captâ à Francis cum Venetis fæderatis
 Urbe

Urbe Constantinopolitanâ anno millesimo ducen-
tesimo quarto, Græcorum Principes, quos Latini
ex ea expulerant, varia sibi Regna per ejusdem
Imperii Constantinopolitani regiones constitue-
runt. *Theodorus Lascaris* Imperator à Græcis salu-
tatus Imperator anno mccciv. Niceæ in Bithynia
sedem habuit, obiitque anno mcccxxii. Impe-
rii xviii. Moriens sine mascula prole *Theodorus*
Lascaris Imperii Græcorum successorem designa-
vit generum suum *Joannem Ducam*, cognomento
Vatacium, qui, postquàm Imperium auxisset, è
viviis sublatus est iii. Kalendas Novembris anni
mccclv. Imperii trigesimo tertio. Filium unicum
reliquit *Joannes Ducas* ex *Irene* Augusta priori co-
njugè susceptum, qui ab avo materno *Theodorus*
Lascaris appellatus est, & post obitum patris mi-
litum populique concursu Imperator acclamatus,
ab *Arsenio* Patriarcha Græco Constantinopolitano
inauguratus est. Sed anno iv. Imperii sui gravi
morbo correptus, ac valetudine à Medicis despe-
ratâ, Monasticum habitum induit, ac multis edi-
tis sinceræ pœnitentiæ signis vitam clausit mense
Augusto anni mccclix. Filium reliquit octo dumta-
xat annorum puerum, *Joannem* nomine, quem
Imperii legitimum hæredem & annum ætatis de-
cimum agentem *Michaël Palaologus*, post captam,
ut jam annotavimus, *Alexii Strategopuli* artibus
Constantinopolitanam urbem, indeque expulsos
Latinos, igniti crepitaculi objectu excæcavit anno
mccclxi. totumque Orientis Imperium, ejectis La-
tinis, sibi vindicavit, ac Græcis addixit. Hic est
Michaël ille *Palaologus* Græcorum Imperator, qui
ingruentem sibi cum valido exercitu Carolum Si-
cilix

ciliæ Regem extimescens, Romanum Pontificem sibi conciliandum duxit, adeoque Ecclesiæ Græcæ cum Romana unionem promovendam in Concilio Generali Lugdunenfi II. sub Gregorio X. Pontifice Maximo, sicut in Colloquio quarto, agendo de Conciliis, commodius ostendemus. Hic breviter observandum est, non solum *Michaëlem Palæologum*, sed etiam alios ejus prædecessores Imperatores Græcos de pangenda Ecclesiæ Græcæ cum Latina pace cogitasse eo solo fine, ut Constantinopolitanum Imperium, quo Latini tum temporis potiebantur, Imperatori Græco restitueretur. Anno siquidem millesimo ducentesimo trigesimo secundo *Germanus II.* Patriarcha Græcus Constantinopolitanus, annuente *Joanne Duca* Græcorum Imperatore, Epistolas ad *Gregorium IX.* Pontificem Maximum, nec non ad Cardinales ad promovendam utriusque Ecclesiæ unionem Nicæâ scripsit. Româ Nicæam missi sunt ex Fratrum Prædicatorum Ordine duo, totidemque ex Ordine Minorum, qui cum Græcis paciscerentur, habitâque *Nimphæ* in Bithynia Synodo, cui Patriarchæ Græci Constantinopolitanus, & Antiochenus, interfuerunt, litteras ad instar professionis fidei ad Papam Græci dedere, in quibus, quàm plurimis Patrum sententiis intextis, errorem suum de Spiritu Sancto disertè enuntiarunt, sicque malis artibus Patriarchæ Antiocheni cæptum opus pro votis non cessit. Nihilominus *Joannes Ducas* Græcorum Imperator pro viribus egit, ut pax redintegraretur. Idque testantur litteræ *Alexandri IV.* Pontificis Maximi datæ anno mclvi. ad Episcopum Urbevetanum, quem Pontifex Legatum ad *Theodorum La-*
scæ.

scarim juniorem, filium *Joannis Ducae*, Græcorum Imperatorem, misit, in quibus describuntur articuli ineundæ pacis. Sed nequaquam fœdus sancitum fuit, quia Constantinopolis Imperatori Græco non fuit restituta. Nec feliciorum exitum nactæ sunt aliæ uniones Ecclesiæ Græcæ cum Latina, quæ, Constantinopoli Græcis anno MCCLXI. restitutâ, sub *Michaële Palæologo*, & aliis deinceps Imperatoribus Græcis tentatæ, aut factæ identidem fuerunt; ut ex his, quæ postea dicturi sumus, liquidò patebit.

Sed redeamus ad seriem Imperatorum Græcorum. *Michaël Palæologus*, postquam imperasset annos à capta urbe Constantinopoli viginti duos, obiit die XI. mensis Decembris anni MCCLXXXII. Hæredem Imperii reliquit filium suum *Andronicum*, qui patrem Imperatoria sepultura adeò non honoravit, ut ne plebeja quidem sit dignatus, sicut refert *Nicephorus Gregoras*, idque in odium concordia Ecclesiæ Græcæ cum Latina, quam totis viribus vivens ipsius pater promoverat, & ad mortem usque servaverat. Sed pertinaciæ suæ in promovendo Schismate, & Spiritus Sancti neganda ex Filio processione pœnas, justo Dei judicio dedit *Andronicus* Imperator; quippè qui, mortuo filio suo *Michaële*, nepotem *Andronicum* Imperii designavit hæredem, qui adversus avum rebellans sæpius, tandem, captâ Constantinopoli anno millesimo trecentesimo vigesimo septimo die sacrâ Pentecostes, sicut observat *Cantacuzenus lib. I. cap. 59.* eum Imperiali folio dejecit, in carcerem conjecit, ubi multa toleravit incommoda, & ex morbo oculorum usum amisit. Paulò post Monasticum induere habi-

habitum coactus est, quem postquàm per biennium gestasset, obiit anno mcccxxxii. in ipsa religiosa vitæ professione *Antonius* appellatus. Interim Græcorum Imperium miserè lacerabatur à Turcis, quorum irruptionibus oppressus *Andronicus junior*, redintegrandæ cum Romana Ecclesiæ concordiæ pium præ se tulit desiderium. Narrat siquidem *Nicephorus Gregoras lib. 10. sub Andronico juniore*, tentatam esse reconciliationem ab Episcopis Latinis duobus, qui Constantinopolim venerant, se verò, Græcos suos, habitâ oratione, quam recitat, deterruisse variis de causis, ac præsertim quòd Romani omnia Sedis suæ arbitrio finire vellent, ac Latini Dialecticis cavillis nimium indulgerent, qui ad dogmata sancienda nocivi essent. Hæc itaque unio Ecclesiæ Græcæ cum Latina, ad quam *Andronicus junior* se propensum demonstrabat, exitu caruit; tum quia Latini Principes Græcis auxilium contra Turcas petentibus suppetias non tulerunt; tum quia etiam id temporis *Palamitarum* hæresis, de qua in tertio Colloquio agemus, Orientalem Ecclesiam invasit. Eâ etenim grassante hæresi, cui plurimum favit *Andronicus junior*, & ex qua robur novum schismati accessit, de unione Ecclesiarum, sancienda parùm cogitabatur, quamvis Imperium Byzantinum in dies collaberetur. Obstitit etiam huic Ecclesiarum unioni diutinum inter Latinos dissidium, quo tres Pontifices Romanam sedem sibi vindicabant. Obiit *Andronicus junior* Græcorum Imperator die xxv. mensis Junii anni mcccxli. filiumque novennem *Joannem Paleologum* Imperii successorem reliquit, cujus tutelam & publicæ rei administrationem suscepit *Joannes Cantacuzenus*,

qui postea Imperii Insignia sumpsit, ob idque à *Joanne* Patriarcha Constantinopolitano anathemate percussus. Sed à *Joanne Cantacuzeno* captâ anno MCCCXLVII. Constantinopoli, initum est fœdus inter *Cantacuzenum*, & *Joannem Palæologum*, ut ambo simul imperarent, seque eâ invicem benevolentia complecterentur, quâ patres & filii solent. Ut autem fœdus istud magis confirmaretur, filiam suam *Helenam* Imperatori *Joanni Palæologo* collocavit *Joannes Cantacuzenus*. Hoc sancito fœdere, *Cantacuzenus* Imperator, ut Romanorum Pontificum, & Occidentalium Principum sibi conciliaret amicitias, & auxilia ad frangendum Turcarum impetum ab ipsis impetraret, de Græcorum conjunctione cum Romana Ecclesia instauranda seriò cogitare cepit, Pium, quod inierat consilium, cum Romanis Pontificibus *Clemente VI.* & *Innocentio VI.* communicavit, Sedis Apostolicę Legatos honorificè excepit, & conditionem proposuit de Concilio celebrando. At consilium suum, cum ad optatum exitum perducere minimè posset, & aliundè ægrè videret, Orientis Imperium intestinis bellis in dies debilitari, tandem rerum humanarum pertæsus, purpuram ac sceptrum cum habitu Monastico, nomenque ipsum *Joannis* cum *Joasaph* nomine commutavit anno MCCC LV. Eâ insperatâ *Joannis Cantacuzeni* abdicatione Imperii potentior factus *Joannes Palæologus* Imperator, armis sine mora aggressus est *Matthæum Cantacuzenum*, quem ipsius pater *Joannes Cantacuzenus* Imperatorem renunciaverat, eoque Philippis capto, & in ordinem redactò, solus, domito æmulo, Imperium obrinuit. Romam, ut Latinorum auxilium contra Turcas imploraret,

anno

anno MCCCLXIX. accessit, ubi, ex præscripta à Summo Pontifice *Urbano V.* Formulâ, Romanæ Ecclesiæ fidem professus est. Professionem ipsius apud *Odoricum Raynaldum* legere est ad an. MCCCLXIX. Incertum est quo anno mortuus sit *Joannes Palæologus* Imperator. Mortis ejus tēpus à *Petavio* refertur ad an. MCCCLXXXIV. à *Bulialdo* consignatur an. MCCCXCI. Sed, si quod in Græcorum Imperatorum catalogo, qui *Codino* de Originibus Constantinopolitanis subjungitur, verum est, *Joannem* videlicet *Palæologum* imperasse an. XLI. eum excessisse oportet anno MCCCLXXXII. cum *Andronicus* ejus pater, ut mox diximus, obierit die xxv. mensis Junii anni MCCCXLI. Verum, cum annus millesimus quadringentesimus vigesimus secundus fuerit Imperii *Manuelis* filii *Joannis Palæologi* trigessimus secundus, teste *Joanne Canano* illius ætatis scriptore, hinc sanè *Bulialdi* firmatur calculus, conficiturq; *Joannem Palæologum* imperasse annos ferè LII. & è vita migrasse an. MCCCXCI. *Joannem Palæologum* excepit in Imperio Orientis *Manuel Palæologus* ejus filius natus minor, in quem pater magis propensus fuit, quàm in *Andronicum*, suum primogenitum, tum quia *Manuel* obsidem sese dederat pro patre, qui captivus à Venetis detinebatur ob magnam pecuniæ summam à sænatoribus acceptam, cui solvendæ par non erat; tum quia etiam *Andronicus* primogenitus Genuensium fultus auxiliis conjuraverat in patrem, qui, eâ conjuratione detectâ, *Andronicum* filium suum primogenitum excæcari, & in carcerem detrudi jussit. Ad Imperium itaque evehctus *Manuel*, cum à Turcarum Principe *Bajazethe* immani bello laceraretur, ac undique premeretur, totam ferè peragravit Europam, ut auxiliares copias, præfer-

tim à Francorum , Anglorumque Regibus elicere posset , sed turbę Anglicę , & Caroli VI. Galliarum Regis morbus frequens in causa fuerunt , cur nulum itineris fructum reportarit . Obiit *Manuel Gręcorum Imperator* ex Apoplexia die xxi. mensis Junii anni mccccxxv. cū biduo ante Monachi habitum induisset , *Matthęi* sumpto nomine . Imperavit annos circiter xxxv. cū *Joannes Paleologus* ejus pater obierit, sicut mox innuavimus , anno Christi mcccxc. vel sequenti mcccxc. à quo ad annum usque mccccxxv. intercedunt anni xxxv. Hi sunt Imperatores Byzantini cū Latini , tum Gręci , qui sæculis xiii. & xiv. summā rerum in Oriente potiti sunt , & quorum Genealogias , seu Familias, legere poteris apud *Carolū du Fresne* dominum *du Cangium* , qui eas accuratē descripsit .

D. Quis est iste *Bajazethes* , à quo , ut mox observasti, immani bello impetitus & penē oppressus fuit *Manuel Paleologus* Gręcorum Imperator ?

M. Antequā exponam ; quis fuerit iste *Bajazethes* , sedulō observare debes , Turcicam gentem , de cujus origine non una est Scriptorum sententia , magni Imperii in Oriente anno millesimo ducentesimo nonagesimo octavo , Auctore *Othomano* , jecisse fundamenta . Is quippē *Othomanus*, sive *Osman* , filius *Orthogulis* , animo & corpore præcellens , ex *Sogutha* Mysiæ vico oriundus erat , in Asiam cum gentilibus suis infudit sese ; rem Turcicam incredibiliter auxit , plurimas subegit urbes , ac Prusæ Mysiæ urbi opibus florenti , magnā obsidione expugnata , sedem Imperii, quod ab ipso *Othomanum* dictum est , anno mcccxviii. constituit. Obiit *Othomanus* , primus Turcarum Imperator ,

an-

anno mcccxxvi. Ei in Imperium successit *Urchanes* illius filius, qui Mysiam, ac Lydiam universam ditioni suæ subjecit, Nicæam expugnavit, Lycaoniam, Phrygiam, Cariam, cæteraque ad Hellespontum, & Euxinum usque in suam potestatem redegit, dùm *Joannes Cantacuzenus*, & *Joannes Palæologus* Græcorum Imperatores inter se odiis & armis certantes, novis Turcarum victoriis atque incrementis locum dederunt. Mortuus est *Urchanes*, secundus Turcarum Imperator, anno Christi mcccclvii. Imperii trigesimo secundo. *Urchanem* in Imperio Othomano excepit ejus filius *Amurathes*, cujus frater *Solimanus* natus major inter venandum ex equo lapsus, humique allisus, jam è vita migraverat. Musulmanicæ superstitioni addictissimus fuit *Amurathes*, utpote qui Tempia, Scholas, Xenodochia Religiosis Turcis ac pauperibus extruxit. Bellicâ etiam virtute insignem sese prodidit. Callipolim, Adrianopolim, ac circumjctas Provincias occupavit, Triballos ac Mysios domuit, & bellis triginta septem in Asia & Europa, partim contra Christianos, partim contra rebelles suos confectis, nullo victus succubuit, sed semper sibi arridentem fortunam expertus est. Excessit è vivis *Amurathes* anno Christi mcccxc. postquam, juxtâ Annales Turcicos, imperasset annis triginta duobus. Filium reliquit *Amurathes* Imperii Othomani hæredem *Bajazethem*, qui in Annalibus Turcicis *Gilderun*, idest, *Fulmen*, cognominatur. Hic ille est *Bajazethes*, qui, ut mox dicebamus, Græciæ, vicinisque regionibus armorum terrorem inferens, *Manuelem Palæologum* Græcorum Imperatorem ad extremas redegit angustias,

& Græcorum Imperium miserum in modum laceravit. Othomanum Imperium longè latèque propagavit *Bajazethes*. Thessaliam, Macedoniam, Phocidem, Atticam, Mysiam, Bulgariam, & Valachiam Turcicæ ditionis fecit, Constantinopolim verò pluribus obsedit annis, quam tamen obsidionem solvere coactus est, ut contra *Sigismundum* Hungariæ Regem Nicopoli cum exercitu imminentem procederet, & cum illo committeret prælium, in quo *Sigismundum* Hungariæ Regem magnâ clade affectum fuisse ex Turcarum Historiis *Leunclavius* narrat. Tot victoriis ac secundis rebus elatum *Bajazethem* debitâ pœnâ castigavit Deus præpotens scelerum ultor. A' *Tamerlane* quippe, qui cum ingenti Tartarorum, Persarumque exercitu in Asiam irruptionem fecerat, victus captusque, *Bajazethes*, caveâ ferreâ inclusus, feræ instar, ad ludibrium circumductus est, & scabelli loco adhibitus, quotiès equitandum aut ex equo *Tamerlani* victori desiliendum erat. Eâ animi ægritudine doloreque confectus *Bajazethes*, vir post homines natos superbissimus, ac ferocissimus, mortem sibi met ipsi concivit, caput suum allidendo caveæ ferreæ, quâ tenebatur inclusus. Periiit autem anno MCCCCIII. cùm annos quatuordecim imperasset. Si plura de exordio Imperii Othomani, & de Turcarum Imperatoribus, qui decimo quarto Ecclesiæ sæculo præfuerunt Imperio Othomano, scire desideres, leges Annales Turcicos, *Leonicum Chalcondilam*, & *Phranzem*, qui de rebus Turcicis scripserunt, quibus adde *Leunclavium* in pandectis Historiæ Turcicæ, & in Historia Musulmanorum.

D. Ab Imperio Orientali, quod satis hætenus,

nus perluſtravimus, transferamus nos ad Imperium Occidentale, quod ſub finem Colloquii primi in, *Hiſtoriam XII. ſæculi* obſervaviſti, haud parùm turbatum fuiſſe à duobus illud prehensantibus, Electorumque ſuffragiis in eoſdem diſtractis poſt mortem *Henrici VI.* Imperat. quæ accidit anno *mcxcvii.* Hi erant *Philippus Sueviæ Dux*, *Henrici VI.* Imperatoris germanus frater, & *Otto Saxoniæ Dux*, quorum primus, ſeu *Philippus* electus Imperator, dùm in cubiculo poſt venæ ſectionem cubaret, à quodam Palatino perfidiſe cæſus eſt *Bambergæ* anno *mccviii.* *Otto* verò, ſublato ſuo competitore, ſolus Imperio potitus eſt; ut ibidem annotaviſti. Cùm igitur ad *Ottonem* inter Imperatores Occidentis hujus nominis *IV.* pervenerimus, obſecro te ut illius geſta, ac ſeriem aliorum, qui ſæculis *xiii.* & *xiv.* ei in Imperio Occidentis ſucceſſerunt, in præſentia deſcribendi munus ſuſcipias.

M. *Otto* hujus nominis *IV.* filius *Henrici Leonis Baviariæ ac Saxoniæ Ducis*, contra *Philippum Sueviæ Ducem* & *Henrici VI.* Imperatoris fratrem, electus Imperator, eodem mortuo an. *mccviii.* tenuit Imperium, & ſequenti anno, poſtquàm Sedi Apoſtolicæ Sacramento obſtriſtus, Eccleſiæ jura confirmaveſſet, Imperii coronam accepit ab *Innocentio III.* Pontifice Maximo. Promiſſis non ſtetit *Otto* Imperator, eumque jura ac ditionem Eccleſiæ invadentem Pontifex per legatos admonuit, ut ab incepto deſiſteret, ſed cùm morem gerere pertinaciter detrectaret, anathemate percuſſus eſt, ejusque ſubditi Sacramento fidelitatis ſoluti. Quò factum eſt, ut plures e Germaniæ procereſ ab eo alienati *Fridericum II.* filium *Henrici VI.* Imperatorem ſalutaverint, quem ſociis

armis fovit etiam *Philippus Augustus* Galliarum Rex . Cum his *Otto* congressus ad Bovinas propè Tornacum anno MCCXIV. ingenti suorum cæde victus est , sensimque ab omnibus destitutus in Saxoniâ fugit Imperio privatus, obiitque, datis Christianæ pænitentiae non dubiis argumentis , anno MCCXVIII. cum Imperium ab obitu *Philippi* per annos circiter sex tenuisset . Exauctorato , *Ottone* , ejusque exercitu , ut jam diximus , profligato penitus anno MCCXIV. *Fridericus II.* Imperium solus obtinuit , & ab *Honorio III.* Pontifice Maximo Imperator coronatus est anno MCCXX. Post solemnem suæ inaugurationis pompam aureos montes pro tuenda Ecclesiæ dignitate pollicitus est , legesque tulit de exterminandis Hæreticis , de testamentis Cruce signatorum fulciendis , & agricolis ab injuriis vindicandis , ut apud *Goldastum in constitutionibus Imperialibus* legere est . Quin , & Crucis signum ad Hierosolymitanam expeditionem ex manu *Hugolini* Cardinalis Hostiensis accepit, seque ad profectionem maturandam totum è nutu Summi Pontificis pendere juravit, sed fidem fefellit . Ea quippe arma , quæ ad expugnandos Saracenos , ut primum Imperium iniit , capturum voto ac juramento sese obstrinxerat, ad infestandam Ecclesiam impie convertit, atque Romanos Pontifices diu divexavit , à quibus vicissim , cum esset in impietate pertinax , quinquies fuit anathemate percussus . Primò ab *Honorio III.* quòd Episcopos quosdam injustè exagitasset, ac sedibus expulisset . Secundò, à *Gregorio IX.* anathemate confixus est, quòd expeditionem in Palæstinam , quam pollicitus fuerat , fictè ac simulatè suscipiens , turpe & rei Christianæ

na exitiosum fœdus cum Sultano Babylonie inivisset, & Hierosolymitanâ peregrinatione ad solam ostentationem perfunctus cum maximo dedecore rediisset. Tertiò ab eodem Summo Pontifice excommunicationis fulmine perstrictus est, quòd Lombardiam, aliasque Italiæ Regiones immanissimis stragibus devastaret, incenderet, ac deformeret; Quòd Ecclesiæ ditiones invaderet, Cardinales, Episcopos, Abbates Romam ad Concilium ab eodem Pontifice indictum euntes interciperet, captivosque detineret; quòd Ecclesiæ libertatem opprimeret, Ecclesiasticis viris molestiam crearet, & priora scelera novis criminibus cumlaret. Quartò, novo anathemate ab *Innocentio IV.* constrictus est, quòd in impietate sua adhuc perseverans, bona Ecclesiæ sibi usurparet. Denique, ab eodem Summo Pontifice in Concilio Generali Lugdunensi I. anno MCCXLV. celebrato non solum excommunicationis fulmine percussus est, sed etiam, ceu indignus, Imperio dejectus, sicut uberius explicabimus in Colloquio quarto, ubi agemus de Conciliis. Ex hac exauكتورationis sententia in ipsum ab *Innocentio IV.* in Concilio Lugdunensi prolata, furibundus evasit *Fridericus II.* nedum respuit; arma corripuit, gravissimaque damna Pontifici, & Ecclesiæ intulit, quæ illius temporis Historici commemorant. Parvam per menses omninò septem obsidione cinxit, à qua ingenti clade repulsus in Siciliam se recepit, obiitque anno MCL. in Arce quadam Apuliæ, quæ *Florentina* dicebatur. Quo autem morbi genere extinctus fuerit, non convenit inter Historicos. Alii quippè volunt, *Fridericum II.* à *Manfredo*, quem ex concubina genuerat, fuisse

sus.

suffocatum. Alii asserunt, eum gravi morbo correptum, vel ex veneno sibi propinato interiisse. Incertum itidem est, an *Fridericus II.* moriens, ad meliorem frugem se receperit? Sunt nonnulli Scriptores, qui tradunt, eum nihil unquam de odio in Romanos Pontifices, & pervicaciâ remisisse, adeoque excômmunicatum, & impenitentem ex hac vita migrasse. Non desunt tamen alii Scriptores, quos inter censetur *Matthæus Parisius*, qui testantur, *Fridericum II.* antequàm moreretur, edidisse pœnitentiæ signa, & ab Archiepiscopo Panormitano fuisse absolutum.

Post exauctorationem *Friderici II.* fluctuavit Imperium Occidentale nulli securè innixum, &, juxta probabiliorum eruditorum Scriptorum sententiam, contigit Interregnum ab anno MCCXLV. quo *Fridericus II.* ab *Innocentio IV.* Pontifice Maximo in Concilio Generali Lugdunensi I. Imperio abdicatus est, usque ad annum MCCLXXIII. quo *Rodolphus* Comes Habsburgensis fuit Imperator electus. Fuerunt quidem nonnulli ab anno MCCXLV. usque ad annum MCCLXXIII. electi Imperatores, videlicet *Henricus* Thuringiæ, & Hassiæ Landgravius, *Guillelmus* Brabantiae, sive Hollandiæ Comes, *Richardus* Cornubiæ Comes, *Henrici III.* Angliæ Regis frater, & *Alphonsus* Castellæ Rex *Ferdinandus III.* Hispaniarum Regis filius; verùm hi Principes Imperium dumtaxat degustarunt, & à multis Scriptoribus Imperatorum Occidentis Catalogo non accensentur. Quapropter de illis pauca dicemus, eorumque electionis, ac mortis tempus indicare sat superque sufficiet. *Henricus* Thuringiæ, & Hassiæ Landgravius, exauctorato *Friderico*, electus est eodem

eodem anno MCCXLV. Imperator apud Herbipolim.
 Movit contra ipsum *Conradus*, quem *Fridericus II.*
 ejus pater Regem Romanorum anno MCCXXXIV. eli-
 gi curaverat, cujus electionis Acta edidit *Baluzius*
 tomo I. *Miscellaneorum* pag. 472. In prælio victus
 fugatusq; fuit *Conradus*, ac victor remansit *Henricus*,
 qui tamen dum Ulmā obsidet, sagittā ictus, indeq;
 reversus obiit ex vulnere anno MCCXLVII. ab electio-
 ne sua secundo. Mortuo *Henrico* Septemviralibus
 Comitibus suffectus est *Guillelmus* Brabantiae seu
 Hollandiae Comes, contra quem *Conradus* à patre,
 suo *Friderico II.* missus, grandi repulsus clade fugit
 ad patrem, ut ejus furorem augetet & ignomi-
 niam; *Guillelmus* verò electus Imperator Aquisgra-
 num expugnavit, & in ea urbe ritu solemni corona-
 tus est. Contra Frisios rebelles fortiter pugnans
Guillelmus in glaciem incidit sub equo subsiden-
 tem, è qua cum subsilire haud posset, jaculis ac
 contis à nescio quibus confossus periit ann. MCCLVII.
 Post *Guillelmi* obitum Principes Electores, varia in
 studia distracti, duos creavere Cæsares, *Richardum*
 scilicet Cornubiæ Comitem, *Henrici III.* Angliæ
 Regis fratrem, & *Alphonsum* Castellæ Regem, *Ferd-*
inandum III. Hispaniarum Regis filium. Utriusque
 electio coram Summis Pontificibus *Alexandro IV.*
Urbano IV. & *Clemente IV.* cum diu disceptata fuisset,
Richardus parùm firmè se in Imperio consistere
 posse cernens, in Angliam rediit; *Alphonsum* verò,
 Princeps excelsi ingenii & eximiae literaturæ, di-
 ctusque cognomento *Sapiens*, cum undique immi-
 nentia bella conspiceret, consiliis *Gregorii X.* Sum-
 mi Pontificis permotus, spontè cessit Imperio, & in
 Hispaniam suam se recepit. Vacuum itaque cum
 utrius-

utriusque electi Cæsaris, cessione relictum esset Germaniæ Imperium, *Gregorius X.* Comitia indixit, in quibus *Rodolphus* Comes Habspurgenfis electus est Imperator pridie Kalendas Octobris anni *mcclxxiii.* Vir iustitiâ, religione, & bellicâ virtute Imperio non impar, quique, sicut Scriptores non, obscuri tradunt, pietate suâ diuturnum, sibi, suisq; posteris asseruit Imperium ob honorem exhibitum Sanctissimo Eucharistiæ Sacramento, dum in veneratione & tempore pluvio occurrens Sacerdoti illud lubrico & difficili itinere ad infirmum deferenti, è vestigio equum, cui insidebat, dedit, pedesque equitem maximâ religione deduxit ad ægrum, ac in Ecclesiam reduxit, eique religiosa quædam fœmina amplissimum honorem à Deo in remunerationem tam pii facinoris augurata est, sicut latè refert & probat *Serarius* libro 5. *Rerum Moguntinarum.* Aliud post suam ad Imperium electionem, insigne pietatis argumentum dedit idem *Rodolphus.* Nam cum fidelitatis Sacramentum ei recusarent Electores, quòd Sceptrum Imperii non adesset, acceptâ ille Cruce ait: *Ecce signum, in quo nos & totus Mundus est redemptus: & hoc signo utamur loco sceptri,* eamque mox deosculatus, cæteros, ut idem facerent invitavit, & fidelitatis Sacramento sibi obstrinxit, sicut referunt *Stero,* & *Eberardus* Authores cœvi, Plura in Germania bella gessit *Rodolphus,* in quibus, virtute summâ & felicitate suffragantibus, tot ferè victorias retulit, quot præmia commisit. *Othocarum* ipsi parère detrectantem armis ad officium revocavit, sed reparatis viribus post veniam adhuc insolentem acie superavit, in qua *Othocarus* ipse à gregario quodam milite perem-

peremptus est. Hujus victoriæ præmium *Rudolphus* tulit Austriam, quæ *Alberto* ejusdem *Rouulphi* Imperatoris filio concessa, Augustæ Austriacæ familiæ Imperatorum feracissimæ in posteris nomen & originem dedit. Alia insuper bella gessit cum Helvetiis & Burgundis, quæ ipsi feliciter cesserunt. Obiit *Rodolphus* Imperator anno Christi mcccxi. pridie Kalend. Octobris, anno ætatis suæ lxxiii. Imperii verò xviii. *Rodolphum* excepit *Adolphus* Nassaviæ Comes, qui avaritiâ, crudelitatem, & libidine infectus Imperium extenuavit, discordias & bella nutrit, populos tributis insolitis oppressit, odium procerum sibi conflavit, præsertim ex pactione, quam cum *Eduardo* Anglorum Rege fecit, ei videlicet suppetias ferendi contra *Philippum* Pulchrum Francorum Regem, prius ab eodem *Eduardo* acceptâ summâ triginta millium marcarum. Electoribus igitur eum indignum Imperio judicantibus, in ejus locum suffectus est *Albertus* Austriæ Dux, *Rodulphi* Imperatoris filius, contra quem *Adolphus* Imperio dejectus bellum movens, commissâ acerrimâ pugnâ per sex horas in campo dicto *Burgentrich* propè Wormatiam, victus est, & ab eodem *Alberto* vulneratus cecidit in prælio anno mcccxviii. Post *Adolphi* necem, *Albertus* electionem suâ à Septemviris ratam haberi curavit, eamque *Bonifacius VIII.* anno mcccii. approbavit, sicut Colmariense Chronicon testatur. Nonnulla bella in Germania gessit *Albertus* Imperator, nimirum contra Electores, Trevirenses, Moguntinum, Coloniensem, & *Rudolphum* Palatinum, qui fœdus contra ipsum inierant, eosdemque repressit. Pugnavit etiam contra *Ottomem* Bavarie Ducem, qui Salisburgensis Episcopi

arti-

artibus adjutus Hungariæ Regnum affectabat, tum-
 que *Alberto* Imperatori venenum ab Episcopo Sa-
 lisburgensi propinatum est, quod dum arte medicâ
 evomere conatur, oculum amisit, indeque *Monocu-*
lus cognominatus. Movit etiam *Albertus* in *Hen-*
ricum Carinthiæ Ducem, ut Bohemiæ regnum re-
 cuperaret, quod ille, Imperatore inscio, sibi usur-
 paverat; sed factâ suorum conspiratione, à Princi-
 pe *Joanne*, fratris sui filio, cui Sueviæ Ducatum,
 tanquam nimis prodigo, abstulerat, pugione ictus
 nefariè trucidatus est Kalendis Maji anni millesi-
 mi trecentesimali octavi, Imperii decimi. *Alberto*
 è vivis sublato, post varia Electorum dissidia, quo-
 rum suffragia distrahebantur à *Philippo Pulchro*
 Galliarum Rege, qui *Henrico Valesio* fratri suo Im-
 perium aucupabatur, tandem electus est anno
 mcccviii. Imperator *Henricus VII.* Comitis Lut-
 zemburgensis, & *Beatricis* Hannoniæ Comitissæ fi-
 lius, qui in Italiam anno mcccx. cum numeroso
 exercitu veniens, Mediolani coronâ ferreâ ab Ar-
 chiepiscopo redimitus est. Deindè, quasdam Ita-
 liæ civitates, quæ Imperii jugum excusserant, sube-
 git, alias in deditionem accepit, & Romam ingres-
 sus anno mcccxi. à Cardinalibus, quibus Summus
 Pontifex *Clemens V.* qui tunc temporis in Galliis,
 seu Avenione Sedem habebat, hanc provinciam,
 demandaverat, solempni ritu inauguratus est. Bel-
 lum gessit cum Florentinis, & cum *Roberto* Siciliæ
 & Apuliæ Rege, qui eis favebat; sed in medio re-
 rum cursu sublatus est apud Bonconventum, qui
 pagus est duodecim millibus Senis in Etruria di-
 stans, anno millesimo trecentesimo decimotertio,
 Imperii ab electione quinto, à Romana verò coro-

natione anno secundo per mensem unum & dies vigintiquatuor inchoato, sicut *Jordanus* coævus Scriptor testatur. Nonnulli Historici falso rumore decepti tradunt, *Henricum VII.* Imperatorem obiisse ex veneno ipsi porrecto in particula Sanctissimæ Eucharistiæ manu *Bernardi Politiani* Ordinis Prædicatorum, qui Imperatori erat à Confessionibus, & apud ipsum auctoritate, & gratiâ plurimum poterat. Sed hanc esse Sanctissimo Ordini & de Ecclesia benemerito afflictam calumniam multis momentis evinci potest. Primò, quia multi Scriptores, quos inter censetur *Albertinus Mussatus*, coævus Author, disertè asserit, *Henricum VII.* Imperatorem naturali morte occubuisse. Continuator etiam *Guillelmi Nangii*, qui tum vivebat, ad an. mcccxiii. scribit, *Henricum VII.* morbo & febre ex hac vita excessisse, veneni autem propinationem ad vagos & incertos rumores refert; idemque faciunt *Platina* in *Vitis Pontificum* in *Clemente V.* & *Joannes Nauclerus*, Præpositus *Tubingensis*, qui solum rumorem veneni *Henrico VII.* Imperatori propinati testem proferunt. Secundò, si *Henricus VII.* veneno periisset, omni proculdubio signa veneni in cadavere apparuissent, & tamen constat, Medicos post mortem Imperatoris accersitos, dissecto ipsius cadavere, viscera, cor, jecur, partesque singulas diligenter inspexisse, nec veneno, sed naturali morbo obiisse *Henricum VII.* Imperatorem testatos fuisse litteris & instrumentis publicis, quæ in *Chronicis Jacobi Susati* extant. Tertiò, si *Bernardus Politianus* tam nefandum scelus perpetrasset, debuisset post mortem *Henrici* Imperatoris, ut vitæ suæ consulere, ad *Florentinos*, aut ad *Robertum Siciliae Regem*

Hen-

Henrici Imperatoris hostes fugere, non fugit tamen, sed sibi benè conscius mansit apud *Henrici* Imperatoris amicos, calumniam à malevolis disseminatam intrepido excepit animo, certò certius habens, eam facile dissipatum iri, sicut reverà dissipata est, tum *Clementis V.* Pontificis Maximi sententiâ, tum iudicio ac testimonio Principum Imperii, & præsertim *Joannis* Bohemiæ Regis, ipsius *Henrici* Imperatoris filii Diplomate, quod, ex veteri membrana authentica in Conventu Virdunensi FF. Prædicatorum asservatâ, publicavit Vir doctissimus *Stephanus Baluzius* lib. 1. *Miscellaneorum* pagina 162. tum denique ex singulari illo affectu, quo *Carolus IV.* Imperator, *Joannis* Bohemiæ Regis filius, & *Henrici* Imperatoris nepos, Ordinem Fratrum Prædicatorum semper complexus est. Ille, quippè à Magistro Generali ejusdem Ordinis obtinuit, ut Pragæ, quæ Bohemiæ Metropolis est ac Regia Civitas, Comitia generalia celebrarentur. Die sancto Pentecostes Eucharistiam in solemnî Sacro de manu Magistri Generalis accepit cum Imperatrice; Diplomata aureis sigillis appensis munita, quibus Prædicatorum Ordinem magnis exornabat Privilegiis, concessit; omnes Patres Capitulares Imperiali convivio in Regia excepit, multisque affecit honoribus. Credibile autem non est *Joannem* Bohemiæ Regem, & *Henrici VII.* Imperatoris filium, speciale Diploma ad vindicandam Fratrum Prædicatorum innocentiam concedere, ejusque filium *Carolus IV.* Imperatorem, & *Henrici VII.* Imperatoris nepotem, tot beneficiis & privilegiis Ordinem Prædicatorum donare voluisse, si *Bernardus Politianus* ejusdem Ordinis *Henrico VII.* Imperato-

ri Hostiam veneno illitam porrexisset. Quartò, præter hæc antiqua & integerrimæ fidei monumenta, *Nicolaus Serarius* Societ. Jesu, vir doctissimus, libro 5. *Rerum Moguntinarum* duos laudat Aucthores *Trithemium*, & *Conradum Vecerium* Scriptorem Vitæ *Henrici VII.* qui hoc execrabile facinus à *Bernardo Politiano* Dominicano amoliuntur, & ad ejus tuendam innocentiam multa proferunt argumenta; quibus Scriptoribus duos magni nominis adjungam Auctores, videlicet *Henricum Spondanum* Appamiarum Episcopum, & *Odoricum Raynaldum* Congregationis Oratorii Presbyterum, quorum primus in Annalibus Ecclesiasticis ad an. mcccxiii. Num. vi. ab hac putida & immani calumnia Dominicanum Ordinem egregiè vindicat, & locupletissimis testimoniis probat, *Henricum VII.* Imperatorem morte naturali obiisse, ejusque infirmitatem cœpisse ab apostemate in coxa, & inde venisse in febrem, ex qua decesserit decima post die. Alter verò, seu *Odoricus Raynaldus* in Annalibus Ecclesiasticis ad annum mcccxiii. Num. xiv. ait, ejusmodi calumniam perperam Ordini Prædicatorum impatam, & à pietatis osoribus confictam, eadem facilitate refelli, quâ objicitur, cum levi recentiorum auctoritate nitatur, & veteres Historici morbo naturali *Henricum VII.* Imperatorem extinctum fuisse affirmant. Non me fugit, quosdam scripturuisse, ob sacrilegum & parricidiale *Bernardi Politiani* facinus Prædicatores omnes à Romano Pontifice hac pœna fuisse mulctatos, ut Sacrum facientes manu sinistrâ Corpus Christi sumant. Sed hoc purum, putumque commentum esse evincam in Colloquio sexto, ubi agendo de Monastica disciplina, quæ Sz-

culo Ecclesiæ decimoquarto vigit, ostendam, hunc ritum, quem etiamnum Dominicani Sacris operantes observant, ab ipso Ordinis exordio invaluisse.

D. Redeamus, quæso, ad seriem Imperatorum, qui sæculo decimoquarto post *Henricum VII.* summâ rerum in Imperio Occidentis potiti sunt.

M. Mortuo *Henrico VII.* Imperatore, die *S. Bartholomæo* Sacrâ anni mcccxiii. extitit Interregnum mensium quatuordecim, & divisis bifariam Principibus, alii *Ludovicum* Bavariz Ducem, alii *Fredericum Austriacum* Imperatorem designarunt. Potior fuit *Ludovici* Bavariz Ducis electio, ad quam Electores omninò quinque conspirarunt, *Petrus* Moguntinus, & *Baldwinus* Trevirensis, Archiepiscopi, *Joannes* Bohemiz & Poloniz Rex, *Waldemar* Marchio Brandeburgensis, & *Joannes* Dux Saxoniz. Electio verò *Frederici Austriaci* duobus dumtaxat Electoribus probata est, videlicet *Henrico* Archiepiscopo Colonienfi, & *Rudolpho* Comiti Palatino, qui ad Comitata vocati eis interesse noluerunt, & *Fredericum* extra locum & diem constitutam Imperatorem elegerunt. Ea dissensio Germaniam atroci bello ab anno mcccxiv. usque ad annum mcccxxii. distinxit, sed post multa prælia, *Fredericus*, commissâ in Bavaria cum *Ludovico* pugnâ, ab eo victus & captus est, atque triennio apud victorem stetit in vinculis, inde anno mcccxxv. dimissus est, eâ lege, ut Austriâ suâ penitus contentus, omni jure ad Imperium cederet, omni ambitui renunciaret, omnia instrumenta & literas, quibus sua fulciri poterat electio, in *Ludovici* manus deponeret, & quæcumque ipse, ejusque fratres de
Im-

Imperio tenebant, *Ludovico* restituerent. Litteras pacis ex Archivis Serenissimorum *Bavariæ Ducum* descripsit *Herwartus* tomo 1. pag. 328. Sic semoto & in ordinem redacto *Frederico*, Imperii æmulo, *Ludovicus* *Bavariæ Dux*, Imperium solus obtinuit, sed à *Joanne XXI.* quem alii appellant *XXII.* quique anno *MCCCXVI.* Summus Pontifex fuit electus, inaugurationem & coronationem impetrare haud potuit, immò, ipsum monuit Summus ille Pontifex, ut sub pœna excommunicationis ipso facto incurrendæ, intra trium mensium spatium ab omni Regni & Imperii administratione cessaret, nec eam amplius resumeret, nisi post approbationem ejus personæ à Sede Apostolica factam. Hujus Pontificii mandati gravitate exacerbat *Ludovicus*, cum in sua animi obfirmatione perseveraret, ab eodem Summo Pontifice quinto Idus Julii anni *MCCCXXIV.* declaratus est contumax, & omni jure Regni & Imperii, si quod sibi ex sua electione competere posset, privatus. Huic sententiæ, quam Avenione publicatam, alibi etiam per Germaniam, Italiam, aliaque Regna promulgandam Prælati direxit *Joannes XXI.* parère noluit *Ludovicus*, & excusâ eâ, quæ debetur Sedi Apostolicæ reverentiâ, ausus est Epistolam publicare virulento calamo exaratam, quâ *Joannem XXI.* uti injustum innocentium persecutorem, Clavium subversorem, Ecclesiæ legum temeratorem, denique incorrigibilem & hæreticum notorium impetiit, & universo Orbi declaravit. Posthæc, invitantibus Gibellinis, Italiam ingressus, habitis Tridenti Comitibus, iterum *Joannem XXI.* sexdecim contra ipsum oppositis articulis, hæreticum palàm denunciavit, eum non jam Pontificem,

sed *Presbyterum Joannem* irrisoriè appellans . Indè Mediolanum progressus , Coronâ ferreâ ab Episcopis duobus propter crimina exauctoratis redimittus est . Quæ omnia , ubi rescivit *Joannes XXI.* citavit *Ludovicum* , eumque non comparentem , sed contumacem , velut hæreticum damnavit , & bonis omnibus mobilibus , & immobilibus , ac juribus privatum edixit , Vassallosque ipsius , & quascunque personas ei obstrictas à juramento fidelitatis absolvit , prohibuitque Fidelibus universis ne illi obtemperarent , aut cum illo communicarent . Hanc Pontificis sententiam ex Codice Vaticano descriptam edidit *Odoricus Raynaldus* ad annum *MCCCXXVI.* Num. xx. & sequentibus . Eâ Pontificis sententiâ ferocior factus *Ludovicus Bavarus* , cum quatuor millibus Equitum Romam an. *MCCCXXVIII.* septimo Januarii die ingressus est , & in Basilica *S. Petri à Sciarra Columna* Imperator coronatus est , & à *Jacobo Alberto* Venetiarum Episcopo inunctus . Tunc longè majora moliens *Ludovicus Bavarus* , die *XII.* mensis Maji ejusdem an. *MCCCXXVIII.* quâ gloriosæ Christi in Cœlos Ascensionis celebrabatur solemnitatis , Schismaticis & Apostatis quibusdam Minoritis , cum Abbate Fuldensi , *Nicolao Fabrianensi* , aliisque ejusdem furfuris hominibus cum promiscua plebe congregatis , *Petrum Raynaldum de Corbaria* , Oppido Diœcesis Reatinæ , Ordinis Fratrum Minorum , qui Romæ in Conventu *S. Mariæ de Ara Celi* residebat , Antipapam constituit , ab eoque iterum coronatus est ; cum ipsi prius purpureum pileum imposuisset . Sed de hoc Pseudo-Pontifice dicto *Nicolao V.* plura dicemus in sequenti Colloquio . Post mortem *Joannis XXI.* coronatus

natus est *Benedictus XII.* contumaciam *Ludovici Bavarum*, literis ac Nunciis ad eum missis, frangere, de cujus reconciliatione semel iterumque actum, sub ipsius Pontificatu, confectum nihil. Denique, cum *Ludovicus Bavarum* se infestum semper & impium adversus Sedem Apostolicam exhiberet, omnibus concordie viis Sacerdotium inter & Imperium frustra tentatis, *Clemens VI.* qui *Benedicto XII.* successit, latam olim in *Ludovicum Bavarum* à *Joanne XXI.* sententiam renovavit, omnique jure ad Imperium, Ducatum & Palatinatum exuit, Principesque Electores convenire jussit, ut alium Germanie Regem crearent, quem Sedes Apostolica in Imperatorem promoveret, ut videre est apud *Odoricum Raynaldum* ad annum MCCCXLVI. num. III. & IX. ubi *Clementis VI.* eà de re Decretum, litterasque, ad Principes Electores directas refert. Mandato Pontificis morem gesserunt Principes Electores, qui in Comitibus habitis in Villa *Rhens* Diœcesis *Trevirensis*, quæ supra Confluentiam ad Rhenum sita est, *Carolus IV.* Regem Bohemie in Romanorum Regem elegerunt anno MCCCXLVI. Obiit verò *Ludovicus Bavarum* anno sequenti, seu MCCCXLVII. non sine suspitione veneni à *Joanna Austrie Ducissa* propinati, quod frustra cum vomere tentasset; sperans agitatione corporis illud dissolutum iri, venatum iit, ubi dum vehementius equitando aprum insequitur, subitâ apoplexiâ correptus, lapsu equi obtritus est. Eum Christianæ poenitentiae signa edidisse, *Cuspinianus*, *Paulus Langius*, aliique Authores ab *Herwarto* laudati asserunt, alii verò negant, ut videre est apud *Spondanum* ad annum MCCCXLVII. Illud omninò certum est, *Ludovicum Bavarum* nun-

quam à Summis Pontificibus absolutum fuisse ab excommunicatione , quâ repetitis frequentissimè dirissimis sententiis justè ligatus fuerat atque damnatus .

Mortuo *Ludovico Bavaro* anno *MCCCXLVII*. *Carolus IV.* filius *Johannis Bohemiarum* Regis , & nepos *Henrici VII.* Imperatoris , qui , ut mox diximus , à Principibus Electoribus anno *MCCCXLVI.* creatus fuerat Romanorum Rex , aliquos post obitum *Ludovici Bavari* expertus est Imperii æmulos . Bavari siquidem Principes , & hi , qui à partibus eorum stabant , Imperium *Eduardo* Regi Angliæ detulerunt , sed huic injustum ac plenum periculis honorem recusanti suffecerunt *Fredericum Thuringiæ Landgravium* , *Misniæque Marchionem* , qui oblatum sibi Imperium subire detrectavit . Tertio igitur loco substituerunt *Guntherum* , Comitem *Scurartzburgensem* , qui *Frankfurtum* veniens publicè acclamatus est Imperator , quam tamen dignitatem dumtaxat degustavit . *Carolus* quippè hujus nominis *IV.* Imperator , corrupto *Fridanko* , Comitis *Guntheri* Medico , operam dedit , ut venenum ipsi propinaretur . Quare intra sex menses *Guntherus* , qui ad electionem suam armis tutandam sese comparabat , sublatus est ; *Carolus* verò , incruentâ partâ victoriâ , solus Imperio liberè potitus est , ejusque inauguratione , quæ *Aquisgrani* anno *MCCCXLIX.* facta est , quievire penitus omnes in Germania excitatæ turbæ . In Italiam venit *Carolus IV.* anno *MCCCLV.* ac Romæ die Paschatis coronam Imperii accepit ab *Ægidio* Cardinali Pœnitentiario *Innocentii VI.* Pontificis Maximi , statimque , juxta pacta conventa cum eodem Romano Pontifice , urbe excessit , ac

totâ ditione Pontificiâ. Haud malè Imperium rexit *Carolus IV.* fuitque Princeps æquissimus, in utilitates Ecclesiæ propensissimus, erga sacras reliquias, præsertim Crucem, Lanceam & Clavos, quibus confixus est Christus Dominus, singulari pietate affectus. Ad promovenda litterarum & linguarum studia, quibus erat impensè addictus, Præ Academiâ instituit. Legem dictam *Carolinam*, seu *Bullam auream*, in Comitibus Nurembergæ anno MCCCLVI. habitis promulgavit, quæ continet triginta Capita, in quibus præscribitur forma, seu modus aut ritus procedendi in celebranda sive Romanorum Regis, sive Imperatoris electione, & determinantur singulorum Electorum numerus, officia, locus, comitatus, jura, aliaque plura in ea statuuntur ad generale Imperii regimen attinentia. *Wenceslaum* filium suum quindecim annorum adolescentem, redemptis magnâ pecuniæ vi septem Principum Electorum suffragiis, Romanorum Regem creavit anno MCCCLXXVII. Quo factò haud parvâ nomini suo inussit maculam, proditâ propter nimium privatæ suæ familiæ studium Imperii majestate, sicut refert *Aeneas Sylvius*, qui postea Summus Pontifex fuit, dictus *Pius II.* Cap. xxxiiii. *Historiæ Bohemicæ*. Vitâ functus est *Carolus IV.* anno MCCCLXXVII. in Vigilia S. Andree, ut *Albertus Argentinensis*, & *Trithemius* testantur. *Wenceslaum*, filium natu majorem, Bohemici Regni, Imperiique successorem reliquit. Hic, ut jam diximus, Patris sui *Caroli IV.* artibus ac pecuniâ in Romanorum Regem anno MCCCLXXVII. electus, successit eidem in Imperio anno MCCCLXXVIII. Princeps corpore, animoque deformis, libidini, crapulæque, iacanta-

tionibus, ac sævitæ, instar *Neronis*, deditissimus nihil gessit memoriâ dignum. Lustralem aquam, dum baptizaretur, lotio resperfit, sicut unus è Græcis Imperatoribus *Constantinus Copronymus*, uti refert *Dubravius*. Imperium pessimè administravit usque ad annum millesimum quadringentesimum. Nam præter mox memorata illa vitia, quibus, instar suis in volutabro, sese fœdavit, Imperii jura dissipavit, Urbem, Ditionemque Mediolanensem, *Joanni Galeatio* Virtutum Comiti vendidit, ipsumque primi Mediolanensium Ducis titulo insignivit, acceptis ab eodem centum & quinquaginta millibus Florenorum; latrocinia permisit, in Sacerdotes, aliosque viros honestos crudeliter sæviit, quorum plures in flumen præcipites egit, igne damnavit, aliisve suppliciis vexavit & peremit. His turpissimis moribus infectus *Wenceslaus* Imperator, in tantum suorum odium & contemptum venit, ut anno millesimo quadringentesimo ab Electoribus fuerit Imperio privatus. Hanc exauctorationis in *Wenceslaum* sententiam à *Joanne* Archiepiscopo Moguntino cæterorum Electorum nomine latam, refert *Odoricus Raynaldus* ad ann. mcccc.num.xiii. Habes nunc seriem Imperatorum, qui Sæculis XIII. & XIV. Occidentis Imperium gubernarunt, compendiosè quidem, sed accuratè, quantum fieri potuit, descriptam.

D. Tot varios & infaustos rerum eventus, quibus Sæculis XIII. & XIV. Imperium tam Orientis, quàm Occidentis jactatum est, & Ecclesiæ perturbata tranquillitas, dum tacitus mecum perpendo, non possum, ut candidè fatear, quin vehementer indoleam, hisque succenseam Principibus Christianis-

stianis, qui æstu ambitionis abrepti turbas excitarunt, & omnia in Ecclesia suis deque miscuerunt. At expectatio rerum bonarum, quas alii Orbis Christiani Principes iisdem Sæculis pro utilitate & defensione Ecclesiæ gesserunt, jacentem animum erigit, & inducit in spem, melioremque cogitationem. Ostende igitur, obsecro te, quo loco essent res Ecclesiæ Sæculis XIII. & XIV. sub Christianissimis Galliarum Regibus.

M. Ineunte Sæculo XIII. *Philippus II.* cognomento *Augustus* Galliarum Rex, de quo haud pauca in Colloquio primo in Historiam XII. Ecclesiæ Sæculi diximus, annum Regni sui agebat vigesimum, pace initâ ipsum inter & *Joannem*, dictum, *Sine terra* Anglorum Regem, latissimum. Sed breve fuit populorum de pace gaudium. Rex quippe *Joannes* Parisios à *Philippo Augusto* vocatus, ut tanquàm Regis Francorum Beneficiarius pro Comitatu Pictaviensi, & Andegavensi, & Aquitaniz Ducatu statâ die coram illo se sisteret, responsurus ad ea, quæ ei objicere debebat, nec per se, nec per Oratorem comparuit. Quocircâ Rex *Philippus Augustus* bellum redintegravit, & *Joannem* Anglorum Regem inobedientem in ordinem redegit. *Joannes de Sancto Victore* ad annum MCCXXIII. de *Philippo Augusto* non minus de Ecclesia, quàm de Regno Galliarum benè merito hæc scribit, quæ illum plurimùm commendant: Hoc anno, inquit, obiit *Philippus Rex Francorum* ab aliquibus *Augustus* cognominatus hujus nominis II. fortunatissimus, qui Regnum Francorum ferè duplo ampliavit. Hic in omnibus Artibus felix, Ecclesiarum & Personarum religionum amator & fautor, & specialiter Ecclesiarum.

S. Dio-

S. Dionysii & Victoris Parisius . De ipso referebat B. Ludovicus ejus ex filio nepos , quòd cùm dictus Philippus Rex reprehenderetur à quodam milite suo Consiliario , quia tot dabat Ecclesiis , & quòd personæ Ecclesiasticæ multa damna ei inferebant , jura videlicet ipsius usurpando , multique mirabantur , quomodo hæc ita pacificè sustinebat , & sub silentio præteribat , respondit: Benè credo id quod dicitis , sed quando cogito Beneficia , quæ Deus mihi contulit , cui ipsi deserviunt , & ad quem pro me preces & pro Regno fundunt , malè hoc pati pro Deo , quàm inter me & Ecclesiam scandalum generare , vel suscitare , & eos , quorum orationes scio mihi profuisse , contra me provocare . In favorem etiam Ecclesiæ constituit , ne Judæi apud se quocumque modo vestimenta Ecclesiastica , vel ornamenta Altaris , vel Cruces , aut libros , ut Missalia & Textus retinerent , & retenta redderentur absque pecunia , & quod dicti Judæi nulli religioso mutuarent pecuniam sine licentia Abbatis sui . In Ecclesia Beata Mariæ Parisiensis quatuor Capellanas constituit pro anima Gaufridi Comitis Britannia , & etiam pro anima Isabellis Regina , & multa alia bona , propter quæ Deus contra omnes inimicos suos victorem semper fecit . Nam Normanniam , Pictaviam , Andegaviam , Cenomaniam , Aquitania magnam partem contra Regem Anglorum (Joannem scilicet dictum Sine terra) acquisivit . Flandriam , Hannoniam , Boloniæ Comitatum . Sed etiam tantæ benignitatis & liberalitatis fuit , quòd Comitatum Flandriæ , quem Ferrandus justè amiserat , reddidit Margareta satis juveni , & ejus sorori Joannæ uxori Ferrandi . De laude igitur Philippi Regis dicere possumus , quòd à tempore Caroli Magni non fuit Rex in Francia , qui tot agones habuit pro

Re-

Regno suo gubernando, nec aliquis tot victorias. Fortunatus enim in omnibus fuit, & multas bonas Constitutiones in Regno fecit. Bellum Belgicum omni ex parte secundo Marte confecit Philippus Augustus, Imperatore Ottone, necnon Ferrando Flandriæ, & Reginaldo Morinorum Comitibus, numeroſo cum exercitu, ad Bovinas, Tornacum inter & Insulam, juſto prælio proſtigatis anno MCCXIV. In cujus victoriæ celeberrimæ accepti beneficii monumentum, Abbatiam propè Silvaneſtum erigere decrevit Rex Chriſtianiſſimus, ejuſque votum Ludovicus VIII. ejus filius exoluit, & Victoriæ nomen Abbatix indidit. Omnium Literatorum amantiſſimum fuiſſe, Philippum Auguſtum, coque regnante, Academiam Pariſienſem multùm floruiſſe oſtendit Egaffius Bulaus tomo 3. Hiſtoriæ Univerſitatis Pariſienſis pagina 109. Poſtremò, Rigordus, qui Philippi Auguſti geſta litteris commendavit, hoc unum in tanto Rege reprehenſione dignum fuiſſe teſtatur, quod Iſemburgim Reginam uxorem ſuam duriùs habuerit, & ab ea ſexdecim annos & ampliùs diſſenſerit; quam tamen in gratiam recepit anno MCCXXIII. Mortuo Philippo Auguſto Galliarum Regi ſucceſſit Ludovicus VIII. ejus filius cognomento Leo, annum agens ætatis ſuæ trigeliſimum circiter ſeptimum, qui, vivente adhuc patre ſuo Philippo Auguſto, Expeditionem Anglicanam eâ occaſione ſuſcepit. Anno MCCXVI. Innocentius III. Pontifex Maximus à Joanne dicto Sine terra Anglorum Rege enixiſſimè rogatus, Barones Angliæ, quòd Joannem è Regno Angliæ expellere molirentur, nominatim excommunicavit. Eo Summi Pontificis patrociniò adjutus Joannes Anglorum Rex, impunè omnia vaſtare, diripe-

ripere, ferro, flammisque mandare cœpit, adeò ut nunquam tam luctuosa, lugubrisque visa fuerit ulli rerum facies, quàm in Anglia, cujus miserrimæ cladis hypotiposum exhibet *Matthæus Parisius* ad hunc annum. Rebus in eo positis, Barones Regni Angliæ omnium rerum inopes, nescii quò, aut ad quem confugerent, demùm, missis Legatis, *Ludovicum* filium *Philippi Augusti* Galliarum Regis sibi poposcerunt in Regem, quorum precibus acquiescens *Ludovicus* rescripsit, se quamprimùm auxilio affuturum. Id ubi rescivit Pontifex *Innocentius III.* Legatum misit in Gallias *Wallonem*, seu *Gualonem* S. Martini Presbyterum Cardinalem ad *Philippum*, & *Ludovicum* cum litteris deprecatoriis, ne *Joannem* Anglorum Regem jam aliundè satis afflictum magis affligerent. At frustrà minis prohibente, Legato, *Ludovicus* propositi tenax exercitum deportavit in Angliam, urbes adventu suo consternatas, aut expugnatas in deditionem accepit, agros depopulatus est, fautoresque *Joannis* Anglorum Regis ubique passim oppressit. Hinc à *Gualone* Summi Pontificis Legato sententiâ excommunicationis percussus est *Ludovicus*, qui ideò Romam, Legatos misit, ut eum apud *Innocentium III.* Pontificem Maximum excusarent; & *Joannem* Angliæ Regem multorum criminum insimularent, præsertim verò, quòd *Arturum* nepotem suum Regni legitimum hæredem jugulasset; sed parùm illi Legati profecerunt. Interim *Ludovicus* longè latèque in Anglia dominabatur, dumque acerrimo animorum æstu utrinque decertaretur, contigit & *Joannem* Anglorum Regem, & *Innocentium III.* Papam mori. *Joannes* Angliæ Regni hæredem reliquit *Henricum* Pri-

Primogenitum suum, qui tantum decennis erat, Custodemque, seu Tutorem habuit *Willelmum de Penbroc* Angliæ Marescallum, qui sapientibus consiliis suis Anglorum animos ad obsequium novo Regi præstandum, & Gallos ex Anglia expellendos convertit. Quò factum est, ut *Ludovicus*, concessio Angliæ Regno *Henrico* hujus nominis III. filio *Joannis*, in Galliam regressus sit, gloriam ex animi moderatione non minorem, quam antehac ex bellica fortitudine sibi pepererat. In Gallias reversus *Ludovicus* duas Expeditiones suscepit, unam adversus Anglos in Aquitaniam, ubi *Savaricum Malleonensem* huic Provinciæ Præfectum, & magni in Anglica Aula nominis virum, prælio vicit, & Rupellam, quò Angli appellere solebant, in suam potestatem redegit anno MCCXXIV. Alteram Expeditionem anno MCCXXVI. in Albigenes aggressus est, quorum omnia penè Oppida, præter *Iolosam*, quam pestilentie metu obsidere noluit, ad deditionem compulit. Sed in citeriorem Galliam ab hac Expeditione rediens dysenteriae morbo correptus, ad *Montempensium* in Arvernia è vita migravit eodem anno MCCXXVI. Princeps fuit castissimus, qui, teste ejus Gestorum Scriptore apud *Duchesium* tom. 5. nullam, præter uxorem suam, foeminam cognovit unquam, oblatamque sibi virginem eleganti formâ præditam, dum ægrotaret, quâ morbum ex Medicorum consilio depellere posset, constanter recusavit his verbis: *Non ita erit, non enim peccarem mortaliter ullo modo, maluitque mori, quam fœdari, sicut refert Guillelmus de Podio Laurentii cap. 25. Historia Albigensum.*

Defuncto *Ludovico VIII.* Galliarum Rege, *Solium*

lium Regale conscendit *Ludovicus IX.* ejus filius annum agens ætatis duodecimum, qui statim Remis inauguratus est. Exordio Principatus sui *Ludovicus IX.* sub tutela matris suæ *Blanchæ* heroici animi & pietatis eximie fæminæ, *Philippum* Bologniæ Comitem, *Theobaldum* Campaniæ, aliosque Princeps, qui ægrè ferebant, quòd *Blancha*, genere extera, rerum summâ in Regno potiretur, armis ad obsequium compulit. Dein, sacrum bellum jam à patre suo susceptum contra Albigenes, qui in Ministros, & Ecclesias immaniter grassabantur, instauravit, illudque feliciter confecit an. MCCXXVIII. quo *Raymundus*, filius *Raymundi* senioris Comitis Tolosani, cujus præsidio fulta Albigenium hæresis totam regionem infecerat, ejuratâ Lutetiæ Parisiorum hæresi, filiam suam *Alphonso*, fratri *Ludovici IX.* Galliarum Regis, cum Tolosani Comitatus dote, collocavit. Finitâ contra Albigenes sacrâ militiâ, de qua in Colloquio tertio iterum redibit sermo, conditisque sanctissimis legibus ad Hæreseos extirpationem, & ad Ecclesiasticæ restorationem libertatis in Narbonensi, & Arelatensi Provincia, gravi, ac periculoso ex morbo recreatus *Ludovicus IX.* Crucis Insigne anno millesimo ducentesimo quadregesimo quarto ab Episcopo Parisiensi accepit, & sacrum bellum in Ægyptum invexit, cujus tota moles in *Damiatam* urbem Ægypti incubuit, quam Saraceni à Francis magna clade affecti ac in fugam compulsi, injecto igne, deseruerunt, eamque, postquam extinctus fuisset ignis, piissimus Rex, nudis pedibus & capite, ingressus est, ejusque Templum à Mahometanæ superstitionis sordibus omnino repurgavit anno MCCXLIX. At, prohi dolor!

anno

anno sequenti post atrocissimum prælium Rex *Ludovicus IX.* captus est à Saracenis cum fratribus suis *Alphonso* Piæaviensi, & *Carolo* Andegavensi, nihil tamen clade suâ dejectus, tam fortêm ac magnanimum in sua captivitate exhibuit animum, ut, *Babyloniz* Sultano à suis occiso, *Mammalucchi* de eo in Regem eligendo deliberarint, idque reapse præstitissent, nisi Religionis dissimilitudo obstitisset, ut *Joinvillæus* testatur. Redditâ Saracenis *Damietta*, Rex in libertatem assertus annos quinque in *Syria* commoratus est, ubi omnes Regiæ, paritèr & Christianæ virtutis numeros implevit, captivos redemit innumeros, & cōplures Saracenos ad fidem Christianam convertit. Accepto tandem nuncio de morte Reginæ Matris, cui Regni procurationem demandaverat, in Gallias rediit anno *MCCLIV.* *Lutetiam* reversus *Ludovicus IX.* promovendæ publicæ utilitati, atque amplificandæ Religioni totum se dedit. Justitiam castè administrari, sanctissimis conditis legibus, iudicibusque integerrimis constitutis, non solum curavit Rex optimus, sed etiam subditis suis, maximè pauperibus, jus ipse dicere solitus erat ad *Nemus vincennarum* sub patulæ quercus umbra causas ipsorum audiens. Meminerat quippè, se à Deo Regnum accepisse, non ut sibi, sed Religionis, ac Subditorum tranquillitati consulere. Hinc ille amplificandæ fidei nunquam intermissus ardor, plena animi pietas, plena dignitatis & modestiæ ad pervidenda, quæ Reipublicæ Christianæ rationibus conducebant, prudens sagacitas ad conficienda quæ perviderat, constantia singularis, mens recta, ut nihil vellet aliud, nisi quod esset optimum; summa auctoritas, ut quod

quod optimum esse intelligebat, ad optatum exitum id certè perduceret. Hinc summa illa charitas, quâ Ordines Fratrum Prædicatorum, & Minorum complectebatur, quorum Cænobia Parisiis, & in aliis Galliarum Regni civitatibus plurima ejus sumptibus erecta sunt; invictum illud animi robur, quo, pro tuenda gloria Dei, Edicto sanxit, ut blasphemiarum, pœnâ ferri candentis in blasphemantes decretâ, punirentur, luxus in vestibus, conviviisque reprimeretur, publicæ Meretrices ex urbibus & pagis expellerentur, & ludi aleatorii prohiberentur. Sed angustior erat Europa, quàm ut tantam Regis pietatem in se contineret. Iterum in Africam anno mclxix. transmisit S. *Ludovicus* Tunicium expugnaturus, ut inde in Terram Sanctam, sive in Ægyptum transiret; utrobique Christianos à Saracenorum tyrannide vindicaturus. Votis tamen non respondit exitus ille, cujus explorata spes injecta fuerat. Castra siquidem Christianorum lues invasit, quæ juncta dysenteriarum Sanctum Regem afflavit. Quarè, cum præclara *Philippo* primogenito suo tradidisset documenta, quæ Gallicè *Joinvilleus* historiæ suæ inseruit, Latine verò verterunt *Gaufridus de Bello loco*, & *Guilhelmus Nangius*, migravit ad Dominum an. mclxx. inter Sâctos post mortem à *Bonifacio VIII.* Pontifice Maximo solemni canonizationis ritu adscriptus. Extant adhuc Parisiis, inter cætera alia piæ liberalitatis *Sancti Ludovici* Galliarum Regis perpetua monumenta, Sacrum Sacellum ab ipso fundatum, in quo spinea Corona Salvatoris, pars vivificæ Crucis, aliæque æniquæ summa cum veneratione asservantur, & Domus Hospitalis vulgò dicta

Quin-

Quindecim viginti, seu trecentorum cæcorum, quam *Sanctus Ludovicus* confestim post suum ex Syria reditum ad recipiendos & alendos trecentos cæcos excitavit, dotavitque in memoriam trecentorum militum suorum, qui ab Infidelibus crudeliter excæcati fuerunt, dum ipse Terram Sanctam ab eorum manibus eripere conaretur. *S. Ludovico* Galliarum Regi ab hac mortali vita ad Cœlestem, translato successit ejus filius *Philippus III.* dictus *Audax*, qui, pace cum Tunicii Rege certis quibusdam legibus confectâ, in Gallias ex Africa rediit, & Sacra parentis sui *Sancti Ludovici* ossa Parisios ad Sandionysianas Ædes augustissimâ pompâ funebri deferri curavit, eoque pietatis officio perfunctus, Remis ipso die Assumptioni Virginis sacro fuit ab Episcopo Sveshionensi anno MCLXXI. de more coronatus. Comitatus Tolosani, qui ejus patruî *Alphonfi*, Pictavorum ac Tolosatium Comitatis, ex Africa redeuntis morte vacabat, possessionem adiit. Cum *Petro Aragoniæ* Rege acre ac diuturnum bellum gessit *Philippus Audax* Galliarum Rex, cujus originem & causam paucis aperire non abs re erit. *Urbanus IV.* Pontifex Maximus, utriusque Siciliæ Regnum in *Carolus Andegavorum* Comitem, *Sancti Ludovici* fratrem, transtulerat anno MCLXIII. quod idem jus *Clemens IV.* qui *Urba-*
no IV. successit, novo Decreto firmavit. *Carolus* itaque Romæ unâ cum conjugè Rex Siciliæ coronatus *Manfredum* Siciliæ tyrannum, & filium spurium impij *Friderici II.* Imperatoris, sibi cum valido exercitu occurrentem anno MCLXVI. acie vicit, & occidit, atque biennio post *Conradinum*, ejusdem *Friderici II.* quondam Imperatoris nepotem, Siciliæ

Regnum affectantem ad Fucinum lacum prælio superavit, & in suam potestatem redactum capitis sententiâ damnavit anno MCCLXVIII. Hunc finem habuit maledicta, ac Sedi Apostolicæ jure merito exosa stirps *Friderici II.* Imperatoris. Adversus *Carolus*, utriusque Siciliæ Regnum legitimè ac pacificè possidentem, *Michaël Palæologus* Græcorum Imperator novo & arcano artificio machinatus est conjurationem. *Petrus* enim Aragonum Regem extimulavit ad Siciliam invadendam, quasi sibi debitam jure uxoris suæ *Constantiæ*, filiæ *Mandredi* Siciliæ olim invasoris. Hæc horrenda conspiratio, quæ ob malas & occultas artes, quibus incepta ac finita est, verè appellari potest *Negotium perambulans in tenebris*, crudelissimum post hominum memoriam habuit exitum. Anno siquidem MCCLXXXII. die xxx. Martii sub campanæ signum, ad Vespertinum Officium convocantis (undè *Sicularum Vesperarum* nomen) per singula insulæ oppida omnes ad unum Galli cujuslibet sexus, ætatis, conditionis, & ordinis ex condicito à Siculis trucidati sunt, *Petro* Aragoniæ Rege cum sua classe in Anchoris rei exitum haud valde procùl expectante. His infauſtis auspiciis *Petrus* Aragonum Rex Siciliæ Regnum invasit, quem *Martinus IV.* Pontifex Maximus confestim diris devovit, exauctoravit, ejusque Aragoniæ Regnum *Carolo*, filio *Philippi Audacis* Galliarum Regis, detulit. Hanc Pontificiam Regni Aragonii donationem acceptavit *Philippus Audax*, justumque bellum *Petro* Aragoniæ Regi intulit ob videlicet Gallorum stragem, ejus, ut credebatur, nutu in Siculis Vesperis editam, ob usurpatum Siciliæ Regnum, injuriamque illatam &

& Romanæ Ecclesiæ & *Carolo* Regi Siciliæ patruo suo. Cum valido itaque exercitu, tot atroces injurias ulturus, in Aragoniam venit *Philippus Audax*, complures urbes expugnavit, &, commissio prælio, Aragonii fugere compulsi sunt, *Petrus* verò eorum Rex accepto vulnere paulò post obiit. Ex hac bellica expeditione in Gallias rediens *Philippus Audax*, contracto ex aëris intemperie, & itineris difficultate morbo, Ecclesiæ Sacramentis piè susceptis, conditoque Testamento, quod *Lucas Dacherius* tomo ix. *Spicilegii* pag. 268. refert, supremum diem obiit Perpiniani die vi. Octobris anni mclxxxv. Eum jejuniis, & mirabili ciborum abstinentiâ corpus suum macerasse, cilicio lorica desuper indutum uti solitum fuisse, aliisque Christianis præfulsisse virtutibus asserit *Guillelmus Nangius* Monachus San-dionysianus Ordinis Benedictini. *Philippo Audaci* successit ejus filius *Philippus IV.* qui ob formæ præstantiam, & decentissimam totius corporis speciem dictus est *Pulcher*. Hic Remis VIII. Idus Januarii anni mclxxxvi. inauguratus, assidua ferè cum Anglis eorumque, fœderatis Belgis bella suscepit. *Eduardum V.* Angliæ Regem, qui Normaniam & Aquitaniam invaserat, magnâ clade repressit duce *Carolo Valesio* anno mcccxi. & per eum Aquitaniam recepit. *Guidonem* Flandriæ Comitem vicit ad Furnas anno mcccxi. & non multò post per *Carolus Valesium*, Belgas anno mcccxi. rursus perdomuit. At triennio necdùm elapso, cùm *Jacobus Castilioneus*, Belgii regio nomine præfectus, tributorum gravitate plebem nimium vexaret, Belgæ tam duri jugi ferendi impatientes, à *Philippo Pulchro* defece-

runt , quos ipse ut in ordinem redigeret, validum contraxit exercitum , qui ad Curtracum cum seditiosis infelicitèr pugnavit anno mcccii. Cæsa quippè Gallorum viginti millia . Insula , Gandavum , Duacum, Castellum , cæteraque oppida *Guidoni* triumphanti fasces submiserunt , ac portas aperuerunt . Hujus cladis acceptæ ignominiam biennio post delevit *Philippus Pulcher* , ac pristinum belli decus reparavit . Commissio siquidem ad Audomaropolim prælio anno mccciv. quindecim Belgarum millia profligavit , eosque compulit ut pacem cum illo inirent , eâ tamen lege ut suis moribus ac institutis viverent, veterique immunitate fruerentur . Hic fuit belli Flandrici exitus , de quo plura scribunt *Joannes Villanius* , qui tum in Belgio versabatur, continuator *Guillelmi Nangii*, *Paulus Æmilius* , *Nicolaus Gilius*, & *Papirius Massonus*, alique Francorum Historici . Cum *Bonifacio VIII.* Pontifice Maximo, *Philippo Pulchro* Galliarum Regi negotium fuit ac dissidium acerrimum , cujus originem & causam in sequenti Colloquio , texendo seriem Romanorum Pontificum , commodius referemus . Ordinis Templariorum extinctionem promovisse *Philippum Pulchrum* , eamque à *Clemente V.* Romano Pontifice in Concilio Viennensi obtinuisse , suo loco itidè m ostendemus , seu in Colloquio quarto , ubi de Conciliis , quæ sæculis xiii. & xiv. fuerunt celebrata , deditâ operâ agemus . Excessit è vita *Philippus Pulcher* apud Fontemblauidi, ubi natus erat, sacramentis Ecclesiæ piè susceptis die xxx. mensis Novemb. ann. mcccxiv. Ejus coniugis *Joannæ* plurimùm commendatur liberalitas , quippequæ Parisiis celeberrimum Na-

varræ fundavit Collegium, cujus Foundationis litteræ, aliaque ad eam spectantia leguntur in historia ejusdem Collegii Navarræ, quam edidit *Joannes Launojus* Sac. Fac. Parisiensis Doctor. Mortuo *Philippo Pulchro* Galliarum Regi successit ejus filius *Ludovicus X.* cognominatus *Hutinus*, idest, rixosus & perversus, annos viginti sex natus. Remis inauguratus bellum suscepit Belgicum, & Curtracum obsidione cinxit, quam tamen brevi solvere coactus, rediit inglorius. Supremum Senatum Lutetiæ in Palatio Regio collocavit, & Ordinarium instituit. Veneno sublatus est *Ludovicus X.* die quintâ Junii anni mcccxvi. Regni undevigesimo mense, Reliquit filiam *Joannam* ex priori uxore, & *Clementiam* alteram uxorem suam gravidam. Quare *Philippus* ejus frater, qui ob staturæ proceritatem fuit *Longus* appellatus, Parisios veniens Regni administrationem suscepit, dum *Clementia*, uxor *Ludovici X.* ejus fratris, peperisset, & si masculum pareret, donec adolevisset. Peperit *Clementia* filium *Joannem I.* dictum, qui paucos post dies mortuus est. Tum *Philippus* hujus nominis V. frater *Ludovici X.* ab omnibus Rex agnitus est, & Remis die Epiphaniæ inunctus, rejectâ *Joanna*, *Ludovici X.* filiâ, propter legem Salicam, quæ foeminas in Galliis à Corona Regia arcet, eamque solis masculis adjudicat. Nihil præclarum gessit *Philippus* hujus nominis V. Galliarum Rex, & ineunte anno sexto Regni sui obiit, nulla ex se virili prole relicta, die III. Januarii anni mcccxxi. Post *Philippum Longum* regnavit in Galliis ejus frater *Carolus IV.* ob egregiam formam *Pulcher* nuncupatus, de quo, præter bellum Aquitanicum, quod ducit

Carolo Valesio feliciter gessit, nihil laude ac memoriâ dignum dicendum occurrit. Vitâ functus est *Carolus Pulcher* die 1. Februarii anni MCCCXXVIII. Regni sui incunte anno septimo. Uxorem *Joannam* gravidam reliquit, quæ mox filiam enixa est, sicque per legem Salicam omninò defecit, ac jure Regni excidit familia *Philippi IV.* dicti *Pulchri* Galliarum Regis, cujus tres filii, qui post ipsum successivè regnarunt, sine prole mascula continenter mortui sunt.

D. Deficiente familiâ *Philippi IV. Pulchri* cognomine donati, cuinam delata fuit Galliarum Regni corona?

M. Mortuo *Carolo IV.* qui ultimus fuit ex stirpe *Philippi Pulchri* oriundus, de Jure ad Galliarum Regnum disceptare *Eduardus VI.* Anglorum Rex, *Elizabethæ* sororis *Caroli IV.* filius, ac subindè ejusdem *Caroli* nepos, & *Philippus Valesius*, qui defuncti *Caroli IV.* patruelis erat. Hæc lis inter utrumque Principem de Jure ad Galliarum Regnum suborta, diu agitata est, ac tandem *Philippo Valesio* omnium Regni Parium consensu adjudicata. Hic, licèt *Bene Fortunatus* Rex fuerit appellatus, Galliarum tamen Regnum malè fortunatum fecit, Bello cum *Eduardo VI.* Anglorum Rege infelicitè gesto. Eo siquidem bello sæpiùs Galli fuerè victi, primùm ad *Clusas* in Flandria navali certamine die XXIII. Junii anni MCCCXL. Deindè, terrestri ad *Croffiacum* die XXVI. Augusti an. MCCCXLVI. in quo prælio Principes undecim, Equites milles ducenti, peditum triginta millia in Francorum exercitu cecidèrè, & ex eo Caletum oppidum in potestatem venit Anglorum. Felicior fuit *Philippus*

pus Valesius Rex in bello Belgico, quod statim post adeptum Galliarum Regnum suscepit. Nam commissâ ad Castellum pugnâ, Belgarum amplius duodecim millia internecione delevit, *Cassellum*, *Poperinga*, *Ipra*, *Brugæ* Urbes munitissimæ deditio- nem fecerunt. Obiit *Philippus Valesius* hujus nominis VI. die xxii. mensis Augusti anni mccccl. & in ejus familia, *Valesiana* scilicet, Galliarum Regnum ducentis annis, hoc est usque ad obitum *Henrici III.* constitit. Hic autem duas res memorabiles, quæ, regnante in Galliis *Philippo Valesio* contigerunt, silentio prætermittere haud possum.

In primis, regnante *Philippo Valesio*, acta est anno mcccxxix. celebris illa causa Episcoporum, & Prætorum Regionum, seu Ecclesiasticorum & Sæcularium Judicium. Prætores Regii, teste *Papirio Massonio*, omnem jurisdictionem ad Episcopos transire conquerebantur; Episcopi verò à Prætoribus Regiis injuriam sibi fieri asseriebant, quòd Ecclesiasticam libertatem infringere, quantum in se erat, non dubitarent. *Philippus Valesius* Rex de hacce controversia cogniturus, Lutetiam eos convocavit. Tùm *Petrus Cunerius*, seu de *Cuneriis*, vulgò gallicè, sed corruptè, *Maitre Pierre du Coignet*, ex ordine Equestri Consiliarius, & Advocatus in Senatu Parisiensi, causam Prætorum, seu Sæcularium Judicium, egit acerrimè, adversus quem pro jurisdictione Ecclesiastica disputarunt *Petrus Rogerii* (qui deindè ad Pontificatum Maximum, evectus est, & vocatus *Clemens VI.*) *Petrus Bertrandus* Aduensis Episcopus, postea S.R.E. Cardinalis. Primas responsiones ad Objecta *Petri Cunerii* fecit *Petrus Rogerius*, cæteras *Bertrandus* Episcopus

Æduensis. Exitus iudicii hic fuit. Rex, ne posteris exemplum daret de Sacerdotum privilegiis aliquid detrahendi, nihil immutandum pronuntiavit, *Seque jura Ecclesiarum aucta, quàm imminuta esse velle*; monuit attamen Antistites ut Ecclesiæ abusus & excessus corrigerent, & sic tollerentur deinceps omnes querelarum occasiones, ut videre est apud *Spondanum* ad annum mcccxxix. Hac periculosâ lite disceptatâ, tantam sibi invidiam conflavit, odiumque in se concitavit *Petrus Cunerius*, ut omnium sibilis exploderetur, atque ad majorem ei inurendam infamiæ notam, quia Ecclesiam infra jurisdictionem Regiam deprimere contendebat, factum est ipsius simulacrum simum ac deforme, inque Chori Cathedralis Ecclesiæ Parisiensis parietem obscuro in angulo infixum sub repræsentatione orci sive Inferorum, quod scholastici prætereuntes suis stylis scriptoriis, pugnisque confodere atque contundere solebant. Quâ de re plura legelis apud jam citatum *Spondanum*, & apud *Egassium Bulaum* tom. 3. *Historiæ Universitatis Parisiensis* pag. 222.

Altera res memorabilis, quæ ad tempora *Philippi Valesii* Galliarû Regis referri debet, est Provinciæ seu Principatus Delphinatus ad Regias ditiones accessio, donatione *Humberti* Delphinatum Principis, qui rerum sæcularium pertæsus, ac filiis orbat, mundo nuncium remisit, & Ordinem Fratrum Prædicatorum professus est, relicto sui Principatus, sive Delphinatus hærede Primogenito Regis Galliæ, eâ lege, ut, superstitie parente, ante aditum Regnum, *Delphini* nomen & Insignia ferret. Quam donationem laudavit, approbavitque *Clemens*

mens VI. Pontifex Maximus litteris Apostolicis , quarū meminit *Odoricus Raynaldus* ad an. *MCCCXLIV.* num. *LXII.* , & ad annum *MCCCXLV.* num. *VIII.* Postquā *Philippus Valesius* Galliarum Rex ex hac vita migrasset , anno , ut superius observavimus , millesimo trecentesimo quinquagesimo , *Joannes* ejus filius cognomento *Bonus* in illius locum suffectus est, Princeps excelsi quidem animi, sed in gerendo cum Anglorum Rege hæreditario bello infeliciorem, quā pater, habuit exitum. At enim, cum *Eduardo Walliæ* Principe , *Eduardi VI.* Anglorum Regis filio , prælium in *Pictonibus* die *IX.* mensis *Septembris* anni *MCCCLVI.* magno quidem animo , sed præcipiti consilio commisit , tamque infelicitè ei cessit martis alea, ut cæsis sex Francorum millibus , atque inter cæteros *Petro Borbonio*, aliisque proceribus , & octingentis Equitibus primariæ nobilitatis , ipsemet Rex *Joannes* captus fuerit cum *Philippo* filio natu minimo , qui à Patris latere nunquā divelli potuerat , eumque, supra hominem pugnans, acriter defenderat. In Angliam itaque *Joannes* Galliarum Rex captivus abductus est ; sed quarto postquam captus fuerat anno , tricies centum aureorum millibus , hoc est tribus aureis millionibus redemptus, Parisios rediit, & in Regnum , variis ob ejus absentiam factionibus ac seditionum procellis agitatam, receptus est. Tot exhaustus calamitatibus, sacram contra Turcas expeditionem meditatus *Joannes* Rex , cujus ab *Urano V.* Pontifice Maximo Dux fuerat renunciatus , in Angliam anno *MCCCLXIV.* trajecit , ut Angliæ Regem in belli sacri societatem pellicere posset . At morbo correptus obiit Londini die *VIII.* Apri-

Aprilis ejusdem anni, eique funus magnificè ab *Eduardo* paratum, corpusque in Gallias remissum, quod in Ecclesia Monasterii San-Dionysiani sepulturæ mandatum est. *Carolus* hujus nominis V. cognomento *Sapiens*, mortuo patri suo *Joanni* Galliarum Regi successit, & Remis die ix. Maji anni MCCCLXIV. inauguratus est. Hic fortunam in bellis magis secundam, quàm pater, expertus fuit. Duce *Bertrando Guesclino* Aremorico, & rei militaris scientissimo, bellum Hispanicum feliciter confecit adversùs *Petrum* Castellæ Regem, dictum *Cru- delem*, ut ulcisceretur injuriam *Blancæ* Reginae, sorori uxoris suæ, factam, quam ille Rex *Petrus Cru- delis* repudiaverat, probris affecerat, in carcerem detruserat, ac tandem post injurias omnis generis toto decennio illatas, veneno necaverat, sicut nar- rat *Mariana* lib. xvii. De rebus Hispaniæ cap. iv. Alterum bellum gessit *Carolus V.* adversùs Anglos, quos mari terræque vicit, & Aquitaniam, ac No- vempopulanam omnem, Burdigala & Bajona ex- ceptis, in suam redegit potestatem. Bellum deni- que movit contra *Joannem Montefortium* Aremo- ricæ, seu Britannicæ minoris Regulum, qui ad An- glos defecerat. De hisce bellis à *Carolo V.* confe- ctis legendi sunt Continuator *Guillelmi Nangii*, *Froissardus*, *Walsinghamus*, *Paulus Æmilius*, alii- que Historici. Obiit *Carolus V.* die xvi. Septembris anni MCCCLXXX. cujus absolutissimum Elogium, pangit Auctor Anonymus Operis, quòd inscribi- tur *Somnium Viridarii* cap. cxxv. apud *Goldastum* tom. 2. *Monarchiæ*. *Carolus V.* Galliarum Rex filium reliquit duodennem, qui statim post obitum pa- tris ex procerum & Optimatum consilio inaugura- tus

tus est, dictusque *Carolus VI.* cujus ætas cum rebus gerendis necdum idonea esset, Regni administratio *Ludovico Andegavensium Duci*, patruo Regis *Caroli VI.* natu maximo, demandata est. Hic ille, est *Ludovicus Andegavensium Dux*, Regni Galliarum Regens, quem *Joanna*, Neapolis & Sicilia Regina, in filium & Regni Neapolitani hæredem adoptaverat, quæ tamen à *Carolo Dyrrachino*, in quem *Urbanus VI.* Regnum Neapolitanum transtulerat, oppressa & perempta fuit, antequam Galli ei suppetias ferre potuissent. *Ludovicus Andegavensis* à *Clemente VII.* tempore Schismatis Avenione sedente coronatus Rex Neapolis, Sicilia & Apuliæ, collectis copiis ex Provincia digressus, per Alpes Cottias in Italiam penetravit, ubi plurimis affectus incommodis, fatiscente Francorum exercitu insolitis æstibus & morbis, interceptisque ad vitam sustentandam necessariis comœatibus, atque Italarum invidiâ infectis, ut fertur, veneno aquis, commisso prælio occisus est, magnaque Gallorum edita strages. Hæc in Italiam expeditio, quam *Ludovicus Andegavensis*, Regni Galliarum Regens, & *Caroli VI.* Regis patruus suscepit, funesta fuit Galliarum Regno, quippe quæ Regium ejus ærarium exhaustit. Accessit etiam ad ejusdem Galliarum Regni omnium malorum cumulum, morbus *Caroli VI.* Francorum Regis, qui in Ducem Brittaniæ minoris vindictam animo noctu diuque versans, in eum duxit exercitum; sed cum Cænonianos pervenisset, ardore solis icto capite inamentiam incidit. Quare *Carolo VI.* regnandi impote per dementiam facto, duo superstites ejus patrui *Joannes Biturigum*, & *Philippus Burgundiæ*
Duces

Duces Regni administrationem sumpserunt, *Ludovico*, Regis fratre & *Aureliano* Duce, rejecto, quæ res *Burgundionem* inter & *Aurelianensem*, ac utriusque stirpem implacabilis odii semen, bellique civilis fomitem subministravit, sicut commodius referemus in Colloquio I. in Historiam Sæculi decimi quinti, ubi de *Carolo VI.* Galliarum Rege, qui obiit anno mccccxii. plura, auxiliante Deo, dicemus.

D. De Galliarum Regibus uno spiritu multa continenter dixisti, quæ mihi summæ voluptati fuerunt, tantum abest, ut tædium aliquod attulerint, nec minorem, ut spero, voluptatem percipiam ex brevi narratione rerum, quæ Sæculis XIII. & XIV. sub Castellæ, seu Castiliæ Regibus in Hispania gestæ sunt.

M. *Alphonsus VIII.* seu, ut alii volunt, IX. Castellæ Regnum, ut jam observavimus in Colloquio I. in Historiam XII. Sæculi, *Sanctio* hujus nominis III. patre suo defuncto, anno mclviii. administrare cœpit, ac subinde decimotertio ineunte, Sæculo quadragesimum secundum Regni numerabat annum. Hispaniam id temporis Saraceni miserè vexabant. *Miramolinus* quippè Tunisi Rex totam vincendo pervagatus Hispaniam, Arelatum & Avenionem usque perruperat. Sed anno mccx. quatuor Reges, Castellæ videlicet, Aragoniæ, Lusitaniæ, & Navarræ, junctis viribus contra Saracenos progressi sunt, eosque tantâ strage profligarunt, ut ducenta millia cecidisse dicantur, è Christianis verò viginti quinque, aut triginta duntaxat occubuerint. Post hanc nobilissimam Hispanorum victoriam, quam narrant *Rodericus Toletanus* Archie-

chiepiscopus lib. 8. de *Rebus Hispania*, & *Joannes Mariana* lib. 10. cap. 23. & 24. Saracenorum in Hispania res inclinare cœperunt, adeò ut paulatim, amissis Provinciis, quas invaserant, nihil eis præter Granatense Regnum reliquum fuerit. Obiit *Alphonsus Castellæ Rex* anno MCCXIV. plenus non tantum dierum, sed virtutibus & honore cumulatissime exornatus, cum quo totam Castellæ gloriam, sepultam scribit idem *Rodericus Ximinius Archiepiscopus Toletanus*. Vixit annis LXII. è quibus annis tribus & quinquaginta regnavit, ac filium reliquit Regni hæredem *Henricum* annorum undecim puerum, quem ex sua conjuge *Leonora*, filia *Henrici Regis Angliæ*, susceperat. Post obitum itaque *Alphonfi* patris Rex Castellæ salutatus est *Henricus* sub tutela & institutione sororis suæ *Berengaria*, conjugis *Alphonfi Legionis Regis*. At diù non regnavit *Henricus* hujus nominis primus, nam dum Palentiæ in ædibus Episcopi cum æqualibus luderet, cocti lateris ictu vulnus accepit in capite, & ex eo undecimo post die è vita migravit VIII. Idus Junias anni MCCXVII. In ejus locum successus est *Ferdinandus* hujus nominis III. filius *Alphonfi Legionis Regis*, & *Berengaria* ejus conjugis. Utroque Regno Castellæ videlicet & Legionis potitus est *Ferdinandus*, omnibusque Hispaniæ finibus Mauros procùl eliminavit, præter Granatam, cujus tamen Regem sibi tributarium fecit, magnâ ubique editâ Barbarorum strage. Diem supremum obiit *Ferdinandus* Hispali Kalendis Junii anni MCCLII. cum annos xxxv. Castellanis, Legionensibus verò xxii. imperasset. *Ferdinando* successit *Alphonsus X.* filius *Ferdinandi III.* Hic ille *Alphonsus* est, cui, ut supra

dice-

dicebamus, variantibus in creando Occidentis Imperatore sententiis, Imperium delatum est, causâq; sub *Alexandro IV. Urbano IV. & Clemente IV.* iudicatâ, demùm sub *Gregorio X.* jure cedere coactus est. Astronomiam, Syderalemque Scientiam professus est idem *Alphonsus*, & in ea tantâ cum laude versatus, ut quæ modò extant Astronomicæ Tabulæ, ab eo dictæ sint *Alphonsinæ*. Primus etiam fuit Hispaniæ Regum, qui leges & Edicta vulgari Hispanorum linguâ condiderit, cum antehac Latino idiomate publicis in tabulis exprimerentur. Sacros Bibliorum libros in vernaculam linguam vertendos quoque curavit. Obiit *Alphonsus* Rex Castellæ, à perduelli filio suo *Sanctio* Regno exturbatus, anno mclxxxiv. Regni sui xxxi. Eo mortuo, *Sanctius* hujus nominis *IV.* illius filius, spoliati ejediq; è Regno patris notâ ad posteritatem infamis, Rex Castellæ salutatus est, & undecim annis Regnum tenuit, obiitque Toleti Kalendis Maji ann. mcccxcv. Princeps fuit, teste *Mariana*, magnis Principibus exequatus fortitudinis, æquitatis, prudentiæque laudibus. sed egregiè callidus, sagax, neque uno loco crudelitatis impressa vestigia ad posteritatis invidiam relinquens. Post obitum *Sanctii* Castellæ Regnum excepit *Ferdinandus IV.* ejus filius, quod annum agens ætatis nonum per matrem suam *Mariam* filiam *Alphonfi* Infantis de *Molina* gessit. Undè *Ferdinandi* Regis ætas adolescentior, ejusque matris *Mariæ* cum *Sanctio* nuptiæ, quæ ob impedimentum propinquitatis (erat enim *Maria* neptis *Sanctii*) à *Martino IV.* Pontifice Maximo rescissæ fuerant, civilibus, externisq; bellis locum dedere. Una ex parte Aragoniæ, Navarræ, & Lusitanæ Reges, ex altera *Alphonsus* de la Cer-

Cerda, Joannesque patruus, quorum alter sc. Castellæ Regem, alter Legionis aderebat, junctis copiis & opibus in Ferdinandum IV. arma moverunt; prudentia tamen matris incolume filio *Ferdinando* Regnum servavit, ac pace inter Principes compositâ, octodecim circiter annis Castellæ Regum gubernavit *Ferdinandus IV.* obiitque VII. Idus Septembris anni MCCCXI. *Ferdinando* successit ejus filius *Alphonfus* hujus nominis XI. adhuc puerulus, utpotè natus dumtaxat annum unum & dies sex, quod in causa fuit, cur, Rege adhuc minore, intestinis dissidiis scdum in modum laceratum fuerit Castellæ Regnum. Anno ætatis suæ decimo quinto *Alphonfus* Regni administrationem capeffivit. De Mauris insignem victoriam reportavit ad Tarissam anno MCCCXL. & ab iis sæpius prælio victis plura recepit Oppida, rerumque annis triginta octo potitus, pestis contagione correptus decessit in obsidione Castrî *de Gilbratar* die XXVI. Martii anni MCCC. Ex *Maria* Lusitanæ Regis filia, justâ & legitimâ conjugæ suæ, unicum reliquit filium, videlicet *Petrum*, Regni hæredem. At ex *Leonara Gusmania*, pellice sua, quam in deliciis habebat, plures suscepit, reliquitque liberos, *Henricum* scilicet, *Fredericum*, *Sanctium*, *Telium*, *Petrum*, & *Didacum*. Mortuo *Alphonso* successit ejus filius *Petrus* ex *Maria* legitimâ conjugæ procreatus, qui *Cruclis* fuit appellatus, non solum quia impudicis *Mariæ Padillæ* amoribus irretitus, *Blancam*, Joannis Ducis Borbonii filiam, quam sibi legitimo matrimonio copulaverat, injustè repudiavit, captivam omni solatio destitutam, detinuit, ac tandem veneno extinxit; verum etiam quia multos Viros Principes ferro peremit. Idem
cru-

crudelitatis genus exercuit in tres fratres suos nothos, seu in *Fredericum, Petrum, & Dillacum*, quorum etiam matrem *Leonoram Gusmaniam* Principatus sui initio occidit. *Rubeum*, qui cum *Machometo* de Regno *Granatæ* contendebat, quique adversæ factionis viribus impar ad eum confugerat, humano divinoque jure violato, jugulavit, inhians thesauris, quos advexisse secum putabatur. Cum igitur, regnante *Petro Crudeli*, fœda esset Hispaniæ facies, & bellis civilibus externisque deformata, sicut *Mariana* lib. 17. alique Hispanicæ gentis Historici describunt, tres adhuc superstites *Petri Crudelis* fratres nothi, nimirum *Henricus, Sanctius, & Telius*, mortem matris suæ *Leonoræ Gusmaniæ*, ac fratrum suorum ulturi, ad *Aragonum Regem* sese receperunt, impetratoque auxilio; Castellæ fines adoriuntur, & expulso *Petro Crudeli*, regium nomen sumpsit *Henricus* ejus frater nothus. Animum tamen non despondit *Petrus Crudelis*, sed in *Vasconiam* profectus, *Anglos*, qui hanc Provinciam tenebant, ostentatâ præmiorum, prædæque spe pellexit, ut ei suppetias ferrent. Inito prælio adversus *Henricum* victoriâ potitus est *Petrus Crudelis*, eumque finibus Hispaniæ exegit. Victus *Henricus* in Galliam venit, instauratoque bello *Francorum Regis Caroli V.* auxilio adjutus, commisso apud *Oppidum Montielem* prælio, *Petrum Crudelem* superavit, captumque ac de fuga cogitantem stricto gladio confodit. Hæc *Petri Crudelis* mors contigit die *xxiii. mensis Martii anni mcccclxix.* anni verò Regni *Petri Crudelis* undevigesimi. Sublato *Petro Crudeli*, Castellæ Regno, nemine reclamante, potitus est *Henricus* hujus nominis *II. filius Alphonsi XI.*
& Leo-

& *Leonora Gusmania*, illudque sapienter rexit usque ad annum mcccclxxix. quo è vivis excessit. Narrat *Mariana* lib. 17. de *Rebus Hispaniæ* cap. 2. *Henricum*, Castellæ Regem, præ singulari amore, quo Prædicatorum Ordinem, ob Beati *Dominici* sui gentilis & agnati memoriam, complectebatur, voluisse propediem morituum velle Dominicani Ordinis indui, & eâ indutum sepeliri. Addit etiam idem Scriptor, Hispaniæ Regibus solemne fuisse ex eo numero & Ordine, seu Fratrum Prædicatorum, Sacerdotes deligere, quibus conscientia vulnera detegerent. Hinc Dominicani, ut obiter dicam, ab initio Ordinis ad audiendas Catholicorum Regum Confessiones admissi sunt, eoque præclaro, ac perhonorifico munere continuâ ac perpetuâ temporum serie magno cum zelo & Ecclesiæ Regniq; utilitate perfuncti sunt usque ad annum mdcc. quo, *Carolo II.* Hispaniæ Rege ex Austriacorum progenie, absque liberis defuncto, Rex Hispaniæ proclamatus est *Philippus V.* ex Borboniorum Sanguine oriundus, qui Sacerdotem è Societate Jesu sibi Confessarium adscivit.

D. Absolvistine seriem Regum, qui Sæculis XIII. & XIV. Hispaniæ, seu Castellæ Regnum administrarunt.

M. Duo adhuc supersunt Reges, qui Sæculo XIV. Hispaniæ, seu Castellæ Regni gubernacula tractarunt. Mortuo *Henrico* hujus nominis II. Castellæ Regi, quem in Dominicanum Ordinem optimè affectum fuisse diximus, successit *Joannes* hujus nominis I. ejus filius anno mcccclxxix. Bellum gessit cum Lusitanis, Anglisque difficillimum, quod tandem feliciter composuit. Totius Regni Comi-

tia habuit Caracæ anno mcccxc. ad deliberandum de multis rebus Rempubicam, Ecclesiamque spectantibus, & ad perversam, quæ inoleverat, extirpandam consuetudinem, juxta quam Proceres Laici in jura Ecclesiarum involabant, & Patronorum occupato nomine, Sacerdotes, exiguo stipendio constituto, Ecclesiis præficere solebant, decimarum multò maximam partem pro se quisque domum avertebant, Ecclesiarum jura impunè occupabant, dabant & auferebant Templis mercenarios Sacerdotes atque temporarios. Hunc gravissimum serpentem id temporis in Hispania abusum meritò deplorat *Joannes Mariana* cap. 13. lib. 18. de *Rebus Hispaniæ*, ubi etiam observat, præclaros *Joannis Castellæ* Regis ad æquitatem, & ad sanciendam Ecclesiarum libertatem propensi conatus fuisse impeditos Regulorum intercessione, morem istum per multas ætates continuatum, majorum merita, & veterum Pontificum veniam excusantium, quos amplius urgeri haud visum Regi, nè novâ offensione eorum animi irritarentur. Post hæc celebrata Comitia, *Joannes* Rex Complutum venit, cùmque septimo Idus Octòbris anni mcccxc. ad quoddam Spectaculum Equitum Africanorum exiisset, atque ut se oblectaret, ostentaretque peritiam, equum, quo vehebatur, calcaribus incitasset, ex equo præcipitatus momento temporis extinctus est anno ætatis suæ xxxi i i. Regni xi i. Reliquit Regni hæredem filium suum natum annos dumtaxat undecim, *Henricum* hujus nominis III. qui post obitum patris Rex salutatus est, ejus tamen ætati minori regendæ, donec adolesceret, ac Regni administrationi procurandæ decreti sunt ab Ordinibus Tu-

Tutores, quorum æmulatione haud parùm res turbatæ sunt, Regnumque periclitari cœpit tum ab intestinis dissensionibus, tum etiã à Lusitanis res suas interim promovere satagentibus, donec post tertium annum, pactis cum Lusitanis in annos quindecim induciis, compositæ extæræ dissensiones, internæ verò per Legatum Pontificis in integrum, restitutæ fuerunt. Quatuordecim annos natus Regni Castellæ administrationem suscepit *Henricus*. Catharinam filiam Lecestriz Ducis sibi matrimonio copulavit. Cum Lusitanis haud infeliciter pugnavit, & à *Tamerlane*, Tartarorum Imperatore, honorificam Legationem excepit, ad quem vicissim Oratores milit. Tandem, cum uteretur sæpius adversâ valetudine, & eam ob rem *Valetudinarius* vulgò appellaretur, obiit viii. Kalendas Januarias anni mcccvii, ætatis xxvi. Regni xvii. Filium reliquit *Joannem* Regni Castellæ hæredem, cujus gesta referemus in Colloquio I. in Historiam Sæculi XV.

D. Colloquium nostrum, si placet, absolvamus, & ne quid eorum, quæ ad noticiam status Ecclesiæ sub Principibus Christianis comparandam juvare possunt, in eo desiderari videatur; totum illud concludamus brevi narratione gestorum ac serie Regum, qui Sæculis XIII. & XIV. supremum in Anglia dominium obtinuerunt.

M. Regum Anglorum seriem perduximus in Colloquio primo in Historiam Sæculi duodecimi usque ad *Richardum*; qui anno postremo ejusdem Sæculi duodecimi vitâ functus regnare desit in Anglia. *Richardo* Angliæ Regi defuncto successit ejus frater, dictus *Joannes Sinaitarra*, quod ci à pa-

ere nihil relictum esset. De jure ad Coronam Angliæ contendit cum *Arturo* Britannię Duce nepote suo, & filio *Gaufridi*, qui frater erat *Joannis* natu major. *Arturi* jura *Philippus II.* dictus *Augustus* Galliarum Rex protexit ac defendit. Sed *Joannes* captum *Arturum* nepotem suum & Rothomagum abductum in Arce Nova inclusit, ac paulò post trucidavit. Hęc mors *Arturo* injustè illata occasionem dedit gravissimis bellis, quæ *Philippus Augustus*, ejusque filius *Ludovicus VIII.* Galliarum Reges contra *Joannem* Anglorum Regem gesserunt, de quibus bellis superiùs sermonem sat superque habuimus. Aliud acerrimum dissidium habuit idem *Joannes* Anglorum Rex cum *Innocentio III.* Pontifice Maximo, qui in eum Excommunicationis sententiam tulit, & sacrorum justitium Angliæ indixit, quòd prædictus Rex *Stephani* Cantuariensis Archiepiscopi electioni obstinato animo intercederet, & Ecclesiasticos redditus sacrilegâ temeritate invaderet. Verùm facti pœnitens *Joannes* Rex, ut pacem cum *Innocentio III.* iniret, Regna sua Angliæ & Hiberniæ, Ecclesiæ Romanæ, seu *Innocentio III.* ejusque Successoribus resignavit ac contulit, ut videre est apud *Matthæum Parisum* ad ann. MCCXIII. Obiit *Joannes* Rex in pervigilio S. *Luca* Evangelistæ anno MCCXVI. Hunc Regem parùm in fide Christiana constantem fuisse scribit *Matthæus Parisius*, asserens illum de Resurrectione corporum ac de aliis Christianæ fidei Capitibus malè sensisse, quædam impia ac blasphema sæpè evomuisse, eumque ad ejurandam Christianam Religionem paratum. Legatos misisse ad *Miramolinum* Africæ & Marrochiz, ut ei Regnum suum Angliæ tributarium redderet.

deret . Quæ omnia fabulæ simillima videntur . Post obitum *Joannis Angliæ Regis* proclamatus est filius ejus primogenitus *Henricus* hujus nominis *III.* qui, præfente *Galone* Sedis Apostolicæ Legato, fecit homagium *Sanctæ Romanæ Ecclesiæ*, & *Innocentio* *Papæ de Regno Angliæ & Hiberniæ*; & juravit quòd mille marcas, quas Pater ejus *Romanæ* contulerat *Ecclesiæ*, fideliter persolveret, quamdiù prædicta Regna teneret . Sicut testatur *Matthæus Parisius* . Bellum adversùs *S. Ludovicum* hujus nominis *IX.* Galliarum Regem infelicitè gessit *Henricus III.* ad *Talleyburgum* datus in fugam, ad *Xantonas* profligatus, obtentis demùm induciis in *Angliam* redire compulsus est anno *MCCXLIII.* Pietatem *Henrici III.* erga *Sacrosanctum Missæ Sacrificium* plurimùm commendat *Walsinghamus*, aitque, cum solitum fuisse, tres *Missas* solemnes quotidie audire, pluribus etiam privatim celebrantibus adesse, atque *Sacerdotis*, *Corpus Christi* attollentis, dexteram deo-seculari . Obiit *Henricus III.* *Angliæ Rex* anno æræ *Christianæ* *MCCLXXII.* postquam regnasset annos quinquaginta sex . Ei successit filius primogenitus *Eduardus*, quem alii hujus nominis *alii* melius *IV.* appellant . Cum *Scotis* acerrimè pugnavit *Eduardus*, eosque profligavit insigni prælio, in quo sexaginta *Scotorum* millia ceciderunt . Quò factum est, ut *Rex*, *Proceresque* *Scotorum* sese ac *Regnum* *Scotiæ* voluntati *Eduardi* *Regis* permiserint . Sed hoc *Regno*, quamdiù vixit, novis identidem emergentibus bellis ac dissensionibus, potiri haud potuit . Quare, sub finem vitæ suæ jussit filio suo *Eduardo* *Regni* hæredi, ut paternas injurias in *Scotos* honorificè ulcisceretur, ejusque ossa in aliquo

vase reclusa secum deportaret, donec totam Scotiam pervagatus, hostes omnes superasset. Hæc suprema mandata postquam filio suo dedisset superbus ille Rex, dissenteria correptus è vita migravit, pridie Nonas Junii anni MCCCVIII. cum regnasset annos triginta quinque. Mortuo *Eduardo IV.* Angliæ Regi successit ejus filius *Eduardus* hujus nominis V. quo regnante magnis motibus Anglia fuit agitata, ac bellis civilibus lacerata. In primis, anno MCCCXI. grave dissidium habuit *Eduardus* Rex cum Proceribus supremi Senatus, quem *Parlamentum* vocant, quod licet anno MCCCXIII. satagentibus Regni Episcopis, pace Regem inter & Proceres conciliatâ, sopitum fuerit; acrius tamen recrudit anno MCCCXXVII. Eo siquidem anno *Isabella* Angliæ Regina, quam Regni inimicam Londini proclamari jussit *Eduardus* Rex ejus maritus, Comitissæ Hannoniæ, qui filiam suam *Philippam* juniori *Eduardo* Angliæ Regni hæredi desponderat, necnon Anglicanorum Præsulum auxiliis adjuncta, trajecit in Angliam, eique è vestigio Proceres ac populus se adjunxerunt. Tum ipse Rex *Eduardus* captus est. Duo *Hugones Spencerii*, pater scilicet & filius, quorum consiliis ac ministerio Rempublicam regebat *Eduardus*, atroci supplicio sublati sunt. Ad hæc, habita sunt Regni Comitia, in quibus Procerum sententiâ *Eduardus* Rex fuit Regno abdicatus, & *Eduardus junior*, ejus filius primogenitus, Rex salutat. Huic sententiæ acquievit *Eduardus* pater, filii electionem probavit, & Regiæ dignitatis Insignia, missis Oratoribus, tradidit. Denique *Eduardus senior* in Castro de Berkley detentus, inaudito crudelitatis genere, à Custodibus suis necatus est;

Veru

Veru scilicet candente per anum immisso confolius & corneâ fistulâ ad partem illam pudendam aptatâ, ne adustionis vestigia conspicerentur. Sic extinctus est *Eduardus senior*, cùm regnasset annos novemdecim. Ejus filius *Eduardus junior* bellum Scotis indixit, cum quibus postea pacem iniit, quam turpem Angli vocant, quâ videlicet Scotia declarata est immunis ab omni jure, quod Angli sibi in eam usurpaverant, & in vinculum sanctitæ concordie *Eduardus junior*, hujus nominis VI. Anglorum Rex, *Joannam* sororem suam *Davidi*, filio *Roberti* Scotiæ Regis, matrimonio collocavit. Verum, turpiorem maculam *Eduardo* Regi inusserunt obscæni amores, quibus implicitus fuit cùm *Alicia Peresia*, pellice impudentissima, quam licet, rogantibus Regni Proceribus, ab Aula recedere jussisset, mox tamen ipsam revocavit, ad obitum usque retinuit, & in ejus complexu, nullis Ecclesiæ munitus Sacramentis, immortalis est propudiosissimus senex. Hic ille est *Eduardus* hujus nominis VI. Anglorum Rex, qui, ut superius dicebamus, magnis cladibus Gallos affecit, regnantibus *Philippo Valesio*, & *Joanne*, quem postremum habuit captivum, ac primus Galliarum Regis sibi nomen adscripsit. Sed, cùm varius sit eventus belli, adversam fortunam sub *Carolo V.* Galliarum Rege expertus est *Eduardus*, ac totam, exceptis *Burdigalâ* & *Bajonâ*, perdidit Aquitaniam, quæ ab ipso defecit, ac Regi Christianissimo se dedit. Obiit *Eduardus* hujus nominis VI. Anglorum Rex die XXI. mensis Junii anni MCCCLXXVII. cùm regnasset annos LI. Defuncto *Eduardo* successit ejus filius *Richardus* hujus nominis II. undecim dumtaxat annos natus, cujus ætas

cùm ad Rempublicam regendam sufficere haud posset, Regni procurationem suscepere Lancastriæ Dux, & *Edmundus Cantabrigensis Comes*, *Richardus* Regis patruus. *Joannis Wicklessi* hæresis, cui nimia *Eduardi senioris Angliæ* Regis negligentia initium, dederat, latè in Anglia serpere cœpit sub ejus successore *Richardo*, cujus pueritia opportunum serendis erroribus tempus, & viam ad eos spargendos facillimam *Joanni Wicklesso* natione Anglo, & ingenii vehementis homini, superbo & ambitioso stravit, sicut ostendemus in sequentibus Colloquiis. Regnum Angliæ pessimè administravit *Richardus* hujus nominis II. tamque gravi tyrannide omnes Regni Ordines à se alienavit, ut Regno sese abdicare coactus fuerit anno mcccxcix. Ejus renunciationem non solum omnes Regni Ordines admiserunt, sed etiam sententiam depositionis, quam refert *Walsinghamus* in Historia Anglicana, ad annum mcccxcix. in ipsum tulerunt, quâ illum cùm ex propria confessione, tum ex tribus & triginta Capitibus contra eum probatis, in quibus Regalis Juramenti violati, & tyrannidis convictus erat, Regno omninò ineptum, ac subindè jure optimo exauctoratum declarabant. Confestim Angliæ Regnum sibi vindicavit *Richardus* Regis depositi patruelis *Henricus*, qui filius erat *Joannis Ducis Lancastriæ*, Rexque ab Ordinibus salutatus est. Regno potitus *Henricus* hujus nominis IV. nefandissimum scelus perpetravit, quod omnes Historici, etiam Angli, detestantur. *Richardum* siquidem, quem Regno deponi curaverat, & in turri Londinensi captivum detinebat, specie cujusdam conjurationis in se à nonnullis Regni Proceribus factæ, citò obtruncari

cari iussit. Hunc deploratissimum exitum habuit execranda illa rebellio, quam, Auctore *Henrico*, contra *Richardum* legitimum Regem excitarunt in Anglia nonnulli perfidi homines, quos omni severitate dignos, pestes Regnorum, publicarum rerum subversores, populorum destructores, hostes denique Dei & hominum jure merito appellat *Henricus Spondanus* in *Continuatione Baronii* ad an. mcccxcix. Sed de *Henrico IV.* Angliæ Rege, qui hujus rebellionis adversus *Richardum* incentor ac promotor fuit, plura dicemus in Colloquio I. in Historiam Ecclesiasticam Sæculi XV.

COLLOQUIUM II.

In quo textitur Series Episcoporum, qui Illustriores Ecclesiæ Sedes Sæculis XIII. & XIV. tenuerunt.

DISCIPULUS.

TO T inter procellas, quibus universus Orbis Christianus Sæculis XIII. & XIV. fuit agitatus, potueruntne Romani Pontifices clavum Ecclesiæ feliciter gubernare, & non solum ornandæ ac propagandæ Religioni, sed etiam paci Sacerdotium inter & Imperium conciliandæ utilem navare operam?

MAGISTER. Summi Pontifices, qui Sæculis XIII. & XIV Sedem Romanam tenuerunt, in communem gloriam & utilitatem tam universæ, cui præerant, Ecclesiæ, quam ad procurandam Imperii & Regnorum pacem indefesso studio incubuerunt. Eorum pietas publica fuit ad exemplum,

plum, constans ad diuturnitatem, fortis ad debellandam impietatem, & destruendam omnem altitudinem sese extollentem adversus scientiam Dei. Bellum Hæresi, flagitiis, improbitati, lapsis in deteriora moribus perpetuò indixerunt, disciplinam legum severitate sanxerunt, constituerunt veterem Ecclesiæ dignitatem, emendarunt ea, quæ obrepserant temporum labe, vitia; & Imperatoribus Jura Ecclesiæ violare, aut ejus pacem, inductis Schismatibus, perturbare molientibus magnis animis restiterunt.

D. Maeste itaque animo, mihi quidem gratum erit, seriem, gestaue Pontificum, qui Sæculis XIII. & XIV. Ecclesiæ Romanæ præfuerunt, in præsentis nostro Colloquio perlustrare, summamque delibare.

M. Anno MCXCVIII. mortuo *Celestino III.* Pontifice Maximo, sicut jam observavimus in Colloquio secundo in Historiam Sæculi duodecimi, non vacavit Sedes Pontificia, sed eadem die, quâ sepultus est *Celestinus III.* seu IV. Idus Januarii anni millesimi centesimi nonagesimi octavi *Innocentius III.* electus fuit Pontifex Romanus, ut testatur Scriptor Anonymus à *Bosqueto*, postea Episcopo Monspelienſi, editus, qui *Innocentii III.* adhuc viventis res gestas descripsit. Verum, quia *Innocentius III.* tunc tantum Diaconus erat, dilata est ejus Ordinatio in Presbyterum usque ad Sabbatum quatuor temporum ix. Kalendas Martii; & sequenti Dominica, in qua tunc occurrit festum Cathedræ Sancti Petri (die nempe XXI. mensis Februarii) fuit apud Sanctum Petrum in Episcopum consecratus, & in ejusdem Apostoli Cathedra constitutus, uti referunt
idem

idem Anonymus, & *Rodulphus de Diceto* Scriptor Anglus in *Historia*, quam edidit, pag. 701.

D. Afferis, *Innocentium III.* fuisse dumtaxat Presbyterum ordinatum ix. Kalendas Martii, seu die xxi. mensis Februarii anni millesimi centesimi nonagesimi octavi, & tamen, ut audivi à viris eruditis, extant etiamnum antiqua quædam Breviaria Ordinis Sanctissimæ Trinitatis, in quibus dicitur, Sanctum *Joannem de Matha*, ejusdem Ordinis Institutorem, unâ cum Sancto *Felice Valesio*, Romam anno mxcviii. venisse, & petiisse ab *Innocentio III.* recens electo sui Ordinis confirmationem, & Pontifici in festo Sanctæ Agnetis secundò, scilicet die xxviii. mensis Januarii, dum in Ecclesia Lateranensi Missam celebraret, ad Sacræ hostiæ elevationem, Angelum candidâ veste, cruce bicolori, specie redimentis captivos apparuisse; quo viso, Pontificem hoc novum Institutum approbasse. Quæ igitur fieri potest, ut *Innocentius III.* fuerit dumtaxat, ut dicis, Presbyter Ordinatus die xxi. mensis Februarii anni mxcviii. cum tamen die xxviii. mensis Januarii ejusdem anni eum jam Missam celebrasse antiqua illa Breviaria aperte testentur?

M. Non parvam certè proponis difficultatem, ad quam solvendam *Bonaventura Baro* in analibus Ordinis Trinitariorum à se Romæ vulgatis asserit, verum non esse quod passim dicitur, *Innocentium III.* qui Diaconus tantum erat, quando Summus Pontifex die vii. Januarii creatus est, distulisse ordinationem suam in Presbyterum usque ad diem vigesimam primam mensis Februarii, cum visio, quam inter celebrandum missam die vigesima octavâ mensis Januarii habuit. *Innocentius III.*
certa

certa sit; ideòque jam Presbiter esset ordinatus *Innocentius III.* die vigesimâ octavâ mensis Januarii. Verùm, ipse, etsi lubentissimè fatear, certam esse hanc visionem, quam habuit *Innocentius III.* die xxvi. mensis Januarii, existimo tamen, eum hac die necdùm fuisse Presbyterum, sed tantùm Diaconum, ut disertè testantur jam citati Scriptor coævus Anonimus, & *Rodolphus de Diceto*. Sed, si ita sit, inquis, cur igitur in antiquis Trinitariorum Ordinis Breviariis legitur, *Innocentium III.* hanc habuisse apparitionem, dùm celebraret Missam die vigesima octavâ Januarii? Profectò, si eâ die nondùm fuisset Presbyter, sed tantum Diaconus, Missam celebrare haud potuisset *Innocentius III.* Non eo inficias, hanc difficultatem nonnullis insuperabilem visam esse, eam tamen, si consulamus Scriptores mediæ & infimæ Latinitatis, apud quos celebrare & audire Missam aliquandò unum & idem est, facili negotio solvi posse existimo. Unum, præ cæteris aliis, quæ apud illos Scriptores suppetunt, proferam exemplum petitum ex *S. Gregorio Turonensi*, qui in libro de *Gloria Martyrum* cap. li. referens miracula *Sancti Sigismundi Burgundiæ Regis*, ait: *Si qui nunc Frigoretici* (idest, *Febricitantes*, uti variis exemplis explicat *Du Cange* in Glossario) *in ejus honore Missas devotè celebrent* (idest Missas audiant) *ejusque pro requie offerant oblationem, statim compressis tremoribus, restinctis febribus, sanitati pristina restaurantur*. Cum itaque apud Scriptores mediæ & infimæ latinitatis celebrare & audire Missam aliquandò unum & idem sit, & promiscuè usurpari possit, mirum videri haud debet, quòd in antiquis Trinitariorum

Ordi-

Ordinis Breviariis legatur, *Innocentium III.* die vigesimâ octavâ mensis Januarii anni millesimi centesimi nonagesimi octavi Missam celebrasse, idest, *audivisse*, cum eâ die non esset Presbyter, sed tantum Diaconus. Hoc pacto solvitur iste nodus, & eadem operâ corrigitur Anachronismus, in quem lapsus est *Spondanus*, qui ad annum MCCIX. ait, Ordinem Sanctissimæ Trinitatis ab *Innocentio III.* fuisse confirmatum eo anno, & hanc Apparitionem, cujus superiùs mentionem fecimus, contigisse v. Kalendas Februarii ejusdem anni millesimi ducentesimi noni, dum *Innocentius III.* rem divinam faceret. Hunc *Spondani*, & aliorum Authorum, qui eum secuti sunt, Anachronismum aperte refellunt ea, quæ mox adduximus diserta probatæ fidei antiquorum Scriptorum testimonia.

D. Res magnas ac memoriâ dignas, quas in suo Pontificatu gessit *Innocentius III.* Pontifex Maximus, obsecro te, ut breviter describas.

M. Cum Res propemodum infinitas in suo Pontificatu *Innocentius III.* præclare gesserit, quas nec memoriâ complecti, nec observando hic notare possem; præcipuas dumtaxat, quas litteris prodiderunt celebriores Historici, compendiosè referam. *Innocentius III.* natione Campanus, patriâ Anagninus, filius *Thrasimundi* ex illustrissima Comitum Signiæ familia, ante promotionem suam *Lotharius* dictus, à *Celestino III.* Pontifice Maximo Cardinalium albo fuit adscriptus, cum annum dumtaxat vigesimum nonum ætatis suæ attigisset, & post *Celestinum III.* ad Pontificatum provectus est die VII. Januarii anni MEXCVIII. Fuit Pontifex, teste *Trithemio*, in divinis scripturis eruditissi-

tissimus ; quippè qui à pueritia (in Academiis Parisiensi & Bononiensi) operam litteris impenderat , & in virum non minus probum , quàm doctum evaserat . Quo autem zelo , quantâve animi constantiâ Ecclesiam rexit *Innocentius III.* facile ex his , quæ jam in præcedentibus Colloquiis observavimus , colligere potes . Ille quippè est , qui *Philippum II.* Galliarum Regem cognomento *Augustum* monitis , obsecrationibus , Censuris , ad *Inseburginæ* repudiata uxorem recipiendam , & *Mariam* , Ducis *Moraviæ* filiam , superductam , compulit dimittendam . *Joannem* , dictum *sine terra* , Angliæ Regem tyrannidem in Ecclesiam & Clericos exercentem anathemate percussit , ipsiusque subditos à Sacramento fidelitatis absolvit . *Ottoni* hujus nominis *IV.* de Imperio cum *Philippo* *Sveviæ* Duce decertanti constantèr favit , eumque , postquam Sacramentum præstitisset de obedientia & reverentia Romanæ Ecclesiæ , de servanda Canonicarum electionum libertate , de Hæreticis delendis , de omnium possessionum Ecclesiæ restitutione faciendâ &c. Imperatorem coronavit , quem tamen postea insigni perfidiâ præstitum Sacramentum violantem , & castra plurima Ecclesiasticæ ditionis , urbesquè *Apuliæ* invadentem anathemate confixit , & ejus subditos ab ejus fidei Sacramento solvit , ut constat ex *Rigordo* , & ex variis *Innocentii III.* Epistolis , quas duobus Tomis collegit *Stephanus Baluzius* . *Siciliam* , fiduciarium Romanæ Ecclesiæ Regnum , summâ diligentiam tuitus est *Innocentius III.* eoque *Constantiam* Imperatricem & *Fridericum* ejus filium investivit , postquam ipsi , ejusque Successoribus , fidelitatem iurasset . *Marchaldum* *Siciliæ* Tyran-

rannum anathemate contrivit, & conscripto exercitu armis fregit atque fugavit. Regem Aragonum propriis manibus coronavit *Petrum*, qui suum Aragoniæ Regnum Romanæ Ecclesiæ fiduciarium ac vectigale constituit. Bulgaros ad Romanæ Ecclesiæ obedientiam revocavit, effecitque, ut *Joannitius*, seu *Calojohannes*, Bulgarorum Rex, humilem obedientiam Sedi Apostolicæ professus, se ac Regnum suum illius Sacro Principatui subjecerit. Armenorum Catholicum, & *Leonem*, minoris Armeniæ Regem, devotionem suam ac obedientiam ergà Romanam Ecclesiam scriptis litteris profitentes paterno affectu excepit, & Armeniæ Ecclesiam, cum Romana conjunxit. Nihil etiam intentatum reliquit, ut Ecclesiam Græcam cum Latina uniret, missis ad *Alexium Angelum* Orientis Imperatorem Legatis, qui Græcos ad Ecclesiæ unitatem revocare satagerent. Antiquam litem inter Ecclesiam Turonensem & Dolensem, de qua in præcedentibus nostris Colloquiis sermonem jam fecimus, finivit *Innocentius III.* sanxitque ut Dolensis Ecclesia tanquam suffraganea Ecclesiæ Turonensi, seu Metropoli, in perpetuum subjaceret. Ad excindendam ac penitus extirpandam Albigenium hæresim, sacram Expeditionem indixit, *Raymundum* Comitem Tolosanum eorum fautorem anathemate perculit, & Synodum Oecumenicam Lateranensem quartam anno mcccv. celebravit, in qua Albigenium hæresim, *Joachimi* Abbatis libellum, & *Almaricum* damnavit, sicut in Colloquio quarto datâ operâ ostendemus. Obiit *Innocentius III.* Perussii xvi. vel xvii. Kalendas Augusti an. mcccvi. cum annos duodeviginti, menses sex, & dies novem.

Eccle-

Ecclesiam rexisset . Nonnulla scripsit Opera , sed præsertim doctissimas Epistolas per annos singulos in Regeſto digeſtas , quas ad Hiſtoriam Eccleſiaſticam illius temporis illuſtrandam , & ad Jus Canonicum excolendum plurimum conferre poſſe , una eſt omnium eruditorum ſententia . Sed de Operibus & Epistoſis *Innocentii III.* plura dicemus in Colloquio quinto, ubi de Viris Illuſtribus, qui sæculis XIII. & XIV. floruerunt , diſſeremus . Geſta , ſeu Vitam *Innocentii III.* Romani Pontificis ab Autore incognito , ſed coætaneo, deſcriptam *Stephanus Baluzius* præfixit fronti Tomi primi Editionis accuratiſſimæ , quam adornavit, Epistoſarum *Innocentii III.* Poſt obitum *Innocentii III.* cùm Sedes Pontificia vacaſſet unum tantummodò diem , ſuſſectus eſt ibidem Peruſii in locum ejus *Cencius Sabellus*, ex nobiliſſima Sabellorum familia oriundus, patriæ Romanus , vir doctri-næ & morum probitate conſpicuus , dictus *Honorius III.* quem *Cæleſtinus III.* Diaconum Cardinalem & Camerarium , & *Innocentius III.* Cardinalem Presbyterum antehac creaverant . Hic deceſſoris ſui veſtigiis inſiſtens , nihil tam curæ ac cordi habuit , quàm ut Sacram- contra Saracenos Expeditionem promoveret, miſſis ad *Philippum* Galliarum Regem, alioſque Chriſtianos Principes , Legatis , qui illos ad eandem, ineundam expeditionem adhortarentur . In Syriam proſectionem adornarunt Cruceſignati , tantumque ſuo adventu terrorem Saracenis injecerunt, ut multos ex illis trucidarint , caſtra divitiis reſer- tiſſima actutum occupaverint , & Peluſium , ſeu Damiatam , nobiliſſimam Ægypti urbem, obſederunt , atque expugnaverint . At , orto Damiatæ inter

inter Christianos diffidio , eorum Classis à Saracenis combusta est , & *Damiata* ad deditionem compulsa . His auditis , Pontifex *Honorius* , ne Saraceni fortunâ suâ uterentur , *Fridericum II.* Imperatorem ad Expeditionem Syriacam impulit , sed frustra . Hic siquidem Imperator , qui de manu *Honorii III.* Insignia ceperat Imperii , fidemque jurejurando obstrinxerat Expeditionis adversus Saracenos suscipiendæ , innumeris usus tergiversationibus , moras consultò necebat , & postquam inani-
bus promissis , suis commodis unice studens , Romanum Pontificem diù delusisset , in apertas adversùs ipsum simultates erupit , illius ditionem , vexavit , Episcopos diversos per Apuliam & Siciliam constituit , depulsis his , quos Summus Pontifex iisdem præfecerat Ecclesiis . *Joannem* Hierosolymorum Regem , Socerum suum (ejus quippè filiam *Jolem* , seu *Jolantam* , uxorem duxerat *Fridericus II.*) Regno exiit , sicque inutiles omninò reddidit optimi illius Principis conatus , qui totum , pene Occidentem peragrarat , ut sacram expeditionem promoveret . Tuendæ adversus Mauros Hispaniæ , & exscindendæ Albigensum grassanti hæresi , traducendisque ad fidem Catholicam hæreticis *Honorius* Pontifex curam omnem adhibuit . *Henricum III.* Angliæ Regem post *Joannis* patris obitum in tutelam Sedis Apostolicæ suscepit , nihilque non egit , ut hunc Angliæ Regem cum *Philippo Augusto* , ejusque filio *Ludovico* , qui ei negotium faceßebant , conciliaret . Ordines Religiosos Fratrum Prædicatorum , Minorum , & Eremitarum Beatæ Mariæ de Monte Carmelo confirmavit , sicut fusiùs exponemus in Colloquio sexto , ubi de Mona-

stica Disciplina Sæculorum XIII. & XIV. sermonem habituri sumus. Obiit *Honorius III.* Optimus Pontifex, xv. Kalend. Aprilis anni MCCXXVII. cum annos decem, & menses octo Ecclesiam rexisset.

D. *Innocentium III.* decessorem *Honorii III.* Sanctissimum fuisse Pontificem, ac multa ad utilitatem Ecclesiæ magno zelo præstitisse observasti, & tamen nudiustertius audiivi à viris eruditis, eum post mortem ingenti flammâ cinctum visibilitèr apparuisse *Ludgardi* Virgini Sanctissimæ, eique significasse, se ob tres causas cruciari, quæ etiã æternis suppliciis illum addixissent, nisi per intercessionem piissimæ Matris Dei, cui Monasterium condiderat, in extremis ipsum pœnituisset. Hanc de *Innocentii III.* post mortem apparitione Historiam, an fabulæ loco habere debeam? Dubius adhuc hæreo.

M. Hanc de *Innocentii III.* post mortem apparitione Historiam, quam graves referunt Scriptores, videlicet noster *Thomas Cantipratensis* in Vita, quam descripsit, *Ludgardis* Virginis, *Bellarminus* lib. 2. de gemitu *Columbæ* cap. 9. & *Spondanus* in Annalibus ad annum MCCXVI. falsi insimulare, non audeo, sed potiùs cum *Bellarmino* crediderim, id ad timorem Prælati, etiam piis, incutiendum, sapientèr fuisse à Deo ordinatum. Si enim, inquit doctissimus ille Cardinalis, tam laudabilis Pontifex (seu *Innocentius III.*) qui in oculis hominum non probus & prudens solùm, sed etiã Sanctus & imitatione dignissimus habitus est, tam parùm fuit à gehenna, & usque ad diem iudicii purgatorii incendiis atrocissimis puniendus est, quis Prælatus non trepidet? quis non accuratissimè conscientie suæ secreta rimetur? Ego enim

enim facile mihi persuadeo, tantum Pontificem non potuisse Lethalia peccata committere, nisi sub specie boni deceptum ab adulatoribus & domesticis, de quibus in Evangelio dicitur: inimici homines domestici ejus. Itaque hoc tam magno exemplo discamus omnes sollicitè scrutari conscientiam nostram, ne forte erronea sit, cum nobis recta, & sana esse videatur.

D. Quem in Sede Pontificia Successorem habuit *Honorius III.* qui, ut mox dicebas, obiit xv. Kalend. Aprilis anni mcccxxvii.

M. *Honorio III.* in Pontificatum successit *Ugolinus*, patria Agnaninus, ex Illustrissima Comicum Signiæ prosapia Oriundus, Ostiensis Episcopus, & in Pontificatu dictus *Gregorius IX.* quem sempiternâ laude, & immortalî memoriâ dignissimum esse, animi magnitudine, & vitæ sanctitate clarissimum, Divini humanique juris consultissimum, auctoritatis Ecclesiasticæ assertorem constantissimum, testatur *Ciaconius* in Vitis Pontificum. Ut primum Pontifex Maximus inauguratus fuit *Gregorius IX.* Imperatorem *Fridericum II.* vehementer adhortatus est, ut promissam jam olim in Palæstinam contra Saracenos profectiorem maturaret, eumque tergiversantem sacrorum communione interdixit. Eo fulmine territus *Fridericus*, in Syriam navigavit, ubi, nullo edito prælio, cum turpe, & exitiosum Religioni Christianæ fœdus iniisset cum Sultano, & in Italiam inglorius atque infamis regressus fuisset, iterum ab eodem Summo Pontifice anathemate percussus est, ejusque subditi Sacramenti, quo erant ei obstricti, religione fuerunt absoluti. Tunc audaciâ furens, & scelus anhelans *Fridericus* Imperator, totam Italiam odiis & factionibus replevit.

Gibellinorum, qui ejus partes acerrimè sustinebant, & *Guelphorum*, qui à Romano Pontifice stabant. Constituit etiam in Longobardia Ducem *Ecelinum* Gibellinæ partis & stirpis Teutonicæ Tyrannum perfidum & immanem, qui annis triginta quatuor Patavium, Veronam, Brixiam, Tridentum, Tarvisium, & alias urbes oppressas tenuit, tamque belluinam in Longobardos crudelitatem, exercuit, ut nonnulli eum ex Dæmone genitum sibi persuaferint. Nihil antiquiùs habuit *Gregorius IX.* Pontifex Maximus, quàm ut Principum ac Populorum pacem procuraret. Hinc inter Florentinos & Senenses, inter Romanos varias in factiones divisos, inter Longobardos & *Fridericum* Imperatorem, inter Angliæ & Scotiæ Reges pacem conciliare summopere studuit. Litterarum cum esset amantissimus Summus ille Pontifex, Academiam Parisiensem impensè coluit, ejus Leges ac Privilegia renovavit in Epistola XIII. lib. v. in qua eandem Academiam appellat *Sapientiæ Officinam*, & *Scientiarum parentem*. Academiam etiam Tolosanam à *Raymundo juniore* Comite Tolosano institutam approbavit. Redimendis Christianis apud barbaras Nationes captivis, & proferendis Ecclesiæ finibus intentus *Gregorius IX.* Ordinem Beatæ Mariæ de Mercede Redemptionis captivorum confirmavit, & ad Gentes intenebris, & umbra mortis sedentes spargendi Evangelii præcones misit, præsertim Dominicanos, qui, velut nubes in æra sublatæ, Infidelium regiones non solum Divino Verbo, & Evangelii copioso imbri, sed etiam proprio sanguine largissimè irrigarunt. Obiit *Gregorius IX.* propè centenarius anno Christi MCCXLI. postquam
annis

annis quatuordecim , & mensibus quinque Ecclesiam rexisset . Trigesimo à *Gregorii IX.* obitu die , Pontifex electus est *Gaufridus Castiloneus* , morum integritate , eximiâ doctrinâ , in tractandis Ecclesiasticis negotiis experienciâ diuturno rerum usu comparatâ multùm commendatus , & ex Ordine Cisterciensi ad Cardinalitias Insulas à *Gregorio IX.* assumptus , qui in Pontificatu *Celestinus IV.* fuit appellatus . Sed hunc Pontificem tantæ dignitati obcundæ parem , post septemdecim ab inito Pontificatu dies , præmatura mors rapuit , sicut testatur *Bernardus Guidonis* in Chronico Romanorum Pontificum . Mortuo *Celestino IV.* vacavit Sedes Pontificia annum unum , menses octo , & dies quindecim , eò quòd *Fridericus* Imperator aliquot Cardinales Amalphitano carcere detineret , qui postea , adnitentibus *S. Ludovico* Galliarum Rege , & *Balduino* Imperatore Constantinopolitano , remissi , elegerunt Anagninæ cum aliis Cardinalibus *Sinibaldum de Flisco* , Genuensem tituli *Sancti Laurentii in Lucina* Cardinalem , qui in Pontificatu *Innocentius IV.* dictus est , & propter eximiam , quâ pollebat , doctrinam , *Pater juris* , & *Pater veritatis* passim appellatus . In exordio Pontificatus sui concordiam Sacerdotii & Imperii statuere pro viribus studuit Summus ille Pontifex , & in eam inclinare videbatur *Fridericus* Imperator , missis ad Pontificem Legatis , & propositis incundæ pacis legibus , quas *Matthæus Parisius* recenset ad annum MCCXLIV. At *Fridericum* , superbi , levisque animi Principem , citò pœnituit , quòd se ad parendum Summi Pontificis mandatis , præstito per Oratores suos Sacramento , obstrinxisset , propositis pacis conditionibus stare

noluit, Summo Pontifici paravit insidias, seseque apertum prodidit Ecclesiæ inimicum. Quapropter, *Innocentius IV.* ut evaderet insidias, quas implacabili odio ei struebat *Fridericus* Imperator, in Gallias, solitum Romanorum Pontificum Azilum, se recepit, ubi à *Ludovico*, Rege Sanctissimo, Summâ, quâ par erat, reverentiâ, ac magnifico apparatu exceptus, Oecumenicam Synodum Lugduni indixit anno MCCXLV. in qua in contumacem *Fridericum* Imperatorem excommunicationis & excommunicationis fulmina vibravit, sicut latius expendemus in quarto Colloquio, in quo de Conciliis habitis Sæculis XIII. & XIV. operosius disseremus. Mortuo *Friderico II.* Imperatore anno MCCL. *Innocentius IV.* Lugduno discessit, & in Italiam reversus est, ubi multos populos, qui *Friderici* Imperatoris partibus adhæserant, ad officium revocavit, *Ecelinum* tyrannum, & *Fridericianæ* persecutionis in Marchia Tarvisina incentorem & administrum, tanquam hæreticum prorsus vitandum, & Fidelium armis petendum, palàm denunciavit. *Conradum*, Imperatoris *Friderici* filium, hæredem paternæ tyrannidis, ut è Sicilia, quam occupabat, expelleret, Siciliæ Regnum *Carolo*, Andegaviæ & Provinciæ Comiti, Sancti Ludovici Galliarum, Regis fratri, certis conditionibus in Diplomate expressis, in feudum possidendum obtulit *Innocentius IV.* qui tamen susceptum consilium, ob absentiam Sancti Ludovici Regis cum perficere haud potuisset, Siciliæ ac Apuliæ Regnum *Henrico* Angliæ Regi in feudum obtulit pro *Eadmundo*, minore ipsius filio, ut testatur *Matthæus Parisius* ad annum MCCLIV. Maximo fidei apud gentes barbaras propagan-

gandæ studio flagravît *Innocentius IV.* In Prussiam siquidem, Norwegiam, Græciam, Bulgariam, Æthiopiam, Indiam, ad Jacobitas, Nestorianos, Tartaros, Saracenos, nec non ad Turcarum Sultanium misit Viros religiosos, præsertim Ordinis Fratrum Prædicatorum, qui Fidei Catholicæ doctrinam eis prædicarent atque instillarent. Quos verò fructus in istis Missionibus tulerint Religiosi illi Viri, opportuniùs ostendemus in Colloquio sexto, ubi de Monastica Disciplina nobis sermo erit. Hic dumtaxat breviter observabo *Innocentium IV.* ad reprimendos Hæreticos, qui in Lombardia, Romandiola, Marchia Anconitana, & Tarvisina id ætatis grassabantur, Sacræ Inquisitionis munus Fratribus Prædicatoribus demandasse. Obiit Optimus ille Pontifex Neapoli anno mccciv. die vii. vel, ut scribit *Ciaconius*, die xiii. Decembris, cum annos ix. menses v. & dies xiv. sedisset. Noster *Thomas Cantipratenfis* lib. 2. *De Apibus* c. x. num. xxi. asserit, hunc Summum Pontificem, ob rescissa Fratrum Mendicantium Privilegia à suis Decessoribus concessa, divinitus percussum fuisse paralyti, ac vocis officium ad mortem usque amisisse. Duplicem causam mortis *Innocentii IV.* assignat *Matthæus Parisius*. Prima est, quòd ægerimè tulerit Summus ille Pontifex, exercitum suum à *Conrado*, Rege Siciliæ, adversario suo, victum ac dissipatum fuisse. Altera est, quòd *Robertus* Lincolnensis in Anglia Episcopus (quem odebat *Innocentius IV.* & cujus ossa è tumulo eruere, & insepulta relinquere decreverat, nisi obstitissent Cardinales) in visione nocturna cuspide Baculi sui Pastoralis ipsum in latere iratus pupugerit, ex quo

ictu ait, cæpisse *Innocentium IV.* laborare pleuresi, quâ tandem extinctus est. Sed hæc omnia, quæ de obitu *Innocentii IV.* referût *Thomas Cantipratensis*, & *Matthæus Parisius*, somnia sunt ac mera commenta, quæ non solum accurati Historiæ Ecclesiasticæ Scriptores explodunt, & ad aniles fabulas rejiciunt, sed etiam falsi apertè convincuntur ex Epitaphio ejusdem *Innocentii IV.* quod legitur in Ecclesia Cathedrali Neapolitana, & his versibus conceptum est.

*Hic Superis dignus requiescit Papa benignus,
Latus de Flisco, sepultus tempore prisco.
Vir sacer & rectus sancto velamine tectus.
Ut jam collapsò Mundo temeraria passò
Sancta ministrari, Urbs posset quoque rectificari,
Concilium fecit, veteraque jura refecit.
Hæresis illisa, tunc extitit atque recisa.
Mænia direxit, rectè sibi credita rexit.
Stravit inimicum Christi Colubrum Fridericum.
Janua de nato gaudet sic clarificato,
Laudibus immensis Urbs tu quoq; Parthenopenfis,
Pulchra decore satis dedit hic tibi plurima gratis.
Hoc titulavit ita Umbertus Metropolita.*

Ordinem Servorum *B. Mariæ* approbavit *Innocentius IV.* & in Sanctorum album solemni ritu retulit *Edmundum* Cantuariensem Archiepiscopum; *Guilhelmum* Briocensem Episcopum in minori Britannia; *Stanislaum*, Cracoviensem Episcopum ac Martyrem, & *S. Petrum* Martyrem Ordinis Fratrum Prædicatorum, cujus vitam, à *Thoma Lentino* ejusdem Ordinis cœtaneo Scriptore editam, *Henschebnius* & *Papebrochius* inter Acta Sanctorum mensis Aprilis tomo 3. ad diem 29. reposuerunt.

D. Eò mihi charior semper erit *Innocentius*

tit IV. Pontificis Maximi memoria, quòd nuper legerim apud *S. Thomam* in *IV. Sententiarum*, *Distinct. xx. quæst. I. artic. IV. quæstionculâ III.* Summum illum Pontificem omnibus & singulis pro Galliarum Rege orantibus decem dierum Indulgentiam concessisse, quam postea ad centum dies *Clementem VII.* & ad unum annum *Leonem X.* extendisse testatur *Durantis* cap. 33. lib. 2. *De Ritibus Ecclesiæ*. Sed perge, si placet, alios memorare Pontifices, qui Sæculis XIII. & XIV. Romanam gubernarunt Ecclesiam.

M. Paucis post *Innocentii IV.* obitum diebus, *Raynaldus*, seu *Reginaldus* è stirpe Comitum Signiæ, Cardinalis Episcopus Ostiensis, Pontifex electus est, Vir jugi orandi studio, abstinentiæ laude, & mansuetudine singulari spectatissimus, dictus in Pontificatu *Alexander IV.* Exscindendis Albigenisum Hæreticorum reliquiis, & promovendæ Ecclesiæ Græcæ cum Latina unioni maximam sollicitudinem adhibuit Romanus ille Pontifex. *Alphonsum*, Castellæ Regem, sacram Expeditionem in Mauros adornantem, & *Orhocarum*, Bohemiæ Regem, contra Lituanos, aliosque Paganos in Poloniam irrumpentes, egregiè adjuvit, & contra omnes illos Catholicæ Fidei hostes Crucis vexillum explicari, & sacre militiæ Classicum personare iussit. Librum *Willelmi de Sancto Amore* adversus Religiosos Mendicantes editum, *De Periculis Novissimorum Temporum* inscriptum, damnavit *Alexander IV.* Ortas contra Fratres Prædicatores ac Minores turbas in Academia Parisiensi, cujus partem maximam *Willelmus de Sancto Amore* sibi conciliaverat, compescuit, eosque, quorum pietatem ac doctrinam probè nove-

rat,

rat, Magistrorum Collegio, è quo fuerant eje-
cti, restituit; rescissis omninò durioribus eorum-
dem Magistrorum Sacularium contra prædictos Re-
ligiosos Statutis. Causam harumce turbarum, quæ
contra Fratres Prædicatores ac Minores in Aca-
demia Parisiensi excitatæ sunt, aperiam in sequenti
Colloquio. Hic tamen breviter observabo, Egaf-
sium Bulann, qui tomo 3. *Historiæ Universitatis Pa-
risiensis* hanc invidiosam litem repetere, & obliga-
ta jampridem vulnera de industria refricare voluit,
non eâ, quâ par est, reverentiâ loqui de *Alexan-
dro IV.* eo solo nomine, quòd Summus ille Pontifex
Dominicanos, & Minoritas contra eorum in Aca-
demia Parisiensi æmulos Apostolicâ autoritate,
defenderit. Hæc quippè sunt prædicti Scriptoris
verba stomachi & querimoniarum plena, quæ le-
guntur pag. 355. *Quis non fremat, inquit, cum audit
tot Bullas, tam ob levem causam datas? tot fulmina
manu Apostolica emissa? Quis non miretur, Summum
Pontificem, alioqui virum optimum, ita ab inimicis
Universitatis induci potuisse, ut tam vehementer per-
sequeretur Academiam Parisiensem, quòd nollet alte-
rius Ordinis, & Instituti homines in suum consortium
admittere? Tunc enim Academici damnatum fuisse
Guillelmi à Sancto Amore libellum minus impatienter
ferebant: sed violari ab istis hominibus, seu Mendi-
cantibus, sua Privilegia, libertates imminui, Statuta
infringi, cum inimicis & ab inimicis cogi, conversari,
omnia habere cum acerrimis persecutoribus communia,
uno verbo cum percussoribus societatem inire compelli,
hoc verò, supra quàm dici potest, indignanter ferebant.
Et pag. 363. hæc habet: Anno MCCLXI. octavo Kal.
Junii Alexander IV. moritur: quo mortuo pacatiores
fue-*

fuerunt Musæ Parisienses, quas toto sui Pontificatus tempore durissimè tractavit & persecutus est ob Willelmum de Sancto Amore Mendicantium malleum, quos ille tuebatur. Itanè Alexander IV. toto sui Pontificatus tempore Academiam Parisiensem persecutus est, quia Willelmi à Sancto Amore Doctoris Parisiensis libellum contra Religiosos Mendicantes temerè scriptum, & erroribus scatentem proscripsit, & Dominicanos ac Minoritas injustè vexatos, præcipuè Albertum Magnum, Thomam Aquinatem, & Bonaventuram, fulgentia suorum Ordinum, ac totius Ecclesiæ Lumina strenuè tutatus est, Sanctosq; illos Doctores, qui non sanctimonix solum, sed & doctrinæ splendore toti Orbi prælucebant, Magistrorum Parisiensium Collegio, è quo expulsi fuerant, auctoritate Apostolicâ restituit. Itane, inquam, Alexander IV. Academiam Parisiensem persecutus est, qui in suis ad eam scriptis Epistolis, quæ legi possunt apud Spondanum ad annum MCCLV. multis encomiis illustribus illam celebrat, eamque appellat Lignum vitæ in Paradiso Dei: Lucernam fulgoris in domo Domini, sæcundam eruditionis parentem: fulgidum Solem doctrinæ, qui per totum Orbem claræ intelligentiæ lumen fundens, depellit ignorantia tenebras, ruditatis abstergit caliginem, aufert imperitiæ nubilum, promit illuminationis auroram, cognitionis pandit serenum, & lucidum scientiæ monstrat diem, rigat documentorum suorum fluentis paradisi omnem terram, & bonorum influentia dogmatum instruit & imbuit universum, copiosis, & dulcibus sapientiæ fructibus reficiens Ecclesiam, Mundum pascens; quia de Parisiis, velut de parentis sinu partus scientiarum plurimi prodeunt, de ipsa rectæ ac perfectæ disciplina soboles

boles gignuntur . Hinc procedit inclyta Doctorum pro-
sapia , hinc alta progenies provenit peritorum , quibus
Christianus illustratur populus & Fides Catholica ro-
boratur . Profectò , quicumque tot encomia , qui-
 bus *Alexander IV.* Pontifex Maximus Academiam
 Parisiensem prosequitur , semoto omnium partium
 studio , & abdicatis omnibus præjudiciis expendere
 haud gravabitur , confestim nullo negotio fatebi-
 tur , Summum illum Pontificem impensè Acade-
 miam Parisiensem coluisse , & de eâ optimè meri-
 tum fuisse , dum Fratrum Prædicatorum ac Mino-
 rum , qui ex ipsius gremio fuerant exclusi , patroci-
 nium suscepit , eosque restitui jussit . Mortuus est
Alexander IV. octavo Kalendas Junii anni MCCLXI.
 cùm annos sex , menses quinque , & dies totidem
 Ecclesiam Romanam gubernasset .

Post *Alexandri IV.* obitum Sedes Apostolica
 duobus mensibus & totidem hebdomadibus cùm
 vacasset , inauguratus est die iv. mensis Septembris
 anni millesimi ducentissimi sexagesimi primi Pon-
 tifex Maximus *Urbanus* hujus nominis IV. dictus
 ante Pontificatum *Jacobus Pantaleon* , natione Gal-
 lus in Trecensi Urbe humili loco natus , utpotè Su-
 toris veteramentarii filius , sed virtutibus & doctri-
 nâ per inferiores dignitatum gradus ad Apostoli-
 cam Sedem elatus . Primùm siquidem fuit Canoni-
 cus Tricassinus , dein Laudunensis Archidiaconus ,
 postea Virdunensis Episcopus , *Alexandri IV.* in Po-
 meriana , Prussia , universaque Germania Legatus ;
 mox Patriarcha Hierosolymitanus , ac tandem
 Summus Pontifex . Sub illius Pontificatus initium
Michaël Paleologus Imperium Constantinopolita-
 num Latinis eripuit , & ad Græcos revocavit . Quod
 ægrè

ægrè ferens Romanus Pontifex, sacram Expeditionem indixit, quam ut averteret *Michaël Palæologus* Græcorum Imperator, Ecclesiæ Græcæ cum Latinæ conjunctionem se vehementer optare, missisque Oratoribus, quos summâ lætitiâ & humanitate excepit *Urbanus IV.* sacræ illud unionis negotium procurare, totisque viribus promovere se velle significavit. *Manfredum* Siciliæ Tyrannum anathemate perculit *Urbanus IV.* Eum in Campaniam cum Saracenorum auxiliaribus copiis irruipientem, contracto Crucesignatorum exercitu fugavit, Regnoque abdicavit, quod in *Carolus* Andegavorum Comitem, *S. Ludovici* fratrem, de Cardinalium consilio transtulit anno MCCLXIII. Festum Corporis Christi quotannis in universa Ecclesia ritu solemnè celebrandum instituit idem Summus Pontifex. *S. Richardum* Episcopum Cicestriensem in Anglia in Sanctorum album retulit, cujus Sancti Episcopi vitam duplicem edidere *Henschenius* & *Papebrochius* inter Acta Sanctorum mensis Aprilis, unam ex *Joanne Capgravio* acceptam & descriptam ab Autore Anonymo, alteram à *Fr. Radupho* Ordinis Prædicatorum concinnatam. Monialibus Ordinis *S. Clare* Regulam tradidit *Urbanus IV.* mitiorem, & teneri sexus infirmitati accommodatiorem eâ, quam eis dederat *S. Franciscus*. Hinc Sanctimoniales illius Ordinis, quæ hanc *Urbani* Pontificis Maximi Regulam profitentur, *Urbanistæ* propterea nuncupantur. Obiit *Urbanus IV.* sexto Nonas Octobris anni MCCLXIV. postquam annos tres, mensem unum & dies quatuor Ecclesiam Romanam rexisset, Vir sanè magni animi, eximie pietatis, & dignus diuturniori Pontificatu. Post Interpontificium

cium quinque mensium ab obitu *Urbani IV.* electus est Pontifex Maximus *Guido*, Episcopus Sabinensis, dictus in Pontificatu *Clemens IV.* Hic fuit natione Gallus, qui post mortem uxoris, quam duxerat, & ex qua duas filias susceperat, Sacris Ordinibus initiatus est, ac primùm Podiensis, sive Aniciensis Archidiaconus, indèque ejusdem Ecclesiæ Episcopus, ac paulò post Archiepiscopus Narbonensis, & ab *Urbano IV.* Cardinalis Episcopus Sabinensis creatus fuit, demùmque ob vitæ integritatem, & in rebus agendis solertiam, omnium Cardinalium suffragiis electus est Romanus Pontifex, dum absens esset, & à Legatione Anglicana, ad quam ab *Urbano IV.* missus fuerat, rediret. Hoc nuncio in itinere accepto, Viterbium pervenit, & die *xxi.* mensis Februarii Cathedræ S. Petri Sacrà anni *mcclxv.* coronatus est. Primo statim Pontificatus ingressu rerum contemptus Mundi, & incredibilis erga propinquos suos moderationis præbuit exemplum. Scripsit siquidem integerrimus ille Pontifex Epistolam ad *Petrum Grossum* nepotem suum, quâ ei significat, se nullo pacto velle, ut aliquis ex suis agnatis obtentu ipsius sublimationis infletur, sibiq; non licere, quod suum non esset, dare propinquis. Promittit tamen se daturum sorori *Petri Grossi*, ad quem scribebat, trecentas libras Turonenses, si ipsa filio simplicis militis, hoc est, nobilis, desponsaretur; si verò altiores nuptias ambiret, nec unicuique denarium largiturum. Hujus propositi adeò tenax fuit Sanctissimus ille Pontifex, ut non solum duas filias, quas, ut diximus, ante Pontificatum susceperat, innuptas reliquerit, sed etiam filio fratris sui Clerico, & tres Canonici possidenti jussit,

ut, duobus dimissis, quem maximè optaret, unicum retineret. Hujus Summi Pontificis, qui carni & sanguini nunquam acquievit, Epistolam ad *Petrum Grossum de Sancto Egidio* nepotem suum edidit in suis *Annalibus Odoricus Raynaldus*, eamque Collectores Conciliorum inseruerunt tomo 11. pag. 830. Verùm, qui in propinquos suos beneficia sic temperabat *Clemens IV.* Pontifex Maximus, in proximum & pauperes summæ liberalitatis erat, & in emergentibus temporum difficultatibus Ecclesiasticas opes pro Ecclesiæ utilitate profundeabat. Siciliæ Regnum *Carolo Andegavensi*, *S. Ludovici Galliarum Regis* fratri, Apostolico jure donavit, & reportatam ab eodem *Carolo*, novo Siciliæ Rege, insignem victoriam, in qua deleti sunt Gibellini, *Manfredus* Siciliæ Tyrannus cæsus, ejus uxor, filii, ac præcipui Duces capti, gratulatus est idem Summus Pontifex, & *Conradinum* Siciliæ Regnum affectantem anathemate perculit. Accepto de calamitoso Christianorum in Syria statu, & Soldani Babylo-nii progressibus nuncio, omnes Principes Christianos, sed præsertim *S. Ludovicum* Galliarum Regem ad succurrendum, bellumque Sacrum in Syria instaurandum vehementer adhortatus est, & negotium habitum sub decessore suo *Urbano IV.* de Unione Ecclesiæ Græcæ cum Latina, missis ad *Michaelem Palæologum* Græcorum Imperatorem Viris Religiosis ex Prædicatorum Ordine Apocrisariis, promovere ac perficere in votis habuit. Ita Juris Disciplinam exactè didicerat *Clemens IV.* Pontifex Maximus, ut *Durandus* eum *Lumen juris*, *Platina Jurisconsultum totius Galliæ sine contentione primum*, & *Onuphrius Jurisconsultorum peritissimum*

appellent. Viros doctos impensè coluit, & Sancto *Thoma Aquinati* Neapolitanum Archiepiscopatum obtulit, quem Sanctissimus ille Doctor eximiâ, sed sibi congenitâ humilitate, constantè recusavit. Denique, omnes Sanctissimi Pontificis numeros postquàm explevisset *Clemens IV.* obiit Viterbii in Vigilia S. *Andrea* anni MCCXLVIII. & in ea urbe in Ecclesia Fratrum Prædicatorum sepultus est. Rexit Ecclesiam tribus annis, mensibus novem, diebus viginti quinque. Post mortem *Clementis IV.* Sedes Apostolica, ob varia, contrariaque Cardinalium studia vacavit annos duos, menses novem & dies duos. Tandem sex Cardinales, in quos ceteri alii ejusdem Collegii omnem suam novi eligendi Pontificis auctoritatem, edito Compromisso, refuderant; elegerunt *Thealdum*, seu *Theobaldum*, Placentinum, Archidiaconum Leodiensem, qui tum temporis cum Christiano exercitu in Syria degebat. Huic electioni factæ Kalendis Septembris anni MCCLXXI. omnes Cardinales lubentissimè unore, unâ mente, communibusque suffragiis consenserunt, ac *Thealdum* Romam è Syria reversum VI. Kalendas Aprilis anni MCCLXXI. in Basilica S. Petri Romanum Pontificem, dictum *Gregorium X.* inaugurarunt. In res Palæstinæ plurimùm intentus fuit Summus ille Pontifex, & sicut, è Syria antequam discederet, promiserat his verbis: *Si oblitus fuero tui Hierusalem, oblivioni detur dextera mea*, omnem adhibuit sollicitudinem, ut subsidia nova Christianis in Oriente militantibus suppeditarentur, & ut Græci, quibus *Michaël Paleologus* imperabat, deturbato è Solio Cōstantinopolitano *Baldvino*, ultimo ex Latinis Cōstantinopolitanq Imperatore,

tore, ad fidei, & Communionis Apostolicę Sedis unitatem revocarentur. Metuebat quippè, ut jam observavimus, *Michaël Paleologus*, novus Græcorum Imperator, Principum Latinorum adversus se conspirationem, quam ut à se dispellere studeret, *Gregorium X.* Romanum Pontificem novâ fidei professione, & Ecclesię Gręcę cum Latina unione sibi conciliavit. Eam ob rem, *Gregorius X.* Concilium Oecumenicum Lugdunense II. celebravit anno MCCLXXIV. in quo Gręci Spiritus Sancti à Patre Filioque processionem festis vocibus agnoverunt, Terrę Sanctę decreta sunt auxilia, & sancita saluberrimis Statutis Ecclesię Disciplina. Sed de hoc Concilio Generali Lugdunensi secundo uberius in quarto Colloquio differemus. *Rodulphi* Imperatoris electionem confirmavit *Gregorius X.* & *Alphonso* Castellę Regi suasisit, ut Imperii juribus cederet, sicut in superiori Colloquio observavimus. Italię Provinciis ac Civitatibus pacandis, & Gibellinorum, Guelforumque factionibus, quibus tota Italia perstrepebat, extinguendis, totum se dedit Summus ille Pontifex, & in id præsertim incubuit, ut Christianorum Principum arma stringerentur in fidei hostes, maximè Saracenos, ad quos profligandos scripsit ad *Philippum III.* Galliarum Regem, ut subsidiarias copias in Syriam mitteret, eidem Regi postea gratulatus est, quòd sumptis Crucis Insignibus, Sacram Expeditionem in Syriam mitteret, eique Gallicani Cleri decimas concessit, ad conficiendum contra Saracenos bellum necessarias. Mortuus est *Gregorius X.* Aretii in Tuscia die x. Januarii anni MCCLXXVI. cùm sedisset annos ab electione quatuor, menses quatuor, & dies decem; à Conse-

cratione verò tres annos, novem menses, & dies quindecim. Eum miraculis post mortem claruisse, testantur *Ptolomæus Lucensis*, & *S. Antoninus*. Idem etiam legitur in Monumentis Aretinæ Ecclesiæ, & in Vaticano Codice à nostro *Bzovio* in Annalibus Ecclesiasticis laudato.

D. Fuitne diuturnior Pontificatus Successoris *Gregorii X.*?

M. *Innocentius V.* *Hadrianus V.* & *Joannes XX.* qui post *Gregorium X.* Sedem Romanam tenuerunt, brevissimum Pontificatum gesserunt. At enim, post *Iusta Gregorio X.* à Cardinalibus, ut moris est, persoluta, *Petrus de Tarentasia*, Episcopus Ostiensis, ex Ordine Fratrum Prædicatorum assumptus, vitæ integritate & præcellenti eruditione præditus, electus fuit Romanus Pontifex, dictusq; *Innocentius V.* quem acerba mors sexto mense Pontificatus per unum alterumque diem inchoato rapuit, & spes ingentes ab Ecclesia de illius regimine conceptas præcidi die *xxi i. Junii* anni *mcclxxvi*. Præter singularem eruditionem, librorum, quæ adhuc supersunt monumentis, contestatam, paremque morum sanctitatem, formam & pulchritudinem dignam Imperio, quâ sui Sæculi hominibus præstabat *Innocentius V.* Pontifex Maximus, multis aliis præclarissimis dotibus, ex quibus quamplurima in Rempubliam Christianam bona derivarunt, in Ecclesia præfulsit, eaque in Pontificatu prudenter feliciterq; peregit, quæ multorum annorum æquare & implere spatia possent. *Innocentio V.* successit *Ottobonus Patria Genuensis*, Diaconus Cardinalis Tituli Sancti *Hadriani*, ob idque dictus *Hadrianus V.* cujus Pontificatus brevissimus fuit. Obiit siquidem Vi-

ter-

terbii altero ab electione sua mense necdum expleto, die videlicet XVIII. mensis Augusti an. MCCLXXVI. *Hadrianum V.* in Pontificatu excepit *Petrus Juliani* natione Lusitanus, Cardinalis Episcopus Tusculanus, dictus *Joannes XX.* Fuit hic Pontifex eximie eruditiois vir, & in Physicis præsertim, ac in Medicinæ Disciplina versatissimus. Ad pacem inter Principes Christianos conciliandam, ad debellandos Fidei Christianæ hostes, & ad promovendum S. Unionis Ecclesiæ Græcæ cum Latina negotium omnes suas curas convertit. Hinc *Philippum* Galliarum Regem ad Syriacam Expeditionem, quam voverat, perficiendam, missis Legatis, vehementer adhortatus est. *Petro* Aragonum Regi decimas ad propulsandos Mauros, qui in ejus Regnum irruperant, concessit, sicut & *Guidoni* Flandriæ Comiti, qui Syriæ defensionem arma consecravit. Misit etiam idem Summus Pontifex Legatos Apostolicos *Jacobum* ac *Salvium* Ordinis Fratrum Prædicatorum ad *Michaelem Palæologum* Græcorum Imperatorem, & ab eo obtinuit, ut juratam à suis Oratoribus in Concilio Generali Lugdunensi II. utriusque Ecclesiæ Græcæ & Latinæ unionem coram Legatis Apostolicis confirmaret, ut liquet ex Litteris ejusdem Imperatoris ab *Odorico Raynaldo* relatis ad annum MCCLXXVII. Num. XXI. Viros litteratos, teste nostro *Ptolomæo Lucensi*, singulari affectu complectebatur, fovebat, beneficiis cumulabat *Joannes XX.* quem alii appellant *Joannem XXI.* quique tam infelici, quam inopinata & præmatura morte extinctus est. Soluta liquidem Camera suæ contignatione, eaque subinde corridente, inter ligna & lapides collisus ac oppressus est, indeque ægrè retractus, sex dumtaxat

dies post casum vixit, obiitque Viterbii mense Maio anni MCCLXXVII.

D. Ex tam deplorando Pontificis casu probè intelligo, quàm fluxæ & instabiles sint res humanæ, quàmque lubrica & anceps sit earum conditio. Sed, ne hujus funesti & acerbi interitus intempestivo luctu diutiùs te detineam, perge quæso, aliorum Pontificum, qui decimo tertio Sæculo Ecclesiam Romanam gubernarunt, texere Catalogum.

M. Protractâ post *Joannis XX.* obitum ad sex menses Romani Pontificis electione, tandem electus est *Joannes Cajetanus*, patriâ Romanus, ex Illustrissimâ Ursinâ Prosapiâ oriundus, cui adhuc puero Sanctus *Franciscus* supremam Pontificatus dignitatem fuerat auguratus, atque Ordinem commendarat suum. Diaconus erat Cardinalis *S. Nicolai in Carcere Tulliano*, à quo sibi in Pontificatu nomen sumpsit, dictusque est *Nicolaus III.* Tanta fuit hujus Summi Pontificis morum æquabilitas, & in rebus gerendis singularis prudentia, ut vulgò *Compositus* appellaretur. Electus est die *S. Catharinæ Martyri* Sacrà anni MCCLXXVII. & die *S. Stephani Protomartyris* ejusdem anni consecratus. *Alphonsum* Hispaniæ, & *Philippum* Galliarum Reges inter se acerrimè dissidentes, missis ad utrumque Legatis, conciliare pro viribus studuit, quod tamen exitu caruit. Florentinorum dissensiones sedavit Summus ille Pontifex, & extinctis Guelphorum, Gibellinorumque factionibus, pacem, cujus erat studiosissimus, in Italiam feliciter revocavit. *Ladislaum* Ungariæ Regem, Cumanis Paganis faventem, injectis Censurarum minis ad officium reducere curavit. Ut Ecclesiæ Græcæ cum Latina conjunctio
in

in Concilio Lugdunensi facta, firmaretur; strenuam navavit operam, datis pluribus ad *Michaëlem Palæologum* Græcorum Imperatorem, ad *Andronicum* ejus filium, ad Patriarcham Constantinopolitanum, cæterosque Præsules Græcos Litteris. De Judæorum, & Hæreticorum conversione multum sollicitus verbum Dei Judæis prædicandi Fratribus Prædicatoribus Provinciam demandavit, variaque pœnarum genera in Catharos, aliosque Hæreticos promulgavit. Regulam *Fratrum Minorum* explicuit idem Summus Pontifex celebri illa Constitutione, quæ incipit: *Exiit qui seminat*, quæ rerum omnium, quæ Ordini *Minorum* concederentur, usu dumtaxat Fratribus permissio, dominium Sedi Apostolicæ reservavit. Quod dominium *Joannes XXI.* quem alii dicunt *XXII.* in Extravag. ad *Conditorem*, ut Commentitium & nullius utilitatis abdicavit. Obiit *Nicolaus III.* in Castro Suriano Apoplexiâ ictus in Octava Assumptionis Deiparæ Virg. ann. MCCLXXX. cum annis duobus & mensibus novem, minus duobus diebus, Romanam Ecclesiam rexisset. Ejus Corpus Romam delatum in Basilicam S. Petri in Sacello, quod in honorem S. *Nicolai* excitaverat, conditum est. Sub Pontificatu hujus Papæ *Nicolai III.* hoc est, anno MCCLXXIX. piâ *Caroli II.* Salernitani Principis, & Siciliæ Regis filii diligentiam Sacrum B. Mariæ Magdalenzæ Corpus in Gallo-Provincia, seu in Sancti *Maximini* Villa fuisse inventum testantur *Bernardus Guido*, *Jordanus*, & *Ptolomæus Lucensis*, quibus ipse etiam lubentissimè subscribam, & præposteram eâ de re *Joannis Launoii* (cui, ob nimiam ventustissimos quosque Sanctos è Cælo detrudendi pruriginem, *Sanctorum everforis* cognomen ad hæ-

fit) dubitationem explodi meritò debere censeam; non possum attamen, ut liberè dicam, quin ceù fictitium repudiem miraculum, quod *Sylvester Prieras*, & *Bzovius* ad annum MCCLXXXIII. referunt, liberationis *Caroli II.* Salernitani Principis è carcere Barcinonensi, in quo ab *Alphonso* Aragonum Rege detinebatur, ejusque Narbonam usque mirabilis translationis, nullâ ope humanâ factæ, sed solâ virtute *B. Mariæ Magdalenæ*, quæ ei indicavit, quo loco ejus reliquiæ delitescerent, utque inventas honorificentius collocaret, ac ibi Cœnobium Fratribus Prædicatoribus extrueret, dotaretq; præcepit. Hoc, inquam, miraculum *Caroli II.* Salernitani Principis è carcere Barcinonensi liberationis virtute *B. Mariæ Magdalenæ* factæ, loco fabulæ haberi debere, ex eo maximè evincitur, quòd inventio Corporis *B. Mariæ Magdalenæ*, ejusque in loco honoratori, jussu laudati Principis Salernitani *Caroli II.* collocatio facta fuerit, ut convenit inter omnes Historicos, anno MCCLXXIX. Liberatio verò *Caroli II.* Principis Salernitani contigerit dumtaxat anno MCCLXXXVII. sub Pontificatu *Nicolai IV.* sicut disertè testantur Scriptores coevi, & probatissimæ fidei *Guillelmus Nangius*, ad ann. MCCLXXXVIII. *Paulus Æmilius* in *Philippo Pulchro*, *Joannes Villanus* lib. 7. cap. 114. *Ptolomæus Lucensis* cap. 24. *Historiæ*, *S. Antoninus*, *Platina* in *Nicolao IV.* *Mariana* lib. 14. cap. 14. & *Walsinghamus* ad ann. MCCLXXXIX. Addo etiam, liberationem *Caroli II.* Principis Salernitani è carcere Barcinonensi contigisse sub Pontificatu *Nicolai IV.* Summi Pontificis, hoc est, anno millesimo ducentesimo octogesimo octavo, apertè constare ex Epistola ejusdem Papæ *Nicolai IV.* ad
Phi-

Philippum Pulchrum Galliarum Regem, cujus fragmenta Annalibus Ecclesiasticis inseruit Odoricus Raynaldus ad annum MCCLXXXVI II. Num. xvi.

D. Famam *Nicolai III.* Pontificis Maximi duplici potissimum ex capite proscindebat nuperrime morosus quidam ac superciliosus Censor. Ei siquidem vitio vertebat, quod conscius fuisset conjurationis adversus *Carolus* Siciliæ Regem à *Joanne Prochita*, viro sceleratissimo, initæ cum *Petro Rege Aragonum*, & *Michaële Palaeologo Græcorum Imperatore*, de invadenda Sicilia. Quam Conjurationem nefariè susceptam, cæsis postea omnibus ad unum in tota Sicilia Francis per immanitatem post hominum memoriam maximam executi sunt. Præterea, dictabat idem Censor, *Nicolaum III.* in sua Constitutione, *Exiit qui seminat*, quæ legitur in Sexto, Tit. *De Verborum significatione*, definiisse, abdicationem omnium rerum tam in speciali, quam in communi, verbo & exemplo Christum Dominum docuisse, quod tamen erroneum & hæreticum esse *Joannes XXI.* quem alii dicunt *XXII.* in sua Constitutione, quæ incipit his verbis: *Cum inter nonnullos*, decretorio judicio declaravit. Ab his duobus accusationis Capitibus *Nicolaum III.* vindicandi tibi onus in præsentia incumbit.

M. Proclive est hæc duo accusationis Capita amoliri à *Nicolao III.* Pontifice Maximo, ejusque famæ, quam maledico dente carpere ausus est asperimus ille Censor, integritatem demonstrare. Quod enim primum Caput spectat, nefarium videlicet de Gallorum in Sicilia cæde consilium cum *Nicolao III.* communicatum, oppidò falsum est, sicut colligitur ex locupletissimo *Ægidii* Cardinalis Vi-

terbiensis testimonio: *Cædes Gallorum*, inquit, in *Sicilia facta* (*Vesperas Siculas dicunt*) *turbari in Italia omnia, Nicolao extincto custode pacis*. Non potuisset autem *Ægidius* Cardinalis appellare *Nicolaum III.* Custodem pacis, si reverâ Summus ille Pontifex prædictæ conjurationis, & tragicæ proditiōis conscius fuisset. Non me latet Scriptores Italos, *Ricordanum, Villanum, S. Antoninum, Blondum, Fazellum, Summontium* asserere, *Nicolaum III.* sollicitatum à *Joanne Prochita* huic conjurationi manus dedisse, eò quòd infensus esset *Carolo* *Siciliæ Regi* ob repulsam, quam passus fuerat cum quibusdam verborum aculeis, dum ab ipso postulasset, ut neptem suam *Ursino* nepoti uxorem traderet. At illos Scriptores Italos falsis rumoribus temerè & mendaci famâ in vulgus sparsis plus æquo credidisse existimo, quia verosimile non est, *Nicolaum III.* qui ab ipso Pontificatus sui exordio pacem & concordiam inter *Carolum* *Siciliæ Regem*, & *Michaëlem* *Palaologum* Imperatorem *Græcorum* stabilire pro viribus satagit, quique probè norat, decessores suos *Urbanum IV.* & *Clementem IV.* excommunicato *Manfredo*, & omni jure Regni *Siciliæ* exuto, Regnum *Siciliæ* detulisse *Carolo* Comiti *Andegavensi*, *S. Ludovici* *Galliarum* Regis fratri, *Francosque* nihil minùs cogitantes enixis precibus ad illud Regnum suscipiendum sollicitasse, non est, inquam, verosimile, *Nicolaum III.* tam facilè mutasse sententiam, & non solum *Carolum* *Siciliæ* Regno, quo à Romanis Pontificibus donatus fuerat, privare, verùm etiam iniquæ contra omnes Gallos in *Siciliæ* Regno degentes conjurationi assensum præbere voluisse. Sed laudatos Scriptores Italos deceptos fuisse, dum

nar-

narrant *Nicolaum III.* confcium fuisse conjurationis adversus *Carolum* Siciliæ Regem, ex eo maximè suaderi potest, quòd iidem Scriptores similiter referunt, *Martinum II.* vulgò *IV.* appellatum; *Nicolaï III.* successorem, consensisse privato certamini, Burdegalæ, centum Equitibus utrinque concurrentibus, committendo, ad quod *Petrus* Aragonum Rex, qui Siciliam invaserat, provocavit *Carolus* Siciliæ Regem. Quod tamen falsum esse (inquit *Spondanus* ad annum MCLXXXI.) aperte probant litteræ ab eodem *Martino* Romano Pontifice ad *Carolus*, quibus acerrimè eum redarguit, quòd adeò temerariè consenserit hujusmodi damnabili & damnato certamini, eique sub debito ipsi Pontifici, & Ecclesiæ Romanæ fidei & homagii omninò injunxit, ut ab eo sub pœna excommunicationis abstineret, & omnes, qui ei auxilio, consilio, vel favore assisterent, etiam si Regiâ vel Imperiali dignitate fulgerent, eadem censurâ irretitos declaravit. Sicut ergo audiri haud debent Scriptores Itali, dum asserunt *Martinum* Romanum Pontificem pacto Reges inter Aragoniæ & Siciliæ singulari certamini consensisse, ita nobis sublesta eorundem Scriptorum fides esse debet, dum scribunt, *Nicolaum III.* conjurationis adversus *Carolus* Siciliæ Regem, & iniquissimè Gallorum cædis confcium fuisse.

Nec minus à vero aberrarunt hi, qui putarunt *Nicolaum III.* definiisse in sua Constitutione, quæ incipit. *Exiit qui seminat*, Christum rerum aliquarum, earum præsertim quibus utebatur, vel quas ad suos & suorum Discipulorum usus accipiebat, nullum dominium habuisse. Id certè in prædicta Constitutione non decernit *Nicolaus III.* sed solum asse-

afferit, Christum abdicationem absolutissimam dominii rerum temporalium tam immobilium, quàm mobilium, in communi & in speciali, verbo & exemplo docuisse, quod sanè verissimum est. Subdit tamen idem Summus Pontifex, Christum, præter hoc vitæ genus, aliud, dùm viveret, suo commendasse exemplo, si quidem Loculos cum Apostolis possidebat, ex quibus emi jubebat necessaria ad communem vitæ sustentationem, & pauperibus etiam eleemosynam erogari. Sic enim ait Summus ille Pontifex: *Infirmorum personam Christus suscepit in Loculis, & infirmorum imperfectionibus condescendit*. Hoc est, Christus Dominus dignatus sese accommodare imbecillitati & imperfectioni naturæ nostræ multis necessariò sustentandæ subsidiis, quæ non nisi pecuniis comparari possunt, Loculos humano more, seu cum vero dominio, habere voluit. Non negat igitur *Nicolaus III.* Christum habuisse aliquandò rerum aliquarum, earum maxime quibus utebatur, dominium, ac subindè nulla est pugna inter hunc Romanum Pontificem, & *Joannem XXI.* quem alii dicunt *XXII.* quia *Joannes XXI.* in sua Constitutione *cùm inter nonnullos*, definivit dumtaxat Hæreticum esse negare, Christum & Apostolos aliquid habuisse in communi, sicut tum temporis pervicaciter docebant quidam Minoritæ, qui de sua paupertate ambiciosius, quàm religiosius disceptantes, magno animorum æstu Christum & Apostolos nunquam aliquid in communi possedisse pertendebant, & omne à se bonorum dominium amoliebantur, atque in Sanctam Sedem rejiciebant, usum sibi tantum reservantes, sicut opportuniùs in sequentibus Colloquiis expendemus.

Va-

D. Vacavitne Sedes Pontificia post *Nicolai III.* obitum, qui, uti annotasti, contigit anno MCCLXXX.

M. Sunt quidam Dominicani Scriptores, qui post *Bzovium* ejusdem Ordinis, Annalium *Baronii* continuatorem, asserunt, *Joannem Vercellensem* Ordinis Prædicatorum Generalem Magistrum, mortuo *Nicolao III.* Pontifice Maximo, electum fuisse in Romanum Pontificem; Sed, cum absens electus fuisset, antequam suæ promotionis nuncium accepisset, vitâ functum esse. Nolim quidem ipse Familiæ Dominicanæ, cui nomen dedisse eximie felicitatis, & summo semper honoris loco ducam, gloriam deprimere, quam potius, quamdiu suppetent vires, promovere curæ ac cordi jugiter habeo; ad Historiæ tamen Ecclesiasticæ elucidationem ingenuè hic fatebor, hanc creationem *Joannis Vercellensis* in Romanum Pontificem post mortem *Nicolai III.* meram esse fabulam, quæ non solum *Ptolomæi Lucensis*, & *Sancti Antonini* silentio aliorumve gravissimorum Auctorum, qui de Romanis Pontificibus scripserunt, aut Ecclesiasticam Historiam concinnarunt, auctoritate convincitur, sed etiam cum ratione temporum cohærere minimè potest. At enim, *Nicolaus III.* ut jam diximus, mortuus est anno MCCLXXX. & *Joannes Vercellensis* obiit anno MCCLXXXIII. ut videre est in Chronicis Ordinis Prædicatorum, & in Scripturis ejusdem Ordinis. Si ergo *Joannes Vercellensis* immediate post obitum *Nicolai III.* in Romanum Pontificem fuisset electus, omni procul dubio, suæ electionis nuncium accepisset, cum è vita dumtaxat migrarit anno MCCLXXXIII. quo anno nulla fieri potuit Pontificis Romani electio, Sedente jam *Martino*

tino II. qui vulgò *IV.* appellatur. Hac itaque misſâ fabulâ, quâ non eget Familia Dominicana veris & innumeris, ut ostendam in sexto Colloquio, cumulata honoribus, certum & indubitatum est apud omnes Historicos, post *Nicolai III.* obitum Sedem Apostolicam, ob tumultus occasione Hannibaldensium & Urſinorum æmulationis exortos, per sex menses vacasse, & tandem communibus suffragiis electum esse in Romanum Pontificem *VIII.* Kalend. Martii, seu die Cathedræ *Sancti Petri* sacrâ, anni *MCCLXXXI.* *Simonem de Bria*, natione Gallum, Tituli *Sanctæ Cæcilie* Presbyterum Cardinalem, qui in Ecclesia *Sancti Martini* Turonensis cum olim, Canonicus fuisset, & sacri ærarii Præfectus, *Martinus* appellari voluit. *Martinus II.* juxtâ ordinem Romanorum Pontificum, qui eo nomine donati sunt, nuncupari deberet, sicut cum vocat *Henricus Stero* in Annalibus, usus tamen obtinuit, ut dicatur *Martinus IV.* moribus generosus & magnanimus, & à cupiditate pro se vel suis alienus, Ecclesiasticique Juris zelator, ut ait *S. Antonius*, qui etiam testatur, Summum illum Pontificem fratri suo, quî statim ac audierat creationis ipsius nuncium, ex Gallia ad ipsum gratulabundus advolaverat, modica tantum munera, & itineris expensas tribuisse, dicendo: *Bona esse Ecclesiæ, non sua, quæ in Conſanguineos profundere non liceret.* O sententiam auream, cedro dignam, ac marmori insculpendam! Pontificiam dignitatem, quam modestè de se sentiens, variis adhibitis excusationibus, declinare conatus fuerat, intrepidâ constantiâ sustinuit. *Michaëlem Palæologum*, Græcorum Imperatorem, ab unione cum Ecclesia Latina in Concilio Lugdunen-

si per Oratores suos juratâ , & proprio deinde Sacramento coram Legatis Apostolicis confirmatâ græca levitate recedentem anathemate perculit. Sicularum proditionem , & immanitatem à sæculis inauditam , quâ in ipsa Paschatis solemnitate, dum Campanæ ad Vespertinum Officium pulsarentur , (unde *Sicularum Vesperarum* nomen) omnes ad unum Gallos cujuslibet sexus , ætatis , conditionis & ordinis , indiscriminatim confoderunt , execratus est *Martinus* Papa . *Petrum* Aragoniæ Regem , nefariæ istius conjurationis participem , & Regni Siciliæ invasorem , diris solemnibus Ecclesiæ ritu devovit, eumque, Ecclesiasticas Censuras contemnentem, Regno Aragoniæ , & Cataloniæ ac Valentini Principatibus privatum edixit , & ejus subditos à juramento fidelitatis absolvit : Aragoniæ verò Regnum , aliasque *Petri* Ditiones , *Philipppo* , Galliarum Regi , adjudicavit , ut *Carolo* *Valesio* , filio suo minori , ex ipsius *Petri* sorore suscepto , eas armis vindicaret , sub clientela tamen Sedis Apostolicæ , certis conditionibus possidendas . Anathematis sententiam tulit in Panormitanos , & in eos , qui Regnum Siciliæ *Carolo* Regi fiduciario jure ab Ecclesia traditum invaderent , vel conjuratis opererent : Pugnantibus verò pro *Carolo* , legitimo Siciliæ Rege , si in prælio caderent , eamdem concessit Indulgentiam , quam Crucesignatis pro Terræ Sanctæ recuperatione , aut defensione , sui Decessores largiti fuerant . Felix *Carolus* , si Optimi illius Pontificis consiliis ac mandatis morem gessisset ! Sed ejus mandata negligens , delusus est à *Petro* Aragoniæ Rege , qui dolo rem agens , eum ad singulare certamen provocavit, eâ lege ut victoris præmium esset

esset Siciliae Regnum, infamia pugnam detrectantis. Dolum non subodoratus generosior *Carolus*, Burdegalam, assignatum certamini locum, se contulit, ubi se delusum tandem agnovit, non comparente *Petro* Aragoniae Rege. Sic dolus virtuti praevaluit. Perdidit Siciliam *Carolus* fortitudine, eâ potitus est *Petrus* Aragoniae Rex, minùs de fama sua, cuius jam iacturam fecerat, quàm de Siciliae Regno, quod invaserat, injustè retinendo sollicitus. Obiit *Martinus IV.* Perusii, iv. Kalend. Aprilis anni mclxxxv. cumque post obitum multis claruisse miraculis testantur *Martini Poloni* Continuator, *Guillelmus Nangius*, & Auctor *Vitz MS. Martino IV.* consentientibus suffragiis subrogatus est in Sede Apostolica *Jacobus Sabellus*, nobilis Romanus, *Sanctae Mariae in Cosmedin* Diaconus Cardinalis, iv. Nonas Aprilis ejusdè an. mclxxxv. dictus in Pontificatu *Honorius IV.* qui Decessoris sui vestigiis insistens, *Jacobum*, filium *Petri* Aragoniae Regis, paternae tyrannidis hæredem, qui Siciliae sceptrâ arripuerat, ejusque matrem *Constantiam*, filiam *Manfredi* Siciliae Tyranni, anathemate confixit. *Ladislauum* Ungariae Regem, qui, repudiata legitima uxore, cum pellicibus polluebatur, suoque familiari consortio Infideles Cumanos, Tartaros, Neugerios, & Saracenos dignabatur, acerrimè redarguit, & in eum, ni Reginam reciperet, & maritali complecteretur affectu, atque Infideles à sua societate ablegaret, Anathematis minas intenuit. Plures Epistolas scripsit Summus ille Pontifex, quæ referuntur ab *Odorico Raynaldo*, *Bzovio*, & *Wadingho*. Extat etiam in Bullario Romano ejusdem Pontificis diploma, quod incipit: *Olim*
Feli-

Feliciſ, anno MCCLXXXVI. datum, quo novam Mendicantium Sectam, sub nomine Ordinis Apostolorum, à nescio quibus institutam damnavit. Sedit duobus annis, & uno die, atque è vita migravit Romæ die Cæne Domini, quæ incidit in diem III. Aprilis anni MCCLXXXVII. Post illius obitum vacavit Sedes Romana mensibus decem, & octo-decim diebus, hoc est, usque ad diem XXI. mensis Februarii festo Cathedræ Sancti Petri Sacram-
 anni MCCLXXXVI. quâ die Romanus Pontifex electus est *Hieronymus Asculanus*, tituli *Sanctæ Pudentianæ* Cardinalis, ex Ordine Fratrum Minorum assumptus, non verò ex Ordine Fratrum Prædicatorum, sicut per errorem, aut memoriæ lapsum obrepsit Dupino tom. 10. *Bibliotheca Scriptorum Ecclesiasticorum* pag. 57. Primus fuit ex Ordine S. *Francisci* Romanus Pontifex, dictusque est *Nicolaus IV.* qui, susceptâ Ecclesiæ administratione, statim ad componendas res Siculas animum applicuit. Siculis iussit ut ad obsequium Ecclesiæ redirent, & ad *Alphonsum* Aragoniæ Regem Legatos misit pro *Caroli*, cognominati *Claudi*, Principis Salernitani & Siciliæ Regis, quem in carcere Barcinonensi captivum detinebat, liberatione. E carcere dimissus quidem est *Carolus*, sed asperrimis conditionibus ei in Conventu Oleronenſi impositis, quas *Nicolaus IV.* rescidit, & *Carolum* Siciliæ & Apuliæ Regem coronavit. Inde tamen acriùs recrudit bellum inter prædictum *Carolum* Siciliæ Regem, & *Jacobum* ejusdem Regni invasorem, *Alphonſi* Aragonum Regis fratrem. De Religione Christiana apud barbaras nationes propaganda multùm fuit sollicitus *Nicolaus IV.* misitque Religiosos tam ex Ordine
 Fra-

Fratrū Prædicatorū , quā ex Ordine Fratrū Minorū , quibus Verbi Divini nationibus à fide Christiana alienis prædicandi provinciam demandavit , quorū Apostolicis laboribus apud Tartaros Christiana Religio ita effloruit , ut *Argon Rex* , ejusque coniux Christo nomen dederint , quorū conversioni gratulatus est *Nicolaus IV.* Epistolis decimā libri primi , & duodecimā ad *Argonem Regem* . Causam etiam Christianorū in Syria , quorū res inclinata erat , apud Principes Christianos , præsertim apud Reges Galliæ , & Angliæ , vehementer sollicitavit . Quin & ad tuendam Urbem *Ptolomaidem* multos milites ipse proprio ære transmisit . Hunc Summum Pontificem egregiè doctum fuisse , & ex omni ferè Religione viros optimos & doctos Cardinales creasse , ac Romam pulcherrimis ædificiis exornasse testatur *Joannes Stella Venetus* in suo Commentario *de Vita & Moribus Romanorū Pontificum* . Obiit *Nicolaus IV.* die Sacræ Parasceves , seu die iv. Aprilis anni mcccxi r. annum agens Pontificatus quintum . Post mortem *Nicblai IV.* Sedes Pontificia , ob Cardinalium dissensionem , vacavit annis duobus , mensibus tribus & die unā , cū tandem die v. mensis Julii anni mcccxiv. Summo omnium consensu electus est Summus Pontifex *Petrus de Murrone* , Sanctus Anachoreta , & novæ Congregationis Religiosæ , quæ *Cælestinorum* postea dicta est , Auctor . In aspera ac remota Apuliæ solitudine rerum divinarum contemplationi , & corpori macerando intentus erat vir ille sanctitate illustris , dū de sua electione nuncium accepit , ac statim , ut erat verè pius & humilis , fugam arripere cogitavit , sed à populo deten-

detentus, in urbe Aprutii *Aquila*, volens nolens, inauguratus est, dictusque *Cælestinus V.* qui tamen paulò post se ad hanc dignitatem minus aptum agnoscens, tantoq; oneri ferendo imparem sentiens, oneri & honori cedere statuit, adductus potissimum consiliis Cardinalis *Benedicti Cajetani*, viri sagacis, callidi, & rerum gerendarum gnari, qui ipsum divini judicii metu, ut se Pontificatu abdicaret, deterruit; non verò, ut quidam ineptè fabulantur, voce per tubum fictâ, & quasi cælitus dimissâ, ei, ut Pontificatum deponeret, persuasit. Tandem, post quinque menses & dies octo Pontificatus, *Cælestinus V.* ornamenta Pontificis in Consistorio exiit mense Decembri, & die *Sanctæ Lucie* sacrâ anni mcccxciv. editâque Constitutione, quâ cessionem hujusmodi fieri posse pronunciavit, stupendum humilitatis exemplum, & magnum spretæ humanæ felicitatis reliquit argumentum, quod omnis ætas mirabitur, nulla deinceps fortassis imitabitur. Obiit *Cælestinus V.* anno mcccxcvi. in Arce Fumonis, ubi *Bonifacius VIII.* ejus successor illum recluserat, metuens ne ipsius simplicitate aliqui ad Schisma in Ecclesia conflandum abuterentur. Eum post mortem miraculis clarum *Clemens V.* Pontifex Maximus solemnî ritu in Sanctorum album retulit. *Cælestinum V.* in carcerem à *Bonifacio VIII.* ejus successore, conjectum, hæc de eo pronunciasse fertur: *Intravit ut Vulpes, regnabit ut Leo, morietur ut canis.* Sed id falsò & temerè usurpatum à Malevolis, & Principum assentatoribus, plerique existimant, quoniam *Platina*, valdè alioqui pronus ad notandas Pontificum maculas, nihil tale retulit, sed nec alii, qui eorum vitas descripserunt, inquit *Genebrardus Aque-*
Tom.V. H. lis

sis Episcopus in Chronico ad annum mccciii.

D. Estne hic *Bonifacius* ille Papa, qui, sicut in superiori Colloquio dicebas, grave ac diuturnum cum *Philippo Pulbro* Galliarum Rege habuit diffidium?

M. Is ille ipsissimus est, qui, patriâ Anagninus, ante Pontificatum dicebatur *Benedictus Cajetanus*, Presbyter Cardinalis tituli ss. *Silvestri*, & *Martini*; vacante verò Sede per *Celestini V.* abdicationem, à Cardinalibus ipso Natalis Domini pervigilio anni mccciv. Romanus Pontifex electus est, dictusque *Bonifacius VIII.* In ipso sui Pontificatus exordio, pacis inter Principes Christianos stabilizandæ curam suscepit, ac bellum acerrimum, *Jacobum* Aragonium Regem inter & *Carolum* de Regno Siciliæ contententes eâ lege composuit, ut *Jacobus* Aragonius omni jure in Siciliam cederet. At siculi Gallicæ dominationis jugum omninò excutere volentes, *Carolus*, legitimus licet Siciliæ Regem, agnoscere detrectarunt; & *Fridericum*, fratrem *Jacobi* Regis Aragoniæ, crearunt Siciliæ Regem, eorumque contumaciam nullis beneficiis, nullis minis, & Ecclesiasticarum Censurarum fulminibus frangere potuit Summus Pontifex, donec tandem pace sub certis quibusdam conditionibus, quæ legi possunt apud *Spondanum* ad annum mcccii, *Fridericum* inter & *Carolus*, dictum *Claudum* initâ, contumaces Siculos ad officium revocaverit, & Censuris Ecclesiasticis, quibus erant devincti, solverit, ut videre est in illius Summi Pontificis Diplomate, quod *Odoricus Raynaldus* in Annalibus Ecclesiasticis descripsit ad annum mccciii, num. xxiv. Verum, dum paci inter Principes conciliandæ totus incumbere

beret *Bonifacius VIII.* incidit, proh dolor ! in grave ac infaustum cum *Philippo Pulchro* Galliarum Rege dissidium , cujus memoriam æternis deffendam lachrymis nō refricarem, nisi Historiæ leges ad id me compellerent . Huic exitiali Ecclesiæ dissidio, quod *Bonifacium VIII.* inter & *Philippum Pulchrum* Regem Christianissimum exarsit , tria potissimum capita occasionem dederunt . Primum illius dissidii incentivum fuit Regaliæ Jus , quod Rex in Ecclesiis Galliarum Regni exercebat, quod tamen vehementer improbabat *Bonifacius VIII.* Secundò , hoc ferale dissidium , velut unguis in ulcere , auxit suscepta à Rege *Philippo Pulchro* protectio duorum Cardinalium Columnensium , quos Gibellinorum factioni addictos , sibi que clam insidiantes , *Bonifacius VIII.* habito Romæ Episcoporum Conventu purpurâ exutos , omnibus bonis , muneribus , Beneficiis , & jure ad quascumque dignitates deinceps consequendas spoliatos anathemati subjecerat . Postremò, illud dissidium acrius recrudit per Legationem *Bernardi Saisseti* Appamiensis Episcopi, quem *Bonifacius VIII.* ad Regem miserat , ut ejus Majestatem ad Syriacam Expeditionem impelleret, indictas ad hoc Sacrum Bellum Ecclesiarum Decimas in alios usus convertere prohiberet , vacantium Ecclesiarum fructus retinere, earumque titulos absque consensu Romani Pontificis conferre Regi inhiheret . *Bernardus Saissetus* (quem *rixarum & deffensionum virum* appellat *Spondanus* ad annum mcccxcvi. quemque recenti beneficio Pontifex obstrinxerat , cum Appamiarum Episcopatum in ejus gratiam anno mcccxcvi. crexerat, eique, invito Rege, primas Insulas tradiderat) sibi deman-

datâ Legatione functus, durioribus verbis ac intempestivis minis exasperavit animum Regis, qui illum Narbonensi Archiepiscopo in custodiam tradidit, ut ab eo unâ cum Episcopis Provinciæ canonicè judicaretur. Multorum criminum accusatus fuit *Bernardus Saiffetus* Appamiensis Episcopus, quæ legi possunt apud *Spondanum* ad annum mccc. De his omnibus, quæ in *Bernardum Saiffetum* Appamiensem Episcopum in Galliis gesta erant, certior factus *Bonifacius VIII.* scripsit ad *Philippum Pulchrum* Galliarum Regem litteras, quibus hunc Episcopum è carcere eximi iussit, additis etiam Anathematis ac depositionis minis, quæ jam nutantem & iratum *Philippum* Regem in furorem impulerunt. Hinc, exacerbatis vehementer animis, asperiores utrimque scriptæ Epistolæ. Hinc *Philippus* Rex tam Legatum Apostolicum, quàm Appamiensem Episcopum libertate donatum Regno abire iussit, ac solemnî Edicto prohibuit, ne quis è Clero Gallicano Romam peteret, aut è Regno aurum vel argentum Romam inferret. Hinc publicata Gallorum ad Sedem Apostolicam, vel ad Concilium Generale provocatio. Hinc immania accusationum, seu potius calumniarum capita, quæ *Plessiacus*, vir nobilis, in Conventu Præsulum, Doctorum, & Procerum Parisiis habito, proposuit contra *Bonifacium VIII.* Hinc sententia excommunicationis, quam in *Philippum Pulchrum* tulit *Bonifacius VIII.* totumque Galliarum Regnum sacris interdixit, Academias docere vetuit, & Gallos Sacramento fidei exoluit. Hinc denique perditissimâ illa conjuratio *Sciarra Columna*, & *Nogareti*, Equitis Galli, qui secretò militari conductâ manu audax

dux & execrabile facinus aggressi sunt in Summum Pontificem *Bonifacium VIII.* quem captivum apud Anagniniam fecerunt, eique Colaphum armatâ manu *Scarram Columnam* infixisse fertur. Elapsis autem tribus ab ejus captivitate diebus, intra quos thesaurus Ecclesiæ direptus est, Cives Anagnini, resumptis animis, quæ sui officii erant, præstiterunt, ac Summum Pontificem in libertatem assertum Romam perduxerunt, ubi tandem paucos post dies, eorum, quæ sibi usque adeo indignè obtigerant, acerrimo dolore confectus migravit ex hac vita anno MCCCLIII. cum annos octo, menses novem, & dies duodeviginti Ecclesiam rexisset. Ipsum muro caput concussisse, digitos corrosisse, & desperato ac furenti similem mortuum esse asserunt quidem Scriptores, inter quos est *Spondanus* ad annum MCCCLIII. At hoc indignissimum commentum est, quod non solum falsi cōvincit magnanimitas *Bonifaci VIII.* quem *Magnanimum & imperterritum* appellat *S. Antoninus*, sed etiam exploditur ejusdem *Sancti Antonini*, *Platina*, *Pauli Emilii*, aliorumque illius temporis Scriptorum silentio. *Bonifacium VIII.* Virum fuisse doctissimum, magni animi, in amicos liberalem, jurium Ecclesiæ acerrimum defenso-rem, integerrimæ fidei Pontificem, purumque criminum, quæ ei *Columnenses*, & *Philippi Pulchri Galliarum Regis Ministri*, fervente dissidio, affinxerunt, fatentur Historici, qui à studio partium sunt alieni. Negare tamen haud possum, esse aliquos Scriptores, quos inter censetur *S. Antoninus*, qui huic Summo Pontifici nonnulla vitia, præsertim nimium consanguineorum amorem, vitio vertunt. Jubilæum anno quolibet centesimo recur-

rente primus instituit *Bonifacius VIII.* illudque Romæ promulgavit anno mccc. quò immensa hominum multitudo religionis ergò confluit.

D. Fuitne *Bonifacii VIII.* successor in Galliarum Regnum, & *Philippum Pulchrum* Regem propensior?

M. Mortuo *Bonifacio VIII.* Pontifice Maximo, Summo Purpuratorum consensu substitutus est *Nicolaus Bocasinus*, Tarvisinus, Cardinalis Episc. Ostiensis, ex Ordine Prædicatorum assumptus, dictus in Pontificatu *Benedictus XI.* quamvis juxta Ordinem istius nominis Pontificum esset dumtaxat X. appellandus. Is ille est, qui ex humillimis natalibus ortus, cum Sedem Apostolicam conscendisset, matrem pretiosis ornatam vestibus, quæ magis novæ filii dignitati, quam priori abjectæ fortunæ convenirent, se adeuntem repulit, & negavit se matrem agniturum, nisi depositis his adscititiis ornamentis, accederet vilibus, ut solita erat, induta vestibus. Quod cum præstitisset mater, eam honorifice suscepit, & magno cum gaudio amplexatus est. Pacis studiosissimus fuit Summus ille Pontifex, quam pro viribus promovit non solum in Sicilia, quam, sublato Interdicto, communioni restituit, & in diversis Italiæ Provinciis, quæ Guelphorum & Gibellinorum, Alborum & Nigrorum diris factionibus miserum in modum erant laceratæ; verum etiam in Galliarum Regno, in quo gravissimas, dissidiis *Bonifacii VIII.* & *Philippi Pulchri* Francorum Regis, ortas tempestates compescuit, atque revocatis ac rescissis, quas *Philippo Pulchro* Regi ejus decessor intentaverat, pænis & censuris, antiquam Regum Galliæ & Summorum Pontificum

con-

concordiam gravissimè læsam feliciter instauravit. Plura his similia dùm medicaretur Sanctissimus ille Pontifex, obiit Perusii cum gravissimo Orbis Christiani damno die iv. Julii anni mccciv. cùm sedisset menses octo & dies xvii. Apud Fratres Prædicatores Perusii sepultus est, miraculis etiam post obitum clarus. *Benedicto XI.* ad vitam immortalem, translato, duas in partes scissi sunt Cardinales, aliis optantibus amicum *Bonifacii VIII.* aliis ex adverso Gallum, vel saltem Regi Christianissimo addictum eligere in animo habentibus. Quò factum est, ut, persistente illa pertinaci Cardinalium divisione, Sedes Pontificia undecim mensibus vacaverit. Tandem operâ præsertim & consiliis *Nicolai Pratenfis*. Ostiensis Episcopi Cardinalis Ord. Prædicatorum, inclinati sunt Cardinaliū animi in electionem *Bertrandi de Agutis*, seu *de Gotto* Archiepiscopi Burdigalensis, qui *Philippo Pulchro* Galliarum Regi subinfensus erat. De eo Cardinalium proposito idem Cardinalis Pratenfis Christianissimum Regem, in quem propensum gerebat animum, per litteras certiolem fecit, eumque monuit, ut *Bertrandum* sibi devinceret, & in gratiam cum ipso rediret. Rex, acceptis à Cardinali Pratenfi litteris, confestim *Bertrandum* Burdigalensem Archiepiscopum ad *S. Joannis Angeli* oppidum in Sanctonibus, accitum ad secretum Colloquium ita demulsit, & injectâ spe Pontificatus sibi tam arctè obstrinxit, ut *Bertrandus*, quem *avidum honoris & gloria* fuisse testatur *S. Antoninus*, omnia in Regis gratiam sese facturum sponderit, si ejus operâ & favore Summus Pontifex crearetur. Rex suis, Regnique commodis consulere volens, quinque ei condiciones

proposuit, & sextam suo tempore declarandam; quas omnes cum Archipræsul se accuratè impleturum juramento promississet, Rex Nuncium ad Cardinalem Pratensem misit, ut electionis ipsius negotium promoveret. Electus itaque est Perusii Nonis mensis Junii anni mcccv. Romanus Pontifex *Bernardus de Agutis*, seu *de Gotto*, Archiepiscopus Burdigalensis, dictusque in Pontificatu *Clemens V.* & coronatus Lugduni die xiv. Novembris ejusdem anni. At, dum in suæ coronationis celebritate per urbem solemnî pompâ veheretur, *Joannes Dux Britannia*, & *Gaillardus de Gotto* frater Pontificis, aliique nobiles cum promiscua plebe ruinâ cadentis muri oppressi ac collisi interierunt, *Carolus* verò *Valesius* frater Regis gravitèr læsus est. Pontificiam Sedem in Gallias transtulit *Clemens V.* modò Lugduni, modò Burdegalis, sed potissimùm Avinionē commoratus. In tesseram grati animi, conditiones, quas *Philippo Pulchro* Galliarum Regi antè inaugurationem promiserat, statim implere cæpit. Regi plenissimam veniam indulgit læsæ in *Bonifacio VIII.* Pontificiæ Mejestatis, & hæc fuit prima conditio. Conscios ac fautores ejusdem criminis veniâ itidem donavit, & hæc altera conditio. Decimas in quinquennium Regi concessit, & hæc tertia conditio. Constitutiones *Bonifacii VIII.* quatenus Regi, Galliaque Regno officere poterant, revocavit, & hæc quarta conditio. Nunquam tamen adduci potuit Pontifex, à Rege licèt vehementer sollicitatus, ut memoriam sui Decessoris *Bonifacii VIII.* damnaret. Columnensibus ad petitionem Regis pepercit idem Summus Pontifex, eisque Insulas restituit, & hæc quinta fuit conditio. Denique

nique, sextæ conditioni, quam suo tempore exponendam sibi reservarat *Philippus Pulcher* Galliarum Rex, satisfecit *Clemens V.* Pontifex Maximus in Concilio Generali Viennæ in Galliis celebrato, in quo *Templariorum* Ordinem extinxit, sicut opportunius ostendemus in Colloquio IV. ubi de Conciliis Sæculo XII. habitis differemus. In *Andronicum* Græcorum Imperatorem Schismatis fautorem anathema vibravit *Clemens quintus*, & propagandæ fidei studiosus *Joannem de Monte Corvino* Ordinis Sancti Francisci in Oriente Legatum constituit, ut fides apud Tartaros, Indos, Æthyopes, aliasque Orientis regiones, in quibus vir ille religiosus pietate insignis magno cum fructu Evangelium jam prædicaverat, magis ac magis promoveri posset. *Roberti* Siciliæ Regis defensionem contra *Henricum VII.* Imperatorem suscepit ille Pontifex, abrogavitque exauclorationis & capitis pœnam, quam in eundem *Robertum*, velut Majestatis reum, & Imperii proditorem tulerat hic Imperator. Obiit *Clemens V.* apud *Rupem Mauram* supra Rhodanum XII. Kalend. Maii anni MCCXIV. postquam sedisset annos octo, menses decem, dies quindecim. Confictas in odium illius Pontificis calumnias, ob Sedis in Gallias translationem, & *Templariorum* Ordinis abolitionem, vulgaverunt quidam Itali Scriptores, quæ fabulas olent, & figmenta malevolorum quorundam hominum, præsertim *Dantis* exulis Florentini, viri maledicentissimi, cui tantum fidei tribui debet, quantum calumniatori professo dari solet. Post obitum *Clementis V.* dissidentibus Cardinalibus, vacavit Apostolica Sedes annos duos, menses tres, dies septemdecim, ac tandem

dem Cardinales, urgente *Ludovico X. dicto Hutino*, Galliarum Rege, & à *Philippo Picavienſi* Comite, ejusdem Regis fratre, Lugduni apud Fratres Prædicatores in Conclavi reclusi elegerunt Pontificem Romanum *Jacobum de Oſſa*, Cardinalem Episcopum Portuenſem, natione Gallum, patriâ Cadurcenſem, & ignobili patre futore veteramentario natum. Cardinales Compromiſſum de illo eligendo Romano Pontifice feciſſe, quem Cardinalis *Jacobus de Oſſa* nominaveſſet, ipſumque, Neapoleone *Urſino* ſuadente, ſe ipſum nominaveſſe, aſſerunt quidam Scriptores Itali. Sed hoc purum figmentum eſt, quod falſi convincitur, tum quia Cardinalis *de Oſſa* Supremum Pontificatum adeptus, dictuſque *Joannes XXII.* (dicendus tamen, juxta ordinem hujus nominis Pontificum, *Joannes XXI.*) in ſuis litteris Encyclicis de electione ſua diſertè teſtatur, ſe à Cardinalibus concorditèr, nemine diſcrepante, in Summum Pontificem electum, timore ac tremore concuſſum vehementèr haſitaſſe; tum quia etiam, ſi Cardinalis *de Oſſa* impotenti ambitione abreptus ſe ipſum Romanum Pontificem elegiſſet, omni procul dubio *Ludovicus Bavarus*, ejus inſenſiſſimus hoſtis, aliiſque, qui ab illius Imperatoris partibus ſtabant, hanc immoderatæ ambitionis labem in acerbiffimis adverſus hunc Pontificem inveſtivis ei objeciſſent; quam tamen ab illis nunquam ei fuiſſe objectam certiffimè conſtat. Tria præſertim graviffima negotia *Joannem XXI.* vel, ut vulgò alii dicunt, *XXII.* diù multùmque exercuerunt, quorum primum adverſus eum excitavit enatæ in Ordine Fratrum Minorum factiones occasione controverſiæ de ſenſu & obſervantia Regulæ Sancti Franciſci, quoad

quoad Evangelicam paupertatem . Sed de hoc negotio , cui initium dedit quorundam Fratrum Minorum non minùs importuna , quàm molesta Controversia , commodiùs agemus in proximo Colloquio . Alterum negotium , quod Pontifici *Joanni XXI.* seu *XXII.* maximam facessivit molestiam , fuit acerrimum illud dissidium , quod habuit cum *Ludovico Bavaro* , veteratore ac fraudulento Imperatore , de quo dissidio cùm plura in præcedenti Colloquio à nobis dicta sint , pauca hic de Schismate à *Ludovico Bavaro* in Ecclesia conflato addere abundè sufficiet . *Petrus Raynaldus de Corbaria* constituit *Ludovicus Bavarus* Pseudo-Pontificem , qui antehàc , invitâ ac reclamante uxore sua , teste *Wadingho* in Annalibus Fratrum Minorum , Ordinem Fratrum Minorum professus fuerat , factus verò Pseudo-Pontifex , ob novam , quâ splendebat , dignitatem , à propria uxore tanquam maritus , juridicè repetitus , omnibus ludibrio fuit . Aliquantum tamen sese scenicum Pontificem gessit , & quamvis à legitimo Pontifice *Joanne XXI.* seu *XXII.* cum omnibus Schismatis ipsius fautoribus fuisset confixus , Cardinales creavit , Legatos in Orientem misit , & Catholicos omnes ejus Schismati adherere nolentes diris devovit . At *Ludovico Bavaro* , cujus instrumentū erat , in Germaniam reversos rebusq; ipsius in Italia profligatis , *Petrus Corbarius* ad se tandem reversus , Insignia Pontificatus deposuit , Schisma & errores ejuravit , & veniam à *Joanne XXI.* seu *XXII.* ad cujus pedes sese , laqueo collo injecto , abjecerat , obtinuit , inclusus tamen , ne quis ejus Pseudo-Pontificatu abuteretur , in Palatio Pontificis , ubi post triennium Avenione obiit , ut videre est

est apud *Odoricum Raynaldum* ad annum mcccxxx. num.xi. & sequentibus. Eo in Schismate, & gravissimo dissidio, quod *Ludovicus Bavarus* habuit cum *Joanne XXI.* seu *XXII.* Religiosi Dominicani infracto steterunt animo pro Sede Apostolica, & contra Imperatoris impetus & Pseudo-Pontificis consilia, causam Ecclesiæ, etiam cum vitæ rerumque suarum dispendio, strenuè gesserunt. Hinc *Ludovici Bavarum* Imperatoris in Dominicanos implacabile odium. Hinc florentissimorum Cœnobiorum Dominicanorum Ordinis, quæ in *Ludovici Bavarum* Ditione posita erant, ruina & expulsio è tota Bavaria Dominicanorum, qui nec extincto schismate, nec nostris etiam temporibus fuerunt postliminio restituti. Ultimum negotium, quod haud parùm exercuit *Joannem XXI.* seu *XXII.* originem habuit ex privata opinione, in quam, ut Doctor particularis, plus æquò propendere visus est, de dilatione Beatitudinis Sanctorum usque ad Supremi Judicii diem. In hanc quippè singularem opinionem (quam tamen, ut ostendemus in sexto Colloquio, nunquàm Summus ille Pontifex credendam proposuit, sed potius ante mortem revocavit) benè multi viri docti insurrexerunt, præsertim Dominicani; quos licèt Summus Pontifex demeruisset innumere beneficiis, relato videlicet in Sanctorum album Sancto *Thoma Aquinate*, assumptis ad purpuram, tribus Dominicanis, & toti Ordini his duobus verbis: *Lucere & ardere*, in Insigne datis, eos tamen nunquàm adducere potuit, ut in ejus privatam abirent sententiam. Qua in re *Ludovicus Bavarus* Imperator, acerrimus Dominicanorum hostis, qui ante suspicatus fuerat, Dominicanos sibi infen-

inensos esse, & spe præmiorum Sedi Apostolicæ addictos, ubi audivit, illos in peculiarem *Joānis XXI.* seu *XXII.* de his licet optimè meriti, opinionem descendere nolle; De Prædicatorum Ordine exclamasse fertur: *Hic Ordo, est Ordo veritatis*, cui uni sese devovit. Obiit Avenione nonagenarius *Joānes XXI.* seu *XXII.* die IV. Decembr. an. MCCCXXXIV. cum sedisset annos undeviginti. Fuit Pontifex verè Maximus rerum gestarum magnitudine, summâ in Regna omnia Christiana providentiâ, exquisitâ doctrinâ, & propensissimo in omnes viros eruditos animo, quibus rectum discendi ac docendi modum præscripsit in Epistola, quam direxit ad Doctores Academiæ Parisiensis, quamque ex parte refert ex Vaticano Codice *Odoricus Raynaldus* ad annum MCCCXVIII. *Quidam etiam Theologi*, ait in ea Epistola Summus ille Pontifex, *postpositis vel neglectis necessariis, utilibus, & edificativis doctrinis, curiosis, inutilibus, & supervacuis Philosophiæ questionibus, & subtilitatibus se immiscet; ex quibus ipsius studii disciplina dissolvitur, luminis ejus splendor offunditur, & Studentium utilitas impeditur &c.* Præter *S. Thomam Aquinatem*, quem ann. MCCCXXIII. Sanctorum Fastis adscripsit, eundem honorem detulit Sanctissimus ille Pontifex *B. Ludovico* Episcopo Tolosano Ordinis Fratrum Minorum anno MCCCXVII. & *Thomæ* Herfordiensi Antistiti anno MCCCXX. Instituit etiam Sanctissimæ Trinitatis Festum. Post decem dies ab obitu *Joannis XXI.* seu *XXII.* Cardinales in Conventu Avenionensi Fratrum Prædicatorum inclusi *Jacobum Furnerium*, seu *de Furno* appellatum, natione Gallum, humili loco, patre scilicet *Guillelmo* Molitore natum, Ordinis Cister-

Cisterciensis olim Monachum , Sacræ Facultatis Parisiensis Doctorem Theologum , & Cardinalem tituli *Sanctæ Priscæ* elegerunt Pontificem Romanum die XIII. Kalend. Januarii anni MCCCXXXIV. qui in Pontificatu dictus est *Benedictus XII.* quamvis, juxta seriem hujus nominis Pontificum, dicendus est *Benedictus XI.* Sese à Pontificatus exordio ostendit pium , constantem , liberalem , profusis Sanctæ pecuniis pro conversione Infidelium , maxime Tartarorum , ad quam promovendam Religiosos & Apostolicos viros misit . Ad dignitates Ecclesiasticas neminem è suis promovit , nisi nepotem , quem alioqui dignissimum , & orantibus Cardinalibus , Ecclesiæ Arelateni præfecit , nunquam tamen adduci potuit , ut eum in Purpuratorum Patrum Senatum referret , & alios nepotes vel agnatos suos bonis Ecclesiæ ditaret , asserens , Pontificem parentes & affines non habere, sæpiusque istud Davidicum usurpans : *Si mei non fuerint dominati , tunc immaculatus ero .* Nihil antiquius habuit idem Pontifex , quàm ut pacem inter Principes Christianos sanciret , foveretque , ut communes vires contra Saracenos verterent . Ad exterminandos Mauros Hispaniam devastantes sacram indixit expeditionem , quam fœderati Reges Christiani feliciter ac gloriose confecerunt . Mediolanenses, aliosque Insubres , videlicet Bergomenses , Papienses, Novarienses, Cremonenses, Vercellenses , Comenses &c. Censuris Ecclesiasticis , ob *Ludovici Bavaræ* , & Antipapæ *Petri Corbarii* Schisma , irretitos , in gratiam Ecclesiæ recepit , & communione Ecclesiasticâ donavit , nunquam tamen *Ludovici Bavaræ* contumaciam, Litteris licet ac Nunciis ad eum mis-

missis, frangere potuit. Controversiæ sub suo De-
cessore enatæ de Sanctarum animarum beatitudine
finem tandem imposuit, & Beatorum animas, sta-
tim ac solutæ sunt corporibus (si tamen nihil illis
super sit piacularibus Purgatorii flammis eluen-
dum) ad Visionem Dei admitti definivit, Diplo-
mate, quod incipit : *Benedictus Deus*. Testatur Odo-
ricus Raynaldus ad annum mcccxxxvi. extare etiam-
nùm in Bibliotheca Vaticana aliquot Tractatus
MSS. de statu animarum ante Generale Judicium,
quos ante Pontificatum lucubraverat *Benedictus XI.*
seu *XII.* Ad restaurandam collapsam disciplinam,
ad libertatem juraque Ecclesiæ vindicanda, ad
emendandos abusus, qui id ætatis in Beneficiorum
collationem irreperant, ad reformandos Ordines
Religiosos curas Apostolicas adhibuit, ac pater-
nam sollicitudinem impendit Pontifex ille maxi-
mus, tantæque in regimine Ecclesiæ constantiæ &
integritatis fuit, ut nec vi, nec precibus, aut pro-
missis à recto dimoveri unquam potuerit. Neptem
suam unicam Tolosano Mercatori, modicâ dote
constitutâ, uxorem dedit, rejectis nobilibus procis,
qui ejus nuptias ambibant. Oblit Sanctissimus il-
le Pontifex Avenione die xxv. Aprilis an. mcccxlir.
cùm rexisset Ecclesiam annis septem, mensibus
quatuor, & diebus sex. Celebratur in Martyrologio
Gallicano ut Pontifex *Sanctæ memoriæ*, eumque
etiam miraculis effuluisse testatur cœvus ipsius
vitæ Anonymus Author.

D. Mortuo *Benedicto XI.* seu *XII.* Sedes Pon-
tificia, quam *Clemens V.* in Gallias transtulerat,
fuitne in Urbem Romam revocata?

M. Præter illos tres, quos memoravi, Pon-
tifices

tifices Maximos natione Gallos, *Clementem V. Joannem XXI. seu XXII. & Benedictū XI. seu XII.* quatuor alii Summi Pontifices, natione itidem Galli, Sedem Pontificiam in Galliis, seu Avenione fixerunt, videlicet *Clemens VI. Innocentius VI. Urbanus V. & Gregorius XI.* qui postremus, ut mox referemus, relictâ tandem Avenione, Romam petiit, & in eam Urbem, post diuturnum exilium ab Italis tot querelis, verbisque desietum, Sedem Pontificiam retulit. *Benedicto itaque XI. seu XII.* successit in Sede Pontificia *Clemens VI.* ante promotionem *Petrus Rogerius* dictus, natione Gallus, patriâ Lemovix, in territorio Castelli Malimontii natus ex nobili genere. Fratrem habuit *Guillelmum Rogerium* Comitem *Bellifortis*, qui fuit pater *Gregorii XI.* Pontificis. Apud Arvernos Monasterio *Casa-Dei*, Ordinis *Benedictini*, nomen dedit *Petrus Rogerius* antequam pubertatis annos excessisset. Dehinc, Lutetiam missus, in Philosophicis, Theologicisque disciplinis excelluit, ac Lauream Doctoralem in Academia Parisiensi promeritus est. Abbas *Fiscanensis* primùm fuit, deindè *Atrebatensis* Episcopus, hinc *Senonensis* Archipræsul, tum *Rotomagensis*, postea à *Benedicto XI. seu XII.* creatus Cardinalis xv. Kalend. Januarii anni mcccxxxvii. tituli *SS. Nerei, & Achillei*, postremò, electus est Pontifex Maximus in Conclavi apud Fratres Prædicatores Avenionenses die vii. Maji an. mcccxlii. & die Sacrà Pentecostes, quæ fuit xvi. ejusdem mensis, coronatus est, & appellatus, ut mox diximus, *Clemens VI.* Hunc *Petrarcha* litteratissimum Pontificem appellat, tam felicitis & invictæ memoriæ, ut quod semel legisset, oblivisci nullatenus pos-

posset, & quod mirabilius est, inquit, hæc memoria: magno quodam capitis ictu, cujus ingens suprema vertice cicatrix remanserat, ei provenerat. Clementi VI. summis precibus, missaque honorificâ Legatione, Romani supplicarunt, ut in Urbem rediret. Sed eorum votis obsecundare haud potuit Summus Pontifex, quòd *Ludovicus Bavarus*, Imperator Ecclesiæ perduellis, Romam, totamque Italiam turbaret, quem proindè Pontifex anathemate percussit, eumque omni Jure ad Imperium exuit, ut videre est in ejus Decreto, & in Epistolis ad Principes Electores directis, quas in Ecclesiasticis Annalibus inseruit *Odoricus Raynaldus* ad an. MCCCXLVI. *Joannam* Siciliæ Reginam, ac Provinciæ Comitissam, Regno suo pulsam à *Ludovico* Ungariæ Rege, pœnas de nece *Andreae* Regis fratris sui, ejusdemque *Joannæ* mariti, cujus illa suspicione laborabat, repetente, Avenione honorificè suscepit, infontem declaravit, eique dispensationem indulgit matrimonium ineundi cum *Ludovico* Tarentino Principe. Ab eadem Regina *Joanna*, cui pecuniæ opus erant, ut in suum Regnum, quod Ungarorum Rex reliquerat, cum marito suo redire posset, Avenionem cum omnibus Juribus emit idem Pontifex, ut videre est apud nostrum *Bzovium* ad an. MCCCXLVII. ubi Instrumentum ea de re confectum, seu Contractum venditionis ex Archivis Vaticanis, & Molis Hadriani exhibet. Piè obiit *Clemens VI.* die VI. mensis Decembris anni MCCCLXI. cum sedisset annos XI. Fuit Pontifex verè Maximus, clementiæ ac mansuetudinis laude insignis. Flagellantium Sectam damnavit anno MCCCXLIX. Jubilæum ab anno centenario ad quinquagesimum reduxit. Pacem inter Princi-

pes Christianos conciliare maximoperè studuit. Sacram Expeditionem contra Turcas, communes fidei hostes, indixit. Proferendis Ecclesiæ finibus, & extinguendo Græcorum Schismati, missis ad *Joannem Palæologum*, eorum Imperatorem, litteris ac Nunciis, animum adjecit, multumque fuit sollicitus de Armenorum salute, ut liquet ex ea Epistola, quam Summus ille Pontifex scripsit ad *Consolatorem* Armeniæ Catholicum, & universum Clerum, in qua quatuordecim Capita circa auctoritatem Ecclesiæ Romanæ, & Summi Pontificis credenda Armenis proponit, quam Epistolam recitat *Odoricus Raynaldus* ad annum MCCCXLVI. num. 68.

Clementi VI. Pontifici Maximo successit in Cathedra S. Petri *Innocentius VI.* antea dictus *Stephanus Alberti*, natione Gallus, Cardinalis Episcopus Ostiensis, electus Avenione Summus Pontifex die XVIII. mensis Decembris anni MCCCXLII. Ab exordio Pontificatus sui constituit, ut omnes Prælati, aliique Beneficarii ad Ecclesias suas sub anathematis pœnâ proficiscerentur, & in iis, juxta sacros Canones, residerent. Sanxit etiam, ut Ecclesiastica Beneficia, nullâ habitâ ratione nobilitatis, seu generis claritatis, conferrentur tantum viris doctrinâ & pietate probatissimis, & quibus Christi & Apostolorum vita cordi esset, sicut refert *Ægidius* Cardinalis Viterbiensis. Sacram contra Turcas Expeditionem à suo Decessore indictam promovere, & ad optatum exitum perducere, in votis maxime habuit. Cum Græcorum Imperatoribus *Cantacuzeno* primùm, deindè *Joanne Palæologo* de conjunctione Ecclesiæ Græcæ cum Romana per Legatos

tos egit. Beguardos hæreticos in Germania exterminari iussit, & nascentem in Anglia hæresim, quæ Originale peccatum, & merita bonorum operum negabat, in ipso ortu extirpavit. In quosdam Fratres Minoritas, qui contra definitionem *Joannis XXI.* seu *XXII.* pertinaciter disputabant, & spiritu potius Pithonico, quàm Prophetico, nonnulla vaticinia temerè in vulgus spargebant, severè animadvertit *Innocentius VI.* Pacis inter Principes Christianos conciliandæ, & potissimum inter *Eduardum* Anglorum, & *Joannem* Francorum Reges procurandæ studiosissimus fuit. *Caroli* hujus nominis *IV.* Imperatoris inaugurandi provinciam *Petro Bertrandi* juniore, Ostiensi Episcopo, & *Egidio Albornoto* Cardinalibus demandavit. *Ludovicum* Marchionem Brandeburgensem, *Ludovici* Bavari Imperatoris filium, Censuris Ecclesiasticis ob Schisma paternum irretitum, veniam enixè postulantem, in communionem Ecclesiæ recepit, post emissam ab eo professionis Formulam, quam ex Tabulariis Arcis S. Angeli, & Bibliothecæ Vaticanæ exhibet *Odoricus Raynaldus* ad annum *MCCCLIX.* Ordinibus Religiosorum Mendicantium, in ea, quam habuerunt cum *Richardo* Armachano Episcopo gravissimâ controversiâ, impensè favit idem Summus Pontifex, prohibuitque Archiepiscopis & Episcopis Angliæ, ne Fratres Mendicantes in Confessionibus excipiendis, Prædicationibus, Sepulturis, ac Eleemosynis impedirent, ac per suos subditos impediri permetterent. Obiit Avenione *Innocentius VI.* die *XII.* mensis Septembris anni *MCCCLXII.* Pontificatus anno *X.* & in Carthusia Villænovæ sepultus. Hunc Pontificem multis encomiis celebrat vitæ ipsius Author, qui

tamen testatur, eum carni & sanguini plus æquo indulgisse, & in nepotes ac propinquos profusorem fuisse, quàm Pontificia dignitas postulabat.

Innocentium VI. in Sede Pontificia excepit *Urbanus* hujus nominis *V.* dictus antea *Guillelmus Grimoaldus* natione Gallus, Grifaco in Diocesi Mimatensi oriundus, Ordinis Benedictini Monachus, Cœnobii *S. Victoris* apud Massiliam Abbas, Sedis Apostolicæ in Regno Siciliæ & Neapolis Legatus, & tandem, præter suam & omnium expectationem, Deo inspirante, Summus Pontifex, absens licet, electus est Avenione die *xxiii.* mensis Septembris anni *mcccxi.* & die *vi.* mensis Novembris ejusdem anni fuit in eadem Civitate coronatus atque consecratus. Sub initia Pontificatus sui Tyrannos Italiæ domuit ac in ordinem redegit *Urbanus V.* Sacram Expeditionem contra Asiaticos Saracenos indixit, quæ tamen optato exitu caruit. Romam anno *mccclxvii.* iter suscepit, & huic Urbi Sedem restituit, in qua fuerat à *S. Petro* collocata. Excepit in eadem Urbe *Joannem Palæologum* Græcorum Imperatorem, qui subsidii contra Turcas à Latinis impetrandi spe inductus, Romam accessit anno *mccclxix.* ubi Schisma ejuravit, & Ecclesiæ Romanæ fidem professus est, juxta præscriptam ab eodem Summo Pontifice formulam, quam refert *Odoricus Raynaldus* ad annum *mccclxix.* Rebus in Italia ex animi sententia compositis, Avenionem anno *mccclxx.* repetiit *Urbanus V.* quamvis eum, si in Gallias rediret, confestim moriturum *S. Brigitta* à Deo edocta ipsi prænuñciasset. Verum, gravissimis causis ac rationibus, quas inter præcipua fuit Regum Galliæ & Angliæ conciliatio, per-

motus Summus ille Pontifex, Româ profectus Avenionem peruenit die xxiv. mensis Septembris, ubi paulò post morbo correptus, piè obiit die ix. mensis Decembris ejusdem an. mcccclxx. Pontificatus ix. *Petrarcha* Epistola 1. libri 7. *Rerum Senilium*, hunc Pontificem Maximum laudat, quòd Academias, Collegia, ac Viros litteratos suo patrocinio fove-rit, quòd Disciplinam Ecclesiasticam instauraverit, mores reformarit, Beneficiorum pluralitatem damnaverit, Residentiam in suis Ecclesiis ac Beneficiis Prælatis, aliisque Beneficiariis districtè injunxerit, quòd denique immoderatum vestium rescuerit luxum, quem idem Scriptor, facundiâ, & arte poëtica sui Sæculi facile Princeps, ibidem eleganter describit. Adeò à voluntate propinquos suos ditandi, aut promovendi alienus fuit *Urbanus V.* ut nepotem suum, non Principem, aut primariæ nobilitatis fœminam, sed filiam Mercatoris Montispeffulani ducere voluerit. *Jesuatorum* Ordinem à B. *Joanne Columbano* institutum, & Ordinem *Salvatoris* à Sancta *Brigitta* conditum approbavit idem Summus Pontifex, sibi que æternum devinxit Ordinem Fratrum Prædicatorum, dum ei concessit Corpus S. *Thomæ Aquinatis*, quod in Monasterio Fossæ Novæ Cisterciensis Ordinis sepultum erat, illudque in Tolosanum nostri Ordinis Conventum deferri jussit. Brachium verò dextrum ejusdem Sancti *Thomæ Aquinatis* Parisios transmitti voluit, eoque inæstimabili thesauro, nobisq; charissimo, ditavit Conventum ac Collegium nostrum Sancti *Jacobi*, quod Viris illustribus semper abundavit.

Mortuo *Urano V.* & sepulto in Cœnobio

S. *Victoris* Massiliensis, ubi, teste laudato *Petrarcha* Epistolâ 13. libri 13. miraculis post obitum clarruit, electus est, consentientibus Cardinalium suffragiis, Pontifex Maximus *Petrus Rogerii*, natione Gallus, patriâ Lemovicensis, *Clementis VI.* ex fratre *Guillelmo* Comite *Belfortio* nepos, S. *Mariae Novae* Diaconus Cardinalis, ac die v. mensis Januarii anni MCCCLXXI. consecratus & coronatus est, dictusq; *Gregorius XI.* Tantam sibi omnium conciliaverat benevolentiam, ut teste *Spondano* ad ann. MCCCLXX. absque ulla mora, aut discordia renunciatus fuerit omnium Cardinalium consensu Pontifex, solo ipso diu renitente, & onus averfante; cui demum, ne videretur divinae voluntati resistere, humeros supposuit nondum quadragenarius, statura autem parvus, debilis atque imbecilla valetudinis. Statim ac ad Summi Pontificatus apicem erectus fuit *Gregorius XI.* de acceptis à se Catholicæ Ecclesiæ gubernaculis totius Orbis Christiani Præsules ac Principes certiores fecit, in primis *Carolus V.* Galliarum Regem, quem hortatus est, ut, suorum Progenitorum more, Ecclesiam meritis obsequiis prosequeretur, ac vicissim studia Apostolica atque benevolentiam se lubentissimè in ipsum expliciturum sponndit. Ad conciliandam pacem inter Galliae & Angliae Reges Legationem misit, quæ tamen, propter pertinaces duorum horumce Regum similitates, felici exitu caruit. Sacrae contra Turcas in Oriente promovendæ Expeditionis percupidus, Legatos ad *Joannem Palaeologum* Græcorum Imperatorem misit, ut Orientales Occidentalesque Christianos ætiori fœdere ad compescendam Turcarum feritatem devinciret. Propagandæ etiam Catholicæ Fidei studio

dio accensus, selectos ex Ordine præsertim Fratrum Prædicatorum Religiosos Viros spiritu Apostolico actos, & zelo flagrantés salutis animarum, in varias Orientis regiones ad Infidelium conversionem direxit. Pro afferenda Ecclesiastica libertate, & vindicandis Ecclesiæ juribus strenuè allaboravit *Gregorius XI.* Hinc Florentinos in libertatem Ecclesiæ injurios perstrinxit gravissimâ excommunicationis sententiâ, quam noster *Bzovius* ex Vaticano Codice descripsit ad annum mcccclxxv. Numero xv. Eo fulmine perterriti Florentini, *S. Catharinam Senensem* Ordinis *S. Dominici* Virginem Sacram, quam sincera in Deum pietas, illibata vitæ castimonia, flagrans in pauperes charitas, in Ecclesiam zelus, & beatissima cœlestium donorum copia supra fœminæ conditionem evexerant, obnixè rogarunt, ut pro ipsorum reconciliatione Legatione ad Summum Pontificem perfungeretur. Eorum votis annuens Virgo Sancta Aveffionem profecta est, & ad pedes Summi Pontificis *Gregorii XI.* effusa, hæc verba ab eo audire meruit: *Ut omnibus pateat, quia pacem cum eis, seu Florentinis, volo, ecce pacem ipsam pono in manibus tuis, carissima Filia; tu tantum recommendatum habeas honorem Ecclesiæ Sanctæ.* Pontificem Maximum Florentinis iratum omni procul dubio placasset Catharina Senensis, nisi ejus consiliis, & *Gregorii XI.* pietati intercessisset Florentinorum contumacia. Non inutilis tamen fuit hæc Sanctæ Catharinæ Senensis Legatio. Nacta siquidem Sancta illa Virgo opportunam occasionem sæpius colloquendi cum *Gregorio XI.* Pontifice Maximo, quem crebris antehac litteris Spiritus Sancti unctione perfusus de reditu ad Ur-

beni Romam tandem suscipiendo sollicitaverat; tam egregiè miserum Italiæ jampridem armorum strepitu funestata statum depinxit, tantæque sermonis efficaciam ei ob oculos posuit necessitatem Sedem Pontificiam in Urbem Romam postliminio referendi; ut Summus Pontifex precibus, consiliis, & vehementibus Sanctæ hujus Virginis adhortationibus permotus, relictâ Avenione Romam accesserit, eoque appulerit die xxvii. mensis Januarii anni mcccclxxvii. ingenti pompâ à Romanis se suaque ei subjicientibus susceptus, ibidemque anno sequenti die xvi. mensis Martii, Sacramentis Ecclesiæ magnâ pietate perceptis, mortuus est. Scribit *Gersonius*, Sacræ Facultatis Parisiensis Cancellarius, lib. *De Examine Doctrinarum* Par. 2. Consideratione 3. hunc Summum Pontificem, paulò antequam moreretur, habentem in manibus Sacrum Christi Corpus, doluisse, se facilius, quàm par fuisset, visionibus ac revelationibus adhibuisse fidem, & dimisso suorum rationabili consilio, ea præstitisse; quæ illum & Ecclesiam in discrimen Schismatis imminentis infelicitèr traxerant. Iis autem verbis suasiones *S. Brigittæ*, & *S. Catharinæ Senensis* de Urbe repetenda Summum hunc Pontificem indicare voluisse nonnulli post *Gersonium* Scriptores existimant. Sed id loco fabulæ jure merito haberi debet. Primò, quia de hac protestatione *Gregorii XI.* propedièm morituri ne minimum quidem verbulum facit Author coævus, qui hujus Pontificis Vitam ac Gesta descripsit. *Gersonii* autem hac in re fides sublesta omninò esse debet, quippè qui longè post obitum *Gregorii XI.* scripserit. Secundò, *Gregorius XI.* sanctitatem *Catharinæ Senensis* probè

probè compertam habebat, ejus Legatione, etiam post suum in Italiam reditum, pro componendo Florentinorum dissidio, usus fuerat; quin & ejus spiritum probaverat, eamque Prophetiæ dono esse illustratam cognoverat, cum *illi votum suum de petenda urbe in occulto factum, & sibi soli ac Deo notum, sese divinitus cognovisse monstravit*, ut *Pius II.* Pontifex Maximus in Bulla Canonizationis ipsius testatur. Quà igitur credibile est, hunc Summum Pontificem *Gregorium XI.* de sanctitate, & celestibus Catharinæ Senensis donis optimè instructum, voluisse, paulò ante mortem coram omnibus protestari, se suasionibus & visionibus ejusdem Sanctæ Virginis plus æquo credidisse, maximè cum ipse, sciret, se non tam hisce suasionibus, quàm gravissimis adductum rationibus Romam profectum, fuisse, videlicet ut Sedem suam, sicut tenebatur, repeteret, & Civitatibus Ecclesiæ Romanæ perduellibus ad obedientiam redactis, pacem universæ Italiæ redderet. Si plura scire aveas de Summis Pontificibus, qui Avenione Sedem suam habuerunt, scilicet de *Clemente V.* *Joanne XXI.* seu *XXII.* *Benedicto XI.* seu *XII.* *Clemente VI.* *Innocentio VI.* *Urbanò V.* & *Gregorio XI.* *Leges Francis Boscuetum*, qui Historiam, Gestaque horum Pontificum, qui à Gallia oriundi Avenione confederunt, ex corvis Scriptoribus accuratè descripsit, ac perdoctis Annotationibus illustravit.

D. Funesto Schismate, post *Gregorii XI.* obitum, Ecclesiam fuisse exagitata, ac in summum discrimen adductam sæpiùs audiavi à viris eruditis, qui etiam asseriebant, hoc Schisma omnium, quæ unquam in Occidente fuerunt, sine controversia cala-

calamitosissimum, teterrimum & perniciosissimum fuisse, illudque quinquaginta ferme annis inexplicabili Ecclesiæ, & Christianæ Religionis damno perdurasse. Hujus itaque exitialis Schismatis, quod diu divexavit Ecclesiam, originem aperire, & mala, quæ inde orta sunt, breviter referre juvat.

M. Post obitum *Gregorii XI.* Pontificis Maximi cum Cardinales, ut moris est, Conclave ingressi, de novo sufficiendo Pontifice deliberarent, Populus Romanus metuens, ne, creato ab iisdem Pontifice Gallo, Sedes Pontificia Româ in Gallias denuò transferretur, effractis Conclavis foribus, in illud tumultuans ac furens irrupit, & Cardinalibus præsentaneam mortem comminatus est, nisi, abjectâ omni cunctatione, in Romani, vel saltem Itali Pontificis electionem consentirent. Eâ vi adacti Cardinales, ut periclitanti vitæ suæ consulerent, Populi Romani votis morem gesserunt, elegeruntque Pontificem *Bartholomæum Priguanum*, patriâ Neapolitanum & Archiepiscopum Barensem, qui postea, sedato populi tumultu, presentibus & consentientibus Cardinalibus, coronatus est, dictusque *Urbanus VI.* Hoc pacto tumultus in electione *Urbani VI.* excitati in optatam tranquillitatem conversi videbantur, cum ecce subito atrocior cœpit sævire tempestas. *Urbanus* quippè Pontifex paulò post suam coronationem, Cardinalium mores duris ac intempestivis increpationibus redarguendo, sibi illos itâ insensos reddidit, ut ipsi, conjuratione adversus eum factâ, Anagniam, sub specioso obrentu caloris æstivi vitandi causâ, secesserint numero tredecim, natione Galli, excepto *Petro de Luna*, Aragonio, ubi coram *Petro de Creso*,
Ar-

Archiepiscopo Arelatensi, Sanctæ Romanæ Ecclesiæ Camerario, ac Judice Ordinario, protestati sunt de vi sibi illata, & de electione *Urbani VI.* metu extortâ. Dein, *Urbano VI.* diem dixerunt, in eum sententiam tulerunt, ac litteras ad universos Fideles scripserunt, quibus declarabant *Bartholomæum Barensem* esse intrusum. Promulgatâ sententiâ, Fundos, Regni Neapolitani Urbem, sese receperunt, & tribus Cardinalibus Italis tractis in partes, solo Cardinali Sancti Petri cum *Urbano VI.* remanente, *Robertum Gebennensem*, Tituli Sanctorum duodecim Apostolorum, annos dumtaxat xxxvi. natum, Pontificem elegerunt die xx. Septembris anni mcccclxxviii. qui *Clemens VII.* appellatus est. Sic, proh dolor! conflatum est Schisma, quod diu luctuosam reddidit Ecclesiæ faciem, cum duo Summi Pontifices, quorum unus Romæ, alter Avenione sedebat, Petri Sedem eodem sibi tempore vendicarent. Suos uterque habebat auctores, patronosque maximos ac sanctissimos; hinc inde Provinciæ, Regna, Reges, Doctores, Jurisconsulti, Præsules, Concilia, jura stabant; verbo dicam, adeo difficile erat judicare, quam in partem veritas & justitia vergerent, ut Eminentissimus Cardinalis *Baronius* Annalium Ecclesiasticorum parens, non dubitaverit scribere ad amicum suum *Sirmondum* Societatis Jesu, se nihil æquè reformidare, quam pervenire ad hujusce Schismatis tempus, de quo quid statuendum, non esset liberè pronuntiaturus: *Fuisse tamen videtur*, inquit *Spondanus* in continuatione *Baronii* ad ann. mcccclxxviii. *Ecclesia Catholica sensus, Urbanum, ejusque Successores Italiam colentes, extitisse veros ac legitimos Pontifices.*

Quod

Quod verò magis parti Clementis incommodavit, fuit, quòd tam ipse Clemens, quàm ceteri Cardinales ejus fautores suis litteris & gestis per aliquot mensium spatium universa Orbi persuasum voluissent Urbanum ritè electum esse, & ex eorum sententia omnes ubique populi sic opinati fuissent. Hinc est, quòd in pervulgatis Tabulis Chronologicis Romanorum Pontificum locum obtineant Urbanus VI. ejusque successores, nulla verò in iis mentio fiat Clementis VII. & Benedicti XII. seu XIII. qui Avenione nomen Summi Pontificis sibi arrogarunt. Gravissima mala, quibus tempore Schismatis afflicta est Ecclesia eleganter Spondanus, loco mox à me laudato, describit his verbis: Pontifices autem, quorum unus Romæ, alter Avenione sedebat, sibi invicem insidiantes, & mutuis dirarum & anathematum fulminibus tam inter sese, quàm sequaces ferientes; necnon & armis ferreis, etiamque cum prædicatione Crucis, velut in Infideles, persequiebantur. Quòd unus ligabat, alter solvebat: quod unus concedebat, alter rescindebat. Fiebant ex utraque parte processus, privationes, execrationes, sequebantur lites, rapinæ, cades cum ingenti scandalo, ruina, & subsannatione; præter aliorum morum corruptiones, depressiones bonorum, exaltationes reproborum, rerum sacrarum turpia commercia, contemptum legum, Disciplina abolitionem, hæresum atque errorum succretionem, & omnis denique fidei, pietatis, ac religionis extinctionem, de quibus sunt frequentissima Auctorum illius, & subsequentium temporum atque gravissima querimonia, & lugubres lamentationes. Post mortem Urbani VI. quæ accidit Romæ Idibus Octobris anni MCCCCLXXXIX. cum sedisset annos XII. non extinctum est Schisma, summo liquidem consensu

senſu Cardinales *Urbani VI.* obedientiæ in ejus lo-
cum elegerunt *Petrum Thomacellum* Cardinalem,
Neapolitanum annos natum dumtaxat quadragin-
ta quinque, dictum *Bonifacium IX.* quem morum
integritate ac gravitate conſpicium fuiſſe teſtatur
Theodoricus Niemus, Scriptor cœvus. Obiit *Boni-
fati* *IX.* Romæ Kalendis Octobris anni mcccciv.
poſtquàm ſediſſet annos quindecim ex morbo cal-
culi, quem jaſturâ caſtitatis pravo Medicorum,
conſilio ſanare vel levare noluit, & mori quàm for-
dari maluit, ſicut refert S. *Antoninus* 3. part. Chro-
nici Tit. 22. cap. 3. Interim Cardinales obedientiæ
Clementis VII. qui Avenione nomen Summi Ponti-
ficis retinebat, in fovendo Schiſmate perſevera-
runt. Mortuo ſiquidem Avenione ex Apoplexia,
Clemente VII. die xvi. Octobris anni mccccxiv.
contemptis precibus Galliarum Regis, qui eos ro-
gaverat, ut non eligerent Pontificem, ſed vias po-
tiùs extinguendi Schiſmatis ſollicitè quærent,
mox delegerunt *Petrum de Luna*, Cardinalem Ara-
gonium, *Benedictum XII.* ſeu *XIII.* nuncupatum,
addito juramento de abolendo Schiſmate, ſed fictè
& verbo tenus dumtaxat, cum ejusmodi juramen-
tum, quamdiù vixit, nunquàm implere voluerit,
ſæpè licèt ſacris Eccleſiæ fulminibus iſtus, ſicut
opportuniùs oſtendemus in noſtris Colloquiis in
Hiſtoriam XV. Eccleſiæ Sæculi. Hic obiter obſer-
vaſſe ſufficiat, in abolendo diro illo Schiſmate, præ-
cæteris aliis, Academiæ Pariſienſis prudentiam ſin-
gularem, eximiamque fidem tum temporis maxi-
mè enituiſſe. Ea quippè celeberrima Academia,
extinguendi Schiſmatis tres propoſuit vias, ceſſio-
nis, compromiſſionis, & Concilii Generalis. At

Petrus

Petrus de Luna, dictus *Benedictus XII.* seu *XIII.* cogi posse negabat, ac se Francorum, & Aragonum opibus sustentans, bellum atrox & intestinum fovebat. Ruebant interim in his tenebris homines ambitione, odio, invidia, partium studio concitati, quasi offusa sempiterna Christianæ Reipublicæ nox esset. Instabat in rem Ecclesiæ Imperator *Sigismundus*, Galliam, Hispaniam, Angliam, Italiam circumcursabat, ut dissidentes & convulsas Orbis partes componeret: nihil promovebat. Antistites, qui Pisas convenerant, nihil profecerant aliud, nisi ut ad duos Pontifices Maximos tertius adderetur. Tandem pacem & concordiam frustrâ quæsitam à Regibus, Imperatoribus, Jurisconsultis ac Doctoribus, Orbi Christiano jactato, & extrema omnia, metuenti dedit *Carolus VI.* Galliarum Rex, qui celeberrimæ Academiæ Parisiensis secutus consilium, ab obedientia *Petri de Luna*, quem *Benedictum XIII.* appellant, recessit. Quò factum est, ut destitutus à Gallia *Benedictus* conciderit, ac subrogato brevi postea in Concilio Generali Constantiensi *Martino V.* vetus illud ac fatale Schisma post annos ferè quinquaginta sublatum sit. Sed hæc, quæ spectant progressum ac finem istius Schismatis à nobis hic breviter perstricta, latius expendemus in nostris Colloquiis in Historiam XV. Ecclesiæ Sæculi.

D. Desieruntne Græci, post captam à Francis cum Venetis fœderatis urbem Constantinopolim, anno, ut in superiori Colloquio observasti, MCCIV. suos habere Patriarchas Constantinopolitanos?

M. Etsi Franci cum Venetis fœderati, post captam urbem Constantinopolim, Latium elegerint

rint Patriarcham Constantinopolitanum *Thomam Maurocenum*, natione Venetum, secundum Pacta ante urbis expugnationem conventa, ut scilicet ex illa gente, quæ Imperatorem Constantinopolitanum non haberet, Patriarcha designaretur; suos tamen Græci Schismatici semper habuerunt Patriarchas Constantinopolitanos, quorum seriem exhibent *Joannes Leunclavius* lib. 4. Juris Græco-Romani, *Panvinus Onuphrius* in Chronico Ecclesiastico, & *Philippus Cyprius* in Chronico Ecclesiæ Græcæ, quod *Nicolaus Blancardus* è manuscripto Byzantino primus vulgavit, & Latine reddidit. Sed quia isti Scriptores variant in annis Græcorum Patriarcharum Constantinopolitanorum, sequar ipse horum Patriarcharum Chronotaxin, quam in suo Chronico Ecclesiastico texuit *Panvinus Onuphrius*, quæque mihi longè accuratior videtur. Mortuo anno millesimo ducentesimo *Georgio Xiphilino* Patriarcha Græco Constantinopolitano, sicut diximus in Colloquio secundo in Historiam duodecimi Sæculi, successit in Sede Constantinopolitana *Joannes Camaterus*, qui obiit in Didymothico, civitate Thraciæ, anno mcccv. Extat lib. 4. Juris Græco-Romani Synodale Decretum istius *Joannis Camateri* Patriarchæ Græci Constantinopolitani, quo prohibetur, ne Vir unus Sobrinas duas uxores ducat. Post obitum *Joannis Camateri* vacavit Sedes Constantinopolitana apud Græcos per annum unum & menses decem, undè anno mccvii. *Michaël IV. Autarianus* fuit designatus Patriarcha Constantinopolitanus à *Theodoro Lascari* Græcorum Imperatore, suamque Sedem tenuit Nicææ, & vita functus est anno mccxiii. post

postquam sedisset annos quinque & menses sex. In *Michaëlis* defuncti locum successus est Patriarcha Constantinopolitanus *Theodorus* hujus nominis III. qui, postquam sedisset duobus annis, è vivis excessit anno MCCXV. eique successit *Maximus* hujus nominis II. Monachus, qui tantum septem mensibus sedit. In *Maximi* locum substitutus est *Manuel Charitopulus* Monachus, qui obiit anno MCCXXI. cum sedisset annos IV. & menses septem. Post *Manuelem Charitopulum* electus est Patriarcha Constantinopolitanus *Germanus* hujus nominis II. qui sedit annos XVI. & menses sex, suaque Sede fuit expulsus anno MCCXXXIX. Hic Patriarcha Græcus Constantinopolitanus unionem Ecclesie Græcæ cum Latina promovere pro viribus studuit, sed eam ad optatum exitum perducere haud potuit, sicut jam observavimus in superiori Colloquio. Dejecto sua Sede *Germano* subrogatus est *Methodius* hujus nominis II. qui sedit tantum menses tres, coque mortuo Thronum Constantinopolitanum concendit *Manuel* hujus nominis II. qui sedit annos quatuordecim, & obiit anno MCCLIV. Post illius mortem *Germanus* II. qui, ut mox diximus, è Sede Constantinopolitana deturbatus fuerat, in eam restitutus est, ac per annum integrum tenuit, hoc est, usque ad annum MCCLV. Post mortem *Germani* II. Patriarchæ Constantinopolitani, de electione successoris, à quo coronaretur novus Græcorum Imperator, filius *Joannis Duca*, dictus ab avo materno *Theodorus Lascaris*, deliberatum est. Omnium penè suffragia, & ipsius in primis Imperatoris, propendebant in *Nicephorum Blemmydam*, Virum id ætatis magnâ pietate, & sacræ prophanzque eruditionis fama

famâ percelebrem , qui & Orationes duas de Pro-
 cessione Spiritus Sancti à Patre & Filio contra Græ-
 cos Schismaticos conscripsit . Sed hanc dignitatem
 pertinaci modestiâ recusavit . Hic est ille *Nicepho-
 rus Blemmyda* Abbas Monasterii , quod suis extru-
 xerat sumptibus, cuius ad templum cum se aliquan-
 do *Marcesina*, pellex *Joannis Ducæ* Græcorum Impe-
 ratoris , & ab eo efflictim adamata , magno cum
 fastu ac satellitio contulisset , intrepidâ constantiâ
 ei fores occludi iussit , ob publicam ejus impudici-
 tiam, quam crebris sermonibus & calamo fortiter
 insectabatur . Id ægrè admodum tulit superba mu-
 lier, & Imperatorem, qui eam deperibat, ad ultio-
 nem omnibus adhibitis artibus , atque juvante as-
 sentatorum turba , incitare conata est . At *Joannes
 Ducas*, Imperator licet Schismaticus, dolens quòd
 hætenus impuris *Marcesinæ* amoribus illaqueatus
 fuisset, obortis lachrymis & voce suspiriis interrup-
 ptâ, sic *Marcesinam* pellicem suam , & Aulicos, qui
 ejus animum in *Nicephorum Blemmydam* commove-
 re satagebant, affatus est : *Quid me ad Virum justum
 puniendum impellitis ? nam si ego sine probro & igno-
 minia vivere voluissem, Imperii Majestatem inviola-
 tam conservassem . Nunc cum ipse meæ, atque aded
 ipsius Imperii contumeliæ causam præbuerim , meritis
 meis gratia refertur, ut malæ sementis malam messem
 percipiam . Ita refert Nicephorus Gregoras lib. 2.
 Historiæ . Idem etiam constat ex ipsiusmet Abba-
 tis *Nicephori Blemmydæ* Epistolâ ad multos eâ de
 re scriptâ , quam apud *Leonem Allatium* lib. 2. de
 perpetuo consensu cap. 14. & apud *Odoricum Ray-
 naldum* ad annum mclv. Num. lxxv. legere est .
 Huic igitur Abbati *Nicephoro Blemmydæ* præcla-*

ris virtutibus exornato, Patriarchatum Constantinopolitanum obtulit *Theodorus Lascaris* Græcorum Imperator, filius *Joannis Duca*, cum tamen sublimem illam dignitatem modestè suscipere detrectantem impentius urgere noluit, quia licèt eum, ob religionem & sapientiam plurimi faceret, ob morum tamen integritatem ac severitatem haud parum metuebat. Eam ob rem *Theodorus Lascaris* Græcorum Imperator, Patriarcham Constantinopolitanum designavit *Arsenium*, Monachum simplicem, illiteratum, Sacris Ordinibus necdùm initiatum, quem ab Episcopis consecrari jussit. Hi verò Imperatoris mandatis actutum mores gerentes, infrà eandem hebdomadam *Arsenium* Diaconum, Presbyterum, & Patriarcham inaugurarunt. Hic est ille *Arsenius* Patriarcha Constantinopolitanus, qui, ut in superiori Colloquio dicebamus, *Theodorum Lascarim* Græcorum Imperatorem solemnî ritû coronavit, sed post mortem illius Imperatoris Sede sua deturbatus est à *Michaële Palæologo* Græcorum Imperatore, & in ejus locum suffectus est *Nicephorus II.* Metropolitæ Ephesinus. Anno tamen MCLXI, quo *Michaël Palæologus* Constantinopolim urbem Græcorum subjecit Imperio, & Latinos fugavit, in suam Sedem Constantinopolitanam à *Michaële Palæologo* restitutus est *Arsenius*, è qua rursus dejectus, & in exilium missus est ab eodem *Michaële Palæologo* Græcorum Imperatore, quem excommunicaverat *Arsenius*, eo potissimum nomine, quòd *Michaël Palæologus*, ut Imperium sibi suisque per fas & nefas confirmare posset, *Joannem*, filium *Theodori Lascaris*, Imperii hæredem legitimum, qui tunc annum ætatis decimum agebat, igni-

igniti crepitaculi objectu excæcasset. In locum itaque *Arsenii* Patriarchæ Constantinopolitani in exilium ultra Proconnesum ablegati *Michaël Palæologus* Græcorum Imperator electione Cleri substitui curavit *Germanum* hujus nominis III. qui erat Metropolitæ Hadrianopolitanus. At *Germanus* in Sedem Constantinopolitanam intrusus, cum injuriis ac contumeliis à vulgo proscinderetur, quòd *Arsenii* adhuc viventis Sedem occuparet, sese eâ dignitate abdicare coactus est, inque ejus locum ordinatus est Patriarcha Constantinopolitanus *Josephus* Monachus, qui sedit annos XIII. & anno MCCLXXIV. à *Michaële Palæologo* è solio Patriarchali dejectus, atque in ordinem redactus est, eò quòd concordia Græcos inter & Latinos initæ in Concilio Generali Lugdunensi secundo celebrato eodem anno MCCLXXIV. consensum pertinaciter denegaret. Deposito *Josepho* anno MCCLXXIV. consecratus est Patriarcha Constantinopolitanus *Joannes* hujus nominis X. dictus *Beccus*, seu *Veccus*, eximie vir integritatis, & eruditionis, qui, coactâ frequenti Episcoporum Græcorum Synodo, ea, quæ in Concilio Generali Lugdunensi II. pro unione Ecclesiæ Græcæ cum Latina gesta fuerant, confirmavit, Epistolamque Synodicam misit ad *Joannem* XX. Papam, in qua Latinorum dogmata pereruditè & eleganter enuntiabantur. Hujus Patriarchæ Græci Constantinopolitani egregias laudes *Nicephorus Gregoras* his verbis contextit: *His temporibus Magnæ Ecclesiæ Chartophylax erat Joannes Beccus, vir excellentis ingenii, & doctrinarum studiis ab ineunte ætate institutus; præterea, tantis naturæ donis ornatus erat, quantis*

quisquam alter illius ævi . Nam & proceritate corporis , & majestate vultus , & facundia atque acumine ingenii ad omnes res idonei , aliisque dotibus præstabat , qui cùm Imperatoris decreto (de pace cum Latinis incunda) acriter adversaretur , Imperator nihil non tentavit , tam per se , quàm per alios eruditione conspicuos , ut legitimis rationibus eum adduceret ad assentiendum Ea spe frustratus Imperator , eum , omneque fermè genus in teterrimos carceres conjecit . Tum Nicephori Blemmydæ Scripta ad Beccum misit ; quibus ille perlectis , Sanctorum libros , è quibus Blemmydas sua collegerat , ultrò postulavit . Itaque brevi tempore testimoniorum acervum collegit , quæ integra volumina implere possent , & qui dudum Latinis adversatus erat , mutata sententia , victoriam aliò transtulit . Quamobrem Patriarchica Sede conscensa , Imperatoris unus fuit omnia , & lingua , & manus , & velocis Scribæ calamus , docendo , scribendo , & dogmata finiendo , &c. Concordiam Ecclesiæ Græcæ cum Latina semper fovit ac defendit Joannes Beccus , seu Veccus , Patriarcha Constantinopolitanus . At , mortuo Imperatore Michaële Paleologo , Sede suâ an. MCCLXXXIV. pulsus est ab Andronico Græcorum Imperatore , & Michaëlis Paleologi filio , qui , ut jam observavimus , à Latinis adeò alienum gerebat animum , ut patrem suum Michaëlem Paleologum , in odium concordie cum Ecclesia Romana , quam , dum in vivis esset , totis viribus promoverat , ne plebejâ quidem sepulturâ , teste Nicephoro Gregora , Græco Schismatico , dignari voluerit . Quod etiam ipsemet Andronicus Imperator apud Pachymerem , Scriptorem itidem Græcum Schismaticum , lib. 12. Historiæ testatur his verbis : Etenim sententia illa (de unione

Ecclesiæ Græcæ cum Latina) heri aut nudius tertius nondum benè radicata, avulsa est nostra sollicitudine. Et qui illa egerat, licet pater esset, licet de nobis optimè meritis, licet amicissimus, & quidquid aliud dixeris, sive consanguinitatis, sive beneficii nomen, nullis, quod ad nos fuit, nec iis etiam, quæ quilibet Christianus consecutus fuisset, justis persolutis, inglorius jacet, Vir & Imperator hostibus formidandus, & singulariter mihi omni amore dignus. Nihilominus id visum & actum est. Hic itaque Andronicus Græcorum Imperator, cum in Latinos pessimè esset affectus, Joannem Beccum, seu Veccum, de Ecclesiarum Græcæ & Latinæ unione assidue sollicitum, Sede Constantinopolitanâ an. mcccxxxiv. dejecit, & in eam intrusit Gregorium, seu Georgium Cyprium, Schismaticum, qui, ut observat doctissimus Pater Michaël Lequien in Dissertatione I. Damascenica De professione Spiritus Sancti, Palamitarum hæresim, de qua in sequenti Colloquio sermonem habituri sumus, præformavit, multaque scripsit contra Latinos, sed præcipuè contra Beccum, seu Veccum, quem cum Latinis consentientem Andronicus Senior, Græcorum Imperator, Sede Constantinopolitanâ, ut innox diximus, exturbavit. At Veccus graviore rationum pondere, utpotè pro veritate pugnans, Georgium Cyprium confutavit, & quamvis Patriarchatu esset ejectus, nec exiliis, nec carceribus, nec aliis cruciatibus ac pœnis deterreri potuit, quin ad extremum usque spiritum invictâ constantiâ Ecclesiæ Latinæ dogmata propugnaret, eaque à Græcorum Schismaticorum calumniis strenuè vindicaret. Georgius Cyprius Sedem Constantinopolitanam tenuit sex annis, hoc est usque ad annum mcccxc. quo

Patriarchatu cessit. Eodem anno Sedem Constantinopolitanam occupavit *Athanasius*, seu *Anastasius*, qui postquam sedisset annos quatuor, dejectus est, ejusque loco subrogatus est *Joannes XI.* dictus *Sozopolites*, Monachus, anno MCCXCIV. qui Patriarchatu potitus est annos sex, & obiit anno MCCC. Post illius mortem *Athanasius* seu *Anastasius* in Thronum Constantinopolitanum restitutus est anno MCCCi. & postquam sedisset annos octo, sese abdicavit, vacavitque Sedes Constantinopolitana annos duos. *Nipho*, Metropolita Cyzicenus, electus est Patriarcha Constantinopolitanus anno MCCCx. sedit annos tres, menses decem. Patriarchali dignitate se exuit, ac post ejus cessionem vacavit Sedes Constantinopolitana annum unum. Post breve illud Interpontificium, Sedem Constantinopolitanam obtinuit *Joannes XII.* dictus *Glycis* Logotheta anno MCCCxvi. seditque annos quatuor, & obiit anno MCCCxx. Ei successit *Gerasinus* Monachus Monasterii Montis Manganii, qui sedit annum unum & menses aliquot. Post obitum *Gerasini* in Throno Constantinopolitano collocatus est *Esaias* Monachus anno MCCCxxii. seditque annos xvi. & menses aliquot, id est, usque ad annum MCCCxli. quo anno vitam functus est, ac successorem habuit *Joannem XIII.* Aprinum, qui sedit annos xix. Ei in Patriarchatu Constantinopolitano successit *Callistus*, Monachus, qui, postquam sedisset annis quatuor, migravit à vita anno MCCCxlv. Post *Callistum*, Ecclesiam Constantinopolitanam *Philotheus*, seu *Philetus* rexit annos tredecim, menses sex & dies aliquot, ad annum usque MCCCxxv. eique successit *Nilus*, qui sedit annis xx. & diem ultimum clausit anno

anno mcccxcvi i i. Denique, in serie Patriarcharum Græcorum, qui Sæculis XIII. & XIV. Ecclesiam Constantinopolitanam gubernarunt, ultimus recensetur *Antonius* Monachus, qui sedit annis v. hoc est, ab anno mcccxcvi i i. usque ad an. mcccciii. Habes nunc Chronotaxin Græcorum Patriarcharum Ecclesiæ Constantinopolitanæ ad initium usque Sæculi decimi quinti, quam obscuram per se licet, ac multis tenebris obsitam, accuratiori calculo hic digerere, & in meliorem ordinem disponere pro modulo nostro tentavimus.

D. Ostendisti, ut benè memini, in Colloquio II. in Historiam duodecimi Sæculi, Latinos Crucesignatos sub finem undecimi Sæculi in Palestinam venientes, devictis Saracenis, & captâ Hierosolymâ, Latinos Patriarchas Ecclesiæ Hierosolymitanæ præfecisse, quorum Catalogum ibidem, rexisti usque ad Patriarcham dictum *Monachum*, qui in Diœcesi Florentina natus præfuit Ecclesiæ Hierosolymitanæ ab anno mcxciv. usque ad annum mccix. Nunc igitur scire velim, an post illum Patriarcham Latinum, dictum *Monachum*, alii fuerint Patriarchæ Latini, qui Sæculis XIII. & XIV. Ecclesiam Hierosolymitanam gubernarint?

M. Seriem Patriarcharum Latinorum, qui sub finem XI. sæculi, post captam à Crucesignato Latinorum Exercitu Hierosolymorum urbem, Ecclesiam Hierosolymitanam rexerunt, vel ejusdem Ecclesiæ Patriarchæ Titulares fuerunt, postquam sub finem XII. Sæculi, hoc est, anno mclxxxvi i i. Turcæ urbem Hierosolymitanam armis depugnarunt, & in suam potestatem redegerunt; fuscè descripsit *Papebrochius* in Historia Chronologica Pa-

triarcharum Hierosolymitanorum, quam tom. 3. de Actis Sanctorum mensis Maji præfixit, ex quo hæc pauca, quæ in præsentia dicturus sum, deflorare haud pigebit. Anno MCCIV. quo Hierosolymitanus Patriarcha Latinus, dictus *Monachus* obiit, *Albertus*, ex Regulari Canonico Vercellensis Episcopus, postulatus est Patriarcha Hierosolymitanus, qui tamen in Orientem dumtaxat pervenit anno MCCVI. & Patriarchatum tenuit usque ad annum MCCXIV. quo in solempni supplicatione à Saracenis occisus est. Hic est ille *Albertus* hujus nominis II. Patriarcha Hierosolymitanus, qui Montis Carmeli Eremitis Regulam dedit brevissimam, præscribentem divini Officii & Orationis quotidianæ pensum, constructionemque Oratorii in medio Cellularum, ubi manere per singulos dies ad audienda Missarum solemnia convenirent; perpetuam ab esu carniū abstinētiā, Jejunium à Festo Sanctæ Crucis ad Pascha, solitudinem, silentium, fugam otii, Prioris electionem, &c. de hac Regula ab *Alberto* Patriarcha Hierosolymitano editā, & ab *Honorio III.* Pōtifice Maximo approbatā an. MCCXVI. lausè dīsserit *Papebrochius* loco mox à me laudato, ubi tamen antiquitatem Carmelitani Ordinis liberiori calamo impugnando, & *Eliam*, aliosque Veteris Testamenti Prophetas ex clarissimæ illius familiæ albo expungendo, sibi odium ac invidiam multorum confluxit, atque in se ipso expertus est, quā periculosum sit, sese huic immiscere certamini. *Alberto*, hujus nominis II. Patriarchæ Latino Hierosolymitano, successit anno MCCXIV. *Rodulfus*, *Rodulfo Lotharius*, *Lothario Gerondus*, & *Geron-do Jacobus de Vitriaco*, qui postea à *Gregorio IX.*

Pon-

Pontifice Maximo Cardinalis Episcopus Tusculanus creatus est, egregiæ vir doctrinæ & pietatis, cujus opera recensebimus in Colloquio quinto. Obiit Romæ *Jacobus de Vitriaco* anno MCCXLIV. & in ejus locum successus est *Robertus*, qui Patriarchatum Hierosolymitanum tenuit usque ad an. MCCLV. quo anno *Alexander IV.* Pontifex Maximus creavit Patriarcham Hierosolymitanum *Jacobum Pantaleonem*, natione Gallum, patriâ trecentem, qui sexto post creationem suam anno cum Viterbium accessisset ad Curiam pro Ecclesiæ suæ negotiis promovendis, & Cardinales de successore *Alexandri IV.* eligendo dissensionibus contenderent, communibus eorum suffragiis ad apicem Apostolicæ dignitatis evehctus est ann. MCCLXI. dictusque *Urbanus IV.* Vacante itaque Ecclesia Hierosolymitana, per ipsius ad Pontificatum assumptionem, ei præfecit idem Summus Pontifex Patriarcham *Guillelmum*, qui erat Episcopus Agennensis in Aquitania, ipsique etiam commisit curam Ecclesiæ Acconensis, tunc pariter pastore carentis per translationem *Florentii* in Sedem Arelatensem, cum facultate exigendi fructus illius Ecclesiæ, donec redditus Hierosolymitanæ Ecclesiæ recuperarentur. Obiit *Guillelmus* Patriarcha Hierosolymitanus anno MCCLXIII. ac successorem habuit *Thomam*, qui à Messanenensis Ecclesiæ administratione ad Patriarchatum Hierosolymitanum promotus est, obiitque an. MCCLXXII. quo ei successit *Fr. Thomas de Lentino* Ord. Prædicatorum, Archiepiscopus Consentinus, qui, teste *Leandro Alberto* lib. 3. de *Viris Illustribus* Ord. Prædicatorum, vir fuit per omnia egregius, & laudabilis, polluit vitæ integritate, morum honestate, doctrinâ

nâ & eloquentiâ, excessitque è vivis an. MCCLXXVI. Ecclesiâ itaque Hierosolymitanâ per mortem *Thomæ de Lentino* viduata Pastore, *Nicolaus III.* Pontifex Maximus anno MCCLXXVII. ad Patriarchatum Hierosolymitanum nominavit *Joannem Vercellensem* (non, ut quidam habent *Viterbiensem*) Ordinis Prædicatorum, sextum à Sancto Dominico Ordinis Fundatore Magistrum Generalem. Quare errant hi, qui *Fr. Hieronymum Asculanum*, Ministrum Generalem Ordinis Minorum, à *Nicolao III.* electum fuisse scribunt Patriarcham Hierosolymitanum, cum is non Patriarcha, sed Cardinalis Presbyter tituli *S. Pudenticianæ* eodem anno MCCLXXVII. factus fuerit, ut optimè observat *Spondanus* in continuatione Annalium Ecclesiasticorum *Baronii* ad hunc annum. Oblatum sibi à *Nicolao III.* Patriarchatum Hierosolymitanum recusavit *Joannes Vercellensis*, & instantibus precibus apud Pontificem quæsit, ut uni soli curæ sui Ordinis vacaret, quem proinde Pontifex ad constantiam, ferendasque pro Christo labores litteris excitavit, quas ad annum MCCLXXVIII. refert *Odoricus Raynaldus*. In sententia tamen persistit *Joannes Vercellensis*, & tanto oneri humeros supponere detrectavit. Quò factum est, ut Patriarchatus Hierosolymitanus delatus fuerit *Elia*, qui illum tenuit usque ad an. MCCLXXXVI. Demortuo *Elia*, ad Patriarchatum Hierosolymitanum *Nicolaus IV.* Pontifex Maximus, promovit *Nicolaum de Anapiis* anno MCCLXXXVII. ut liquet ex Diplomate Pontificio ad Clerum & Suffraganeos Ecclesiæ Hierosolymitanæ Episcopos, ut debitâ reverentiâ Patriarcham prosequerentur, scripto, & relato ab *Odorico Raynaldo* ad eundem annum.

num. Hunc autem Nicolaum de *Anapiis* ex Ordine Prædicatorum, Provinciæ Franciæ, Remensis Diocesis fuisse, scribit *Leander Albertus* lib.3. de *Viris Illustribus Ordinis Prædicatorum*, ubi modum, quo electus est Patriarcha Hierosolymitanus, narrat his verbis: *Cum esset in Romana Curia* (Nicolaus de Anapiis) *Pænitentiarius*, & ab omnibus, ob ejus vitæ integritatem, modestiam & sanctimoniam dilectus. *Nicolaus IV.* Pontifice Maximo singulis Cardinalibus imponente, quod postridiè ejus diei tres viros prodignitate prædicta idoneos quilibet proferret, non sine divino nutu is venerandus Pater à singulis Prælatus est, sicque per eundem Pontificem ad Præsidentiam Sanctæ civitatis Hierosolymæ evectus est. Obiit Nicolaus de Anapiis non an. MCCLXXXVIII. ut perperam visum est *Leandro Alberto*, sed anno MCCXCI. in excidio Urbis Acconensis. Patriarcham siquidem, qui Accone erat quandò ea civitas à Turcis capta est anno MCCXCI. fuisse nomine Nicolaum, constat ex Epistola Nicolai Papæ IV. ad eum paulò ante scriptâ pro Inquisitionis Officio in Syria, & Palæstina contra Hæreticos & Judæos illic grassantes; eundemque ex Ordine Prædicatorum extitisse legimus apud *Walsinghamum* in Eduardum I. ad an. MCCXCII.

Capta à Turcis anno MCCXCI. Vrbe Acconensi, seu Ptolomaide, Phæniciz civitate nobilissimâ, totius Orientis opulentissima, omnium Orbis regionum commercio apprimè opportuna, ac portu capacissimo tutissimoque munitâ, omnes Latini, apud quos, ut observat *Spondanus*, ad hunc annum, facinora & scelera, cædes & furta, rapinæ & expilationes, sacrilegia & impudicitiz impunè grassabantur, à tota terra sancta exterminati sunt, pænas vide-

videlicet tot criminum, quæ à Latinis in scelerata illa civitate perpetrabantur, supremo exigente numine. Hanc gravissimam jacturam ut quadante-
nùs refarciret *Cælestinus* hujus nominis V. qui fuit Summus Pontifex electus anno mccciv. Patriarcham Hierosolymitanum, qui novas Christianorum copias illuc mittendas comitaretur, ordinandum curavit. At, sicut *Cælestinus* V. brevi sex mensium Pontificatu perfunctus, eo se munere abdicavit, ut jam in hocce Colloquio observavimus, ita novo Patriarchæ Hierosolymitano à Summo illo Pontifice instituto sua nihil omninò profuit Ordinatio, quia, sicut scribit *Guillelmus de Nangis*, Romanam veniens *Rodolphus de Grandivilla* Ordinis Prædicatorum, qui jussu *Cælestini* V. Papæ apud Parisios Patriarcha Hierosolymitanus fuerat consecratus, Patriarchali illa dignitate à *Bonifacio VIII.* successore *Cælestini* V. exutus est. Bonifacio VIII. Benedictus XI. & Benedicto XI. successit Clemens V. qui anno mcccv. *Antonium* Dunelmensem Episcopum creavit Patriarcham Hierosolymitanum. Sed *Antonio* Patriarcha mortuo anno mcccxiv. idem Summus Pontifex *Clemens* V. Patriarchatum Hierosolymitanum contulit *Petro* Ruthensi Episcopo, eique, ob Hierosolymorum Ecclesiam ab Infidelibus oppressam, Ruthenenſis Ecclesiæ veſtigalibus potiri, ejusque administrationem gerere permisit. Erepto quoque è vivis *Petro* Patriarcha Hierosolymitano, *Joannes XXI.* seu ut vulgò dicitur *XXII.* successor *Clementis* V. Patriarchali Hierosolymitanæ Ecclesiæ titulo *Raymundum* Ordinis Prædicatorum exornavit anno mcccxiv. eique etiam contulit Ecclesiæ Nimesiensis administrationem, cum
Hic-

Hierosolymis ob Infidelium tyrannidem sedere non potest. Post mortem *Raymundi*, Patriarchæ Hierosolymitani, Fr. *Petrus de Palude*, vir magnæ doctrinæ & famæ, Avenione ordinatus est à *Joanne XXII.* Patriarcha Hierosolymitanus an. mcccxxix. ut scribit continuator *Guillelmi de Nangis*, & circa principium mensis Julii ejusdem anni, unâ cum Nunciis Regis Cyprii, qui venerant ad ducendam in Cyprum filiam *Ludovici* Comitis Claromontani, sponsam primogeniti filii prædicti Regis, jussu *Philippi* Francorum Regis navigavit in Syriam, tum ad visitandum Sepulchrum Dominicum, tum ad agendum cum Soldano de Christianorum Orientalium pace & recuperatione Terræ Sanctæ. Bienio post, hoc est, anno mcccxxxi. è sua Syriacâ peregrinatione in Gallias reversus est *Petrus à Palude* Patriarcha Hierosolymitanus. Obiit Parisiis anno mcccxl. & in Majori Conventu Fratrum Prædicatorum sepultus est, ubi Epitaphium, quod ipsi positum est, eos refellit, qui illum in Cypro è vivis excessisse inconsideratè scripserunt. Multa Opera scripsit *Petrus à Palude*, quæ suo loco, seu in quinto Colloquio, quod erit de *Viris illustribus* Sæculi XIII. & XIV. commodiùs referemus. De mortuo *Petro à Palude*, Patriarchæ Hierosolymitano, non defuisse successiorem, ex eo vel maximè probat *Papebrochius* sub finem Historiæ Chronologicæ Patriarcharum Hierosolymitanorum, quòd *Sixtus Senensis* in Chronico ad annum mcccxxx. nominet tres consequentes Archiepiscopos Tyrenses, omnes ex Ordine Prædicatorum, videlicet *Nicolaum*, *Bonacursium*, & *Petrum de Conflitu*. Undè infert *Papebrochius*, quòd si hujus Ecclesiæ Tyrensis titulus nō est

est

est permissus vacare, multò minus permissus sit vacare Titulus Patriarchalis Ecclesiæ Hierosolymitanæ. Verùm, cùm isti successores, quos in Patriarchatu Hierosolymitano habuit *Petrus à Palude*, viris eruditis omninò ignoti sint, non est operæ pretium illorum studiosius perquirere nomina, quibus nudus tantum Patriarchæ Hierosolymitani titulus, absque ulla recuperandæ possessionis spe, datus est in Ecclesia Romana. A tempore siquidem amissi à Latinis Orientis, Apostolica Sedes jus, quod semel assumpserat, providendi Ecclesiis tam Patriarchalibus, quàm Archiepiscopalibus in Oriente constitutis, retinuit, soletque etiannùm Legatis Apostolicis, & nonnullis aliis Ordinatis Episcopis conferre titulum alicujus Ecclesiæ, quæ est in partibus Infidelium. Sed satis hætenus dictum sit de Ecclesiæ Hierosolymitanæ Patriarchis, quorum seriem, quæ in Chronico *Panvini Onuphrii*, & *Genebrardi* minùs accuratè textitur, in meliorem ordinem, post doctissimos Viros *Odoricum Raynaldum*, & *Papebrochium* redigere necessarium esse duximus. Id fortassè non perfecimus, conati quidem sumus.

D. Numquid Ecclesiæ Antiochena & Alexandrina sæculis XIII. & XIV. suos habuerunt Patriarchas?

M. Antiochiâ anno millesimo nonagesimo octavo Latinorum armis occupatâ, cœpit Ecclesia Antiochena habere Patriarchas Latinos, quorum seriem in Colloquio secundo in Historiam Sæculi duodecimi texuimus usque ad *Eliam Robertum* Regiensem, antea Episcopum Brixianum, qui Patriarchatum Antiochenum obtinuit anno MCCXI.

&c

& obiit anno MCCXLVII. At quinam, post illum *Eliam Poberum*, ex Latinis Patriarcha Antiochenus fuerit? incompertum planè esse ex *Panvino Onuphrio*, & ex *Genebrardo* in Chronico ibidem observavimus. Habuerunt etiam Græci Schismatici post captam à Latinis Antiochiam, suos Patriarchas Græcos Antiochenos, qui tamen omnes penè ignoti sunt, ac subindè eorum series describi haud potest. Quod spectat Patriarchas, qui Sæculis XIII. & XIV. Ecclesiam Alexandrinam rexerunt, necesse non est, ut in eorum contexenda serie diutiùs hic immoremur. Ostendimus quippè in Colloquio secundo in Historiam Sæculorum septimi & octavi, nos seriem Patriarcharum Alexandrinorum dumtaxat habere descriptam à *Severo*, *Elmacino*, *Abulfarago*, & ab aliis Scriptoribus Arabibus Sectæ Jacobitarum addictis, qui datâ operâ in texenda serie Patriarcharum Alexandrinorum, post *Dioscorum*, Hæreticum Eutychianum, qui in quinto Sæculo, seu anno ccccxliv. Sancto *Cyrillo* successit in Patriarchatu Alexandrino, meminerunt dumtaxat Patriarcharum Eutychianorum & Jacobitarum, qui Ecclesiam Alexandrinam occuparunt, prætermisiss tam Orthodoxis, quàm Hæreticis, qui, licèt fuerint Patriarchæ Alexandrini, *Jacobiticam* tamen, seu Eutychianam Sectam, non sunt professi. In hac igitur referenda serie Patriarcharum Alexandrinorum Jacobitarum tempus & operam hic malè locare non debemus, si tamen eam habere desideres, leges jam citatum Colloquium nostrum secundum in Historiam Sæculorum septimi, & octavi, ubi post Clarissimum *Eusebium Renaudotium* in sua *Historia Patriarcharum Alexandrinorum*, & doctissimos Ope-

ris Bollandiani Continuatores in *Dissertatione Chronologica de Patriarchis Alexandrinis*, quam ad Tomum 5. mensis Junii præmiserunt, seriem Patriarcharum Alexandrinorum à laudatis Scriptoribus Arabicis & Jacobitarum Sectæ addictis descriptam inferuimus, ac integram dedimus, à tempore videlicet *S. Marci* Evangelistæ, qui fuit primus Patriarcha Alexandrinus, usque ad *Joannem XV.* qui fuit centesimus tertius Patriarcha Alexandrinus, quique, ut referunt Bollandiani Operis Continuatores ex Epistolis à *P. Bernarto* Societatis Jesu scriptis, Chrisma, quod ducentis ab hinc annis factum non fuerat, magno apparatu consecravit anno millesimo septingentesimo tertio. Sed tempus est, ut vasa colligamus, ac familiarem nostrum larem redeamus. Cave tamen, ne otio indulgendo,

& porrectis pedibus in utramvis aurem dormiendo, imparatus accedas ad proximum nostrum Colloquium, quod

postridiè de Hæresibus &

Controversiis,

quæ

Sæculis XIII. & XIV.

in Ecclesia exortæ sunt, habituri sumus.



COLLOQUIUM III.

*De Hæresibus & Controversiis, quæ
Sæculis XIII. & XIV. enatæ
sunt in Ecclesia.*

DISCI-
PULUS.

SÆPIÙS experientiâ comprobavi, ad veram studio & lectione sapientiam comparandam, nullam diem partem utiliore esse, quàm diluculum, dùm Sol novus exoriens vigorem & alacritatem affert rebus omnibus, hominemque ad vitæ munia revocat; dum habile est ad omne ministerium corpus, & organa tranquilla sunt ac serena. Quapropter, summo mane hodiè expergefactus, huc rectâ omni festinatione venire properavi, ut te de Hæresibus & Controversiis, quæ Sæculis XIII. & XIV. in Ecclesia obortæ sunt, differentem pronis auribus auscultarem.

MAGISTER. Tibi ex animo gratulor, quòd illos non imiteris juvenes, qui horas matutinas, optimam vitæ partem, intempestivo somno perdere solent, quique à somno excitati tam ægrè è lecto divelluntur, ut, dum oscitant, caput scalpunt, suosque nervos distendunt, tota præterfluat hora. Si Faber ærarius ob vile lucellum surgit ante lucem, quanto magis juvenes expergefacere debet amor cœlestis sapientiæ, quæ apud Salomonem clamat: *Qui manè vigilaverint ad me, invenient me.* Non mediocris protectus est, si quis suo quæque tempore gerat, & matutinas horas studiis impendat;

Tom.V.

L

dat;

dat; cùm certum sit, in studiis plus effici unâ horâ matutinâ, quàm tribus pomeridianis, idque nullo corporis detrimento. Ne igitur tam pretiosi temporis jacturam faciamus, nostrum, si placet, Colloquium incipiamus ab Hæresibus, & Controversiis, quibus Sæculo decimo tertio vexata est Ecclesia. Dein, alias expendemus Hæreses, & Controversias, quæ Sæculo Ecclesiæ decimo quarto originem habuerunt.

D. Albigenſium hæreseos exordia, errorum portenta, flagitiorumque monstra sat superque in tertio Colloquio in Historiam Sæculi duodecimi exhibuisti. At, cùm execrabilis illa Secta, sicut ibidem observasti, Sæculo decimo tertio ita invaluerit, ut ad eam exterminandam necesse fuerit Sacram militiam indicere, præstat nunc, ut breviter describas felicem faustumque exitum illius Sacrae militiæ, quâ feralis illa Hydra lethali vulnere petita tandem aliquandò obtrita ac profligata est.

M. Quòd Hæreticis à Deo, à conscientia, & à bona mente relictis usu venire solet, ut videlicet, in illo barathro, in quod se temerè conjecerunt, pertinaciùs hære ac perire, quàm ex eo emergere & resipiscere malint; Id Hæreticis Albigenſibus, quos penitus occæcaverat impietas cum singulari superbia coniuncta, contigisse conpertum est. At enim nefariæ istius Sectæ Principes, qui sub finem duodecimi Sæculi, sat habuerant in privatis, & in publicis congressibus, in tenebris & in luce, verbo, scriptoque spargere, disseminare, propagare virus impietatis suæ, & eâ virtutis probitatisque specie, quàm gnavitè mentiebantur, populum suis erroribus iniquè corrum-

rumpere; tandem ineunte Sæculo XIII. insolentiores facti, & *Raymundi* Comitis Tolosani fulti præsidio, in Ecclesias immanitèr grassari cœperunt, Tempa spoliarunt, incenderunt domos, violarunt Sacras Virgines, innoxios trucidarunt, Sacerdotes exquisitissimis suppliciis & acerbissimâ morte affecerunt, atque plures florentissimi Galliarum Regni Provincias ferro flammâque devastarunt. Ferebatur ad pompam error civium sanguine satiato furore armatus, cui parentes liberis, opibus divites, imi è plebe capite suo litabant. Tantâ mole miseri laborabant, ut fallerentur, ut perirent. Horum se furoribus ac stragibus opposuit *Innocentius III.* qui tum temporis universæ Ecclesiæ clavum feliciter regebat, & ut commune illud incendium restingeret, consiliis improborum resisteret, audaciam debilitaret, machinationes frangeret, erroremque è Galliarum Regno deturbaret, sacram militiam adversus hæreticos Albigeneses, quos ad meliores partes reduci, & depositis erroribus, ad mentis sanitatem seriò converti posse nulla ampliùs spes erat, indixit. Collectus itaque est Crucesignatorum exercitus, cui, præter multos Duces ac Comites, inscribi voluerunt innumeri Episcopi & Ecclesiastici viri. Eiusdem Sacri Belli Dux electus est *Simon Comes Monfortius*, cujus præclaras dotes describit *Petrus de Valle Cernaii* cap. 18. *Historiæ Albigensum*. Totus igitur in Catholicorum causam incumbens *Simon Monfortius*, Heros invictissimus, uno armorum impetu & continenti seriè triumphorum Hæreticos Albigeneses debellavit, & instar *Judæ Machabæi*, Cælo pro ipso pugnante, cunctis humanis viribus superior visus est. *Bigerras*

primum copias duxit. Capta Urbs, ac Civium cædes promiscuè facta est ipsâ die Sanctæ Mariæ Magdalena sacrâ, quam Christi concubinam, per summam blasphemiam scelerati illi Hæretici appellare non verebantur. Mox Carcassona, & cæteræ Urbes, Castraque perduellium munitissima, sese victori *Simoni Monfortio* dederunt. Comitis Fuxensis copiarum, qui *Raymundo* Comiti Tolosano fœderatus erat, ad Castrum Sancti Martini fusæ, dissipatæ ac profligatæ sunt. Denique ad *Murellum*, seu *Muretum*, in agro Tolosano Oppidulum, *Simon Monfortius* de Albigenſibus insignem reportavit victoriam. Habebant Albigenſes in suo exercitu centum millia armatorum, quorum agmen ducebat *Petrus* hujus nominis II. Aragonum Rex, qui suppetias tulerat affini suo Comiti Tolosano, utpote cui sororem suam *Leonoram* collocaverat. Ex adverso *Simon Monfortius*, qui non plures octingentis equitibus, & mille peditibus in exercitu suo numerabat, divino præsidio confusus prælium conseruit, & præeunte Sancto *Dominico* Ordinis Prædicatorum Fundatore, qui, velut alter *Moyſes*, inter graviora discrimina intentissimis ad Deum precibus vacabat, & Crucifixi effigiem, quam manu gerebat, militibus ostentabat, ingentem hostium multitudinem cæcidit, atque internecione delevit, quos inter *Petrus* Aragonum Rex pugnans occubuit. Plus viginti millia desiderata, cæteri armis exuti, sicut referunt *Paulus Æmilius*, *Petrus de Valle Cernaii* cap. LXXI. & LXXII. Historiæ Albigenſium, & *Rigordus* in lib. de Gestis *Philippi Augusti* ad annum MCCXIII. At, proh dolor! strenuus militiæ Dux *Simon Monfortius*, qui tot pericula eva-

ferat,

ferat , toties è medio igni ac ferro salvus & incolumis redierat , dùm Tolosam obsidet, vibrato per machinam saxo lēsus interiit anno MCCXVI I. & Comitatum Tolosanum , quo , ob egregia sua in Ecclesiam promerita, & propter Apostasiam *Raymundi* Comitis Tolosani , donatus fuerat, reliquit filio suo *Amalrico* . Paulò post , *Raymundus* , qui , ut mox diximus , ob suam Apostoliam Comitatu Tolosano abdicatus fuit, subitâ morte extinctus est, sacrâque sepulturâ privatus, quòd impœnitens obiisset , & Ecclesiam , dum viveret , suâ, in fovenda ac propaganda Albigenſium hæresi, pervicaciâ, dilacerasset . Hic *Raymundus* superstitem reliquit eiusdem cognominis filium, dictum *Raymundum* *junio-rem* , qui , Comitatum Tolosanum , quo suus pater exutus fuerat, armis repetere volens , Bellum movit contra *Amalricum* , qui in possessionem ejusdem Comitatus patri suo *Simoni Monfortio* successerat . Sed *Amalricus* hujus Belli molem viribus imparem suis expertus, Jura sua transfudit in *Ludovicum VIII.* Galliarum Regem, qui numerosum exercitum, Cruce insignitum duxit in Albigenſes , oppida, castraque plurima, & Avenionem post trium mensium obsidionem recepit anno MCCXXVI I. sicut *Gesta* ejusdem Regis , & *Guillelmus de Podio Laurentii* testantur . Demùm , sacro contra Albigenſes Bello suscepto, *S. Ludovicus* Galliarum Rex hujus nominis IX. adhortante *Gregorio IX.* suis Litteris Apostolicis , quas Annalibus Ecclesiasticis inseruit *Odoricus Raynaldus* ad annum MCCXXVI I. finem imposuit , induxitque *Raymundum* *junio-rem* ut consentiret in eas pacis condiciones , quas inter , hæ præcipuæ erant , ut *Raymundus* Comitatum Tolosanum ab

Hæreticis Albigenſibus purgaret, eoſque viis omnibus exterminaret: Damna, illata Eccleſiis ac Monafteriis, reſarciret, earumque Jura & libertates defenderet: *Joannam*, filiam ſuam unicam, uni ex Regis Galliarum fratribus daret uxorem, quo ex matrimonio, ſi nulli procrearentur liberi, nihilo minus Tolofanus Comitatus, poſt eorum ac *Raymundi* Comitum obitum, ad Galliarum Regem, ejuſque ſucceſſores tranſiret. Has & alias hujusmodi conditiones pacis contentas in Tractatu, quem referunt *Duchefnius* Tomo 5. *Hiſtoria Francorum Scriptorum*, & *Catellus* *Hiſtoriæ Comitum Tolofanorum* lib. 2. poſtquam juraſſet *Raymundus* Comes in die Sancto Paraſceves, præſente S. *Ludovico* Galliarum Rege, & innumerâ Prælatorum, Procerumque multitudine, abſolutionem à ſententia excommunicationis, quâ percuſſus fuerat, accepit à Legato Apoſtoliço, qui ei in penitentiam iniunxit, ut Crucem contra Saracenos ſumeret, & ſacram Militiam in Palæſtina per quinquennium gereret. Hunc in modum finitum eſt Bellum ſacrum, & extincta planè in Galliis Albigenſium Hæreſis, ſuas etiam hanc in rem curas conferente ipſomet *Raymundo* *Juniore* Comite Tolofano, qui ad exaltationem Fidei Chriſtianæ, ad radicis extirpandam Hæreticam pravitatem, ad conſervationem pacis, & ad bonum totius Comitatus Tolofani ſtatum, conſervandum & in melius reformandum Sanctiſſimas Leges tulit anno MCCXXXIII.

D. Pernicioſiſſimis Hæreticorum conatibus, ne Religioni noceant, & Catholicæ Eccleſiæ pacem perturbent, armis temporalibus reſiſtendum eſſe, nemo certè negare poteſt. Si enim ille, qui
ho-

hostem, ferrum ac flammam minitantem, atque jugulum patriæ petentem quieto, tranquilloque videret animo, vel ei perfunctoriè aut leviter se opponeret, impius, reusque perduellionis haberetur, & nisi contenderet acerrimè, vimque vi defenderet, defuisse Reipublicæ meritò censeretur; quanto magis exardescere debent avitæ Religionis propugnatores, & armis etiam temporalibus, si necesse sit, comprimere furorem hæreticorum, qui ad suos stabiliendos errores conjurantes, in Religionem, quâ nihil secundum Deum antiquius habere debemus, hostiliter grassantur. Optimè itaque se gessit *Innocentius III.* Pontifex Maximus, dum sacram Militiam ad frangendos Hæreticorum Albigenſium impetus, indixit, secutus hac in re laudatissimum illum morem, quem, ut nuperrimè audiavi à viro erudito, à tempore *Constantini Magni* Imperatoris omnia comprobarunt Ecclesiæ Sæcula. Sed dicas nunc, quæso, quid sibi velit istud Sanctæ Inquisitionis Officium, quod ad excindendas Albigenſium Hæreseos reliquias Fratribus Prædicatoribus à Sede Apostolica demandatum esse dicitur?

M. Ad Hæreseos Albigenſium expugnationem & Hæreticorum conversionem miserat *Innocentius III.* Pontifex Maximus Legatos Apostolicos *Arnaldum* Cisterciensem Abbatem, *Petrum de Castro novo*, & *Rodolphum* ejusdem Ordinis Professores, qui, adjunctis sibi Cisterciensis itidem Ordinis duodecim Abbatibus, Hæreticos ad gremium Ecclesiæ quâ fervidis concionibus, quâ disputationibus, reducere pro viribus tentarunt. Accessit Sanctæ Dux Prædicationis *Didacus*, Oxomenſis in-

Hispania Episcopus, cum *Dominico*, suo itineris & laborum indivulso socio, quem inter Canonicos Regulares suæ Ecclesiæ Oxomensis anno mxciv. susceperat. Animadvertens autem *Didacus*, quòd Cistercienses Albigensum Hæreticorum conversionem huc usque parùm promovissent, illis author fuit, ut dimissis equis, quibus vehebantur, & abjectis auro, argento, famulitio, ac superfluo comitatu, Apostolicam prædicandi rationem sequerentur, & unicuique termini proprii assignarentur, per quos discurrendo, prædicationi insisterent, & disputationibus insudarent, sicut testatur *Petrus de Valle Cernaii* Cisterciensis Monachus cap. 5. *Historiæ Albigensum*. Eo in munere cum biennium Apostolico fervore *Didacus* Oxomensis Præsul & *Dominicus* insumpserunt cum Apostolicis Legatis, & aliis Cisterciensis Ordinis Abbatibus; *Didacus* in Ecclesiam suam reversus est, *Dominico* Duce prædicationis adversus Albigenes paucis cum sociis (nam & Cistercienses Abbates discesserant) relicto. Novem annos Vir Dei *Dominicus* in Hæresis confutationem, in prædicationem ac defensionem fidei strenuè & intrepidè iacubuit, verbo, precibus, miraculis Catholicam Religionem propugnavit; Sacræ Inquisitionis Officium adversus hæreticam pravitatem in Provincia Narbonensi, & maxime Tolosæ & Carcassonæ autoritate Romanorum Pontificum *Innocentii III.* & *Honorii III.* magno cum animarum fructu exercuit, utque Ecclesia ad expugnandos, vel convertendos Hæreticos perpetuum haberet fidei fulcimentum, instituit clarissimum Ordinem Fratrum Prædicatorum, quibus pro tutanda fide Catholica jugiter excubantibus Sanctæ

& Inquisitionis Officium commiserunt Romani Pontifices, seu eis ad hoc officium delectis auctoritatem dederunt inquirendi in Hæreticos, & in eos debitis pœnis animadvertendi, si resipiscere, suosque errores ejurare nolint. Non me fugit quantùm Hæreticis displiceat illud Sanctæ Inquisitionis Officium, quod unus ex illis, videlicet *Guilhelmus Cave* in conspectu *Sæculi Scholastici*, ut vocat, seu decimi tertii, suæ *Historiæ Litteralis*, infrunito ore appellat *Gravissimum & ab Orco petitum Christianæ Religionis dedecus simul & flagellum, conscientiarum carnificinam, summæque tyrannidis, & crudelitatis officinam, qua Sæculi non invenere tyranni majus tormentum*. Verùm, ad confutandam hanc Hæreticorum calumniam, quam surdâ aure præterire haud possum, sufficiat hic breviter observare, tribus potissimum de causis Sanctæ Inquisitionis Officium fuisse in Ecclesia sapientissimè institutum. Primò, ut sanari possint Hæretici, qui suam misereri sortem nolunt. Est enim id Novatorum omnium ingenium, ut in quemcumque incurrerint aut impeerint errorem, ad eum omni animi inductione ac voluntate adhærescant, nec ad sanio-rem mentem, nisi adhibitâ aliquâ severitate, redire valeant. Quid autem medico crudelius eo, qui in ægrotum indulgentior, ferrum in vulnus & cicatricem altius adigere reformidet? Hæc nimia humanitas pro crudelitate, sævitia contrâ, rigidiorque severitas pro humanitate summa haberi debet. Quòd ergò aliquam ergà contumaces Hæreticos severitatem adhibeat Sanctæ Inquisitionis Officium, non inde culpari, sed potius maximè commendari debet, cum eâ severitate sæpius corrigantur

tur Hæretici, suumque perversum mentis habitum emendantes, amissam animæ salutem adipiscantur: *Clamet, vociferetur æger impatiens per dolorem, inquit S. Cyprianus in lib. de Lapsis, gratias agat, postquam senserit sanitatem.* Secundò, institutum est Sanctæ Inquisitionis Officium, ut populi profligatissimas hæreticorum doctrinas fugiant, horreant & execrentur. Si enim Hæretici, impunè & nullo suppliciorum metu coerciti, suas possent disseminare doctrinas, facilè excitarent incendium, quod auris omnibus & flabellis accensum serperet, glisceret, grassaretur, ac, nullo sese opponente cursui flammarum, incautos populos involueret. At, dum Sanctæ fidei Quæsitores, ad primam novitatis auram, errorem acriter oppugnant, & Hæreticos, Hæreseosque fautores confestim in ordinem redigunt, tam prompto, tamque salutari adhibito remedio efficiunt, ut novitas variis multiplicibusque lenociniis hominum animos non permulceat. Deniquè, Sanctæ Inquisitionis Officium institutum est ad fovendam Regnorum tranquillitatem, quæ diù profectò stare non potest, dum Religionis divortia vigent, & populi erroribus ab Hæreticis sparsis afflati de summa re dissident, ac magno animorum æstu inter se digladiantur. Ex his quippe dissensionibus oriuntur factiones, ex factionibus crescit audacia, ex audacia contemptus legum & legitimæ dominationis odium. Hinc rebellio, Bellumque prorupit eò sævius, quòd Religionis & Sacrorum causâ utrinque movetur; ex Bello verò strages, ruinæque innumeræ prodeunt, quæ longo temporis progressu vix ac ne vix quidem resarciri possunt. Tot gravissimis malis omnem aditum præ-

clu-

cludunt, vel saltem præsentissimum remedium afferunt fidei Inquisitores, quippè qui Hæreses in suis cunis præfocant, Hæreticis larvam detrahunt, eorumque malis detectis artibus, omnem facultatem aliis nocendi, suosque instillandi errores penitus adimunt. Istud itaque Sanctæ Inquisitionis Officium sibi à Summis Pontificibus concreditum magno fervore contra Hæreticos Albigeneses obierunt Fratres Prædicatores, quorum tamen zelus, & severa in Hæreticos eorumque fautores justitia tam gravem adversus ipsos persecutionem excitavit, ut in odium Inquisitionis ex urbe Tolosa secedere compulsi, sacro instructo agmine, sicut refert *Spondanus* ad annum mcccxxxiv. bini & bini exierint, animis ad martyrium comparatis, Symbolum Fidei, & Antiphonam *Salve Regina* concinentes. Quæ in re egregii illi Fidei Athletæ contra Hæreticos intrepidis animis decertantes, securi sunt exempla Sanctorum Patrum *Athanasii, Augustini, Hieronymi* & aliorum, qui Hæreticorum conatibus sese acerrimè opposuerunt, eos severiore stylo confixerunt, nec timuerunt unquam, ne à procacibus illis hominibus appeterentur vicissim acerbioribus iniuriis, sed potius quidquid plagarum ab illis accipiebant, in decorum & beneficiorum loco reponabant. Sed de zelo Fratrum Prædicatorum in expugnandis & convertendis Hæreticis plura in sexto Colloquio dicemus.

D. Debellatâ hac pestiferâ Albigenium hæresi, quæ tot ac tantas in Galliis excitavit tragædias, emerferuntne sæculo decimo tertio aliæ hæreses, quæ florentissimum Galliarum Regnum virulento suo anhelitu infestarent?

M. Libri *Aristotelis* Sæculo Ecclesiæ decimo tertio Constantinopoli recens in Gallias asportati, è Græco idiomate in Latinum translati, & ab erroribus, quos continebant, necdum purgati, occasionem præbuerunt quibusdam subtilioribus Theologis in Galliis nova procudendi commenta, &, relictâ verâ ac puriori veterum Patrum doctrinâ, ex turbidis Arabum lacunis fœculentos proferendi errores. *Homines* siquidem (ut rectè observat *Lactantius* lib.3. *Divinarû Institutionum* cap.11.) ideò falluntur, quòd aut religionem suscipiunt, omiſſa Sapiencia, aut Sapiencia soli student, omiſſa religione: cùm alterum sine altero non possit esse verum. Cadunt ergo ad multiplices religiones, sed ideò falsas, quia Sapienciam reliquerunt, quæ illos docere poterat &c. Hi Theologi rerum novarum cupidi, *Aristotelis* Philosophiam in subsidium errorum, quos spargebant, advocantes; in causa fuerunt, cur libri illius Philosophi, qui novorum semina errorum continere videbantur, damnati & combusti fuerint in Concilio Parisiensi anno MCCIX. celebrato, & sub pœna excommunicationis cautum, ne quis de cætero eos scribere, legere præsumeret, vel quoquo modo habere, sicut testatur *Rigordus* in vita *Philippi Augusti* Galliarum Regis ad annum MCCIX. Hanc damnationis sententiam in libros *Aristotelis* à Synodo Parisiensi latam confirmavit *Gregorius IX.* Pontifex Maximus anno MCCXXXIII. in Bulla ad Magistros & Scholares Parisienses, quæ extat in Magno Pastoralis Ecclesiæ Parisiensis, eamque refert *Joannes Lanojus* Doctor Parisiensis in libro, quem edidit, *De varia Aristotelis in Academia Parisiensi fortuna.* Dum *Aristotelis* Philosophia tot ignominia notis inusta

Pa-

Parisiis exularet, & qui vel levitè eam attigissent, hæresis suspicione aspergerentur, commodum adfuit S. *Thomas*, Doctor Angelicus, qui Aristotelis Philosophiam præclaris suis Commentariis sic illultravit, & ab erroribus repurgavit, ut eam fidei obsequio mancipatam Christiani deindè Philosophi, probante Apostolicâ Sede, & toto plaudente, Orbe Catholico, obviis ulnis exceperint, atque pro ejus defensione eas in Scholis pugnas moverint, quas vix boni Cives pro aris, ac focus suscepissent.

D. Fortunæ *Aristotelis* certè non invideo, sed eorum me miseret, qui Sæculo Ecclesiæ decimo tertio ex lectione & studio librorum hujusce Philosophi in varios abducti sunt errores, qui, & quales fuerint, quosve Authores habuerint? paucis hîc exponere debes.

M. Ineunte Sæculo decimo tertio *Almaricus* professione Clericus, è territorio Carnotensi, Villa, quæ *Bena* dicitur, oriundus; Parisiis dum studeret, & argutiis Aristotelicæ Dialecticæ plus æquo deditus esset, Hæresim promulgavit, teste *Rigordo* in *Vita Philippi Augusti* Galliarum Regis ad annum MCCIX. ubi hæc habet; *Qui* (seu *Almaricus*) *cùm in arte Logica peritus esset, & Scholas de arte illa, & aliis artibus liberalibus diu rexisset, transtulit se ad sacram paginam excolendam. Semper tamen suum per se modum docendi & discendi habuit, & opinionem privatam, & judicium quasi sectum, & ab aliis separatum. Unde & in ipsa Theologia ausus est constanter asseverare, quòd quilibet Christianus teneatur credere se esse membrum Christi, nec aliquem posse salvari, qui hoc non crederet, non minus quàm si non crederet Christum*

stum esse natum & passum, vel alios Fidei articulos. Hunc Almarici, ejusque Sectatorum errorem damnavit Academia Parisiensis anno MCCIV. cujus doctrinali judicio stare nolens Almaricus ad Summum Pontificem Innocentium III. provocavit, Romamque profectus est. At, eo audito, lectis quoque litteris Academiae Parisiensis, & utrius partis æquâ lance ponderatis rationibus, Pontifex sententiam adversus eum latam confirmavit, præcepitque ut suum publicè & coram Academia Parisiensi ejuraret errorem, quod quidem anno MCCVI. Parisios reversus Almaricus, fide præstitit, ore palinodiam cecinit, & corde hæresim retinuit. Paulò post, in morbum lapsus, obiit & juxta Cœnobium S. Martini de Campis sepultus est. Discipulos reliquit, qui novos errores impietati Magistri addiderunt, dictitantes primò, potestatem Patris durasse, quamdiù viguit Lex Mosaica: Legem novam à Christo conditam ad sua usque tempora vim habuisse, sed eam deinceps cum omnibus suis Sacramentis antiquatam locum dedisse Spiritus Sancti Regno, in quo Baptismus, Confessio, Eucharistia & alia Sacramenta, & salutis adminicula jam non essent necessaria, sed solâ gratiâ interiori Spiritus Sancti, citrà ullum bonorum operum exercitium, unumquemque salvari posse docebant. Præterea, Charitatis virtutem sic extollebant Almarici Discipuli, ut flagitia ipsa, stupra & adulteria, aliaque id genus gravissima peccata per ipsam licita reddi asserere non dubitarent, mulierculis, quibuscum carnali commercio commiscebantur, & rudibus, quos decipiebant, impunitatem peccati hoc pacto promittentes, sicut refert Rigordus, Author cœvus, ad annum MCCIX.

Alio-

Aliorum errorum Discipulos *Almarici* infimulat *Casarius Heisterbacensis* lib. 5. Dialog. cap. 22. ubi illos accusat, quòd dicerent primò, non aliter esse Corpus Christi in pane Altaris, quàm in alio pane, & in qualibet re. Secundò, quòd assererent, Deum locutum fuisse in *Ovidio*, sicut in *Augustino*. Tertiò, quòd negarent resurrectionem corporum, affirmantes nihil esse Paradisum, neque Infernum. Quartò, quòd Altaria in memoriam Sanctorum erigere, & thus coram sacris Imaginibus adolere, Idololatriæ crimen esse pertenderent. Quintò, quòd eos, qui ossa Martyrum deosculabantur, sugillarent. Postremò, quòd docerent, cum, in quo est Spiritus Sanctus, peccare deinceps non posse, & fornicationem ab ipso perpetratam peccatum esse negarent. Ex quo cœnoso istorum hæreticorum gurgite *Calvinum* pestilentem suam hæresim de *Inamissibili Justitia* quocumque admissio flagitio, excepto solo Apostasiæ à fide peccato, in suam sectam derivasse, haud ægrè mihi persuaferim. Hujus Sectæ *Almarici* discipulorum Coriphæus erat quidam *Willelmus Aurifaber* qui, ut auram popularem aucuparetur, quasi à Deo missus esset, & Prophetiæ dono illustratus, quatuor plagas infra quinquennium eventuras vaticinabatur, famem scilicet super populum, gladium super Principes, terræ hiatum ad Cives absorbendos, ignem super Ecclesiæ Prælatos, quos Antichristi membra impudorato ore appellabat, Romanum verò Pontificem Antichristum, & Romam Babylonem vocabat. Sic omnes Ecclesiæ Ministros canino dente rodebat *Arcadius* ille *Opilio*, qui tamen, ut *Philippi Augusti* Galliarum Regis tibi favorem conciliaret, dicere solebat, omnia Mundi Regna

sub

sub Lege Spiritus Sancti, huic Galliarum Regi, ejusque filio, fore propediem subjienda. Contra illos Sectarios, *Almarici* discipulos, *Petrus*, Parisiensis Episcopus, Synodum Parisiensem indixit anno MCCIX. in qua eos sili jussos & convictos damnavit, & ne ulterius insanirent, præcepit Rex Christianissimus, ut alii ultricibus flammis addicerentur, alii perpetuo carcere plecterentur, solis mulieribus veniâ concessâ. *Almarico*, qui hanc pestem intulerat, Anathema in hoc Concilio Parisiensi dictum est, ejusque ossa exhumata & in sterquilinum dispersa. Proscripti etiam fuere & exusti libri *Davidis Dinantii*, seu de *Dinando* Almarici discipuli, qui assererat, Deum esse Materiam primam, contra quem errorem doctissime disputavit *S. Thomas*, Doctor Angelicus, lib. 1. contra Gentes cap. 17. & primâ parte suæ Summæ quæst. 3. art. 8. Postremò, *Almarici* Hæresis confixa est anno MCCXV. in Concilio Generali Lateranensi IV. cap. 2. his verbis: *reprobamus etiam & damnamus perversissimum dogma impii Almarici, cujus mentem sic pater mendacii excæcavit, ut doctrina non tam hæretica censenda sit, quàm insana.*

Eodem Sæculo Ecclesiæ decimo tertio fuerunt alii in Galliis Theologi, seu potius Theologastri, qui neglecto prorsus Scripturæ, & Sanctorum Patrum doctrinæ studio, ad frivolas Aristotelicæ Philosophiæ regulas nostram erga Deum fidem, exigere voluerunt, & in rebus divinis nihil præterquam philosophantes, vanissima, supra quam credibile sit, opinionum commenta procuderunt, affingentes, detrahentes, circumscribentes, dividentes, promiscuè, & indiscriminatim invertentes audacter

daſter, temerè, arbitrato ſuo . Hanc effrænem & à Sæculis inauditam de rebus divinis differendi licentiam ægrè tulit *Guillelmus* hujus nominis III. Epifcopus Pariſienſis, & in Concilio, quod an. mcccxl. convocavit, decem damnavit errores ex Scriptis Anonymis excerptos, qui erant his verbis concepti: I. *Divina eſſentia in ſe, nec ab Angelo, nec ab homine videtur, nec videbitur.* II. *Licet Divina Eſſentia eadem ſit in Patre, Filio, & Spiritu Sancto, tamen ut hæc eſt eſſentia, & in ratione formæ, una eſt in Patre & Filio, non in Spiritu Sancto.* III. *Spiritus Sanctus, prout eſt amor & nexus, non procedit à Filio, ſed tantum à Patre.* IV. *Multæ veritates fuerunt ab æterno, quæ non ſunt ipſe Deus.* V. *Primum nunc, vel principium, & creatio paſſio, non ſunt Creator vel creatura.* VI. *Angelus malus in primo instanti ſuæ creationis fuit malus, & nunquam fuit non malus,* VII. *Nec Animæ glorificatæ, nec corpora glorioſa, vel glorificata, erunt in Cælo Empyreo cum Angelis; immò nec Beata Virgo, ſed in Cælo aqueo, vel cryſtallino.* VIII. *Angelus in eodem instanti poteſt eſſe in diverſis locis, & eſt ubique ſi vult.* IX. *Cujus meliora fuerint naturalia, neceſſariò major erit gratia, & gloria.* X. *Diabolus nunquam habuit unde poſſet ſtare. Nec etiam Adam in ſtatu innocentie.* His decem erroribus jam laudatus *Guillelmus* Archiepiſcopus Pariſienſis, & Magiſtri Facultatis Pariſienſis, qui huic Concilio aderant, totidem Articulos oppoſuerunt hoc tenore: I. *Firmiter credendum eſt, & nullatenus dubitandum, quod Deus in ſua ſubſtantia, eſſentia, vel natura, videbitur ab Angelis Sanctis, & animabus glorificatis.* II. *Una eſt eſſentia ſubſtancialis vel natura in Patre & Filio, & Spiritu Sancto.*

Et eadem essentia in ratione formæ in tribus Personis .
 III. Spiritus Sanctus , prout nexus est & amor , pro-
 cedit ab utroque , scilicet à Patre & Filio . IV. Una
 sola veritas fuit ab æterno, quæ est Deus . Et nulla ve-
 ritas fuit ab æterno, quæ non sit illa veritas . V. Pri-
 mum nunc & creatio passio , est creatura . VI. Malus
 Angelus aliquando fuit bonus, & post peccando est ma-
 lus . VII. Idem est corporeus locus, scilicet Empyreum
 Cælum, Sanctorum Angelorum , & Beatarum Anima-
 rum : & idem erit corporum humanorum glorificato-
 rum . Et similiter idem est locus spiritualis Sanctorum
 Angelorum , & hominum bonorum . VIII. Angelus
 est in loco per distinctiones : ita quod si est hic , non est
 ibi in eodem instanti . Impossibile est enim eum in eo-
 dem instanti esse ubique , cum hoc sit proprium Dei .
 IX. Secundum quod præordinatum est & prædestina-
 tum à Deo, dabitur gratia & gloria . X. Malus An-
 gelus & Adam habuerunt unde possent stare , etsi non
 unde possent proficere . His Articulis provisum qui-
 dem est sanæ doctrinæ , sed non repressa ea , quæ
 apud Theologos in Galliis inoleverat, de rebus di-
 vinis philosophandi prurigo . Eodem siquidem an-
 no MCCXL. F. Guillelmus Ordinis Fratrum Minorum
 Professor, in Sermone de S. Joanne Baptista , quem
 in Fratrum suorum Ecclesia habuerat ad populum,
 duas propositiones erroneas asseruit , de quibus à
 supra laudato Episcopo Parisiensi , & Sacræ Facul-
 tatis Parisiensis Doctoribus publicè reprehensus ,
 eas coram frequentissimo cœtu damnare compul-
 sus est . Prima propositio hæc erat : *Liberum arbi-
 trium habet potentiam naturalem ad recipiendam gra-
 tiam, non effectivam, aliquo modo , idest , gratiæ rece-
 ptioni cooperantem .* Secunda: *Qui damnatus est, nun-
 quam*

quam fuit in gratia, sed semper Ismael aut Judas fuit, & nunquam Joannes. Senefcente Sæculo decimo tertio, hoc est, anno MCCLXX. Stephanus Templier Episcopus Parisiensis, tredecim proscripsit propositiones erroneas, quibus nonnulli Theologi Parisienses Aristotelicæ Philosophiæ subtilitatibus delusi sanam Theologiam corrumpebant. Hæ autem propositiones his verbis erant conceptæ: I. *Intellectus omnium hominum est unus idem numero.* II. *Illa propositio est falsa, vel impropria: Homo intelligit.* III. *Voluntas hominis ex necessitate vult, vel eligit.* IV. *Omnia, quæ in inferioribus aguntur, subsunt necessitati corporum cælestium.* V. *Mundus est æternus.* VI. *Nunquam fuit primus homo.* VII. *Anima, quæ est forma hominis, secundum quod homo est, corrumpitur corrupto corpore.* VIII. *Anima separata non patitur ab igne corporeo.* IX. *Liberum arbitrium est potentia passiva, non activa, quæ necessariò movetur ad appetibile.* X. *Deus non cognoscit singularia.* XI. *Deus non cognoscit aliud à se.* XII. *Actus humani à divina providentia non reguntur.* XIII. *Corruptibili rei Deus immortalitatem, vel incorruptionem dare non potest.* Alios errores, quos in Theologiam invexerat Aristotelica philosophia, & quorum palmaris hic erat: *Quadam sunt vera secundum Philosophiam, sed non secundum fidem Catholicam*, damnavit idem Stephanus Templier Episcopus Parisiensis anno MCCLXXVII. ad quem eâ de re Joannes XX. vulgò dictus XXI. Pontifex Maximus scripsit his verbis; *Relatio nimis implacida nostrum turbavit auditum, amaricavit & animum, quod Parisiis, ubi fons vivus sapientiæ salutaris abundanter huc usque scaturit, suos rivos tîmpidissimos, Fidem patefacientes Ca-*

tholicam, usque ad terminos Orbis diffundens, quidam errores in præjudicium ejusdem Fidei pullulasse noscuntur. Volumus itaque, tibi que auctoritate præsentium districtè præcipiendo mandamus, quatenus diligenter facias inspicere, vel inquirere, à quibus personis, & in quibus locis errores hujusmodi dicti sunt, sive scripti, & quæ didiceris, sive inveneris conscripta, fideliter nobis per tuum Nuncium transmittere non omittas. Verum, cum nullis Censuris Ecclesiasticis cohiberi posset hæc ingeniorum lascivia, multique indies exurgerent Theologi, qui securis antiquæ Theologiæ relictis callibus, novos, ac nullius adhuc tentatos vestigiis, quærebant, & doctrinas flagitiosâ suâ novitate infames obtrudebant, causam tandem suam, vindicavit ipse Deus, & unum ex istis errorum Architectis terribili morte punivit, quam noster Thomas Cantipratanus, Auctor coævus, lib. 2. de Apibus cap. 48. num. 5. his verbis describit: Magister Simon de Tornaco Parisiis in Theologia regebat, & erat excellens ille suo tempore; sed contra decentiam talis officii supra modum incontinens, & superbus. Hic cum super omnes Doctores Civitatis auditores haberet, & in Schola coram omnibus de humilitate altissimæ doctrinæ Christi questionem, disputatione præhabita, terminaret, in fine tandem datus in reprobum sensum in execranda contra Christum blasphemiae verba prorupit. Tres sunt, inquit, qui Mundum sectis suis & dogmatibus subjugarunt; Moyses, Jesus, & Mahometes. Moyses primo Judaicum populum infatuavit. Secundò, Jesus Christus à suo nomine Christianos. Tertiò, Gentilem populum Mahometes. Nec mora, eversis oculis pro humana voce mugitum emisit, & epilepsia statim elisus in terram die tertio ejusdem morbi vindictam

accepit . Plaga ergo insanabili eum percussit Omnipotens, & omni scientia usque ad prima literarum elementa privavit, & graviore quidem in anima cum hac plaga percussus est, cum usque in diem mortis suæ quasi mutus comparatus est jumentis insipientibus, & in luxuriæ fœditate permansit . Et vide supremæ admirationis miraculum : Aleudem fornicariam, concubinam suam, nominare poterat & sciebat, Boetium verò de Trinitate, qui juxta eum ad spectaculum ponebatur, quem olim corde tenus scierat, post inditam plagam nec nominare noverat, nec valebat . Eo stupendo prodigio didicerunt illius temporis Theologi, qui arcanas æterni Numinis divitias curiosius perscrutari audebant, de Deo silere, quàm loqui, longè cautius, melius, ac convenientius esse .

D. Multùm vereor, ne isthæc Theologorum Parisiensium de rebus divinis disserendi prurigo intulerit Academiæ Parisiensi Sæculo Ecclesiæ decimo tertio gravissima damna ?

M. Ita est : Magistri Academiæ Parisiensis, à *Guillelmo de Sancto Amore*, viro jurgioso, & in sua procacia obstinato, potissimum instigari, contra Fratres Prædicatores ejusdem Academiæ alumnos tumultus concitarunt, qui celeberrimam illam Universitatem in summum discrimen Sæculo decimo tertio adduxerunt . Hæc invidiosa lis, & funesta controversia, cujus memoriam refricare cogunt me Historiæ leges, initium habuit anno mcccxxx. Regnabat tum temporis in Galliis S. *Ludovicus* hujus nominis IX. sub tutela matris suæ *Blanchæ* adhuc constitutus, apud quem Universitas Parisiensis de vi Scholaribus suis per cives & incolas Suburbii San-Marcellini Parisiis illatâ, & de non-

nullorum morte indè secutâ cùm fuisset conquesta; non modò repulsam passa est, sed ad eam comprimendam dispositæ sunt Prætorianorum militum, Cohortes in armis. Eâ re offensa Universitas Parisiensis à Lectionibus abstinuit, & Magistri Parisiis secedentes, alii Remos, alii Andegavum, alii aliò abierunt, libertati & securitati suæ locum tutiorem quærentes. Dissipatis ergo hæc illac Magistris, Fratres Prædicatores, nè omninò conticescerent Musæ Parisienses, Cathedram unam Magistrale[m] in Theologia, consentientibus *Guillelmo* Episcopo Parisiensi, & Cancellario Academiae Parisiensis, tenuerunt. Quadriennio post, Parisios reversis Magistris, & restituto in integrum Studio Parisiensi, alteram Cathedram Theologicam erexerunt Fratres Prædicatores. Quæ res magnorum inter Magistros Parisienses, & Fratres Prædicatores dissidiorum causa fuit ac Seminarium. Ægrè siquidem ferentes Magistri Parisienses, quòd Fratres Prædicatores duas Cathedras Theologicas haberent, & veriti, ne alii Religiosorum Ordines id facere contenderent, sicque suis ipsimet sedibus pellerentur; hoc Decretum communibus votis sanxerunt & edixerunt, *ut nullus Regularium Conventus duas simul Cathedras solemnes & Theologicas in posterum obtineret*. Huicce Decreto Fratres Prædicatores se minimè obtemperaturos palàm professi sunt, eò quòd duas Cathedras jam per aliquot annos pacificè occupant, & summâ cum laude, atque Discipulorum applausu rexerant. Utcùmque tamen inter eos & Academicos pax coaluit usque ad annum MCCLII. quo tempore, ut inquit *Wadinghus* in *Annalibus Minorum* ad hunc annum: *Orta est magna dissensio*

*sensio inter Academicos Parisienses, & Mendicantes, præcipuè Fratres Prædicatores. Controversia exordium habuit à quibusdam Statutis editis à Magistris Universitatis & suspensione lectionis propter irrogatas aliquas injurias Scholaribus (quorum aliqui percussi, alii in carcerem trusi, vel trucidati fuerunt.) Constitutionibus injustis dum noluerunt subscribere, duo Ordinis Prædicatorum, Bonus-homo, & Helias dicti, facti sunt extra Scholas. Conquerentes apud S. Sedem exaudiuntur ab Innocentio IV. & jubentur in pristinum statum restitui. Nec solum ab Innocentio IV. sed etiam ab ejus successore Alexandro IV. Fratres Prædicatores pro sua in Academiam Parisiensem restitutione in integrum quadraginta obtinuerunt Diplomata, quæ in Parisiensis Ecclesiæ Tabulario asservantur, quibus Parisiensis Academia aliquandiu reluctata, tandem aliquando cessit, & Fratres Prædicatores in societatem Magistrorum Parisiensium admisit. Hanc tamen concordiam Guillelmus de Sancto Amore totis suis viribus impedire molitus est. Is quippè, Magistris Odone de Duaco, Nicolao Decano de Barro super Albam, & Christiano Canonico Bellovacensi, aliisque tractis in partes, ad infamandos Religiosos Mendicantes, & ex Academia gremio expellendos nihil intentatum reliquit, totumque virus in ipsos effudit in libello malè confarinato, cui titulum indidit: *De periculis Novissimorum temporum*, quem Alexander IV. Pontifex Maximus post maturum ac diuturnum examen proscripsit tanquam perniciosum & detestabilem, ut opportuniùs ostendemus in quinto Colloquio. Hunc exitum habuit luctuosum illud dissidium, quod, proh dolor! Sæculo decimo tertio exarsit*

inter Magistros Parisienses, & Fratres Prædicatores, quodque, ut obiter dicam, non satis candidè ac sincerè describitur ab *Egassio Bulaeo* tomo 3. *Historiæ Universitatis Parisiensis*, ubi, partium studio abreptus, *Guillelmo à Sancto Amore*, viro ab Ecclesia damnato, & infensissimo Ordinum Mendicantium hosti, plus æquò favet, Causam Fratrum Prædicatorum, quantum potest, deprimit, eos velut totius dissidii Auctores ac concitatores atro carbone depingit, perstringit, insectatur, & omnia, quæ ipsis patrocinari possunt, consultò aut elevat, aut dissimulat, aut sinistram in partem interpretatur. At, velit nolit *Bulaeus*, Causæ Fratrum Prædicatorum æquitatem apertè probant non solum innumera Summorum Pontificum *Innocentii IV.* & *Alexandri IV.* in gratiam Fratrum Prædicatorum data Diplomata, sed etiam eam manifestam reddit ipsa vis veritatis, quam *S. Thomas* Doctor Angelicus, Ordinis Prædicatorum, Academia Parisiensis, & universæ Ecclesiæ columnen & ornamentum, invictissimè tum temporis defendit, erroresque Magistri *Guillelmi de Sancto Amore*, acerbi illius dissidii stimulatoris, præclaris solidisque Scriptis confutavit. Plura in hanc rem dicerem, nisi mihi silentium indiceret Dominicana Familia, quæ antiquæ injuriæ immemor, Academiam Parisiensem pluribus sibi devinctam beneficiis maximo semper honore prosequuta est.

D. Asserebat mihi nuperrimè vir eruditus, sed Monachis haud parùm infensus, huic controversiæ, quam Fratres Prædicatores cum Magistris Parisiensibus Sæculo decimo tertio habuerunt, occasionem dedisse novum quemdam librum inscriptum

ptum *Evangelium Aeternum*, ab *Alexandro IV.* Pontifice Maximo damnatum, quem Ordini FF. Prædicatorum attribuit *Matthæus Parisius*, & in quo blasphema continentur dogmata, quorum hæc præcipua adhuc memoriâ teneo: videlicet *Evangelium Aeternum*, seu *Evangelium Spiritus Sancti perfectius, & melius, & dignius fore Evangelio Christi.* II. *Evangelium Christi non esse Evangelium Regni, ac per hoc nec Ecclesiæ edificatorium.* III. *Novum Testamentum, sicut & Vetus, esse evacuandum, nec in virtute sua ad annum MCCLX. duraturum, & deinceps omnes in statu perfectorum fore.* IV. *Ad instruendos homines de spiritualibus & æternis solos idoneos esse, qui nudis pedibus incedunt: Christum, Sanctosque Apostolos vitæ contemplativæ perfectionem non fuisse consecutos: contemplativam verò vitam ab ipso Joachimo Abbate fructificare cepisse, & à modò in perfectis successoribus ipsius perfectius mansuram, fructusque laturam uberiores.* V. *Quendam Monachorum Ordinem futurum, qui dignitate & gloria reliquis antecellet, in quo implebitur Prophetia Psalmistæ dicentis: Funes seciderunt mihi in præclaris, etenim hæreditas mea præclara est mihi. Et qui tunc maximè florebit & convalescet, cum Clericorum Ordo peribit.* VI. *Sicut in primo statu Mundi commissum fuit à Patre totius Ecclesiæ regimen aliquibus ex Ordine Conjugatorum, sic in tertio Mundi statu committendum à Spiritu Sancto aliquibus ex Ordine Monachorum.* Hæc, & alia id genus blasphema dogmata continentur in hocce libro, qui inscribitur: *Evangelium Aeternum*, cujus Authores cum fuerint FF. Prædicatores, mirum non est, si illis litem moverint Magistri Parisienses, & in eos tam in Scholis, quàm in publicis suggestibus declamaverint.

M. Si

M. Si reverà Fratres Prædicatores edidissent hunc librum, qui inscribitur: *Evangelium Æternum*, quique hæc, quæ mox protulisti, & alia benè multa complectitur blasphema dogmata; eorum damnationi incunctantèr subscriberem, nedùm Apologiam in eorum gratiam adornare vellem. At hunc librum erroribus à capite ad calcem sca- tentem à Fratribus Prædicatoribus fuisse lucubra- tum immanissima calumnia est, huic Sacro Ordini de Ecclesia benè merito perperam à *Matthæo Parisio* impacta, quæ, ut inquit *Odoricus Raynaldus* in Continuatione Baronii ad annum MCCLVI. Num. xx. vel ex eo detergitur, quod *Matthæus Parisius* nulli certo *Authori* hunc librum adscribat, sed tanquam nefandum partum ab omnibus Fratribus Prædicatori- bus editum insinuet. Quid enim magis à verisimilitu- dine abhorrens, quàm eos, seu Fratres Prædicatores, libri hæresi infanda contaminatissimi authores fingere, quos ea manet gloria, excindendis hæresibus, ac tum maxime cum is Ordo primævo Sanctitatis flore ac splendore emicaret, strenuam operam collocasse? Hujus libri *Evangelii Æterni* Authorem *Joannem de Parma* Italum, Ordinis Minorum septimum Genera- lem Ministum, vulgò existimatum fuisse, testatur noster *Eymericus* parte 2. *Directorii Inquisitorum*, quæst. 9. ubi agit de erroribus in hoc detestabili libro contentis. Sed *Wadinghus* in *Annalibus* Mi- norum, & *Papebrochius* in *Actis Sanctorum* ad diem xix. mensis Martii, ubi inseruit *Vitam Joannis Parmensis*, negant hunc *Joannem Parmensem* fuisse Authorem illius malè nati libri *Evangelii Æterni*, quibus licèt ipse ultrò assensum præbeam, non possum attamen quin fatear, hunc *Joannem*

Par-

Parmensem apud *Alexandrum IV.* Pontificem Maximum à suis fratribus, quorum odia, ob zelum, quo flagrabat regularis restaurandæ disciplinæ, incurrerat, accusatum, Præfecturæ Generali, quam in Ordine gerebat, cessit, & in ejus locum suffectum fuisse *S. Bonaventuram*, tunc in Academia Parisiensi Doctorem Regentem apud Minoritas, qui inquisivit in *Joannem Parmensem*, ejusque Socios, quorum duos, *Gerardum*, & *Leonardum* conjecit in vincula. *Gerardus* annos 18. in carcere detentus est, *Leonardus* in vinculis obiit. Denique, *Joannes Parmensis* diem extremum clausit Camerini XIII. Kalendas Aprilis anni MCCLXXXIX. cujus sanctitatem miraculis post mortem fuisse comprobatam, asserunt *Wadinghus* in Annalibus Minorum, ubi vitam ejus descripsit, & alii ejusdem Ordinis Franciscani Scriptores, qui etiam *Joannem Parmensem* appellatione *Beati*, non prohibente Sede Apostolicâ, exornant. Cum igitur planè ignoretur Author istius execrabilis libri, qui inscribitur: *Evangelium Aeternum*, iniquum omninò esset illum Fratribus Prædicatoribus, quasi Authoribus tribuere propter testimonium, seu potius propter unicum & incertum verbum *Matthæi Parisii*, sic scribentis. Dicebatur, Prædicatores esse illius libri Authores: Præterquamquòd, testimonium *Matthæi Parisii* contra Fratres Prædicatores nullius ponderis haberi debet, non solum quia hic Scriptor, ut norunt omnes, pessimæ fidei est, petulantis linguæ, homo Schismaticus & qui hæreticis prolusit, sed quia etiam *Innocentii IV.* Pontificis Maximi, ac subinde Fratrum Prædicatorum, qui hujus Summi Pontificis partes strenuè propugnarunt, hostis apertissimus

mus fuit. Addo etiam, hunc pestiferum librum, inscriptum: *Evangelium Æternum*, publico Ecclesiæ judicio damnatum, flammisque addictum fuisse anno MCCVIII. septennio ante institutum Fratrum Prædicatorum Ordinem. Quî igitur fieri potest, ut ille liber sit partus alicujus Dominicani, cum ipso Fratrum Prædicatorum Ordine sit antiquior?

D. Adductis hætenùs & dilucidè explanatis erroribus & Controversiis, quæ Sæculo decimo tertio Ecclesiam Gallicanam, & Academiam Parisiensem haud parùm perturbarunt; expedit nunc ut in eas Hæreses, quæ eodem Sæculo in aliis Orbis Christiani Nationibus in perniciem animarum, eruperunt, breviter inquiramus, & in primis scire velim, nùm aliqua Hæreses Sæculo decimo tertio in Italia prodierint?

M. Sæculo decimo tertio, hoc est circa annum MCCLX. *Flagellantium* Secta in Italia ortum habuit, ejusque originem Monachus Sanctæ Justinae Paduensis in suo Chronico, quod *Christianus Ursitius* Basileensis anno MDLXXXV. publici juris fecit, his verbis describit: *Cum tota Italia multis esset flagitiis & sceleribus inquinata, quadam subitanea superstitione, & à Sæculo inaudita invasit primitus Perusinos, Romanos postmodum, deindè ferè Italiae populos universos. In tantum itaque timor Christi irruit super eos, quod nobiles pariter & ignobiles, senes & juvenes, infantes etiam quinque annorum nudi per plateas civitatum, opertis tantum pudendis, deposita verecundia, bini processionaliter incedebant, singuli flagellum in manibus de corrigiis continentes, & cum gemitu & ploratu se acriter super scapulis usque ad effusionem sanguinis verberantes. . . . Non solum itaque*
in

in die, verum etiam in nocte cum cereis accensis, in hyeme asperrima, centum, milleni, decem millia quoque per Civitates & Ecclesias currebant, & se ante altaria humiliter prosternebant, præcedentibus eos Sacerdotibus cum Crucibus & vexillis siluerunt tum temporis omnia musica instrumenta, & amatorie cantilenæ: sola cantio Pœnitentiæ lugubris audiebatur ubique tam in Civitatibus, quàm in Villis, ad cujus flebilem modulationem corda saxea movebantur, & obstinatorum oculi se à lachrymis non poterant continere. Mulieres quoque tantæ devotionis fuerunt minimè expertes, sed in cubiculis suis non tantum populares, sed etiam Matronæ nobiles, & Virgines delicatæ, cum omni honestate hæc eadem faciebant. Tunc ferè omnes discordes ad concordiam redierunt, usurarii, & raptores malè ablata restituere festinabant, ceterique diversi criminibus involuti, peccata sua humiliter confitentes, se à suis vanitatibus corrigebant &c. Hæc publicæ Pœnitentiæ devotio in Germaniam, sicut testatur Henricus Stero in Chronico, penetravit, sed quia illius origo, ut ait idem Scriptor, nec à Sede Romana, nec ab aliqua persona auctorabili fulciebatur, a quibusdam Episcopis, & à Domino Henrico Duce Baviariæ cœpit haberi contemptui, unde in brevi tepefcere cœpit, sicut res immoderatè concepta. Tandem in superstitionem, immò in hæresim degeneravit malè cocta, & tumultuosa illa devotio. Neminem quipè à peccatis absolvi pertendebant isti Flagellantes, qui eorum Sectæ nomen non dedisset. Mutuò sese, auditâ confessione, à peccatis absolvebant, etsi Laici essent, sicut testantur Siffridus Presbyter in Epitome lib.2. & Longinus, qui ipsos in Polonia ab Episcopis, & Principibus repressos fuisse affirmat lib.7.

lib.7. *Historiæ Poloniæ*. Eadem Flagellantium Secta in Ungaria, & Germania renovata est an. mcccxlx. de cujus superstitioso ritu *Albertus de Argentina*, qui, imperante *Carolo IV.* & filio ejus *Wenceslao* vixit, in suo Chronico, quod incipit ab anno mccclxx. & desinit in annum mcccclxxviii. amplissimè tractat, ex quo *Spondanus* ad annum mcccxlx. refert, huic grassanti Flagellantium Sectæ sese sociasse perditissimos quosque fugitivos, decoctores, adulteros, seditiosos, homicidas, latrones, omnium denique criminum reos, illosque eò impudentiæ prorupisse, ut Sacra quæque, & Evangelium, ipsumque divinissimum Corporis Christi Sacramentum posthabentes, assererent, Sanguinem suum sic per flagellationem tractum misceri cum sanguine Christi, & si quis eam flagellationem per dies triginta tres continuasset, omne crimen esse purgatum, omnem illi culpam & poenam esse penitus remissam. Alios impiæ illius Flagellantium Sectæ errores ex *Gobelino Persona* in suo *Cosmodromio*, seu Chronico, recenset idem *Spondanus* ad annum mcccxlv. Num. xiv. Asserabant siquidem, Deum, ad ipsorum adventum, Pontificem Romanum, cæterosque Prælatos, ne deinceps Christianis præessent, sustulisse, & omni auctoritate ligandi, atque solvendi, & quidquam consecrandi privasse, ac, propter Sacerdotum nequitiam, in adventu Fratrum Crucis, seu Flagellantium, Sacerdotium Evangelicum amovisse, solum Baptismum omnibus Sacramentis substituisse; & illum non in aqua, sed mutatum in proprii sanguinis effusionem per flagellationem, sicut Christus in Cana Galilææ mutavit aquam in vinum rubrum, nec posse, aut potuisse ab institutionis eorum tempore

pore quemquam salvari, nisi per ejusmodi Baptis-
 mum sanguinis, qui cuncta, quantumcumque
 enormia peccata, potens est delere. Affirmabant
 insuper, nullum post mortem esse Purgatorium;
 nullum Festum celebrandum, nisi diei Dominicæ,
 & Nativitatis Christi, & Assumptionis B. Mariæ
 Virginis, nullumque observandum jejunium, nisi
 feriâ sextâ, & vigiliis Nativitatis Christi, & Assum-
 ptionis B. Virginis. Mitto alios errores, in quos
 prolapsi sunt malè feriatî isti Hæretici Flagellantes,
 quorum Secta latè diffusa aditum tamen in Gallias
 invenire haud potuit, prohibente *Philipo Valesio*
 Rege Christianissimo, quo etiam rogante, & hor-
 tantibus Sacræ Facultatis Parisiensis Doctoribus,
Clemens VI. Pontifex Maximus hanc Sectam da-
 mnavit, ut refert *Guillelmi Nangii* continuator ad
 annum MCCCXLIX. Nec solùm hanc Flagellantium,
 Sectam damnavit *Clemens VI.* sed etiam plures Epi-
 stolâs ad Præsules Germaniæ, Poloniæ, Sveciæ,
 Angliæ, Galliæ, & ad Principes dedit, quibus ip-
 sos vehementer adhortatus est, ut illud supersti-
 tiosum hypocritarum hominum genus coercerent,
 conventicula dissolverent, eorumque Magistros
 carceri manciparent. Extant hæ *Clementis VI.* Epi-
 stolæ in ejus Regeſto anni 8. ex quo eam, quæ ad
 Magdeburgensem Archiepiscopum, ejusque suf-
 fraganeos data est, refert *Odoricus Raynaldus* ad an-
 num MCCCXLIX. num. xx. Contra Sectam Flagellan-
 tium scripsit *Joannes Gersonius*, Sacræ Facultatis
 Parisiensis Cancellarius, brevem tractatum, in
 quo etiamſi reprobet perversum usum flagellatio-
 num, seu disciplinam tibi propriâ manu intligendi,
 cum videlicet usum, qui fit cum ostentatione, cum
 scan-

scandalo, & sine iudicio Superioris sive pii ac prudentis conscientiae moderatoris, vel qui pravis circumstantiis, & erroribus, praesertim contemptu Sacramenti Confessionis, & Pœnitentiae Sacramentalis, contaminatus erat in Secta Flagellantium; non tamen improbat, sed potius approbat flagellationes, seu disciplinas, quæ propriâ manu infliguntur, dummodò id fiat moderatè, animo pœnitente, semotis ostentatione & scandalo; hæc enim sunt celebris illius Doctoris verba: *Lex Christi, si videatur flagella indulgere, juxta illud: Ecce ego in flagella paratus sum, nihilominus circumstantiæ debent apponi, quibus rationabile fiat obsequium nostrum, unâ quoddam huiusmodi flagellatio fiat iudicio Superioris imponentis talem pœnitentiam; & quoddam ab altero fiat & moderatè, & sine scandalo & ostentatione, ac sine sanguine, juxta traditionem Guillelmi Parisiensis; quemadmodum fit huiusmodi flagellatio in Religionibus approbatis, & ab aliquibus devotis personis.* Quapropter, Jacobus Boyleau Doctor Sorbonicus in ea, quam edidit, *Historia Flagellantium*, perperam Gersonium sibi patronum adsciscit, à cujus tamen mente toto cœlo aberrat, dum capite decimo prædictæ historiæ impugnans omnem usum flagellatorum, seu disciplinarum propriâ manu infligatorum, asserit, se ipsum flagellare super nates obscænum, & turpissimum esse tam viris, quam mulieribus: *Flagella super humeros periculosa propter libidinem, quæ inde excitatur & accenditur, usumque flagellandi deorsum se ipsum, ferè semper esse non solum opus insolens, novum & supervacaneum, verum etiam perversum, probrosum & turpissimum.* Quæ omnia ut probet laudatus Author, nonnullas obscænas, adducit historio-

riolas, quæ fabulas olent, & à quibus referendis, propter pudorem, in integrum abstinere debuisset, maximè cum ignorare non posset, *S. Petrum Damianum* scripsisse epistolam, quæ est 27. libri sexti, ad *Petrum Monachum*, dictum *Cerebrosum*, in qua eum reprehendit, quòd non omninò approbaret flagellationum, seu disciplinarum sibi propriâ manu inflictarum usum, quem ibidem ex multis Scripturæ sacræ locis laudabilè esse evincit; eundemq; Sanctum Doctorem illius usus haud modicam utilitatem in Opusculo XLIII. ad Cassinenses Monachos cap. VI. commendasse his verbis: *O quàm jucundum, ò quàm insigne spectaculum! cum supernus Judex de Cælo prospectat, & homo semetipsum in inferioribus pro suis delictis maculat! ubi reus ipse in pectoris sui penetralibus præsidens trifarium tenet officium: in corde se constituit Judicem, reum in corpore, manibus se gaudet exhibere tortorem; ac si Deo Sanctus Pœnitens dicat: non opus est, Domine, ut officio tuo me punire præcipias: non expedit ut ipse de me justî examinis ultione percellas; ipse mihi manus injicio, ipse de me vindictam capio, vicemque meis peccatis reddo.*

Non solum hac Flagellantium hæreticorum, & Sæculi Ecclesiæ decimotertio infestata fuit Italia, sed etiam ipsum quoque puritatis Catholice domicilium, Romam videlicet, contaminare aggressi sunt hæretici Albigeneses, & Waldenses, dicti *Pauvres de Lugduno*, Cathari, Patareni, & aliis id genus nominibus appellati, sicut refert *Odoricus Raynaldus* ad annum MCCXXXI. Num. XIII. Ad illos hæreticos Româ, ac totâ Italiâ expellendos omnem curam & sollicitudinem adhibuit *Gregorius IX.* Pontifex Maximus, & Bullam datam Viterbii VI. Idus
Tom. V. N No

Novembris anni noni Pontificatus sui contra eos publicavit hoc tenore : *Excommunicamus , & anathematizamus universos hæreticos , Catharos , Patarenos , Pauperes de Lugduno , Passaginos , Josephinos , Arnaldistas , Speronitas , & alios quibuscumque nominibus censeantur , facies quidem habentes diversas , sed caudas ad invicem colligatas , quia de vanitate conveniunt in idipsum . Dammati verò per Ecclesiam seculari judicio relinquuntur ; animadversione debita puniendi . Clericis prius à suis Ordinibus degradatis . Si qui autem de prædictis , postquam fuerint deprehensi , redire voluerint ad agendam condignam penitentiam in perpetuo carcere detrudantur . Credentes autem eorum erroribus , hæreticos similiter judicamus . Item receptores , defensores , & fautores hæreticorum excommunicationis sententiæ decernimus subjacere &c.* Hanc Gregorii IX. Constitutionem, contra hujusmodi hæreticos per Italiam sparsos latam, renovarunt , novisque additis pœnis confirmarunt Summi Pontifices Innocentius IV. Alexander IV. & Nicolaus III. in suis Diplommatibus , quæ incipiunt : *Noverit Universitas .* Quin & Fridericus II. Imperator, licet Sedi Apostolicæ haud parùm infensus , Constitutionem Imperialem Cathaniæ anno Dominicæ Incarnationis mcccxxiv. emisit, quâ jussit Magdeburgensi Archiepiscopo, Comiti Romaniolæ, & totius Lombardiæ Legato suo, ut quicumque per Civitatis Antistitem, vel Diæcesanum, in qua degit, post condignam examinationem fueris de hæresi manifestè convictus , & hæreticus judicatus per potestatem, consilium, & Catholicos viros Civitatis & Diæcesis earundem, ad requisitionem Antistitis illicò capiatur, ignis judicio concremandus, ut vel ultricibus flammis pereat, aut si

mise-

*miserabili vita ad coercionem aliorum elegerint re-
servandum, eum linguae plectro deprivent, quo non est
veritus contra fidem Ecclesiasticam invehi, & nomen
domini blasphemare &c.* Hæc Imperialis Friderici II.
Constitutio extat in Registro Gregorii IX. lib. 4.
pist. 103.

D. Prosequere, si placet, Historiam aliarum
Hæresum, quæ Sæculo decimo tertio Orbem Chri-
tianum pervaserunt.

M. Sæculo decimo tertio, hoc est circa an-
num MCCXXX. *Stadinghorum* diabolica hæresis Ger-
maniam infecit, cujus impietatem describit ac de-
plorat *Gregorius IX.* in suis ad Archiepiscopum
Moguntinum, Episcopum Hildesheimensem, &
Fr. *Conradum à Marburg* egregium Prædicatorem
latis anno MCCXXXIII. epistolis, quæ extant in lib. 7.
Epistolarum hujus Pontificis ordine 178. 179. 180.
186. Nefandi illi Hæretici utebantur Magistro Dæ-
mone, qui sub diversis formis in secretis eorum
conventibus conspicuum se præbebat, eosque sui
cultui adstrictos, sic ad turpissima, & ipso auditu
horrenda flagitia informabat, ut illi morem ei ge-
rentes, extinctis lucernis, promiscuam libidinem
exercerent. In Luciferum, quem injustè, violenter,
& fraudulenter à Domino ad Inferos detrusum fuisse
blasphemabant, miseri illi hæretici credebant;
eumque ad suam gloriam, præcipitato Domino,
rediturum asseriebant, nec ante ipsum se beatitudi-
nem æternam sperabant habituros. Sacrum Cor-
pus Domini Nostri Jesu Christi singulis annis in
Paschate de manu Sacerdotis recipiebant, illudque
de industria in ore servantes, proh scelus! in la-
trinam expuebant. In Clericos & Religiosos viros

grassabantur, eosque omni tormentorum genere cruciabant. Ad illos itaque exterminandos hæreticos, qui in confinibus Frisiæ & Saxoniz ac Brementis tractu degebant, quique paludibus, & fluminibus circumcincti ac muniti, omnes Episcoporum & Prædicatorum pro eorum conversione labores inanes, irritosque reddebant, sacram expeditionem indixit *Gregorius IX.* ut, cum à suis erroribus nullo pacto resilire vellent, igne ferroque delerentur. Præcipui Crucesignati exercitus Duces fuerunt *Henricus Brabantiz Dux*, & *Florentius Hollandiz Comes*, qui, ut scribit, *Albertus Stadenfis Abbas* in *Chronico* ad annum MCCXXXIII. Primo congressu pestilentes illos super agrum Oldenesche, ubi convenerant, viriliter invaserunt; sed ipsi summo conamine se defenderunt. Statim Comes de Clivo cum suis à latere irruens super illos, ipsorum acies dissipavit..... Nec mora illi insipientes, & maligni evanuerunt in cogitationibus suis, quia ab exercitu Domini opprimuntur, hostes perfossi, gladiis percussi, equorum pedibus conculcati, & ita manus Domini invaluit super eos, ut in brevi spatio eorum sex millia interierint. Plurimi ex eis fugæ præsidium postulantes, in proxima fovea, & in visera se submerserunt; si qui evaserunt, sub Cæli ventis quatuor sunt dispersi. Sic pertinacia eorum facta est coram ipsis in laqueum, & in retributionem & scandalum.

Denique, Sæculo decimo tertio erupit in Germania Secta quorundam Hæreticorum, qui *Fride-rico II.* Imperatori adversus Ecclesiam perduelli, & *Conrado* ejus filio faventes, prava dogmata, in antiquis Hæreticis Donatistis ab Ecclesia jam confixa, recoxerunt, & in Suevia propalarunt, quæ re-
fect

fest *Albertus Stadenſis* Abbas in Chronico ad annum MCCXLVIII. Afferebant primò, Romanum Pontificem eſſe Hæreticum, omneſque Episcopos & Prælatos, hæreſi itidem & ſimoniâ infectos, nec ligandi, & ſolvendi, neque conficiendi Corpus Chriſti poteſtatem habere, quòd mortalibus peccatis irreciti eſſent. Secundò, affirmabant, quòd nullus vivens, nec Papa, nec Episcopì, neque aliqui alii poſſint interdicare divina Officia, & qui prohiberent, eſſent hæretici & ſeductores. Tertiò, quòd Fratres Prædicatores, & Fratres Minores, Cisterciènſes quoque & alii Viri Religioſi falſis prædicationibus Eccleſiam corrumpere, prayamq; vitam & injuſtam ducerent. Quartò, dictitabant, ſe dumtaxat, ſuosque ſocios, veritatis eſſe præcones & juſtitie ſectatores. Quintò, in fine prophanarum ſuarum concionum ajebant, Indulgentiam ſe impartiri non à Papa confectam, non à Prælatiſ compositam, ſed à ſolo Deo omnipotenti conceſſam. Poſtremò prædicabant, nullam Romani Pontificis in orationibus, ſed dumtaxat *Friderici* Imperatoris, & *Conradi* ejus filii memoriam eſſe faciendam. Hos Hæreticos *Fridericus* Imperator, ejusque filius *Conradus* ſuo patrocinio ſoverunt, exiſtimantes ſe inde cauſam ſuam adverſus Eccleſiam faciliùs promovere poſſe. Sed eos ſefellit eventus, nam Proceres Germaniæ Catholici hæc prava dogmata infectantes, *Fridericum*, & *Conradum*, ejus filium, Hæreticorum fautores deſeruerunt, ipſiſque omnem ad Imperium aditum præcluſerunt. Hæc de hæreſibus, quæ Sæculo Eccleſiæ decimo tertio variis in locis pullularunt, dixiſſe ſufficiat.

D. Hiſtoriam Hæreſum, quæ Sæculo decimo

quarto Ecclesiam exagitarunt, nunc recto ordine describere debes, & in eas primùm inquirere, quæ in Oriente prodierunt.

M. Sæculo decimo quarto, Imperatore in Oriente *Andronico Juniore*, Palamitica lues invasit, quæ Græcorum Schismati novum addidit robur. Hujus Hærescos olim parens fuerat Simeon S. *Mamantis* Monasterii *Xyloxei* Abbas, à suis *Junior Theologus* appellatus, in libro, quem edidit, de *Sobrietate & Attentione*, de quo plura habet noster *Combesius* in Notis ad *Manuelis Calecæ* librum de *Essentia & Operatione* adversus palamitas. Hanc Hæresim in Oriente professi sunt plerique Monachi, qui dicti sunt *Hesychistæ*, *Euchitæ*, & *Massaliani*, eò quòd inter orandum imitarentur infames hæreticos *Massalianos*, caput ad umbilicum deprimentes, & in ea Orationis quiete mirabilem se lucem intueri, & inexhausta voluptate affici delirarent, cùmque ab illis quæreretur, quid lumen illud esset, quo se ad certum illum, quem diximus, corporis habitum conformatos perfundi gloriabantur? respondabant, esse gloriam Deitatis increatam, humano tamen visui perviam. Quem errorem altero confirmabant, dictitantes, lumen, quod in transfiguratione Christi refulsit in Monte Thabor, increatum fuisse, & nihiloseciùs oculis corporeis ab Apostolis visum affirmabant. In mores, Instituta, & dogmata horumce Monachorum Hesychistarum inquirere cœpit *Barlaamus*, gente Calaber, Ordinis S. Basilii Monachus, qui ex Italia Constantinopolim venerat ad *Andronicum Junio*rem Imperatorem, & Sermones de Processione Spiritus Sancti, & de Primatu Romani Pontificis contra Latinos evulgave-

gaverat, ut gratiam à Græcis, & potissimum ab Imperatore iniret. Hanc Monachorum superstitionem & insanos errores cum detexisset *Barlaamus*, illos apud *Joannem* hujus nominis XIII. Patriarcham Constantinopolitanum hæreseos accusavit. Hefychistarum Monachorum patrocinium strenuè suscepit *Gregorius Palamas*, Monachus Græcus, ac Thessalonicensis postea Episcopus, qui nomen suum huic Sectæ dedit. Scriptis itaque & argumentis utrimque concurritur. *Palamas* lumen in Monte Thabor Christo circumfusus, increatum ac æternum Dei lumen fuisse pertendebat, illud tamen non esse substantiam Dei, sed tantum ejus operationem, quam, cæteraque Attributa divina ab essentia, seu substantia Dei realiter distingui, & esse eâ minora, licet ipsi coæterna, probabat exemplo splendoris à Sole emissi, qui non est substantia Solis, etsi coævus ei sit. Addebat insuper, naturam, seu essentiam Dei à nullo intellectu creato, etiam Beatifico, videri posse, qualis in se est, sed tantum luce increatâ, à substantia tamen Dei realiter distinctâ, & oculis aspectabili sanctos perfrui in cælo, & in eadumtaxat luce totam sitam esse æternæ beatorum felicitatis summam. *Barlaamus* ex adverso in hos errores calamum acuit, & gravissimam cum *Gregorio Palama* habuit contentionem, ad quam dirimendam coacta est Constantinopoli anno mcccxi. Synodus à *Joanne* XIII. Patriarcha Constantinopolitano, cui *Lazarus*, Hierosolymitanus Patriarcha, cum Alexandrini, & Antiocheni Legatis, adfuisse dicitur, quæque idcirco nona generalis Synodus apud Græcos audit. In hac Synodo damnatus est *Barlaamus*, & omnes Episcopi Græci deliria *Grego-*

gori *Palama* approbarunt. Nec solum *Joannes XIII.* Patriarcha Constantinopolitanus reprobravit unà cum aliis Episcopis Græcis in hac Synodo doctrinam *Barlaami*, & perversa *Gregorii Palama* dogmata firmavit, sed etiam *Callistus*, in Patriarchatu Constantinopolitano *Joannis* successor, & *Philothæus*, seu *Philetus*, qui in locum *Callisti* subrogatus est, eandem *Barlaami* doctrinam in Synodis Constantinopoli habitis proscripserunt, & ad statum inandos *Gregorii Palama* errores concurrerunt, maxime cum id temporis Palamitarum hæresi apertè faveret *Joannes Cantacuzenus* Græcorum Imperator, qui proinde in ea, quam descripsit, sui temporis Historiâ audiri non debet, præsertim dum scribit lib. 2. capite quadragesimo, *Barlaamum* in Synodo, quam convocavit *Joannes XIII.* Patriarcha Constantinopolitanus, veniam ob stultè dicta petiisse, falsumque fuisse, lumen, quod Apostolis in monte Thabor circumfulsit, gloriam Dei principii expertem, & æternum lumen fuisse, atque illum rediisse in gratiam cum Palamitis. Quæ tota *Joannis Cantacuzeni* narratio à vero procul abhorret, cum certum sit, *Barlaamum* in laudata Synodo damnatum, ut declinaret invidiam Græcorum, quos proditâ etiam Catholici Dogmatis veritate, promereri frustra studuerat, Italiam repetiisse, & ad Latinorum Instituta, quibus erat imbutus, rediisse.

Circâ hanc Palamitarum hæresim duo velim hic obiter observes. Primum est, *Gregorium Palamam*, ejusq; Sectarios fuisse Latinorû infensissimos hostes, ita ut hoc præsertim nomine *Gregorius Palamas* in Græcorum Schismaticorû Sinaxario etiamnum celebretur, & inter Sanctos collocetur, sicut eis exprobrat

brat Gennadius Græcus Patriarcha in Concilio Florē-
tino his verbis : *Vos* , inquit , *Græcos quamvis flagi-
tiosissimos , si solum adversus Latinos dicant , omnium San-
ctissimos arbitramini , inter alios quidem multos , quem-
dam , qui vocatur Palamas , & Ephesi Marcum , homi-
nem nec satis mentis compotem , sed tumidum sapientiæ
ostentatorem , nulla virtute vel sanctitate subnixos ,
quia loquuntur & scribunt solum contra Latinos , extol-
litis & celebratis , eorumque imagines exornatis , fe-
stumque agentes colitis , & veluti Sanctos adoratis .*

Secundò advertere debes , *Leonem Allatum* ,
virum alioqui doctissimum , lib. 2. *De Perpetua Con-
sensione* cap. 17. impegisse in errorem , qui ab om-
nibus Theologis exploditur . Ibi quippè , postquam
asseruit *Barlaamum* , non minùs quàm *Palamam*
circa lumen Thaborium lapsum esse , conceptis ver-
bis docet , illud lumen Thaborium , quod in die
Transfigurationis Christi apparuit , & Apostolo-
rum oculos circumfulsit , fuisse ipsam Christi Dei-
tatem ; nec repugnare ut oculis corporeis diviniore
vi corroboratis Deitas ipsa videatur . Sic enim
loquitur : *Verum enim est ; oculis corporeis increa-
tum conspici non posse , & dùm oculi in statu & condi-
tione naturæ manent , sed si diviniore vi corroborati ad
altiora eleventur , nil impedit , corporeis hisce oculis in
eminentiorem statum sublevatis , deitatem ipsam , &
gloriam deitatis , quæ una cum Deo est , videri*
*damnatus itaque est Barlaamus , quòd lumen , in mon-
te Thabor refulgens , neque ex Divina essentia , neque
divinam essentiam esse affirmabat , & præterea corpo-
reos oculos per nullam diviniorem potentiam ad eò ele-
vari posse , ut deitatem conspiciant &c. Hactenus
Leo Allatus , qui non vidit , se per latus Barlaami
feri-*

ferire omnes Theologos, quorum omnium concors est doctrina, Lumen Thaborium non fuisse, Deitatem Christi, & oculos corporeos divinâ virtute ad visionem essentiae Dei evehi haud posse, communior eorum sententia est.

D. Meministi in superiori Colloquio cujusdam non minus importunæ, quàm molestæ controversiæ, quæ sæculo decimo quarto diù multùmque exercuit Romanum Pontificem Joannem XXI. vulgò dictum XXII. de sensu & observatione Regulæ Sancti Francisci, quoad Evangelicam paupertatem. Huic controversiæ, ut ibidem observasti, occasionem & initium dederunt nonnulli Minoritæ de paupertate sua ambiciosius, quàm religiosius disceptantes. At quinam fuerit progressus atque exitus gravissimæ istius Controversiæ, necdum exposuisti. Ab ovo itaque hanc incipe Controversiam, & omnia, quæ illam spectant, compendiosâ narratione describe.

M. Jam sub Romanis Pontificibus, Bonifacio VIII. & Clemente V. Ordo Fratrum Minorum, duas in partes scissus erat, aliis *Spiritualium*, sive *Fratrum strictioris Observantiæ*, aliis *Conventualium*, seu *Fratrum Communitatis* nomine insignitis. Hæc funesta Ordinis divisio magnam peperit litem, & animorum contentionem, quæ sub Romano Pontifice Joanne XXI. seu, ut vulgò dicitur XXII. acrius recrudit, & toto illius Pontificatu fuit summo utrinque partium studio agitata. Præcipua discordiæ ratio sita erat in discrimine habitus, & in frumenti, vinique in granariis, & cellariis congregatione. At enim, qui *Spiritualium*, & *Fratrum strictioris observantiæ* nomen ambiebāt, habitus curtos, strictos, inusitados, & squallidos, ut ait Wadinsghus

ghus in Annalibus Minorum ad annum mcccxvii. assumebant, nec eos iussi à Superioribus deponere volebant, immò *Fratrum Conventualium* habitum, *superfluum* ac *irregularem* esse querebantur, & illicitum esse putabant frumentum & vinum in granariis & cellariis congregare quamvis eleemosynis quæsitum. Hanc discordiam ut componeret *Joannes XXII.* Constitutionem edidit, quæ incipit his verbis: *Quorundam exigit*, quâ Ministrorum, Custodum, Guardianorumque iudicio & arbitrio commisit, determinare atque præcipere, *cujus longitudinis & latitudinis, grossitiei & subtilitatis, formæ sive figuræ atque similium accidentium esse debeant habitus, caputia, Fratrum Minorum, & similiter, ubi & quando, & quotiès granum, panem, & vinum pro vitæ Fratrum necessariis, Fratres ipsi quærere debeant, conservare sive reponere etiam in granariis & cellariis.* Eâ Summi Pontificis Constitutione exasperati Fratres Minores dicti *Spirituales*, seu *strictioris observantiæ*, in Siciliam secesserunt, ubi quemdam Ordinis Apostatam *Henricum de Ceva* sibi Ministrum Generalem præficere, ac Provinciales, Guardianos, cæterosque Ministros instituere ausi sunt, quodq; gravius est, spretâ autoritate Romani Pontificis, qui eos ad meliorem frugem reducere satagebat, in varios proruperunt errores, quos in Annalibus Ecclesiasticis referunt *Bzovius*, *Spondanus*, & *Odoricus Raynaldus* ad annum mcccxviii. Duas quippè finxerunt Ecclesias, alteram diffluentem opibus & delitiis, obsitamque sordibus, cui præset Romanus Pontifex; alteram humanarum rerum inopiâ divitem, ac virtutum omnium genere exornatam, quâ ipsi soli continerentur. Præterea,

reâ, negabant, Præsules ullâ vel ad jus exercendum, vel divina conficienda autoritate pollere, & virtutem Sacramentorum à Sacerdotis sanctitate pendere, & Christi Evangelium extinctum olim in ipsis revixisse & florere effutiebant, multaque alia id genus garriebant contra sacramentum Matrimonii, & de cursu temporum, ac fine sæculi & adventu Antichristi. Contra hujusmodi segreges Minoritas agens *Joannes Pontifex*, Constitutionem edidit, quæ incipit: *Gloriosam Ecclesiam*, quâ ipsorum errores damnavit, & illos Minoritas, velut Apostatas, excommunicatos, Schismaticos, & perversorum dogmatum assertores, ubique perquiri, capi, & puniri præcepit. Ex quibus quatuor fuere anno mcccxviii. Massiliæ combusti, damnati prius de hæresi ab Inquisitore Fidei Ordinis Fratrum Minorum. Non multò post captus est Avenione anno mcccxix. *F. Bernardus Delitiosi*, Minor Monspelienſis, eòquod in suspicionem venisset sacrilegi veneficii *Benedicto XI.* propinati, sicut constat ex diplomate *Joannis XXII.* eodem anno ad Archiepiscopum Tolosanum, & ad Appamiensem, & Sancti *Papuli* Episcopos dato, quòd antehac ineditum, ex Inquisitionis Carcassonenſis Archivo à doctissimo nostro *Thoma Souege* erutum, publicâ luce integrum donavit, & in sua Historia Ecclesiastica inseruit *Natalis Alexander* Tomo vii. dissertatione ix. art. vi. pag. 485. & 486. Ab his laudatis Episcopis, qui à Sede Apostolica Judices erant deputati, *Bernardus Delitiosi* perpetuo carcere damnatus est, pane laboris, & aquâ angustia sustentandus. Legi potest *Stephanus Baluzius* Tom. I. *Miscellaneorum*, ubi, pag. 195. refert ex veteri codice MS.

Bibliothecæ Colbertinæ litteras *Joannis XXII.* Pape, quibus fratri *Michaeli* Ordinis Minorum, committit causam quorundam Fratrum Minorum non benè de Fide sentientium, & pag. 198. recitat sententiam Inquisitionis ex veteri codice MS. Inquisitionis Carcassonenfis erutam contra quatuor Fratres Minores combustos Massiliæ.

D. Sic igitur tandem conticuerunt Minoritæ, & finita est famosa illa controversia, quam cum illis Sæculo decimo quarto habuit *Joannes XXII*?

M. Nequaquam finita est illa controversia, sed, ut videre est apud *Spondanum* ad ann. mcccxxi. Num. xv. longè major *Joanni* Romano Pontifici cum Fratribus Minoribus fuit conflictatio, ob excitatam ab eis de paupertate Christi quæstionem, quæ maximas in Minorum Ordine, & Ecclesia turbas concitavit. Hæc quæstio in hoc potissimum consistebat, quòd assererent Fratres Minores, Christum & Apostolos, viam perfectionis sequentes, nihil habuisse jure proprietatis & dominii in speciali, nec etiam in communi. Hanc doctrinam *Fr. Berengarius Taloni*, Minor Theologus, acriter propugnare cœpit anno mcccxxii. cumque à Narbonensi Archiepiscopo, & à *Joanne Belva* Ordinis Fratrum Prædicatorum ei palinodia indicta fuisset, is ad Sedem Apostolicam provocans (verba sunt *Spondani* ad annum mcccxxii.) Avenionem petiit, & rem totam Pontifici exposuit, qui, ne temerè, quidquam in re maximi momenti statueret, omnibus Academiis, & doctissimis viris ubiq; terrarum proposuit: Utrum pertinaciter asserere, Christum, & Apostolos non habuisse aliquid in speciali neque in communi, foret hæreticum censendum? Censorium Judicium, quod super hac

can-

controversia vir eruditus *Ubertinus de Casalìs*, qui è Minorum Ordine ad Benedictinum Pontificiâ dispensatione migraverat, composuit; illudque in solemni Consistorio lectum omnibus placuit, extat apud *Wadinghum* in Annalibus Minorum ad annum *MCCCXXI.* & apud *Clarissimum Baluzium* lib. 1. *Miscellaneorum* pag. 307. Dùm sic in discussione Sedis Apostolicæ adhuc penderet hæc de Christi, & Apostolorum paupertate controversia, Fratres Minores suum, ut vocant, Capitulum Generale Perusii anno *MCCCXXII.* sub Ministro generali *Michaële de Cesena* celebrarunt, in quo communibus suffragiis decretum est, Christum, & Apostolos nihil omninò jure proprietatis ac dominii, neque in speciali, neque in communi habuisse. Duplices eâ de re Capituli Perusini litteras datas pridie Nonas Junii, & Idibus Junii ejusdem anni *MCCCXXII.* describit *Wadinghus* Tomo 3. Annalium Minorum ad hunc annum, additque, hujusce doctrinæ in Curia Pontificia defendendæ provinciam demandatam fuisse totius Ordinis nomine Fratri *Bonagratiæ*. Damnanda sanè fuit hæc Fratrum Minorum audacia, & punienda præsumptio atque temeritas, tum quia desciscentes à B. *Francisci* Institutis, quibus reverentiam in Christi Vicarium imperabat, ausi sunt decretorium judicium Summi Pontificis, sub quo illa adhuc pendebat, antevertere, contra Ecclesiam insurgere, Schismati viam aperire, materiam ministrare, & Sedis Apostolicæ hostibus haud modicas ei insultandi occasiones suppeditare; tum quia etiam Fratres Minores Scripta divulgaverunt, in quibus asseriebant, Religiosos, qui aliquod in communi bonum possident, non solum à perfectione

ne Regulæ Franciscanorum deficere, sed etiam ab exemplo Christi, & à lege Evangelii. Ex quo necessariâ consecutione deducebatur, aliorum Ordinum Religiosos, qui bona in communi possident, excludendos esse omnes à Mendicantium, & Evangelicæ pauperum professorum catalogo, ac proinde privandos mercede à Christo Domino promissâ iis, qui sui causâ omnia reliquerunt, & ipsum sunt secuti. Hanc tumultantium Fratrum Minorum temeritatem *Gerardus Odonis*, qui, post *Michaëlis Cefenatis* exauctorationem, Minister Generalis anno mcccxxix. Parisiis electus est, retudit, ac pro meritis castigavit in Tractatu, quem ex MS. Bibliothecæ Vaticanæ laudat, ejusque fragmentum, describit *Odoricus Raynaldus* ad annum mcccxxii. Num. lv. Ad illos etiam FF. Minores refractarios ac segreges in ordinem redigendos *Joannes XXII.* post quætionem de Christi, & Apostolorum paupertate, multis Cardinalium, Episcoporum, Doctorumque, Parisiensis in primis Academiæ, accuratissimo examine, concertationibus, & tractatibus discussam & eliquatam, definitivam ann. mcccxxiii. protulit sententiam, quâ pronunciavit, hanc propositionem: *Christus & Apostoli in speciali non habuerunt aliqua, nec in communi*, ejusque assertionem pertinacem, erroneam ac hæreticam esse. Hac Decretoriâ Summi Pontificis sententiâ offensi segreges & obstinati Minoritæ, præsertim *Michaël Cefenas*, *Okamus*, & *Bonagratia*, effractis omnibus reverentiæ claustris, in Summum Pontificem insolentiâ pertinaci insurrexerunt, contra illius Constitutiones allatarunt, & ad *Ludovicum Bavarum*, implacabilem Sedis Apostolicæ hostem, defecerunt, &

Schul-

Schismati ab eo conflato adhæserunt. Quâ de causâ à Pontifice exauctoratus est *Michaël Cefenas*, & anathemate confixus, à quâ tamen Pontificis sententia ad *Ecclesiam Catholicam* provocavit *Michaël Cefenas*, è suggestu *Joannem XXII.* Hæreticum perfrictâ fronte proclamavit, & contra ipsius Constitutiones petulantissimos libellos scripsit, adversus quos novam Constitutionem edidit Pontifex, quæ incipit his verbis: *Quia vir reprobus Michaël*, quam suis Annalibus inseruit *Odoricus Raynaldus* ad annum MCCXXIX. Num. XXII. De his procacissimis *Michaëlis Cefenatis* libellis, & de aliis, quos *Okamus Minorita* ad scindendam Ecclesiæ unitatem, & personam *Joannis XXII.* Pontificis Maximi læcessendam scripturavit, opportuniùs agemus in quinto Colloquio, quod erit de viris Illustribus, qui aliquâ scientiæ laude Sæculis XIII. & XIV. claruerunt. Hic dumtaxat obiter observabo, præter *Michaëlem Cefenatem*, *Okamum*, & *Bonagratiam*, alios tum temporis fuisse quosdam falsos fratres Ordinis Minorum ad Schisma usque pertinaces, de quibus *Guillelmi Nangii Continuator* ad annum MCCXXIX. hæc scribit: *Adductus est Avenioni quidam Fratrum Minorum de Provincia Oriundus, nomine Veranus, qui apud Montem Pessulanum, & in aliis eorundem locis solemnibus dicebatur fuisse lector, ob hoc quia contra Papam dicitur publicè prædicasse, qui ad ejus adductus præsentiam, nulla sibi facta reverentia, dixit sibi in facie, quod erat verus Hæreticus & non Papa, & quod pro ista veritate desiderabat mori. Requisitus de causa dixit. Quia tu destruis, vel destruere niteris pauper-tatem Evangelicam, quam Christus verbo docuit & exemplo. Propter quod dictum detentus est in carcere*
cum

cum quindecim aliis ejusdem Ordinis Fratribus, qui de diversis Mundi partibus adducti, propter dicta sua hæretica in diversis carceribus miseri detinentur.

D. Facile mihi persuadeo, Sacrum Ordinem Fratrum Minorum de Ecclesia tam benè meritum degeneres & segreges illos Fratres, eorumque dogmata & facta impia damnassee, atque in obedientia Joannis XXII. Pontificis Maximi constanter perseverasse.

M. Omnia, quæ hætenus dixi de quibusdam Fratribus Minoritis, qui Sæculo decimo quarto Ecclesiam perturbarunt, & Joannis XXII. acerrimi insectatores fuerunt, nullam Sanctissimo Fratrum Minorum Ordini infamiæ labem inurere debent, quia Sacer ille Ordo perduelles istos fratres diris devovit, & quæcumque ab illis hac in causa hæreticè dicta, vel impiè gesta sunt, reprobavit in Capitulo generali anno mcccxxix. Parisiis habito, in quo Gerardus Odonis, electus Minister Generalis, de consilio & consensu unanimi Provincialium Ministrorum, & cæterorum Definitorum Capituli, tam Michaëlem Cefenatem, olim Ordinis Ministrum Generalem, quàm Petrum de Corbaria, Bonagratiam Bergomensensem, Guillelmum Okamum, & Franciscum de Esculo ejusdem Ordinis, & alios eorum, affectas in excommunicationis, privationisque pœnas, tanquàm manifestos & notorios Apostatas, incurrisse publicâ sententiâ pronunciavit, ut videre est apud Spondanum in Annalibus Eccles. ad annum mcccxxix. Num. vi. Testatur etiam ad eundem annum Guillelmi Nangii Chronici Continuator, quòd Fr. Henricus de Semons, Doctor in Theologia, & Provincialis Ordinis Minorum, in præsentia omnium

Tom.V. O sir-

surrexit ; & ex parte Generalis eorum Capituli , quod pro tunc Parisius tenebatur , ne in aliquo viderentur falsis fratribus se favorabiles exhibere , facta , processus , & excommunicationes contra Fratres prædictos Ordinis eorum per Dominum Papam factas palam , & publicè approbavit , depositionemque Fr. Michaelis quondam Generalis eorum Ministri per Dominum Papam factam , ex parte Generalis eorum Consilii , & etiam Capituli , & Ordinis , justam & laudabilem preestatus fuit ; factaque Antipapæ (Petri videlicet de Corbaria) & prædicti Fr. Michaelis , Fratris etiam Bonagratia , & Fr. etiam Francisci de Ordine Fratrum Minorum , & eorum , si qui essent , consortes vel complices , tanquam falsa & hæretica , & eorum Ordini inimica & contraria reprobavit , & de eorum factis vel maleficiis Fratres & Ordinem multipliciter excusavit . Hoc pacto , reductis ad concordiam Decretalibus Summorum Pontificum Nicolai III. & Joannis XXII. quæ primâ fronte secum pugnare videbantur , pax tandem reddita est huic Sanctissimo Ordini , qui in ea fluctuum agitatione verè illud Poëtæ usurpare poterat :

*Quarebam filios , exceptis scilicet illis ,
Quos suus optaret non genuisse pater .*

D. Redieruntne tandem segreges illi Fratres Minores ad Ecclesiæ unitatem , & ad Romani Pontificis obedientiam ?

M. Segreges isti Fratres Minores suo periculo comprobarunt , hunc esse casuum virorum spiritualium ordinem , ut primò quidem infelix animus per superbiam intumescat , & inde in contentionem , de contentione in Schisma , de Schismate in hæresim , & de hæresi in blasphemias , infelici gradatione ,

ne, immò præcipiti ruina descendat, sicut ait *Joannes XXII.* in Extravag. *Gloriosam Ecclesiam*. At enim, unus inter illos Fratres segrege Minoritas, dictus *Fr. Petrus Joannes Olivi*, ex oppido *Sirignano*, Diœcesis *Biterrensis*, qui inter suos primum eruditionis & regularis observantię famâ insignis fuerat, tùm postea hæreseos laboravit infamiâ, eumque *Fratricelli*, *Beguardi*, & *Beguina*, ut suum Patriarcham venerati sunt. Inter multos errores, quos iste *Petrus Joannes Olivi* effudit in sua *Postilla*, seu Commentario in Apocalypsim, hi præcipui sunt. Primò, sextum, quem designat, Ecclesiæ statum, & proprium esse Spiritus Sancti asserit, incipientem à tempore Sancti *Francisci*, & plenius à tempore condemnationis *Babylonis Meretricis* magnæ (quo nomine Romanam Ecclesiam ubique intelligit) quique durabit usque ad tempus *Antichristi*, quinque prioribus Ecclesiæ statibus maxime præminere docet. Secundò, pertendit, quòd sicut in primo Christi adventu nova Ecclesia, rejectâ Synagogâ veteri, formata est, sic initio sexti status nova formabitur Ecclesia, Christi lex, Vita & Crux erunt renovandæ per *S. Franciscum*, qui eâ de causâ in exordio illius sexti status Sacris Stigmatibus consignatus apparuit. Tertiò, affirmat, Regulam *S. Francisci* impugnandam & condemnandam esse ab Ecclesia carnalium & superborum, non secus ac Christus condemnatus fuit à Synagoga reprobâ Judæorum. Quartò, per *Belſiam* ascendentem de terra, vult intelligi *Pseudo-Papam* cum suis *Pseudo-Prophetis*, & Ecclesiam, quam Catholicam nuncupamus, ait esse Ecclesiam carnalem, *Babylonem*, & *Meretricem magnam*, quæ

publicè à Christo sponso suo adulteratur, & se, omnesque gentes tibi subjectas, fœdis carnalitatibus, Simoniâcupiditatibus, atque terrenâ hujus mundi gloriâ corrumpit. Misios facio alios errores, quibus scatet hæc *Petri Joannis Olivi* in *Apocalypsim Apostilla*, quam, ejusque Auctorem, *Joannes XXII.* post maturum & deliberatum examen, damnavit, ejusque ossa exhumari jussit atque concremari, sicut refert *Franciscus Pegna* ex tribus probatæ fidei MSS. Codicibus in *Commentario LI. in II. Partem Directorii Inquisitorum*. Legendus est etiam *CL. Baluzius* Tomo 1. *Miscellaneorû* pag. 313. ubi ex Archivo Archiepiscopi Narbonensis edidit censuram, sive sententiam à Magistris in Theologia à *Joanne XXII.* deputatis latam contra omnes *Petri Joannis Olivi* errores, quos maximam partem *Hæreticos*, *Blasphemos*, plerosque *ridiculis & fatuis divinationibus scatentes*, & *temerarios doctissimi illi in Theologia Magistri summo consensu pronuntiarunt*. *Dermitius Thadaus* in sua *Nitela Franciscana*, & *Wadinghus* in *Annalibus Minorum* ad annum MCCXCVIII. *Petrum Joannem Olivi*, & alios nonnullos Pseudo-Minoritas purgare, & ab omni hæreseos suspitione liberare pro viribus conantur, asserentes hujusmodi Franciscanos à suis Sodalibus falsò fuisse accusatos, eò quòd *obsolescentem* (inquit *Dermitius Thadaus*) *Sancti Francisci disciplinam suo splendori restitui cuperent*, & *maximè Petrus Joannes Olivi*, qui sub *Nicolao IV.* incurrit aliquorum, quibus *vita laxior placuit*, indignationem ex studio *veræ disciplinæ*. Tettem etiam *Angelum Clarenium*, qui *Petri Joannis Olivi* familiaris fuit, appellat loco mox à me laudato *Wadinghus*, ejusque auctoritate pro-

probat, prædictum Petrum Joannē Olivi etiam post mortem miraculis fulsisse. Verum, ut candidè fatear, in purgandis Petro Joanne Olivi, aliisque Pseudo-Minoritis, laterem lavant, & oleum operamque perdunt *Dermitius*, & *Wadinghus*. De *Dermitio* hoc judicium in *Annalibus Ecclesiasticis* profert *Odoricus Raynaldus*: crediderim, inquit, *Authorem hunc ignorasse Petrum Joannem Olivi insignem hypocritam, plurimum hæreseon inventorem, judiciaria sententia damnatum; neque advertisse, quàm longè absit à Sedis Apostolicæ condendis Decretis maturitate, dignitateque, ob leves obrectatorum susurros, ita Christianum Orbem commovere*. Postea, ut nullum pro Petro Joanne Olivi, aliisque ei adhærentibus Pseudo-Minoritis, cudendæ Apologiæ superesse locum ostendat idem *Odoricus Raynaldus*, refert Pseudo-Minorum Apostatarum Sectam contaminatam hæresibus, *Cælestino V.* Pontifice germinasse, in eam *Bonifacium VIII.* *Benedictum XII.* *Clementem VI.* leges distinxisse, nonnullis, ob hæresim, rogos paratos fuisse, & *Massiliæ* quatuor Pseudo-Minoritas, qui errores à Petro Joanne Olivi, in sua *Postilla* super *Apocalypsim* assertos pertinaciter propugnabant, ulticibus flammis fuisse addictos, ut habet manuscriptum Vaticanum. Hæc, & alia id genus momenta contra Petrum Joannem Olivi, & alios Pseudo-Minoritas, qui ab ejus partibus stabant, adducit egregius & sincerissimus Scriptor *Odoricus Raynaldus* Congregationis Oratorii, idest, *Baronii* familiæ alumnus, qui nihil deterritus *Bzovii*, & *Spondani* labore in prosequendis & absolvendis *Baronii* Ecclesiasticis *Annalibus*, ultimus omnium idem opus aggressus est, quòd putaret, *An-*

nales *Baronii*, quasi jure familiæ, sibi absolvendos esse. Denique, quod spectat citatum à *Wadingho* testimonium *Angeli Clareni* asserentis, *Petrum Joannem Olivi* miracula etiam post mortem patrassè, nihil certi ex eo extundi, aut statui potest, tum quia constat, *Angelum Clarenum* fuisse Hæreticorum Fratricellorum signiferum, qui profugit in Græciam, ut justæ Quæditorum, & Censuræ Fidei severitati se subduceret, sicut *Jordanus Historicus* testatur; tum quia etiam, nunquam *Joannes XXII.* Pontifex Maximus ossa *Petri Joannis Olivi* exhumi, & publicè cremari edixisset, si reverà fuisset homo sanctus, & miraculis post obitum conspicuus. Ea itaque ab *Angelo Clareno* jactata *Petri Joannis Olivi* miracula, vel simplicium fuere ludibria, vel pura putaque Hæreticorum mendacia. Obiit *Petrus Joannes Olivi* anno MCCXCVII.

D. Quinam erant isti *Fratricelli*, qui, ut mox dicebas, *Petrum Joannem Olivi*, tanquam suum Patriarcham venerabantur?

M. Fratricellorum Sectæ initium dedere sub finem Sæculi XIII. *Petrus de Macerata*, & *Petrus de Forosempronio*, Ordinis Minorum Apostatæ, qui, stricteioris observantiæ specie, secessionem ab Ordine facientes, à *Celestino V.* Pontifice Maximo facultatem obtinuerunt Eremitarum cultu vivendi, & Regulam Sancti *Francisci* ad literam observandi. Hanc facultatem postquam impetrassent, in parvam quamdam Græciæ Insulam perrexerunt, ut à vexatione Generalis Ministri, qui hoc Schisma Ordini funestum pati volebat, tuti esse possent. Hanc invalescentem Eremitarum Congregationem, ac plurimos errores publicantem abrogavit ac damnavit

navit *Bonifacius VIII.* eisque jussit, ut, relicto illo Anachoretarum vivendi cultu, ad Ministri Generalis Ordinis Fratrum Minorum obedientiam redirent. Litteras ejusdem Pontificis ad *Matthæum de Theate*, Ordinis Fratrum Minorum, Inquisitorem hæreticæ pravitatis, datas exhibet *Odoricus Raynaldus* ad an. MCCXCVII. quibus *Bonifacius VIII.* Inquisitoribus Fidei præcipit, ut in eos Fratricellos, si mandato Pontificio morem gerere, & à suis erroribus resipiscere nolint, tanquam in Hæreticos agant, & pœnis canonicis animadvertant. At isti Fratricelli, damnationis Pontificiæ nullâ habitâ ratione, palâm asserere cœperunt, se à nullo mortali cogi posse ad deponendos habitus, quos cum parvis caputiis gestabant, curtos, strictos, squalidos, & nimîâ brevitæ diffformes ac ridiculos. Alios Fratres Minores, qui his inusitatis caputlis, & habitibus non utebantur, vel qui ad præceptum Romani Pontificis victui necessaria congregabant, & in crastinum servabant, diversis conviciis lacerare, procaci imprudentique versutiâ præsumserunt, ut videre est in Tractatu contra *Beguinos & Fratres Minores, qui dicuntur Spirituales*, edito à Clarissimo *Baluzio* ex Archivo Ecclesiæ Narbonensis, Tomo I. *Miscellaneorum*, pag. 276. Quin, quod gravius est, isti Fratricelli, spretis mandatis ac censuris *Clementis V.* Pontificis Maximi, qui per suam *Clementinam*, exivi de Paradiso, Tit. De Verborum significatione, in qua nonnulla dilucidat dubia, quæ circa sensum & observantiam Regulæ S. *Francisci* emergere poterant, eos ad meliorem frugem, & obedientiam Ministri Generalis Ordinis Fratrum Minorum revocare satagebat; perfriatâ fron-

te approbarunt, ac publicè propugnarunt doctrinam insanam, superius à nobis expositam, *Petri Joannis Olivi*, esse à Spiritu Sancto revelatam, & nullam hæresim, vel errorem continere. Damnatos etiam & combustos Massiliæ quatuor segreges Minoritas, propter supra recensitos errores *Petri Joannis Olivi*, injustè damnatos esse pro veritate Evangelicæ Regulæ Sancti *Francisci* defendenda, temere effutiebant, & ipsos ut Martyres colebant, ac prædicabant, sicut constat ex Opusculo *Joannis de Belna* Inquisitoris Carcassonenensis, contra eodem edito, quod extat Tomo I. *Miscellaneorum Baluzii*, pag. 285. Inter illos Fratricellorum errores, quorum præcipuos superiùs indicavimus, quosque à *Joanne XXII.* proscriptos noster *Eymericus*, vir, teste *Odorico Raynaldo*, maximæ fidei & auctoritatis, utpote qui eo tempore, quo adhuc vigebat Secta Fratricellorum, Summorum Pontificum jussu, in eos in ditione Regis Aragonum animadvertit, accuratissimè refert Parte 2. *Directorii Inquisitorum*, quæstione decima quinta, inter illos, inquam, Fratricellorum errores, unus erat, quo isti hypocritæ paupertatis Evangelicæ speciem sibi arrogantes, seque Orationi & contemplationi addictissimos mentientes, perpetuo otio indulgebant, & à labore omninò abstinebant, quò factum est, ut brevi ignavorum hominum colluvies, porcarii, armentarii, pecorarii, cementarii, carbonarii, fabri, alique idgenus è sellulariorum fæce ad eorum Sectam certatim confluerint, eo potissimum sine ut panem otiosi comederent, & mendicitate (ut ipsis quidem videbatur) non indecorâ, vitam sustentarent, sicut testatur *Alvarus Pelagius*, Sil-

ven-

venfis Epifcopus , ex Ordine Fratrum Minorum assumptus , qui sub Joanne XXII. Pontifice Maximo florebat , in Libro II. *De Planctu Ecclesiæ* Cap. XI. Variis nominibus isti Fratricelli erant insigniti. Appellabantur quippè *Bizochi: Fratres de paupere vita: Fratres Spirituales* , sed postquam à Fidei Quæstitoribus exagitati è Sicilia in Germaniam secesserunt , dicti sunt *Beguardi* , & *Beguini* , eò quòd sese adjunxerint ad *Beguardorum* , & *Beguinarum* Sectam , quæ in Germania sub auspiciis *Ludovici Bavari* Imperatoris , Sedis Apostolicæ insensissimi hostis , impunè grassabatur . Hæc varia Fratricellorum nomina exprimit *Joannes XXII.* in Extravagante , quæ incipit his verbis . *Sancta Romana &c.* in qua de his sic legitur : *Nonnulli prophanae multitudinis viri sunt , qui vulgariter Fratricelli , seu Fratres de paupere vita , Bizochi , sive Beguardi , vel aliis nominibus nuncupantur , in partibus Italiae , necnon in Insula Siciliensi ; qui contra Canones habitum novæ religionis sumpserunt , sub quo habitu , quasi sub ovina pelle lupi , varios disseminabant errores .*

D. Expone , quæso , clariùs , quznam esset hæc *Beguardorum* , & *Beguinarum* Secta ? Quinam verò præcipui errores , quos istiusmodi profitebantur Hæretici ?

M. Cur isti Hæretici fuerint appellati *Beguardi* , incertum omninò est , & altum apud Scriptores Ecclesiasticos silentium . *Beguinae* verò erant quædam Mulieres , quæ ita nuncupabantur ab earum Institutore , seu à pio quodam , sanctoque Presbytero *Lamberto* , qui Gallicè cognominabatur *le Begue* , quia balbus erat , indèque puellæ , quæ ab eo in societatem ad castè vivendum sub finem duodecimi

cimi Sæculi fuerant congregatz, dictæ sunt Gallicæ *Beguines*, sicut ostendimus in Colloquio sexto in Historiam Sæculi XII. Complures hujusce Beguinarum Instituti Puellas ineunte Sæculo decimo quarto in errorem induxit fanatica quædam mulier de Hannonia, nomine *Margareta Porrete*, quæ anno mcccx. cum in Galliis peltiferam doctrinam disseminare conaretur, igne damnata est, teste *Guillelmi Nangii* Continuatore ad hunc annum, ubi hæc habet: *Circa Festum Pentecostes accidit Parisius, quòd quædam pseudo-mulier de Hannonia nomine Margareta, dicta Porrete, quemdam librum ediderat, in quo omnium Theologorum judicio, qui ipsum diligenter examinaverunt, multi continebantur errores & hæreses, & inter cæteras, quòd Anima adnihilata in amore Conditoris sine reprehensione conscientia vel remorsu potest & debet naturæ quidquid appetit & desiderat concedere, quòd manifestè sonat in hæresim. Dum libellum hunc, aut in eo contentos errores abjurare nollet, quinimò latam in se excommunicationis sententiam ab Inquisitore hæreticæ pravitatis contemneret, quia coram Episcopo sufficienter monita comparere volebat, & per annum & amplius pertinaci sustinisset animo in sua malitia finaliter indurata, tandem in communi platea Graviæ coram Clero ac populo ad hoc specialiter evocatis de peritorum consilio exposita est & tradita Curiaæ seculari; quam Parisiensis Præpositus in sua potestate statim accipiens ibidem in crastino incendio fecit extinguì. His pravis Dogmatibus Margareta Porrete complures infectæ Beguinæ societatem inierunt cum hæreticis Beguardis, qui per Germaniam multos spargebant errores, quorum primus erat, quòd homo in ista mortali vita usque adeò sublimem*

mem perfectionis gradum assequi potest, ut nec amplius peccare, nec ulterius in gratia progredi queat. Secundus; quod neque jejunare, neque aliam exercere corporis aut animi maculationem & asperitatem debeat ille, qui versatur in eo perfectionis apice. Tertius; quod ille, qui est in prædicto perfectionis gradu, & spiritu libertatis constitutus, non adstringatur humanorum præceptorum, aut Ecclesiasticarum legum Sæculariumve observatione, quia supremum libertatis filiorum Dei culmen attingit. Quartus; quod homo in præsentī vitā possit eā potiri felicitate, quā major in Cœlo futura sit nulla. Quintus; quod perfecta consummataque Beatitudo ex natura & hominis arbitrio ita pendeat, ut nullo sit opus lumine gloriæ infuso. Sextus; quod virtutum exercitatio est adhuc hominis imperfecti, quam proindē longē à se abdicare debet quisquis jam est perfectus. Septimus; quod libidinum actus, ad quos natura inclinatur, nulla involvantur culpā, subindēque mulieris oscula esse peccata mortalia, quia ad illa non pellicit natura, sed coitum cum muliere esse inculpabilem asseriebant, quoniam ad illum naturæ libido propensione suā fertur. Octavus; quod dum elevatur, aut fidelium cultui exponitur Sacrum Christi in Eucharistia Corpus, non debeat ille, qui sublimem perfectionis gradum assecutus est, vel assurgere, vel genibus provolvi, quia sic agens de illo sublimi contemplationis fastigio se dimitteret, si vel de Christi Sacramento, vel de Vita ejusdem aut passione dignaretur tantisper cogitare. Hos ut damnaret Beguardorum & Beguinarum errores, & impurissimas evelleret nequitiarum propagines *Clemens V.* Pontifex

tifex Maximus Synodum Oecumenicam Viennæ in Gallia convocavit anno supra millesimum trecentesimo undecimo, regnante in Galliis *Philippo Pulchro*, in quo unanimi Patrum suffragio confixa sunt virulenta Beguardorum & Beguinarum dogmata, sicut latius exponemus in sequenti Colloquio.

D. Hi Sectarii Beguardi, & Beguinæ conformes mihi esse videntur veteribus *Massalianis*, qui *Euchitæ*, ac *Enthusiastæ* dicebantur, & quorum meministi sub finem secundi Colloquii nostri in Historiam quarti Ecclesiæ Sæculi. Hi quippè nullam ferè vim Sacramentis Ecclesiæ, virtutumque exercitationibus, maximam verò suis fanaticis orationibus tribuebant, & fœditati promiscuorum concubituum indulgere soliti erant. Certè, nihil pestilentius, meâ quidem sententiâ, & ad aperiendam viam ad omnia flagitiorum genera commodius fingi excogitarivè potest istis Beguardorum, & Beguinarum erroribus, ad quos detegendos & aspernandos sufficit communis sensus, sufficiunt communissimæ pietatis notiones, Christianâ institutione omnibus impressæ. Hinc non mirum, quòd non ita pridem *Innocentius XI.* beatæ mem. Romanus Pontifex, ejusmodi Beguardorum errores, quos in perniciem animarum *Michaël Molinosus* Cæsaraugustanæ Diœcesis in Aragonia Presbyter, Quietistarum, seu Spuriorum Mysticorum, Antesignanus, suscitare ac propagare moliebatur, confestim damnaverit Constitutione datâ Romæ die xx. mensis Novembris anni millesimi sexcentissimi octogessimi septimi, ac totus ubique populus Christianus, auditis nefandis illis sententiis, cohorrerit, publicisque illas execrationibus fuerit persecutus.

M. Re-

M. Rectè dicis, nec minus, ut opinor, horrebis duas alias infames Sectas, quas impurissimi homines *Hermannus Pongilupus*, patriâ Ferrariensis, *Gerardus Segarelli*, Parmensis, & *Dulcinus*, Novariensis, *Segarelli* discipulus, Sæculo decimo quarto invexerunt, latèque diffuderunt. Secta ab *Hermanno Pongilupo* conflata, veterum Gnosticorum, quorum meminimus in quarto Colloquio in Historiam trium priorum Ecclesiæ Sæculorum, nocturna conventicula, & promiscuam in iis libidinem renovabat. Fœtus furtivis illis coitibus conceptus, tandiù per manus in orbem stantium jactabatur, donec spiritum efflaret, & in cujus manibus expirabat, is Pontifex Maximus horumce Sectariorum creabatur. Cremabant etiam unum ex istis infantibus ita procreatis, cineribusque in cadum conjectis, ac vino super infuso, indè Novitios spurcissimis suis mysteriis initiabant. Sub specioso summæ, quam affectabant, paupertatis, asserebant, Christianorum nemini licere quidquam habere proprii, nec Respublicas administrare, vel Magistratus gerere. Romanum Pontificem, & omnes Ecclesiæ Catholicæ Prælatos canino dente proscindebant, eisque obtemperandum non esse pertendebant. Denique, animas Sanctorum non frui Dei visione ante generalis Judicii diem propugnabant. Hujus propudiosæ Sectæ parens *Hermannus Pongilupus*, cui in Ecclesia fuerat sepultura concessa, cò quòd, dum viveret, errores suos verbis tenus ejurasset, plurimisque ementitâ pietate fucum fecisset; jussu *Bonifacii VIII.* Pontificis Maximi exhumatus est, ejusque ossa flammis tradita anno post ejus obitum trigelimo primo, sicut testatur *Bernardus Guido* in *Chroni-*

co Romanorum Pontificum. Plura de his nefandissimis Sæctariis legis apud *Prateolum*, & *Bernardum Lutzeburgum* in *Catalogo Hæreticorum*. Alteram Sæctam fœdis dogmatibus & libidinibus impuram condidit Sæculo Ecclesiæ decimo quarto *Gerardus Segarelli*, vir plebejus & illiteratus, qui, venditâ domunculâ suâ, ejusque pretio non in pauperes, sed in nebulones, qui taxillis ludebant, distributo, Christum, & Apostolos imitari se velle professus, viles homunciones in societatem traxit, qui Apostolorum nomen sibi arrogantes, hæc illæc mendicando vagabantur, dictitantes, omnia esse communia, etiam uxores. Aiebant insuper, Deum Patrem rexisse Mundum in severitate & justitia ab ejus creatione usque ad Incarnationem Filii, tum à Filio gubernari cœpisse in gratia & sapientia; jamque à Spiritu Sancto in amore & charitate regi. Ad hoc tertium Spiritus Sancti Regnum prædicandum se venisse dicebant, eoque amoris, seu Spiritus Sancti, vigente Regno, illicitum esse denegare quidquid ex charitate postularetur, subindèque promiscuum virorum fœminarumque carnale commercium, cum ex charitate fieret, peccatum non esse, sed actum charitatis. Hanc sceleratam, & abominandis flagitiis contaminatam Sæctam latè propagavit *Dulcinus* Novariensis, *Segarelli* discipulus, à quo isti Sæctarii dicti sunt *Dulcinistæ*, asserentes, auctoritatem omnem à Christo traditam Ecclesiæ Romanæ penitus cessasse propter malitiam Prælatorum: se solos esse veram Ecclesiam: se nulli obedire debere: omnes Pontifices Romanos à tempore S. *Silvestri* prævaricatores fuisse, excepto *Petro de Murrone*, seu *Celestino V. Papa*. Viros absque uxorum,

rum, uxores aſque maritorum conſenſu, poſſe matrimonii ſtatum deſerere, & ad Sectam ſuam tranſire, docebant. Omnes Ordines Hierarchicos & Religioſos, tanquam Eccleſiæ pernicioſos reprobabant. Laicos à ſolvendis alicui Romanæ Eccleſiæ ſacerdoti decimis liberos eſſe ogganniebant. Perfectius eſſe vivere ſine voto, quàm voti religione obſtrictum, propugnabant. Perinde eſſe in ſtabulo, ac in Eccleſia Deo conſecratâ orare, impiè garriebant. Demùm, ut eorum alios mittam errores, qui legi poſſunt apud S. *Antoninum* parte 3. *Chronici* titul. 21. cap. 1. parag. 1. & apud *Eymericum* par. 2. *Directorii Inquiſitorum*, quæſt. 20. licitum eſſe putabant *Dulcinistæ*, Fidem ore negare, ut hoc pacto Inquiſitorum fidei induſtriam fallere, eorumq; poſteſtatem evadere poſſent. Sed nec fraus, nec dolus *Segarello* hujus Sectæ Authori, & *Dulcino*, illius propagatori, patrocinari potuerunt. Captus ſiquidem *Segarellus* à *Manfredo* Inquiſitore Ordinis Fratrum Prædicatorum, damnatus, & ſæculari Magiſtratui traditus, flammis addiſtus eſt die xviii. menſis Julii anni mccc. ſub Pontificatu *Bonifacii VIII.* In *Dulcinum* verò, & in ſex hominum millia ab eo ſeducta & in Alpibus habitantia, *Clemens V.* Pontifex Maximus primùm Fidei Quæſitores, deinde Crucesignatos Milites direxit. Captus tandem *Dulcinius* cum Scorto, cui *Margarita* nomen, & pluribus aliis nequiſſimæ factionis ſociis, qui Vercellas ducti, Sæcularis Magiſtratus ſententiâ membratim, prius conciſi ſunt, poſteâ exuſti & in cineres redacti, ut S. *Antoninus* loco mox laudato, & *Bernardinus Corius* in *Hiſtoria Mediolanenſi* part. 2. ad annum mcccvii. teſtantur. Sic tandem extincta eſt

ne-

nefaria illa Pseudo-Apostolorum Secta, quam antehac Summi Pontifices *Honorius IV.* sub finem decimi tertii Sæculi, seu anno MCCLXXV. & *Nicolaus IV.* anno MCCXC. proscripserant. His duabus turpissimis Sectis, tertiam, seu *Turlupinorum*, Sectam, quæ Sæculo decimo quarto grassata est, addere non pigebit. Erant porro isti *Turlupini* solo nomine Christiani, & veri Epicurei, qui, præter turpes & impias, in quibus volutabantur, Beguardorum hæreses, docebant, *nihil pudere quemquam debere eorum, quæ à natura accepimus.* Unde, turpi Cynicorum Philosophorum more, absque verecundia incedebant, & quod est dictum horrendum, & cogitatu pudendum, in publico, canum instar, & jumentorum more coibant; asserentes insuper, non esse orandum vocalitèr, sed mentalitèr. Verùm, hæc flagitiosa turpium hominum Secta eodem Sæculo decimo quarto erasa ac penitus deleta est, igne combustis in Gallia perditissimis illis hominibus, qui pecudum vitam degebant, sicut testatur *Robertus Gaguinus* Ordinis Sanctissimæ Trinitatis Monachus libro 9. de *Gestis Francorum*, ubi hæc habet: *Superstitionis quoddam genus eodem tempore à Turlupinis (hoc enim erat hæreticis nomen, qui se de societate pauperum vocitari gaudebant) ortum, finem fecit, crematis eorum vestibus, & libris in foro Suillo extra Sancti Honorati portam. Joanna autem Dabentona, & cum ea alter, cujus nomen Historici non tradunt, ejus Sectæ in primis professores comburuntur. Hic autem, quem sine nomine ponimus, cum ante damnationis ejus sententiam in carcere mortem obiisset, dies quindecim in aggere calcis, ne putresceret ejus cadaver, aservatus est, & die ad supplicium præscripto crematus.*

D. Pa-

D. Parit licentiam vivendi effrænis sentien-
di opinandique libertas, sæpèque conciliatricibus
mulierum gratiis & popularibus illecebris homi-
nes illecti, ac falsâ Religione delusi ad omnia flagi-
tiorum genera perpetranda impelluntur. *Tantum*
Religio potuit suadere malorum. Sed hos ex hara Epi-
curi porcos, sese in cœno libidinum volutantes re-
linquamus, ac paululùm, si placet, hîc inhæreamus
in discutiendo dubio, quod mihi non nihil negotii
faceffit circa doctrinam *Raymundi Lulli*, quem Sæ-
culo decimo quarto floruisse, & tertio Ordini Fra-
trum Minorum nomen dedisse asserunt Minoritæ.
Audieram quippè nuperrimè à viro erudito, hunc
Raymundum Lullum multa scripsisse Opera, sed in
varios errores imegisse, ejusque doctrinam à Ro-
manis Pontificibus fuisse damnatam; & tamen adi-
vi hodie doctissimum Minoritam, qui mihi sanctis-
simè juravit, doctrinam *Raymundi Lulli* ab omni
prorsus errore esse immunem, nec ab ullo unquam
Pont. Rom. proscriptâ. Cum igitur circa doctrinam
istius Authoris adhuc pendulus hæream, tuum de
ejus Operibus judicium lubentissimè auscultabo.

M. De *Raymundo Lullo* non una est omnium
Scriptorum sententia. Alii eum inter Hæreticos
recensent. Alii illum suspectum de fide, multisque
implicatum erroribus pronunciant, immò ut hi-
strionem, perditæque memoriæ virum infamant.
Alii denique non tantùm ejus absolutioni subscri-
bunt, sed etiam ut *Martyrem*, *Doctoremque Illumina-*
tum deprædicant. Tot inter discrepantes virorum
eruditorum sententias, consultius esse duco meum
non interponere judicium, sed historicè dumtaxat
hinc indè adducere momenta, quibus vel ad accu-

sandum , vel ad absolvendum *Raymundum Lullum* ,
 moventur viri eruditi . In primis, hi, qui *Raymun-*
do Lullo patrocinantur, multa in medium proferunt
 encomia , quibus *Raymundus Lullus* à viris clarissi-
 mis celebratur . Eum quippè P. *Caussin* Soc. Jesu
 tomo 4. *Curia sancta* , tract. 1. sect. 13. *Thesaurum*
absconditum appellat , & à solis invidis & æmulis
 exagitatum ait . P. *Sanjurius* ejusdem Societatis
 lib. 4. de *Christi cognitione & amore* ipsum inter fer-
 ventiores Christi amatores refert . Alii eum nun-
 cupant *Doctorem Illuminatissimum* , *Tubam Spiritus*
Sancti , *Organum Dei* , *Fontem veritatis* , *Ecclesiæ re-*
stauratorem , *ineffabilem præceptorem* &c. Prætereà,
 injustam *Raymundi Lulli* accusationem refundunt
 illius Apologistæ in solum *Eymericum Inquisitorem*
Dominicanum , qui in suo *Directorio Inquisitorum*
 refert Diploma *Gregorii XI.* Pontificis Maximi, qui
 multas opiniones *Raymundi Lulli* ut erroneas & ma-
 ximam partem hæreticas damnavit, omnesq; ipsius
 libros prohibuit VII. Kalendas Februarii anni
 MCCCCLXXVI. Porro , hoc *Gregorii XI.* Diploma ab
Eymerico in odium *Raymundi Lulli* confectum ac
 procusum fuisse ex eo potissimum probant isti Apo-
 logistæ, quòd hujusmodi Diploma licèt in *Grego-*
rii XI. Regesto fuerit diligentèr quæsitum, nun-
 quam tamen inveniri potuerit . Postremò , ajunt
Raymundi Lulli Apologistæ , eum apud Majoricen-
 ses pro Sancto & Martyre coli, quod sanè haud
 permitteret Ecclesia, si reverà *Raymundi Lulli* do-
 ctрина fuisset ceu hæretica à Romanis Pontificibus
 confixa . Hæ sunt in summa rationes , quas pro
Raymundi Lulli vindictis vulgò proferunt ejus Apo-
 logistæ . At , hi , quibus ex adverso non probatur

Ray-

Raymundi Lulli doctrina, adductas illas ab ejus Apologistis rationes elevare, & inutiles planè reddere pro viribus moliuntur. Ad primam quippè rationem respondent, nihil ex istis egregiis Epithetis, quæ non satis attentâ consideratione viri docti *Raymundo Lullo* tribuunt, colligi posse, cum ab his abstinendum esse ultrò profiteatur *Wadinghus*, qui Minorum Annales condidit, & *Raymundum Lullum* tueretur quantum potest: *Abstinendum itaque* (inquit *Wadinghus*) *ab ineptis quorundam Epithetis, & paræneticis, quæ insulse affinguntur, elogiis: temerè enim à suis* (*Raymundus Lullus*) *appellatur Sectariis, Doctor Illuminatissimus, Tuba Spiritus Sancti, Organum Dei, Fons veritatis, Ecclesiæ restaurator.* Ad alteram rationem, quam de confictò ab *Eymerico* Inquisitore Dominicano *Gregorii XI.* contra errores *Raymundi Lulli* Diplomate afferunt ejus Apologistæ, respondent *Antillulistæ*, credibile non esse *Eymericum*, virum clarissimum, qui Inquisitoris officio in Règno Aragoniæ sub quinque Summis Pontificibus *Innocentio VI. Urbano V. Gregorio XI. Urbano VI. & Bonifacio IX.* maxima cum laude perfunctus est, voluisse adulterinum & supposititium *Gregorii XI.* contra *Raymundi Lulli* doctrinam obtrudere Diploma, illudque toti Orbi pro vero ac genuino venditare: *Hæc Lullistæ*, inquit *Odoricus Raynaldus* ad annum MCCCLXXII. Num. xxxv. conficta ab *Eymerico*, vel subreptitium esse diploma contendunt. At virum gravem egregiè de Religione Catholica meritum, nullius utilitatis illecebra pellectum, id facinus perfrecta fronte ausum vix credi potest, cum facillimè coargui mendacii potuisset. Addunt etiam *Antilullistæ*, *Petrum Aragoniæ Regem* in Epistola datâ ann. MCCCLXXVII.

ad *Gregorium XI.* istud de *Raymundi Lulli* damnatione Diploma ut legitimum agnovisse, & in suo Regno promulgatum; quod certè improbasset *Gregorius XI.* ipsumque Regem de suppositione Diplomatis admonuisset, si supposititium fuisset, & *Eymericum* hujus criminis convictum non impunitum reliquisset, sed illum Inquisitionis officio abdicasset, quo tam insigniter fuisset abusus. Nihil tamen horum fecit *Gregorii XI.* Quin, *Franciscus Pegna* Directorium Inquisitorum *Eymerici* nuncupavit *Gregorio XIII.* Pontifici Maximo, Notis doctissimis illustravit, & litteris Apostolicis locupletavit, quas inter extat laudatum *Gregorii XI.* contra *Raymundum Lullum* Diploma, quod tamen *Franciscus Pegna* omni procul dubio expunxisset, si illud pro spurio & supposititio habitum fuisset. Fatentur quidem *Antilullistæ*, hoc *Gregorii XI.* contra *Raymundum Lullum* Diploma datum anno illius Pontificatus sexto, seu anno *MCCCLXXVI.* non amplius extare in Regeſto illius Pontificis. Sed id accidisse ajunt, quòd Regeſtum anni sexti Pontificatus *Gregorii XI.* perierit, incertum an casu, an dolo, vel, quod verosimilius est, mutatione Sedis Apostolicæ, tunc *Avenione* Romam translata. Sed etiamsi extaret adhuc Regeſtum anni sexti Pontificatus *Gregorii XI.* & in eo deesset Diploma, quod eodem anno edidit contra *Raymundi Lulli* doctrinam, non inde tamen consequeretur, illud ab *Eymerico* fuisse confictum; nam præterquàmquòd plures ab Authoribus Bullæ Pontificiæ citantur authenticæ, quarum apud aliquos authographum habetur, quæ tamen è Regeſtis, nescio quo casu, exciderunt, constat etiam apud omnes, *Raymundum Lullum* apud *Gregorium XI.*

ſæpiùs

sæpius hæreseos fuisse accusatum, & eundem Pontificem uno Diplomate dato anno MCCCLXXII. præcepisse *Eymerico*, ut in *Raymundi Lulli* errores inquireret, & ejus libros igni addiceret, si qui in illis errores deprehenderentur. Idem altero Diploma-
te dato anno MCCCLXXIV. *Francisco Vitali* præcepit Summus ille Pontifex. Unde nec *Wadinghus* ipse, acerrimus licet *Lulli* defensor, sibi temperare potuit, quin cogente veritate fateretur, *suspicionem* ingerere duas præfatas Extravagantes, *Summum Pontificem* (Gregorium XI.) circa *Lulli doctrinæ damnationem* aliquid effecisse. Ad postremam *Lullistarum* rationem petitam ex sanctitate, Martyrio, & cultu, qui *Raymundo Lullo* apud Majoricenses defertur, respondent *Antilullistæ*, nihil indè ad purgandam *Raymundi Lulli* doctrinam extundi posse, quia propter errores, & propositiones nonnullas hæreticas, hæreticum neino dixerit *Raymundum Lullum*, cum omnia Opera sua Ecclesiæ Romanæ censuræ ac judicio subjecerit, sicut multis probat *Wadinghus*, totumque illud errorum virus Martyrio pro fide Catholica tolerato, seu passionis falce purgaverit; quod tamen certò affirmari haud potest, quia Ecclesia Romana, omnium Ecclesiarum Mater & Magistra, ejus Martyrium necdum vindicavit. Hæc momenta circa doctrinam *Raymundi Lulli* hinc inde historicè produximus; plura de ejus patria, vita & Operibus dicturi in quinto Colloquio, ubi agemus de Viris illustribus, qui sæculis XIII. & XIV. floruerunt. Hic tantum velim sedulò observes, hunc *Raymundum Lullum* confundi non debere cum altero *Raymundo* cognomento *De Terraga*, qui etiam *Raymundus Neophytus* nuncupatus

est. Is quippè ex Hebræorum Rabbino factus Christianus, execrandos errores Scriptis tradidit, quos accuratè recenset noster *Nicolaus Eymericus* 2. parte *Directorii Inquisitorum*, quæst. 10. Inter illos errores, hi præcipui & graviores sunt. Primò, docet hic *Raymundus de Terraga*, dictus etiam *Neophytus*, prava dogmata Almarici, Arii, Sabellii, & quorumvis Hæreticorum, per se hæretica non esse, sed tantùm respectu illorum, qui ipsa animo pertinaci eligunt. Secundò, fas esse Dæmones adorare, & Sacrificantem Dæmonibus æquè & meliùs ab Idololatriâ excusari, quàm Christianum adorantem, imaginem Christi & Sanctorum. Tertiò, Laicum non teneri ad aliquem fidei articulum explicite credendum, ideòque si teneat, vel credat oppositum alicujus articuli ex ignorantia & tentatione, Diaboli, non peccare. Quartò, omnem peccatorem, dum peccat, voluntatem suam divinæ conformare, & æquè placere Deo bona & mæla, æquè *Juda* desperationem, ac *Petri* contritionem. Quintò, hominem sine charitate infusâ posse Deum super omnia diligere & vitam æternam promereri. Sextò, Sæctam *Mahometi* esse perinde Catholicam ac fidem Jesu Christi. Septimò, perfectius esse Schismaticum esse, quàm Catholicum, & Christum, Apostolos, Angelos, Cælites omnes esse Schismaticos. Octavò, solum Deum Patrem esse optimum, Dei Filium esse bonum in primo gradu, Spiritum Sanctum in secundo gradu, creaturam omnem in tertio. Hos, & complures alios *Raymundi Neophyti* errores, qui legi possunt apud *Eymericum*, & apud *Franciscum Pegna* Commentario 52. in *Directorium Inquisitorum* ejusdè *Eymerici*, confixit *Gregorius XI.*

Pon-

Pontifex Maximus Diplomate , quod incipit : *Aliquid mali propter vicinum malum* . Hæc obiter observanda esse duxi , ut facilius cavere posses ab errore , in quem lapsi sunt *Prateolus* , *Bernardus Lutemburgus* , & noster *Abrahamus Bzovius* , qui similitudine nominis decepti , *Raymundi Neophyti* absurdissimos errores , & perniciosos libros , *Raymundo Lullo* , tanquam notiori , perperam affinxerunt .

D. Usque adeòne Sæculis XIII. & XIV. fortunata fuit Dominicana Familia , ut nullum degenerem , nullum à Fide Catholica extorrem filium habuerit ?

M. Etsi Familia Dominicana semper de Ecclesia optimè merita fuerit , eamque non minùs doctrinâ , quàm pietate illustraverit , non ideò tamen ejus filii dilatant phylacteria sua , non omnia sua laudant , non omnia sua extollunt , nec suos omnes , Sanctos dicunt , Doctores , Martyres , Athletas , & Heroes ; sed potiùs modestè , ut par èst , profitentur , & sincerè agnoscunt , nonnullos è suis extitisse , qui ingenio suo plus æquo indulgentes , & ab illibata Sancti *Thomæ Aquinatis* doctrina desciscientes , erraverunt , & malè sanæ doctrinæ adhæserunt , quos inter Sæculo decimo quarto reponunt *Joannem de Montefono* Hispanum , & *Eckardum* Teutonicum , quorum errores pro eâ , quam profiteor , sinceritate , hic suppressere nec possum , nec debeo . *Joannes de Montefono* Ordinis Fratrum Prædicatorum Professor , & Sacræ Facultatis Parisiensis Theologus , graves ac diuturnas contentiones habuit cum eadem Facultate Parisiensi , quæ quatuordecim propositiones erroneas à *Joanne Montefono* assertas censurâ confixit anno MCCCCLXXXVII . Easdem etiam pro-

positiones à quovis publicari, prædicari, & doceri latâ sententiâ prohibuit *Petrus de Ordeomonte* Episcopus Parisiensis, ad quem *Montefonus*, qui obstrictam de palinodia cantanda fidem contumaciter fregerat, fuerat delatus. Has inter quatuordecim *Joannis Montefoni* propositiones, sunt novem, quas licet ad quæstiones purè Scholasticas pertinere, & sensum Catholicum nonnullas earum habuisse asserant aliqui Familix Dominicanæ Scriptores, censeo tamen ipse illas jure ac merito fuisse proscriptas à Sacra Facultate Parisiensi, quæ, ne doctrinam Sancti *Thomæ Aquinatis*, quem sibi *Montefonus* Patronum injustè adsciscibat, suâ censurâ afficere voluisse videretur, illius honori, & integritati, teste *Petro de Alliaco* Theologo Parisiensi, consultum esse voluit his verbis: *Salva in omnibus reverentia S. Thomæ*, & in litteris, quas eadem Academia Parisiensis scripsit contra *Joannem Montefonum*, relatis ab *Egassio Bulao* tomo 4. *Historiæ Universitatis Parisiensis*, disertè testatur, se in hac contra *Montefonum* censurâ doctrinam S. *Thomæ* non attigisse: Nos, inquit celeberrima illa Academia, *millesies diximus, & ut videmus, non sufficit, qualiter S. Thomæ doctrinam in dicta nostra condemnatione nequaquam reprobamus, sed hunc, seu Montefonum, ejusque fautores, doctrinam ejus, seu S. Thomæ, ad distortum, fideique absonum sensum adaptantes, aut ultra quam fieri debet, contra ejusdem Doctōris documentum dilatantes, condemnandos audaciter asserimus*. Idem judicium ferendum esse censeo de quinque aliis propositionibus, in quibus temerè asseribat *Montefonus*, quòd dicere, *Beatam Mariam Virginem & Dei genitricem non contraxisse peccatum originale, est expresse contra fidem*.

fidem . Quæ præsumptuosa assertio , ut ait Petrus de Alliaco in Tractatu , quem contra Montesonum edidit, quique adhuc extat manuscriptus Parisiis in Bibliotheca Navarrici Collegii, non solum Sanctis & Doctoribus tenentibus B. Virginem sine macula originali conceptam, injuriosa est, sed etiam eis , qui tenent oppositum adversativè . Nam licèt B. Bernardus in Epistola ad Lugdunenses tenuerit, ipsam in peccato fuisse conceptam, propter quòd ibidem scribit , Conceptionem ipsius celebrandam non esse ; tamen in fine dictæ Epistolæ sic concludit : Quæ autem dixi, absque præjudicio dicta sint sanius sapientis , Romanæ præsertim Ecclesiæ auctoritati, atque examini totum hoc, sicut & cæteræ, quæ hujusmodi sunt, universa refervo, ipsius, si quid aliter sapio, paratus judicio emendare . Unde patet , quòd illud solum probabiliter & opinativè tenuit, nec oppositum tenentes insanè sapere asserere præsumpsit, quod tamen dicere potuisset , si illud expressè contra fidem credidisset . Hactenus Petrus de Alliaco Theologus insignis , qui ad Cameracensem Episcopatum , & postea ad Cardinalitias Infulas, ob eximiam , quâ pollebat , eruditionem promotus est . Sacræ Facultatis Parisiensis condemnationi prævio examine & maturo judicio factæ , atque ab Episcopo Parisiensi confirmatæ non acquievit Joannes de Montefono, cùmque ab Facultate Parisiensi resecationem & ab Episcopo Parisiensi fulmina ob contumaciam defugere se non posse intelligeret, Clementem VII. qui, perstante Schismate, Avenione sedebat, eique Gallia adhærebat , appellavit . Constantèr in sua tuenda Censurâ perstitit . Facultas Parisiensis, & , ut omnem à se aut inimicitiz, aut præoccupati judicii suspicionem amoliretur,

tur, de ordine, quem in *Joannis de Montefono* condemnatione tenuerat, omnes certiores fecit, datis Circularibus, ut vocant, litteris, quas descripsit *Egassius Bulaus* tomo 4. *Historiæ Universitatis Parisiensis* pag. 621. Misit etiam Facultas Parisiensis Avenionem suos Legatos Magistros *Petrum de Alliaco*, *Ægidium de Campis*, *Joannem de Nova Villa*, & *Petrum de Alainvilla*, qui, postquam coram *Clemente VII.* & in frequenti Cardinalium consensu sæpius perorassent, obtinuerunt tandem an. MCCCCLXXXVIII. Censuræ Facultatis Parisiensis confirmationem, & *Joannis Montefoni* damnationem, cui jussum est ut Parisios rediret, & Universitatis correctioni sese submitteret. Quod cum ille facturum se promississet, nocte sequenti Avenione clandestinâ fugâ se proripuit, & in Aragoniam, unde oriundus erat, secessit. Utinam hîc tandem funesta illa, infauftisque auspiciis suscepta à *Joanne Montefono* controversia finem habuisset! At, prohi dolor, Dominicani Parisienses Collegii S. Jacobi, quod ab ipso ordinis exordio fuit semper illustre virorum eruditorum Seminarium, falsò arbitrati, hac Sacræ Facultatis Parisiensis in *Joannem de Montefono* latâ Censurâ doctrinam Sancti *Thomæ* petitam esse, imprudenter *Joannis de Montefono* patrocinium susceperunt, & Censuræ subscribere detrectarunt. Quam ob causam Dominicani è Facultatis Parisiensis gremio abscissi sunt, & docendi, concionandique munere, necnon gradibus Theologicis omninò privati. Hinc magna in Galliis Dominicanis conflata invidia, ac plurima illata incommoda, quæ *Vitæ Clementis VII.* Scriptor pluribus enarrat. Hanc luctuosam scissuram, quâ per annos viginti quinque integros Do-

mi-

minicani ab Sacra Facultate Parisiensi fuerunt exclusi, ægrè tulerunt *Carolus VI.* Galliarum Rex, ejusque Patruī, Duces Burgundus, & Borbonius, qui pro sua pietate, & auctoritate has discordias sustulerunt, pacemque sanciverunt. His tamen dissensionibus nullus magis indoluit, aut illis tollendis felicius incubuit *Joanne Gersonio*, Sacre Facultatis Parisiensis Cancellario, ut videre est in Epistola, quam in hanc rem ad Collegium Navarræ scripsit, in quo hæc habet: Cogor, inquit, illam deslere scissuram miserabilem, & mutilationem luctuosam partis non modicæ Universitatis Parisiensis. Fratres Predicatores loquor, viderint ipsi quid egerunt Attenderent ò utinam omnes, & benigna recogitatione secum tractarent, quanta, qualisve jactura spiritualis est & fuit, tot hæctenus sermones, tot lectiones, tot salubres Instructiones in Universitate & alibi exinde cessasse. Et cum probè nosset doctissimus ille Cancellarius, hoc pacis studium non omnibus placiturum, subjungit: Oblatrabunt, scio, si ad quosdam hæc scripta delata fuerint, ferentes indignè, immò pro scelere vel mutabilitate deputantes, quòd pacem Jacobitarum, seu Dominicanorum, videar optasse, aut pro ea verbum scriptumve fecisse. Sed libera voce fatebor, nec illud unquam pudori deputabo, me nunc & prius olim semper dum modestè volui, vel optavi, reconciliationem ipsorum in mediis etiam litibus optavisse. Per-eant qui de matris, aut mystici corporis fæda mutilatione gloriantur, qui non sanationi student, sed medellam quarentibus crudeliter irascuntur, & qui ad divisionem magis, quàm pulcherrimam unionem damoniaca impietate pelluntur, quorum persecutio, si pergunt in pacificos veritatis amatores furere, spernenda est, & gene-

generosæ virtutis pede calcanda, hoc proviso, ne damnosius inde nascatur. in Universitate vel Republica scandalum. Sed de Joanne Montefono, & de gravissima Controversia, quæ ejus occasione Parisiis excitata est inter Academiæ Parisiensis Doctores, & Dominicanos, plura leges apud nostrum P. Mallet Doctorem Parisiensem, in libro, quem Gallico idiomate scripsit de Viris Illustribus Domus & Collegii Sancti Jacobi.

Alter Dominicanus, qui sæculo decimo quarto non secundum mensuram fidei, prout in Sanctissimo Ordine fuerat institutus, scripsit & docuit, fuit Ekardus, natione Teutonicus, qui licet à Joanne Taulero in Opusculo *De Convivio*, & ab Bzovio ad annum mcccxxxvii. velut insignis pietate & doctrinâ Theologus celebretur, perniciosos tamen, errores suis concionibus, Scriptisque vulgavit, ut compertum habemus tum ex quæstione in ipsum habitâ primùm ab Henrico Archiepiscopo Coloniensi, tum etiam ex definitione Joannis XXII. Pontificis Maximi, in cujus litteris, ab Odorico Raynaldo ad annum mcccxxix. Num. lxx. ex Regesto ejusdem Pontificis descriptis, viginti octo errores recensentur, ex quibus alios ut hæreseos labe inspersos, alios à temeritatis & hæresis nota non alienos declaravit Joannes XXII. Testatur nihilominus idem Pontifex, quòd Ekardus in fine vitæ suæ, fidem Catholicam professus, prædictos viginti sex Articulos, quos se prædicasse confessus extitit, nec non quæcumque alia per eum scripta & docta sive in scholis, sive in prædicationibus, quæ possent generare in mentibus Fidelium sensum hæreticum vel erroneum, ac veræ fidei inimicum; quantum ad illum sensum revocavit, ac etiam

re-

reprobavit, & haberi voluit pro simpliciter & totaliter revocatis, ac si illos & illa sigillatim & singulariter revocasset; determinationi Apostolicæ Sedis & nostræ tam se, quàm scripta sua & dicta omnia subjiciendo. Undè liquidò patet, Ekardum non obfirmato animo errores suos defendisse, sed potius quæcumque docuerat fidei Catholicæ minus consona ejurasse, seque Ecclesiæ judicio, ut par erat, prompto & humili obsequio subjecisse.

His duobus Familiæ Dominicanæ Theologis, qui se Duces secuti, à recta sanæ doctrinæ semita aberrarunt, tertium adiiciam ejusdem Familiæ Theologum, qui floruit sub finem decimi tertii Sæculi, & obiit decimo quarto Sæculo, seu anno mcccvii. Is est Joannes, sive ortu, sive educatione dictus *Parisiensis*, qui librū edidit hunc præferentem titulum: *Determinatio Fr. Joannis de Parisiis Prædicatoris de modo existendi Corporis Christi in Sacramento Altaris alio, quam sit ille, quem tenet Ecclesia.* In hoc libro Joannes de Parisiis explicandum suscipit, non solum per conversionem substantiæ panis in Corpus Christi, sed etiam per assumptionem ejusdem substantiæ à Verbo Divino, modum, quo Corpus Christi existit in Eucharistiæ Sacramento. Hunc librum Joannis de Parisiis ex MS. Codice S. Viëtoris Parisiensis eruit, & præmissâ Dissertatione Historica de *Dogmate Transubstantiationis* anno mdclxxxvi. Londini edidit Pseudo-Minister Petrus Allix, eumque Scriptorem in suas, seu Hæreticorum partes traxit. Sed non animadvertit Pseudo ille Minister, se ex eo Joannis de Parisiis libro nihil præsidii ad suum contra augustissimū Eucharistiæ Sacramentum errorem suffulciendum accersere posse, tum quia
cer-

certissimè constat, *Joannem de Parisiis* realem Corporis Christi in Eucharistia præsentiam, quam *Petrus Allixius*, alique ejusdem farinæ Hæretici explodunt, nunquam negasse; tum quia etiam, *Joannes de Parisiis* novam & peregrinam opinionem suam, quâ par est reverentiâ, Ecclesiæ judicio subjecit; tum quia denique, *Joannes de Parisiis*, à *Guillemo Parisiensi*, *Ægidio Bituricensi*, *Guillelmo Ambianensi* Episcopis, & à Magistris Facultatis Parisiensis diligentius examinatâ ejus doctrinâ, damnatus est, & prohibitus prælegere, docere, prædicare & disputare Parisiis. Ineptè ergo *Petrus Alixius* in sua laudata Dissertatione, & *Joannes Clericus* Tomo III. *Bibliothecæ Universalis*, existimarunt, eâ *Joannis de Parisiis* opinione evinci posse, Dogma Transubstantiationis, seu Conversionis substantiæ panis & vini in substantiam Corporis & Sanguinis Christi Domini in Eucharistia sub finem decimi tertii, & initium decimi quarti Ecclesiæ Sæculi necdum apud Catholicos fuisse communiter receptum. Hæc siquidem frigida ac inanis utriusque Hæretici conjectura nullo negotio falsi convincitur ex perpetua SS. Patrum tam Græcorum, quàm Latinorum traditione, & ex consensione omnium ætatum, Nationum, & Ecclesiarum, quæ ab ipsis Apostolorum temporibus ad hanc usque ætatem Dogma de Reali præsentia Corporis Christi in Eucharistia, & de Transubstantiatione cōstanter propugnarunt, & illos, à quibus universalis Ecclesiæ fides oppugnata fuit, aut diris devoverunt, aut ad canendam palinodiam adegerunt, sicut in suo aureo Opere de Perpetuitate fidei pluribus probat doctissimus *Antonius Arnaldus* Doctor Sorbo-
nicus.

nicus . Sed hæc de *Joanne Parisensi* Ord. Prædicatorum, de quo in quinto Colloquio iterum redibit sermo , obiter dicta sint .

D. Narrasti in Colloquio superiori Schisma, quod *Ludovicus Bavarus* Imperator Sæculo decimo quarto contra *Joannem* vulgò dictum . vigesimum . secundum , conflavit : nunc autem scire velim , an illi , qui à partibus *Ludovici Bavari* steterunt , in aliquos errores impeggerint , & an fidem aliquam mereantur in his quæ adversus *Joannem XXII.* Pontificem Maximum scripserunt .

M. Postquam *Joannes XXII.* sententiam excommunicationis anno mcccxxiv. tulisset in *Ludovicum Bavaram*, Imperatorem in sua malitia obstinatum , in rabiem actus perduellis ille Imperator , conductitiâ nonnullorum Theologorum doctrinâ & calamo fretus Epistolam vulgavit, quâ *Joannem XXII.* ut injustum innocentum persecutorem , clavium Ecclesiæ subversorem , Canonum violatorem , Sacramentorum prophanatorem , Terræ Sanctæ desertorem , Ecclesiæ temeratorem , denique incorrigibilem , & hæreticum notorium declarare , seu potius infamare ausus est . Inter illos Scriptores , qui *Ludovico Bavaro*, Schismatico Imperatori , adversus *Joannem XXII.* Pontificem Maximum, & Ecclesiasticam authoritatem venales calamos commodarunt , recensentur *Marfilius de Menandrino* Patavinus , & *Joannes Jandunnus* , Perusinus , Viri Politici magis quàm Christiani . Hi quippè impii ac malè feriat homines pestiferum librum de jurisdictione Imperiali & Pontificia consarcinarunt , quem inscripserunt , *Defensorem Pacis* , eumque *Ludovico Bavaro* nuncuparunt . Hunc malè natum librum

librum gravissimis resperferunt erroribus, & primò in eo docent, Christum Dominum, quandò solvit tributum Cæsari, id ex necessitate, non ex arbitrio vel ex pietate fecisse; ex quo inferunt bona temporalia Ecclesiæ ita Imperatoris dominio subiecta esse, ut velut sua pro nutu & libito repetere illa possit. II. Afferunt, Christum in Cælos ascendentem nullum in Ecclesia visibile caput constituisse, nullum Vicarium reliquisse; nec *S. Petrum* plus auctoritatis quàm Apostolos reliquos accepisse. III. Pertendunt, ad Imperatorem spectare Pontifices instituere, deturbare ac punire; de capacitate promovendorum ad Sacros Ordines judicare, Ecclesiarum, sacrorumque Ministrorum numerum decernere, Beneficia Ecclesiastica conferre, Religiosos Ordines approbare, Concilia congregare, jejunia, & feriationem à mechanicis operibus indicere &c. IV. Negant, totam Ecclesiam simul junctam posse ullum hominem punitio-
ne coactivâ coercere, & Episcopum, aut Sacerdotem excommunicationis vel Interdicti in quemquam ferre posse sententiam absque auctoritate Imperatoris. V. Sacerdotes omnes sive Pontifices, sive simplices Presbyteros, ex institutione Christi esse æqualis auctoritatis ac jurisdictionis affirmant, & non minus Episcopos communiter aut divisim, excommunicare posse Romanum Pontificem, quàm illos Pontifex Ecclesiasticâ communione privare possit. VI. Statuunt, Ecclesiam bona temporalia possidere haud posse. VII. Ajunt, Imperatorem succedere Romano Pontifici, & Ecclesiam, Sede vacante, regere posse. VIII. Imperatori adjudicant potestatem dispensandi in contrahendis matrimoniis,

niis, quæ humanâ, non divinâ lege prohibita sunt, & auctoritatem filios non ex legitimo thoro procreatos declarandi, ac faciendi legitimos, non solum quantum ad civiles effectus, sed etiam quantum ad Officia & Beneficia Ecclesiastica. Hos pestilentes errores, quibus potestas Ecclesiastica ab imis fundamentis convellitur, eruditè confutavit ac damnavit *Joannes XXII.* in ea, quam adversus *Marsilium*, & *Jandunum*, eorumque libros tulit, sententiâ, quæ legitur apud *Odoricum Raynaldum* ad annum *MCCCXXVII.* Num. 27. Scripserunt etiam adversus eisdem errores *Alvarus Pelagius* Episcopus Silvensis, *Alexander de S. Elpidio*, qui ex Priore Generali Augustinianorum factus est Archiepiscopus Ravennas, in libro *De jurisdictione Imperii & Auctoritate Summi Pontificis*, & *Petrus de Palude* Ordinis Prædicatorum insignis Theologus, in libro *De causa immediata Ecclesiasticæ potestatis*. His duobus pestilentissimis Scriptoribus *Marsilio*, & *Janduno* in *Joannem XXII.* debacchantibus, adjunxerunt se quoque *Michaël Casenas*, *Guillelmus Okamus*, & *Bonagratia Minoritæ*, quos famam *Joannis XXII.* calumniis proscindere, eumque hærescos insimulare non pudit, asserentes, Summum illum Pontificem apertè docuisse, prædicasse ac propugnasse, Sanctorum Animas, quibus nihil luendum superest, statim atque corporibus solutæ sunt, Deum non videre, nec eo frui, sed earum Beatitudinem procrastinari usque ad supremum Generalis Judicii diem. Quod putidum commentum refellemus in Colloquio sexto, ubi agendo de Doctrina, quæ sæculis XIII. & XIV. in Ecclesia obtinuit, ostendimus, *Joannem XXII.* ejusmodi errorem nun-

quàm ex animo propugnasse, nec illum ex Cathedra, ut ajunt, definiisse, quidquid contra obstrepant hæretici nostri temporis, quamvis negari haud possit Joannem XXII. tanquàm privatum Doctorem, vehementer propendisse in sententiam quorundam veterum Patrum, circa dilationem Visionis Dei, quæ sententia tum temporis necdum eliquata erat, & decretorio Ecclesiæ judicio proscripta, licet quodam modo contraria videatur Fidei Formulæ, quam Clemens IV. & Joannes XXI. Græcis ad Ecclesiæ Latinæ communionem redeuntibus præscripserant, in qua disertis verbis asserebatur, Animas, quæ fuerunt purgatæ, mox in Cælum recipi, ut videre est apud Odoricum Raynaldum ad annum mcccLxvii. Porro nullam fidem merentur Michaël Casenas, Okamus, Bonagratia, & alii fautores Ludovici Bavari Schismatici Imperatoris, apud quem sese receperant, ut liberiùs adversus Joannem XXII. cujus acerrimi insectatores fuerunt, scriberent, eique hæreseos notam impudentiùs inurere possent. Ferenda etiam non est horrenda calumnia, quâ Joanni XXII. importare ausus est Calvinus, procacissimus post homines natos Hæresiarcha, qui libro iv. Instit. Cap. 7. Sect. 28. perfrictâ fronte asserit, hunc Summum Pontificem docuisse, Animas esse mortales, easque unâ cum corporibus usque ad Resurrectionem interire, & Cardinalium neminem tantæ insaniæ se opposuisse. Sic enim scribit: *Expungant è numero Pontificum oportet Joannem XXII. qui palàm asseruit, animas esse mortales, unâque cum corporibus interire usque ad diem Resurrectionis. Atque ut videas totam Sedem cum præcipuis suis fulturis tunc prorsus concidisse, nemo Cardinalium huic se tantæ insaniæ*

sanæ opposuit. Sed Schola Parisiensis Regem Gallie impulit, ut ad palinodiam hominem cogeret. Rex ejus communionem suis interdixit, nisi mox resipisceret; idque de more publicavit per Præconem. Hac necessitate adactus ille, errorem abjuravit. Hactenus, effrons ille Hæresiarcha, qui, ut optimè observat Bellarminus libro quarto de Romano Pontifice capite decimo quarto, tam horrendum mendacium excogitavit, quia sententiam de dilatione beatitudinis usque ad extremum judicii diem, in quam nondum ab Ecclesia proscriptam propendebat Joannes vigesimus secundus, ut Doctor particularis, tanquam verissimam propugnavit Calvinus, etsi probè sciret, eam cùm hæreticam post Joannis XXII. tempora in Concilio Florentino fuisse confixam. Sic enim mentem suam Calvinus lib. 3. Instit. cap. 25. disertè aperit his verbis: Valdè se torquent multi disputando, quem locum occupent, & an Cælesti gloria jam fruantur (Sancti) nec ne? Atqui stultum & temerarium est de rebus incognitis altius inquirere, quàm Deus nobis scire permittat Quod finis Abraham dicitur beata Sanctorum Spiritum collectio, nobis abundè est ex hac peregrinatione excipi à communi fidelium Patre, ut nobiscum fidei suæ fructum communi- cet. Intered: cùm Scriptura ubique jubeat pendere ab expectatione adventus Christi, & gloriæ coronam eò usque differat, contenti simus his finibus divinitus nobis præscriptis, animas piorum militiæ labore perfectas in beatam quietem concedere, ubi cum lætitiâ, fruitionem promissæ gloriæ expectant, atque ita omnia teneri suspensa, donec Christus appareat Redemptor. Potuitne, amabo, Calvinus hanc sententiam, de procrastinatione beatitudinis usque ad extre-

Q 2 mum

mum iudicii diem , quam tamen certissimè norat fuisse tanquàm hæreticam ab universali Ecclesia damnatam , clarioribus verbis adstruere ? *Quoniam igitur videbat Calvinus , verba sunt Bellarmini loco mox à me laudato , id , quod alii reprehendebant in Joanne Papa , non posse à se reprehendi , & tamen nolebat ullam occasioem Pontificis accusandi prætermittere , confugit ad Magistrum suum Patrem mendaciorum , & ab eo insignem illam calumniam mutuatus est , ut infamaret Joannem XXII. Pontificem Maximum . Sed ad confutandam atrocem illam calumniam plura addere opus non est , cùm certum sit apud omnes , qui rectè sentiunt , quatuor Institutionum libros , quos Calvinus edidit , nihil aliud esse à capite ad calcem , quàm totius impietatis quasi Encyclopediam , & Satyram calumniarum , conviciorum & mendaciorum contra Ecclesiam Romanam , ejusque Pontifices , feracissimam .*

D. Agnosco callidam audaciam istius Sycophantæ , qui in proferendis mendaciis , & affingendis calumniis callum obduxit , sibi que omnem omninò fidem abrogavit . Eo itaque in malam pestem , malumque cruciatum abire jussio , alios , si placet , percurramus errores , quos Sæculo XIV. Novatores disseminare tentarunt .

M. Nonnulli extiterunt Sæculo decimo quarto Novatores , qui erroneas propositiones ventilantes à Sacra Facultate Parisiensi fuerunt damnati . Primus inter illos Novatores à Sacra Facultate Parisiensi damnatus fuit *Joannes de Mercuria Cisterciensis Ordinis Professor* , qui anno mcccxlvi. Parisiis multos erroneos proposuit articulos , quorum præcipuos hic subjicere non pigebit . In pri-
mis

mis assererat, possibile esse, Christum voluntate humana aliquid voluisse nunquam eventurum, & fieri itidem potuisse, ut Christus diceret falsum. Secundò, docebat, Deum efficaciter velle quidquid vult. Tertiò, blasphemabat, facere Deum quòd aliquis peccet, & velle voluntate beneplaciti ut ille sit peccator. Quarto, pertendebat, quòd aliquis habens usum liberi arbitrii, tam gravi tentatione extimuletur, ut illi resistere haud possit, & moveatur ad illecebram cum aliena uxore, adulterium non committit rem habendo cum illa, idemque de aliis peccatis ferendum esse iudicium effutiebatur. Quintò, dicebat, non esse pejorem in genere moris illum, qui vitioso habitu cum actu fœdatus est, altero homine, qui consimili habitu vitioso sine actu est inquinatus. Sextò, existimabat, probabile esse, si una ratio, seclusa fide, consulatur, nulla esse Accidentia, sed res omnes extantes esse substantias. Ab hoc errore in Joanne de Mercuria damnato, quo pacto recentiores Philosophi, qui vulgò Cartesiani audiunt, doctrinam suam vindicare possint, judicent viri eruditi. Hos, & alios hujusmodi errores vel ineptè, vel impiè, vel perridiculè à Joanne de Mercuria prolatos tacitus mecum ipse dum cogito, indignerne, an rideam, an utrumque? si quæris, vix satis scio. Hoc unum certissimè scio, nonnullos ex his Joannis de Mercuria errores renovatos non ita pridem fuisse ab hæreticis Quietistis, Discipulis Michaelis de Molinos, qui fœditates & abominationes suas Deo non modò permittenti, sed volenti tribuere non verebantur, atque veterum Gnosticorum & Beguardorum spurcissima dogmata secuti, non solùm obscœnas carnis illecebras, & libidinum monstra negabant esse pecca-

ta, sed, quod horrendum est, animum iis purgari, & ad maiorem perfectionem provehi impiè asse-
rebant. Alterum Novatorem, seu Nicolaum de
Ultricuria, sacra facultas Parisiensis an. MCCCLVIII.
compulit ad publicam articulorum plurimorum
de rebus Philosophicis & Theologicis à se propo-
sitorum revocationem; qui quidem à Sede Apo-
stolica primùm damnati fuerant omnes ut falsi,
plerique ut hæretici. Horumce articulorum dicti
Magistri Nicolai de Ultricuria, qui in Bibliothecis
Patrum referuntur, aliquos tantùm hic indicabo,
quorum duo maximam cum moderna Cartesiano-
rum Philosophia affinitatem habere videntur. Pri-
mus articulus hic est: *in rebus naturalibus unus est
motus localis congregationis, & disgregationis, ita ut
cùm tali motu colliguntur atomi, & naturâ unius sup-
positi sortiuntur, fit corruptio, cùm verò atomorum
accessio ad motum suppositi, vel ad naturalem ipsius
operationem nihil confert, alteratio est.* Alter Arti-
culus his verbis conceptus est: *Lumen nihil aliud est
quàm corpuscula quædam, quæ nata sunt sequi motum
Solis vel alterius corporis luminosi, fitque huiusmodi
corpusculorum ad corporis luminosi præsentiam conflu-
xu. Et si obiiciatur, motu locali non fieri, cùm mo-
mento fiat illuminatio: Respondetur fieri in tempore,
sicut sonum, etsi non percipiamus.* Inter alios arti-
culos Magistri Nicolai de Ultricuria, qui ad Theo-
logiam spectantes, tanquàm hæretici proscripti
sunt, hi tres præcipui recensentur. Primus hic est:
*Si adolescens ingenuus aliquem inveniat, qui brevi
edocere ipsum valeat scientiam omnem, quæ de rebus
creatis haberi potest, centum librarum pretio constitu-
to, quas adolescens furto dumtaxat comparare potest,*

eo casu furtum licitum est. Secundus Articulus: Deus rationali creaturæ præcipere potest, ut ipsum odio habeat, cui mandato obediens, mereretur magis, quàm si ipsum ex præcepto diligeret; quoniam id faceret majori conatu & contra propriam propensionem. Tertius Articulus: Si quis voluntatem suam divinæ conformare voluerit, alterutrum necesse est, vel quod Deus omnia necessaria ad salutem ipsum edoceat, ita ut errare non possit; vel si errare ipsum permittat, vitio non vertatur error, immò actus consequens magis vel æque sit meritorius.

Tertius Novator, quem anno MCCCLI. confodit, & ad palinodiam adegit Sacra Parisiensis Facultas, fuit *Magister Simon*, qui septem illas propugnaverat erroneas & hæreticas propositiones. Dixerat primò, Nomen *Iesus* de Deo dicitur accidentariò. Secundò, *Iesus* potest esse, & non esse Deus. Tertiò, nulla res est, aut esse potest, quæ modò non sit Deus, & aliquandò possit esse Deus. Quartò, Deus potest aliququaliter se habere, qualiter se non habet, & aliqualis etiam esse, qualis non est. Quintò, quamvis *Iesus* fuerit ab *Æterno Patri* coequalis, tamen aliquandò fuit Deus, quandò non fuit *Iesus*. Sextò, *Filius Dei* incæpit esse. Septimo, Nunquam hic homo, qui *Christus* est, factus est *Christus*. Has erroneas propositiones à se in *Actu*, ut vocant, *Vespertiarum*, propugnatos, jubente Facultate Parisiensi, revocavit *Magister Simon*, cujus retractationis Instrumentum editum est in Bibliotheca Patrum. Eamdem sortem anno MCCCLIII. nactus est *Frater Guido*, Ordinis Eremitarum Sancti Augustini, & sacræ Facultatis Parisiensis Baccalaureus Theologus, qui nonnullos errores, in quos impegerat, ex

ejusdem Facultatis Decreto palàm revocare compulsum est. Hi sunt præcipui errores, in quos lapsus est iste Guido. Primò, assererat, quòd *Charitas, quæ semel amittitur, nunquàm fuit Vera Charitas*. Secundò, quòd *Præscitus, existens in charitate, actum vitæ æternæ meritorium elicere non potest*. Tertiò, quòd *homo vitam æternam ita de condigno mereatur, ut hanc ipsi Deus absque injuria negare non possit*. Quartò, quòd *si nullum esset liberum arbitrium, adhuc esset peccatum*. Quintò, quòd *bonum meritum ita est à Deo, ut nihil sit à voluntate, & quòd Deus homini viatori necessitatem quandòque imponit præveniendi voluntatem ad bonum actum, ita ut potestas ad oppositum non remaneat*. Hos, & alios id genus errores, quos postea Wicleffus, Lutherus, & Calvinus recoxerunt, cum propugnasset Frater Guido, illos mandato Sacræ Facultatis Parisiensis coactus est ejurare ac retractare, cujus retractionis Instrumentum extat in Bibliotheca Patrum. Non multò post, seu anno MCCCXLII. Magister quidam Ludovicus, jussu Sacræ Facultatis, aliquot propositio-
num, quas docuerat vel propugnauerat, publicam edidit retractionem. Erat ille Magister argutias Dialecticæ apprimè edoctus, & ita pastus chymæris, ut Deum ad libidinem minutim discerperet, incisim distraheret, particulatim divideret, esse reale Dei distingueret ab esse formali, & attributa Dei ab ejus essentia nescio quibus præstigiis secerneret. Hinc dicebat primò, quòd *licet perfectæ voluntatis, seu divinæ essentia quodlibet intrinsecum sit absolutè necessarium secundum suum esse reale, tamen est aliquid intrinsecus contingens, & non est necessarium secundum suum esse formale*. Secundò, assererat, quòd

quòd aliquid est Deus secundum suum esse reale , quod tamen non est Deus secundum suum esse formale. Quam propositionem damnavit Sacra Facultas Parisiensis tanquam fidei dissonam . Tertiò , docebat , volitionem , qua Deus vult A. esse , non minùs distingui à volitione qua vult B. esse , quàm Deus distinguitur à materia prima realiter . Quartò , affirmabat , in Deo esse contradictoria , quæ immensè formalitèr repugnant . Præter illos errores , quos è Dialecticis fæce in Theologiam invexerat subtilis ille Parisiensis doctor , alios proposuerat , quorum duos absurdissimos hîc proferam . Primus est : quod divina voluntas non potest immediate nolle peccatum esse , & peccatum non est immediatè odibile à perfectâ , seu divina , voluntate . Alter error est , quòd divina voluntas non diligit intentiùs prædestinatum , quàm præscitum , nec plus Deus diligit se ipsum , quàm Diabolum secundum naturam . Hos , & similes errores Magister Ludovicus revocare jussus est à Sacra Facultate Parisiensi , ejusque Instrumentum retractationis insertum est in Bibliotheca Patrum . Missas facio quasdam propositiones malè sonantes , quas Magister Joannes de Calore in actu Vesperiarum , anno mcccclxxxiii. propugnaverat , quasque ex Decreto Facultatis Parisiensis ejuravit ac revocavit solemni retractatione , quæ edita est in Bibliotheca Patrum . At hîc prætermittere haud possum damnationis sententiam , quam Facultas Parisiensis tulit in Fratrem Dionysium Soulechat , Ordinis Minorum , in Sacra Facultate Parisiensi Baccalaureum , Theologum , qui damnatos à Joanne XXII. Pontifice Maximo errores de paupertate Evangelica apud suos docere ausus fuerat . Hunc temerarium Pontifi-

tificiæ definitionis transgressorem Sacra Facultas Parisiensis, ad quam delatus fuerat, proscripsit, erroneas ejus propositiones césorio stigmate confixit, eique docendi munere interdixit. Hanc Facultatis Parisiensis sententiam *Urbanus V.* qui Avinionē sedebat, auctoritate Apostolicâ confirmavit, jussitque *Dionysio Soulechat*, ut Parisiis errores revocaret, sicut videre est in litteris, quas Summus ille Pontifex ad *Joannem* Cardinalem Episcopum Bellovacensem eâ de re scripsit anno MCCCXLVII. quasque *Odoricus Raynaldus* ad eundem annum Num. XVI. refert. Tandem Frater *Dionysius Soulechat* damnatos errores Parisiis in Ecclesia Fratrum Prædicatorum ejuravit, cujus retractationis publicum documentum extat in Bibliothecis Patrum.

D. Nihil hætenus dixisti de Wicleffiana Hæresi, quam tamen Sæculo decimo quarto prodiiisse, ac multas in Ecclesia excitasse tragedias, me antea præmonuisti.

M. Quâvis Wicleffiana hæresis Sæculo XIV. seu anno MCCCXXV. sub *Eduardo Seniore* Angliæ Rege ex inferis eruperit, Authore *Joanne Wicleffo*, natione Anglo, in Lincolnienſi Diœcesi Parocho, & acris ac superbi ingenii Theologo, illius tamen pestilentis hæreseos ortum, progressum atque interitum commodius referam in nostris Colloquiis in Historiam decimi quinti sæculi, maximè, cum plena impietatis dogmata, quæ evomuit ille Hæresiarcha, Hussitarum, Lutheranorum, & Calvinistarum Patriarcha, fuerint damnata in Concilio Generali Constantiensi convocato anno MCCCCXIV. cujus etiam Concilii jussu, *Wicleffus*, post habitum

tum prævium, diligens, & accuratum super ejus im-
 pœnitentia finali ac pertinacia, examen, hæreticus
 fuit declaratus, ejusque (jam licet multis abhinc
 annis vitâ functi, & sepulti) ossa effossa sunt, exhu-
 mata, exulta, & cineres in profluentem abjecti.
 De Wicleffiana itaque Hæresi, nihil in præsentia di-
 cemus, sed integram ejus seriem in Colloquiis in
 Historiam Sæculi XV. exhibere, & singula, quæ
 ad illam spectant, describere satagemus. Ante-
 quàm tamen huicce colloquio nostro finem impo-
 namus; non abs re erit quosdam hic in medium
 proferre Sectarios, qui Sæculo decimo quarto er-
 roribus *Wicleffi* proluserunt. Inter illos Sectarios
 jure optimo numerari debent *Lollardi*, ita dicti à
Lollardo quodam *Waltero*, eorum Antesignano,
 qui fœdissimis per Germaniam, Austriam, & Bo-
 hemiam sparsis erroribus, peculiarem conflavit
 Sectam, cujus errores *Trithemius* refert in Chro-
 nico Hirsaugiensi ad annum mcccxv. Videlicet di-
 cebant isti *Lollardi*, Missam, Baptismum, & Ex-
 tremam Unctionem, nihil prodesse; Luciferum
 cum aliquibus Dæmonibus iniuste Cælo pulsos fu-
 isse, & fore aliquandò restituendos; *Michaelem*
 autem, cæterosque Angelos æternis cruciatibus
 deputandos: Beatissimam Virginem post partum
 non mansisse Virginem: Dominicum Corpus in Sa-
 cramento esse Deum fictitium: Matrimonium esse
 juratum meretricium: Deum nescire, aut certè
 non punire mala, quæ sub terra fierent, unde &
 coibant promiscuè in speluncis & locis subterra-
 neis: Pœnitentiæ Sacramenti administrationem
 Laicis committebant, acceptâ (ut ridiculè agebant)
 potestate ligandi atque solvendi ab *Elia* & *Enocho*:
 Eccle-

Ecclesiæ Prælatos & Statuta contemnebant: Romanam Ecclesiam non Christi, sed infidelium esse dicebant: carnes quovis tempore edebant, & dies festos non observabant: merita & intercessionem Sanctorum irridebant: periurium non esse peccatum, asseriebant, & alia impia profitebantur dogmata isti hæretici *Lollardi*, qui in Austria, Bohemia, finitimisq; Provinciis adeò propagati sunt, ut, teste citato Abbate *Trithemio*, plusquam octoginta millia hominum in eam Sectam jurati & professi numerarentur, quorum multi in diversis Austriæ locis combusti, in suis erroribus usque ad mortem pertinacissimè, & magna cum alacritate peranserunt. *Lollardus Waltherus*, eorum Coriphæus ac Princeps, Coloniz exustus est anno mcccxxii. ut refert idem *Trithemius* in Chronico Hirsaugiensi. Hos Hæreticos, omni execratione dignos, se tanquam Patres ac Magistros habere gloriantur, quantum voluerint, *Wicleffistæ*, *Hussitæ*, Lutherani, & Calvinistæ, qui, dum vacillantibus suis Sectis aliquam antiquitatem conciliare nituntur, suam turpitudinem apertè produnt; seque in malicia & obstinatione Majoribus suis simillimos exhibent, juxta veterem Paræmiam: *Mali Corvi malum Ovum*.

Circa annos mcccclxxii. & mcccclxxiv. duo alii Novatores *Wicleffo* præiverunt, videlicet *Albertus Alberstadenfis* in Germania Episcopus, & *Milleczius* Presbiter & Canonicus Pragensis. Prior, scilicet *Albertus* Episcopus Alberstadenfis, anno mcccclxxii. inter cætera dogmata pravitatis hæreticæ nefandissimâ labe aspersa, asserbat contra Catholicam fidem, & Sanctorum Patrum de-

fini.

initiones, omnia in hoc modo ex necessitate evenire, & Fata cuilibet homini vitæ ac mortis necessitatem imponere, subindeque non esse habendum consilium, nec deliberandum de aliquo, cum omnes actus hominum, etiam à libero arbitrio procedentes, noscantur ex necessitate cœlestis influentiæ provenire. Hinc negabat necessitatem bonorum operum, liberum arbitrium, merita & demerita hominum, nec non invocationem divini auxilii & Sanctorum. Alter, *Milleczius*, Canonicus Pragensis anno MCCCLXXIV. sub specie sanctitatis multos errores vulgavit, eoque dementiæ prorupit, ut diceret, jam Antichristum venisse, Ecclesiam omnino defecisse, nullam in Papa, Cardinalibus, Episcopis, cæterisque Clericis esse veritatem, sed se solum cum suis Sectatoribus viam salutis docere, ut videre est apud *Odoricum Raynaldum* ad annum MCCCLXXIV. Num. XIII. Hunc *Milleszium*, insignem blateronem, ejusque contumaces Sectatores, tanquam hæreticos puniri jussit *Gregorius XI.* Pontifex Maximus in Litteris, quas ad Archiepiscopum Pragensem, ejusque suffraganeos scripsit. Perniciosum etiam librum, qui tum temporis in Germania per manus hominum volitabat, inscriptum: *Speculum Saxonum*, hæresibus ac deliriis scærentem flammis addixit idem Pontifex, & Germaniæ Archiepiscopos ejus damnationem promulgare; & *Carolus IV.* Imperatorem opem ferre monuit litteris Idibus Octobris anni MCCCLXXIV. datis, sicut refert *Spondanus* ad annum MCCCLXXIV. Postremo, suos habuit *Wicleffus* in Anglia præcursor & emissarios, ut constat ex erroribus xxx. quos in Provincia Cantuariensi ab incertis auctoribus

ribus profeminatos *Simon Langham* Cantuariensis Archiepiscopus, Angliæ primas, congregato Virorum Theologorum & Jurisperitorum cœtu, confixit sententiâ, quam tulit Lambethæ quinto Idus Novembris anni MCCCLXVIII. Complures ex his triginta erroribus ad hoc principium relabuntur, scilicet omnes homines, etiam Saracenos, Judæos, & Paganos, nec non pueros in utero materno extinctos habere claram Dei visionem ante mortem suam, eâque visione manente, habere omnes electionem liberam convertendi se ad Deum, vel recedendi ab eo, ita ut si quis tunc elegerit converti ad Deum, salutem æternam sit adepturus, si verò nolit, perpetuæ damnationi sit addicendus. Ex hoc semel jacto principio inferebant Novatores, Sacramentum Baptismi non esse necessarium ad salutem consequendam, neminem damnari posse pro solo peccato originali, immò nec pro peccato actuali, nisi ille, à quo committitur, recusaverit se convertere ad Deum stante clara Dei Visione. Tunc enim peccatum ita irremissibile & irremediabile esse docebant, ut pro illo Passio Christi satisfacere non posset. Non minus absurda & impia, cæteræ propositiones continebant, præsertim istæ: *Pater in divinis est finitus, filius in divinis est finitus, & solus Spiritus Sanctus est infinitus. Christus, Beata Maria, & omnes homines beati, adhuc veraciter sunt mortales. Beata Virgo, omnes Beati, tam Angeli, quàm homines, excepto Christo, sunt peccabiles & damnabiles. Omnes homines damnati in Inferno, & omnes Dæmones sunt & semper erunt reparabiles ad beatitudinem consequendam. Sed detestabiles illos errores retulisse sufficiat.*

D. Hi sunt igitur omnes Hæretici , qui Sæculo decimo quarto virulenta dogmata sparserunt ?

M. Præter illos Hæreticos , quos hætenùs in medium produxi , septem alii non magni ponderis recensentur , quos tamen prætermittere haud debemus , ut integram habere possis Historiam omnium Hæresum , quæ Sæculo XIV. Ecclesiam infestarunt . Primus inter illos ordine reponendus est *Arnaldus de Villanova* , natione Catalanus , Professione insignis Medicus , qui eruditionem , quâ pollebat , pravis de religione opinionibus turpiter fœdavit . Ex nefariis siquidem libris ab ipso editis multos errores excerptis *Joannes Longerus* , Fidei Inquisitor , Ordinis Prædicatorum , quorum quindecim Capita recenset *Eymericus* ejusdem Ordinis in *Directorio Inquisitorum* Part. 2. quæst. 11. Inter cætera absurdissima , quæ effutiit , dogmata , ausus est asserere , omnes Christianos in Infernum detrudi : omnes Monachos adulterare doctrinam Christi , eos Charitate destitutos esse , & aeternum damnari : Opera misericordiæ esse Deo gratiora Sacrificio Altaris : Fundationis Capellarum , aut Præbendarum , seu etiam Missarum pro Defunctis non esse opera Charitatis , sed res ad vitam æternam promerendam prorsus inutiles . Denique , Missis aliis ejus erroribus , ariolabatur , Mundum anno mcccxxv. desitutum . Omnes *Arnaldi de Villanova* errores 'damnati fuerunt à *Joanne Longerio* Inquisitore , & ab Ecclesiæ Tarraconensis Præposito Vicarioque Generali , Sede vacante , anno mcccxvi . i. justo autem Dei iudicio naufragio miserrimè periit *Arnaldus de Villanova* , de quo legis *Bernardum Lutzemburgum* in
Cata-

Catalogo Hæreticorum, & Prætorum Lib. I. *Historia Eccles.* Cap. LXXIX.

Alter Hæreticus fuit *Cecus Asculanus*, Caroli Ducis Calabriae Astrologus, qui in Tractatu, quem Bononiæ edidit, in Sphæram, Stellarum influxibus necessitatem absolutam tribuens, affirmabat omnia in Mundo necessariò evenire, quodque magis impium est, stultè dicebat, ex positura Syderum accidisse, quòd Christus fuerit necessariò incarnatus, pauper natus, & turpem mortem obierit; cùm è contra Antichristus, ex positura syderum in ejus nativitate futurâ, necessariò dives ac splendidus sit futurus. Alia hujusmodi vana & blasphema (teste Joanne Villani lib. 10. cap. 41. & 42.) cùm garrirer ille Astrologus, tandem Florentiæ captus est, & ab Inquisitore Fidei de Hæresi, & pravo Astrologiæ judicariæ usu damnatus, igni addictus est anno MCCCXXVII.

Tertii Hæretici, qui fuit *Bertholdus de Rorbrach*, natione Germanus, meminit Naclerus tomo 2. Generatione 46. his verbis: *Post hæc tempora judicabatur Spiræ Beghardus Bertholdus de Rorbrach. Hic antea in Herbipoli quosdam articulos reclamaverat, videlicet quòd Christus in passione sua sic fuerat à Patre derelictus, quòd præ nimio dolore dubitaverit, salvæ anime sua deberet. Secundus articulus, quòd Christus in Cruce propter nimiam passionem, & dolorem maledixerit B. Mariæ Virgini. Tertius, quòd maledixerit terræ, quæ suscepit ejus sanguinem de Cruce. Propter præmissa fugiens (Bertholdus de Rorbrach) ad Diocesim Spirensensem venit, ubi articulos hos veros asseruit. Addidit etiam, quòd homo in hac vita in tantum proficere possit, quòd nec orare, nec jejunare*

junare oporteret, item quòd Laicus illuminatus possit plus proficere in docendo, & plus sit sibi credendum, quàm Evangelio, aut Doctõribus Sacræ Scripturæ. Item quòd homo devotus in perceptione cibi communis possit percipere tantam gratiam, ac si acciperet Eucharistiæ Sacramentum. Et quia relapsus, tradebatur Curie Sæculari, & est incineratus, anno MCCCLIX.

Circà idem tempus prodiit quartus Hæreticus, seu Martinus Gonsalvus, Conchenfis, qui multa perridicula, fatua, hæretica & impia cùm propalaret in Hispania, ab Archiepiscopo Toletano damnatus est, & à Sæculari Magistratu igni, ut merebatur, traditus. Docebat homo ille lymphatus, se germanum esse Archangeli Michaëlis, & locum ex quo cecidit Lucifer, sibi à Deo servari. Secundò, se primam veritatem & Scalam Cæli appellabat, singulisque diebus Cælum se ascendere, & illud osculari dicebat. Tertiò, se advenientem Antichristum ad singulare certamen provocaturum, & Cruce Christi diademate spineo ornata prostraturum. Hos insulsos errores huic dementissimo homini tribuit noster Franciscus Diago in Historia Provinciæ Aragoniæ lib. 1. cap. 24.

Eâdem tempestate quintus ejusdem farinæ, parisque dementiæ prorupit Hæreticus Nicolaus Calaber, qui istos Martini Gonsalvi errores Barcnone publicavit, addiditque, præfatum Gonsalvum esse Dei Filium in Cælis ab aeterno genitum, quamvis in terris patrem & matrem habuisse videretur: illum nunquam moriturum: ad ejus Prædicationem Mundum universum conversum iri, & in extremo Judicii die omnes ad inferorum supplicia damnatos precibus ejusdem Gonsalvi salutem consecuturos. Sic afinus

alinum fricat, & similes inveniunt labra lactucas. Hos, & alios errores proscripserunt noster *Eymericus* Inquisitor, & Vicarius Generalis *Barcinonensis* Episcopi. Ipse verò *Nicolaus Calaber* Curia Sæculari traditus est, flammis absumendus, ut refert idem *Eymericus* parte 2. *Directorii Inquisitorum* quæstione 11.

Sub *Urbano V.* Pontifice Maximo sextus surrexit Hæreticus, dictus *Bartholomæus Janovezius*, Majoricanus, qui libellum edidit hæresibus scatentem. Asserebat quippè inter multos alios errores, Antichristum die Pentecostes anni MCCCLX. venturum, & omnia Ecclesiæ Sacramenta, atque Incruentum Sacrificium tempore Antichristi desitura. Suos tamen errores à nostro *Eymerico* Inquisitore damnatos, pœnitentiam publicè professus, solemni ritu ejuravit ille hæreticus, sicut ipsemet *Eymericus* refert loco mox à me laudato, & post ipsum *Præteolus*.

Denique, anno MCCCLIII. sub *Innocentio VI.* Pontifice Maximo *Berengarius de Montefalcone*, Cisterciensis Ordinis, docuit: omnia, quæ facimus, bona, puro Dei amore, non ob aliam rationem, nec spe mercedis æternæ esse facienda. Hunc errorem, quem novissimè suscitaverunt spirituales Quietistæ, solemni judicio damnaverunt *Nicolaus Roselli* Inquisitor Ordinis Prædicatorum, & *Sancius Tarraconensis* Archiepiscopus ex Ordine Fratrum Minorum assumptus.

Prætermitto, brevitatis ergo, Fratres *Joanem de Latone*, & *Petrum de Bonageta* Ordinis Minorum Professores, qui anno MCCCLXXI. hos errores è sacro suggestu in Provinciis Tarraconensi & Ca-

Cæsaraugustana publicarunt. Primò, quòd si hostia consecrata cadat, seu projiciatur in cloacam, lutum, seu turpem quemvis locum, speciebus remanentibus, sub eis esse definit Corpus Christi. Secundò, quòd si Hostia consecrata à mure corrodat, seu à bruto quovis sumatur, simile ferendum sit judicium. Tertiò, quotiès Eucharistia sumitur sive ab homine justo, sive à peccatore, dum species dentibus teruntur, Christus ad Cælum rapitur, nec in hominis stomachum trajicitur. Quas propositiones ne quis deinceps prædicare præsumeret, districtè prohibuit *Gregorius XI.* Pontifex Maximus, litteris datis ad Tarraconensem & Cæsaraugustanum Episcopos, quas refert *Odoricus Raynaldus* ad annum MCCCLXXII. Num. XI. Prætermitto etiam Fratrem *Arnaldum Montanerii*, è Catalonia oriundum, & Ordinis Minorum Professore, quem à nostro *Eymerico* Inquisitore, & *Berengario Urgelitano* Episcopo tanquam Hæreticum damnatum *Gregorius XI.* capi jussit, & vinctum ad Sedem Apostolicam transmitti. Errores, propter quos *Arnaldus Montanerii* damnatus fuit, refert idem *Eymericus* parte 2. *Directorii Inquisitorum*, quæstione 11. Docerat scilicet, *Christum & Apostolos nihil habuisse proprium vel commune: Nullum posse damnari, qui deferat habitum Sancti Francisci: Ad Purgatorium singulis annis descendere Sanctum Franciscum, & inde in Paradisum extrahere quotquot Ordinem suum professi sunt, denique, Ordinem S. Francisci in perpetuum duraturum.* Has propositiones *Arnaldi Montanerii* jure merito proscriptas *Dermitius Thaddæus* Ordinis Minorum magno quidem, sed inani labore vindicare adnititur in sua *Nitela Franciscane Religionis*,

in qua cū benè multa non tam studio veritatis, quàm suā ergà Sacrum Ordinem, quem profitebatur, pietate motus scripserit, mirum videri non debet, quòd sæpiùs in Annalibus Ecclesiasticis ab *Odorico Raynaldo* pro meritis suis castigetur, quamvis *Lucas Wadinghus* Franciscanus in libro *de Scripturis Ordinis Minorum*, suo affectui plus æquo itidem indulgens, eum maximo commendet elogio. Sed hæc de Hæresibus, & Controversiis, quæ Sæculis XIII. & XIV. in Ecclesia obortæ sunt, dicta sufficiant.

D. Verè dixit Spiritus Sanctus per os & calamum Apostoli Pauli 1. epist. ad Corinth. cap. 11. v. 19. *Oportet hæreses esse, ut & qui probati sunt, manifesti fiant in vobis*, dum videlicet fideles indivulsè adhærent Ecclesiæ Romanæ, quæ est sola vera Sponsa Christi, & cujus veritatis hoc probatissimum signum est, quòd cū omnes hæreses & Schismata adversus eam vexillum erexerint, ipsa tamen semper inconcussa ac victrix perstiterit, juxta Christi Domini Oraculum Matthæi cap. 16. *Portæ Inferi non prævalebunt adversus eam*. Sed Ecclesiæ triumphos accuratiùs expendemus in Colloquio, quod crastinâ luce habituri sumus de Conciliis tam Oecumenicis, quàm Nationalibus, in quibus serpentes confossæ sunt Hæreses, & restituta fuit Ecclesiæ Disciplina.

COLLOQUIUM IV.

De Conciliis tam Oecumenicis, quàm Nationalibus, in quibus gliscentes Sæculis XIII.

& XIV. Hæreses fuerunt damnatae, & restituta est Ecclesiæ Disciplina.

MAGI-
STER.

Quanti sint operæ pretii ac momenti Conciliorum definitiones, Statuta, & Canones, documento sunt ipsi Ecclesiæ hostes, Hæretici hodierni, qui, postquam Sanctorum Patrum & Theologorum doctrinam, quasi pura hominum inventa conati sunt dissipare, non ibi quieverunt, neque his finibus suas coercuerunt impietates; sed ulterius proficientes, Romani Pontificis, & Conciliorum, quæ ab ipso convocantur, auctoritatem ab ipso Christo Domino profectam impugnare ausi sunt, & apertâ aggressione, ubicumq; prævalent, Romani Pontificis Primatum everterunt, Pastorum Romano Pontifici subditorum auctoritatem subalternam à se prorsus abdicarunt, jugum suis cervicibus à Christo impositum, quasi furentes & indomiti tauri excusserunt, & sacrilegis assertionibus, atq; impiis dogmatibus avitâ Ecclesiæ Catholicæ fidem corruperunt. Cum igitur Conciliorum potissimum definitionibus configantur Hæreticorum errores, & sacris, qui in eis conduntur, Canonibus sancitur Ecclesiæ Disciplina, permagui tua interest, ut scias omnia Concilia, quæ Sæc. XIII. & XIV. tam ad profligandas Hæreses, quàm ad sancendam Ecclesiæ Disciplinam variis in locis fuerunt convocata.

D. Cùm Oecumenica Concilia longè majori in Ecclesia polleant auctoritate , quàm Concilia Nationalia, seu Provincialia , nostrum , si placet , incipiamus Colloquium à Conciliis Generalibus , quæ Sæculo XIII. fuerunt celebrata , quorum convocationis causam, tempus, locum , Præsidem , numerum Patrum, & singula, quæ tum ad proscribendas hæreses , tum ad sanciendam Ecclesiæ disciplinam in his gesta & statuta sunt , à te in præsentia discere percipio .

M. Tria Concilia Generalia Sæculo Ecclesiæ decimo tertio indicta fuerunt, videlicet Lateranense IV. Lugdunense I. & Lugdunense II. quorum historiam hic describam, & Canonum , rerumq; præcipuarum in his gestarum notitiam tibi compendiosâ narratione tradam . In primis , Concilium Generale Lateranense IV. quod est inter Concilia Oecumenica duodecimum , convocatum est ab *Innocentio III.* Pontifice Maximo anno MCCXIII. ut constat ex Diplomate illius convocationis , quod datum est ab eodem Summo Pontifice, XIII. Kalendas Maji ejusdem anni , & cujus exemplaria ad Patriarchas, Archiepiscopos, Episcopos , Abbates, & Priores transmissa sunt . Causas convocationis illius Concilii indicat Summus hic Pontifex. in eodem Diplomate, ubi asserit, se istud Generale Concilium , juxta priscam Sanctorum Patrum consuetudinem, convocasse ad recuperationem Terræ Sanctæ , ad extirpanda vitia , & plantandas virtutes , corrigendos excessus , & reformandos mores , ad eliminandas hæreses, ad roborandam fidem, sopiendas discordias, & stabiliendam pacem, comprimendas oppressiones , & libertatem fovendam . Post
bien-

biennium ab illa convocatione habitum est Romæ anno mcccv. Concilium Generale Lateranense IV. ita dictum, quod in Lateranensi Basilica fuerit celebratum. Ei præfuit *Innocentius III.* Pontifex Maximus, interfueruntque duodecim supra quadringentos Episcopi, Patriarchæ duo, Constantinopolitanus, & Hierosolymitanus; Primates, & Metropolitani septuaginta septem, Abbates & Priores ultra octingentos, absentium Prælatorum, & Capitulorum Procuratores innumeri; adfuerunt etiam (ut testantur Abbas Urspergensis, hujus temporis Scriptor, & *Matthæus Parisius*) Imperatoris Constantinopolitani, qui Latinus erat, & Imperatoris Occidentis, Regumque Franciæ, Angliæ, Hungariæ, Aragoniæ, Siciliæ, Cypri, aliorumque Principum, Magnatum & Civitatum Legati. Patriarcha verò Antiochenus gravi infirmitate detentus venire non potuit, sed Episcopum Antheradensem misit, qui ejus locum supplevit. Alexandrinus etiam Patriarcha, qui sub Saracenorum tyrannide gemebat, *Germanum* Diaconum, qui suas in Concilio vices ageret, deputavit. *Laurentius Surius* in Præfationcula ac Concilium Lateranense IV. ait istud Concilium fuisse Oecumenicum, quia in eo de negotiis Religionis, de Gracæ & Latine Ecclesiæ concordia tractatum est, cui interfuere Patriarchæ Constantinopolitanus & Hierosolymitanus, Archiepiscopi tum Latini, tum Graci, septuaginta, Episcopi quadringenti undecim nec defuere Legati Graci & Romani Imperatoris, Regum Hierusalem &c. At, undè isthæc hauserit Carthusianus ille Scriptor eruditissimus? planè me ignorare profiteor. Adfuisse Concilio Lateranensi IV. Latinorum Orientalium Patriarchas,

chas, Constantinopolitanum & Hierosolymitanum, quin etiam, ut mox dixi, Patriarcham Antiochenum, nonnisi propter valetudinem, & Patriarcham Alexandrinum propter Saracenorum, quâ premebatur, tyrannidem ad Concilium Lateranense IV. accedere haud potuisse, *Laurentio Surio*, aliisque lubens concessero. Tunc enim illæ civitates Latinis Principibus parebant, sicut ostendimus in Colloquiis primo & secundo. Nec etiam inficias ibo, Episcopos Græcos diversarum regionum, quas Latini itidem subegerant, illuc convenisse. Sed Græcos Antistites, quorum Imperator *Theodorus Lascaris*, captâ à Latinis Constantinopoli anno millesimo ducentesimo quarto, Nicæam concesserat, ad Concilium Lateranense IV. accessisse, nè verisimile quidem puto, maximè cum Patres istius Concilii Canonem quartum condiderint contra Græcos, qui tunc temporis vehementiùs in Ecclesiam Romanam frendebant, & Latinos tanto odio prosequabantur, ut in Altaribus, in quibus Latini Sacrificium obtulerant, ipsi offerre nollent, nisi prius ea velut per hoc inquinata lavissent, & pueros à Latinis baptizatos denuò baptizarent. Quapropter, nullatenus existimo, Episcopos Græcos, qui erant sub dominio *Theodori Lascaris*, Græcorum Imperatoris, ad Concilium Generale Lateranense IV. venisse, ac subindè in eo de Græcæ & Latinæ Ecclesiæ concordia tractatum fuisse.

D. Jam probè teneo causas convocationis Concilii Lateranensis IV. tempus illius celebrationis, locum, Præsidem, & numerum Patrum, qui huic interfuerunt. Expendamus modò, si placet, singula, quæ in eo Concilio tam ad configendas hæreses, quam

quàm ad restaurandam Ecclesiæ Disciplinam fuerunt statuta.

M. Congregatis simul omnibus Episcopis in Basilica Lateranensi, *Innocentius III.* Pontifex Maximus die xi. mensis Novembris S. Martino sacrâ anni mcccxv. Concilium aperuit eleganti, pio, atque erudito sermone, sumptis pro themate his Christi Domini verbis apud *Lucam* cap. 22. *Desiderio desideravi hoc Pascha manducare vobiscum, antequam patiar.* Postea, contra varios Hæreticorum errores explicata est Catholicæ Ecclesiæ fides, Albigen- sium damnata Hæresis, decretumque, ut Ditis *Ray- mundi* Comitis Tolosani, Albigen- sium Hæretico- rum acerrimi fautoris, esset in posterum in plena potestate ac possessione *Simonis* Comitis *Montis- fortis*, viri strenui & Catholici, qui plus cæteris in debellandis Albigen- sibus laboraverat, ac plures terras ejusdem *Raymundi* Comitis Tolosani armis occupaverat. Sententiæ hujus concessionis factæ *Simoni* Comiti *Monfortio* à Concilio Lateranen- si IV. meminit *Petrus de Valle Cernaii* in sua *Hi- storia Albigen- sium* cap. lxxxiii. Extat etiam eadem Concilii sententia tomo 7. *Spicilegii*, ubi eam *Lucas Dacherius*, doctissimus Congregationis S. Mauri Benedic- tinus, edidit, & inde in postrema Conciliorum Collectione transcripta est. Insanam *Almarici* Hæ- resim, & librum Abbatis *Joachimi* damnarunt iti- dem Patres Concilii Lateranen- sis IV. Quæ omnia, cum in superioribus Colloquiis fuerint jam à nobis observata, levi brachio hîc attingimus.

Confixis in hoc Concilio Hæreticorum erro- ribus, *Innocentius III.* cui ad recuperandam Terram Sanctam acres stimulos admoverat memorabili,
illa

illa, cuius in primo Colloquio mentionem fecimus, victoria, quâ Latini sacro bello foederati Græcos expugnarunt, Constantinopolim subegerunt, & Imperatorem Constantinopolitanum creaverunt *Baldunum* Flandriæ Comitem, hoc, inquam, fausto Latinorum successu excitatus *Innocentius III.* Expeditionem in Terram Sanctam unanimi Patrum consensu decrevit, varia privilegia & indulgentias ad eam properantibus concessit, triginta millia librarum, ad hoc opus donavit, non solum omnes omnino Clericos tam subditos, quàm Prælatos, sed se ipsum quoque cum Cardinalibus ad decimæ collationem in subsidium Terræ Sanctæ obstrinxit, Crucesignatos ab oneribus publicis immunes esse iussit, Piratas & eorum fautores; item, Christianos, qui Saracenis arma, naves, aut machinas bellicas suppeditarent, excommunicatione perculit, postremo, præcepit omnibus Principibus Christianis, ut pacem inirent, eamque per quadriennium conservarent, & necessaria ad bellum sacrum peragendum subsidia compararent.

D. Condiditne Concilium Generale Lateranense IV. aliquos Canones?

M. Sunt nonnulli Scriptores, qui levissimis adducti conjecturis asserunt, nihil à Concilio Lateranensi IV. sancitum esse, sed Canones nomine huiusce Concilii inscriptos, unius *Innocentii III.* Pontificis Maximi opus esse arbitrantur. Inter illos Scriptores recensentur *Antonius de Dominis* Spalatenfis Archiepiscopus, & *Joannes Barclajus* in vindiciis adversus librum Cardinalis *Bellarmini* de potestate Pontificis in rebus temporalibus. Ficulneas utriusque Scriptoris conjecturas recoxit novissimus Scriptor

ptor *Ellias Dupinus*, Sacre Facultatis Parisiensis Doctor, in libro, quem edidit *De antiqua Ecclesiæ Disciplina* Dissertatione 7. parag. 4. pag. 572. ubi ad probandum istos Canones, qui sub nomine Concilii Generalis Lateranensis IV. circumferuntur, non à toto Concilio, sed ab *Innocentio III.* conditos fuisse, has duas profert conjecturas, quarum prima petitur ex testimonio *Matthæi Parisii*, qui in *Historia Angliæ* ad annum MCCXX. hæc scribit: *Facto prius ab ipso Papa exhortationis Sermonem, recitata sunt in pleno Concilio Capitula sexaginta, quæ aliis placabilia, aliis videbantur onerosa.* Ex quo infert *Dupinus*, hæc Capitula non à Concilio, sed ab *Innocentio III.* confecta fuisse, ejusque jussu in Concilio lecta. Altera conjectura desumitur ex ipsismet Canonibus, qui tribuuntur Concilio Lateranensi IV. In his quippè citatur Concilium Generale, quasi jam fuisset celebratum, ut videtur est in Canone XI. qui sic habet: *in Lateranensi Concilio pia fuit institutione provisum.* In Canone etiam XV. *in Lateranensi Concilio noscitur fuisse prohibitum*, & in Canone XXXIX. *De multa providentia fuit in Lateran. Concilio prohibitum &c.* idem legitur in pluribus aliis Canonibus, qui adjudicantur huic Concilio Lateranensi IV. Ex quo loquendi modo infert *Dupinus*, hos Canones non fuisse editos in hoc Concilio Lateranensi IV. quia si istud Concilium de se ipso loqueretur, diceret potius: *Hæc Sancta & Oecumenica Synodus Lateranensis statuit &c.* Hæ sunt duæ *Dupini* conjecturæ, quæ, cum jejunæ & subleste admodum sint, levi flatu exsufflari possunt. Et primò quidem, quid ex testimonio *Matthæi Parisii* in suæ sententiæ præsidium extundere possit *Dupinus*, certè non video.

Ait

Ait *Matthæus Parisius*, Canones fuisse lectos & promulgatos in Concilio Lateranensi IV. Hoc nemo negat. Sed inde colligi debet, hos Canones editos fuisse à Concilio Lateranensi IV. quoniam Capitula, seu Canones in Conciliis legere & promulgare, nisi qui Sacro approbante Concilio sanciti fuissent, in more & Disciplina Ecclesiæ positum nusquam fuit. Ait insuper *Matthæus Parisius*, horum Canonum, seu Capitulorum, quæ lecta sunt in Concilio Lateranensi IV. nonnulla aliis placabilia, aliis visa fuisse onerosa. Id profectò *Dupino* non suffragatur. Esto enim nonnulli ex his Canonibus lectis in Concilio Lateranensi IV. ad disciplinam ac judiciorum ordinem spectantibus, omnibus non arriserint, potiori tamen parti Patrum placuerunt, quorum suffragiis accedente Innocentii Pontificis auctoritate, sanciti, approbati, atque promulgati fuerunt. Sed demus etiam *Dupino*, reverà *Matthæum Parisium* scripsisse, nullos à Concilio Lateranensi IV. editos fuisse Canones, non tamen illius Scriptoris testimonio suam sententiam fulcire posset *Dupinus*, tum quia *Matthæus Parisius* in ea narratione statim in apertum labitur errorem, asserens sexaginta Capitula, seu Canones lectos fuisse in Concilio Lateranensi IV. cum tamen apud omnes in confesso sit, septuaginta Canones lectos & promulgatos fuisse in hoc Concilio Lateranensi IV. Tum quia etiam testimonium *Matthæi Parisii* præponi haud debet testimoniis probatissimæ fidei omnium Authorum, qui à Concilii Lateranensis IV. temporibus scripserunt, quique septuaginta illos Canones Concilio Oecumenico Lateranensi IV. constanter tribuerunt, eosque velut totius Orbis Christiani consensu editos

tos semper laudarunt. Quod adeò verum est, ut ipsimet Centuriatores Magdeburgenses, quibus, ob doctrinam Transubstantiationis, & Confessionis Sacramentalis, exosa sine dubio fuit Generalis ista Synodus Lateranensis IV. hos tamen septuaginta Canones ab eadem Synodo conditos & approbatos fuisse nunquam negare, aut in dubium revocare ausi sunt, sicut videre est in *Centuria XIII. cap. 9. De Synodis*. Demùm, *Matthæus Parisius* in his, quæ narrat de Romanis Pontificibus, & de doctrina Ecclesiæ Romanæ, nullam meretur fidem, quia prolusit hæreticis nostri temporis, & in Romanos Pontifices petulantis linguæ fuit, sicut facilè colligitur ex his, quæ de *Innocentio III.* qui præfuit Concilio Lateranensi IV. scripsit *Matthæus Parisius* in *Historia minori*, ut refertur in *Antiquitatibus Britannicis* in *Vita Stephani Langthoni*: *Concilium istud Generale* (seu Lateranense IV.) inquit *Matthæus Parisius*, quod more Papali grandia prima fronte præse tulit, in risum & scomma, quo Archiepiscopos, Episcopos, Abbates, omnesque ad Concilium accedentes ludificatus est (seu *Innocentius III.*) desiit. Illi enim, cum jam nihil geri in tanto negotio cerperent, redeundi ad sua cupidi, veniam sigillatim petierunt, quibus Papa non concessit, antequam sibi grandem pecuniam promississent, Mercatoribus Romanis prius accipere mutuum Papæque solvere coacti sunt, antequam discedere Roma potuissent. Papa, jam accepta pecunia, quæstuosum hoc Concilium dissolvit gratis, totusque Clerus abiit tristis. Quæ omnia à veritate historię penitus aliena, & contra *Innocentium III.* & Patres Concilii Lateranensis IV. à *Matthæo Parisio* de industria fuisse conficta certissimè constat. Nec minùs facilè re-

fel

fellitur altera conjectura, quam post *Antonium de Dominis*, & *Joannem Barclajum* adducit *Ellias Dupinus*. Hallucinantur quippè illi Scriptores, dum ea, quæ in hisce Lateranensis Concilii IV. Canonibus laudantur, velut in Concilio Lateranensi IV. constituta fuisse putant, cum potius referenda sint ad Concilium Lateranense III. sub *Alexandro III.* Pontifice Maximo celebratum, cujus plurimas sanctiones Concilium Lateranense IV. sub *Innocentio III.* in Christianæ rei commodum innovandas duxit ac confirmandas. Non igitur *Innocentius III.* post Concilium Lateranense IV. hos septuaginta Canones edidit, ut falsò sibi persuaserunt mox laudati Scriptores, sed Concilium Lateranense IV. nonnullis Decretis, quæ à præcedenti Concilio Oecumenico Lateranensi III. sub *Alexandro III.* in eadem Lateranensi Basilica celebrato condita fuerunt, novum robur per Canones à se confectos addidit, eorumq; executionem imperavit. Unde hæc verba: *In Lateranensi Concilio noscitur fuisse prohibitum, vel in Lateranensi Concilio fuit pia institutione provisum*; hæc, inquam, & alia similia verba, quæ leguntur in aliquibus Canonibus, seu Capitulis, quæ à Concilio Lateranensi IV. condita sunt, innuunt dumtaxat, Concilium IV. Lateranense in suis Canonibus approbasse, & executioni mandari voluisse, quædam Decreta, quæ Conc. Gener. Lateran. III. in Canonibus Concilii Lateranensis IV. citatum jam antehac promulgaverat, sicut clariùs constabit ex his, quæ mox dicturi sumus explicando Canones Concilii Generalis Lateranensis IV.

D. Cum nimis longum esset septuaginta illos Canones à Concilio Generali Lateranensi IV.
con-

conditos hîc attingere, & singillatim explanare, abundè sufficiet præcipuorum Canonum Synopsim subjicere, eosque, si quam difficultatem patiantur, breviter dilucidare.

M. Canon primus Concilii Generalis Lateranensis IV. continet fidem de Sanctissima Trinitate, de rerum omnium creatione, de Verbi divini Incarnatione, & de reali præsentia Corporis Christi in Eucharistiæ Sacramento. Hæc autem Fidei expositio necessaria fuit propter Hæreticos Albigeneses, qui prædamnatos iis de articulis errores innovarunt. Canon secundus damnat libellum Abbatis *Joachimi* contra *Petrum Lombardum*, & insanam atque hæreticam *Almarici* doctrinam. Tertius Canon Excommunicationem & pœnas etiam temporales in Hæreticos decernit, quos Sæcularibus Magistratibus post damnationem tradi jubet, eorumque bona confiscari. Pœnas etiam statuit in Dominos temporales, qui terras suas ab Albigenis hæreseos fœditate purgare neglexerint, eorum Vassallos à fidelitatis Sacramento absolvit, & terras illorum Catholicis occupandas exponit. Circa hunc tertium Concilii Lateranensis IV. Canonem duæ potissimum moventur difficultates, quarum prima est, utrùm Concilium Lateranense IV. pœnas temporales in Hæreticos Albigeneses rectè decreverit? Altera difficultas est, utrùm justum fuerit bellum adversus Albigeneses à *Simone Montisfortis* Comite, & à Principibus Christianis confectum? Ad primam difficultatem respondeo: Patres Concilii Lateranensis IV. jure optimo Albigeneses Hæreticos tradidisse, seu reliquisse Sæculari potestati, pœnis temporalibus puniendos. In eo siquidem con-

contra Hæreticos Albigenſes ſanciendo Canone Patres Concilii Lateranenſis IV. non ſolum ſecuti ſunt doctrinam Sancti *Auguſtini*, qui lib. I. contra duas Epistoſas *Gaudentii*, hæretici Donatiſtæ, & lib. I. contra Epistolam *Parmeniani* itidem Donatiſtæ, & Epistolâ xciii. aliâs xlviii. ad *Vincentium* Donatiſtam, pluribusque aliis in locis, conſtanter docet, Hæreticos Donatiſtas à *Constantino Magno* Imperatore capitali ſententiâ juſtè damnatos eſſe, & legum pœnaliũ, quæ adverſus contumaces Hæreticos à Sæculari poteſtate feruntur, multiplicem fructũ exponit; verũ etiam, Patres Concilii Lateranenſis IV. dum Hæreticos Albigenſes Sæculari poteſtati pœnis temporalibus puniendos tradiderunt, ſecuti ſunt perpetuum Eccleſiæ uſum, quo Imperatores, & Principes Chriſtiani obſtinatos Hæreticos, quos in ordinem Eccleſia redigere minimè poterat, ultimo ſupplicio afficiebant; ſicut conſtat ex benè multis exemplis, quæ paſſim in noſtris Colloquiis in Hiſtoriam Eccleſiaſticam adduximus, & quæ hic ſimul collecta referre non abs re erit. *Theodoſius* & *Valentinianus* Imperatores Manichæos è civitatibus pelli, & ultimo ſupplicio tradi ſanxerunt. *Marcianus*, & *Valentinianus* Imperatores ultimo itidem ſupplicio Eutychianos, & Apollinaristas coërceri debere ſtatuerunt. *Theodoſius* & *Honorius* Imperatores pœnam capitis decreverunt in Donatiſtas. *Juſtinianus* Imperator Manichæos capite plectendos eſſe edixit. *Alexius Comnenus*, Orientis Imperator, *Baſilium*, Hæreticorum Bogomilorum Principem, flammis addici juſſit. *Robertus* Galliarum Rex igne damnavit *Stephanum* & *Liſoium*, alioſque in urbe Aurelianenſi detectos hære-

hæreticos. *Petrus de Bruis* Hæresiarcha in Villa Sancti Ægidii vivus combustus est, & *Arnaldus de Brixia*, alter Hæresiarcha, jussu *Friderici* Imperatoris captus, ad rogam Romæ damnatus est. Ex his luculentissimis exemplis colligere debes primò, Patres Concilii Lateranensis IV. juxta antiquam Ecclesiæ praxim, Albigeneses pervicaces Hæreticos Sæculari potestati pœnis temporalibus puniendos justè tradidisse, nè eorum mortale venenum latius serperet. Secundò, colligere debes, Hæresiarcham *Calvinum* esse malè feriatum nebulonem, quippè qui non solum Fidei Inquisitores, qui in Hæreticos debitis pœnis animadvertunt, *Incendarios* & *Papæ Carnifices* insolentè ac impiè vocat, sed etiam suppliciorum, quibus affecti sunt Calvinistæ, alique Hæretici, eorum Antecessores, Relationem, *Historiam Martyrum* inscribere ausus est; cum tamen, idem ille impudentissimus Hæresiarcha, calidum & frigidum simul ex eodem ore perflans, *Michaëlem Servetum*, Hæreticum, Personarum in Deo distinctionem negantem, & insanabilem, Sæculari Magistratui anno MDLV. tradiderit, cujus sententiâ è medio sublatus est. Errorum etiam *Michaëlis Serveti* refutationem edidit *Calvinus*, in qua multis adversus ipsum rationibus probat, Hæreticos jure gladii coërceri posse, capitisque pœnâ plecti Hæresum Authores ac pertinaces defensores. Sic nefandus ille Hæresiarcha nunquam sibi constabat, sed utroque genu claudicans, modò in hanc, modò in illam, prout sibi conducebat, abripiebatur sententiam.

Ad alteram difficultatem, utrùm videlicet justum fuerit bellum adversus Hæreticos Albigeneses

à *Simone Montisfortis* Comite , & à Principibus Christianis susceptum ? Respondeo , bellum adversus Albigenes confectum fuisse iustissimum , tum , quia Albigenes publicam Deo injuriam irrogabant , Ecclesiæ insultabant , in sacratiora Catholicæ Religionis Mysteria , & in Sacerdotes crudelitatem inauditam exercebant , multasque in Galliarum Regno turbas excitabant , ut videre est in Albigenium Historia corævis ab Authoribus conscripta : tum quia etiam Principes Christiani , præcipuè *Philippus Augustus* , Galliarum Rex , ac *Simon Monfortius* Comes , quos ad illud bellum gerendum meritò adhortatus est *Innocentius III.* Pontifex vigilantissimus , non alium finem sibi in eo bello conficiendo præfixerunt , quàm Hæreticorum emendationem , perduellium punitionem , Religionis , Ecclesiæque defensionem . Quò factum est , ut plam illorum intentionem , bellicque æquitatem Deus pro Catholicis pugnans frequentibus miraculis , quæ ab Authoribus Albigenis Historiæ referuntur , comprobaverit . Suis etiam Ditionibus iustè exutus est *Raymundus* Comes Tolosanus , quia Hæreticis Albigenibus apertè favebat , & *Petrum de Castonovo* , Virum Sanctissimum & Sedis Apostolicæ Legatum , sicariis immisissis , occidi jussit . *Simon* verò *Monfortius* Comes , Crucesignati Dux exercitus , Ditiones *Raymundi* Comitis Tolosani , quas armis occupaverat , jure belli obtinuit , easque electione Episcoporum , necnon Baronum Occitanix & Provincix in Synodo Monspeliensi , Concilii Oecumenici Lateranensis judicio , & Galliarum Regis , qui Comitatus Tolosani principalis Dominus erat , concessione & Investiturâ sibi iustissimè vendicavit .

Dilu-

Dilutis duabus hisce difficultatibus , alios ejusdem Concilii Lateranensis IV. Canones percurramus . Canon quartus damnat, ut superius observavimus, Græcos , qui non prius sacrificare volebant in Altaribus , in quibus Latini sacrificassent , quàm ea lavissent, quique baptizatos à Latinis iterum baptizabant . Quintus Canon de Sedium Patriarchalium ordine agit , jubetque ut post Romanam Sedem , Constantinopolitana primum locum obtineat; Alexandrina secundum ; Antiochena tertium ; & Hierosolymitana quartum . Canon sextus præcipit, ut singulis annis Provincialia celebrentur Concilia à Metropolitanis . Canon undecimus , Concilii Generalis Lateranensis tertii Canonem de Magistris in qualibet Ecclesia Cathedrali instituendis , qui Clericos gratis doceant , jubet observari , sicut in *Lateranensi Concilio pia fuit institutione provisum* , idest in Concilio Generali Lateranensi III. cujus nonnulla Decreta Concilium Generale Lateranense IV. in suis Canonibus confirmavit , eorumque executionem imperavit , sicut jam observavimus contra *Dupinum*, & alios, qui in hac re decepti sunt, non animadvertentes, ea , quæ sub nomine Concilii Lateranensis laudantur in Canonibus conditis à Concilio Generali Lateranensi IV. non esse referenda ad istud Concilium Generale Lateranense IV. sed referri debere ad Concilium Generale Lateranense III. ab *Alexandro III.* Pontifice Maximo convocatum, cujus plurima Decreta Concilium Oecumenicum Lateranense IV. sub *Innocentio III.* habitum in suis Canonibus approbavit , eaque in rem Ecclesiæ executioni mandari præcepit. Canon XIV. Clericos incontinentes puniri jubet . Canon XV.

Clericos à crapula & ebrietate abstinere jubet, eisque venationem, aucupiumque & canes, vel aves ad eum finem alere prohibet. Canon XVI. De Clericorum indumentis decernit, ut in forma & colore modesta sint; ut Ecclesiastici Viri Officia vel commercia sæcularia non exercent; Mimis, jocularibus, & histrionibus non intendant, tabernas prorsus evitent, nisi fortè in causa necessitatis itinerare constituti; ad aleas vel taxillos non ludant, nec hujusmodi ludis intersint, sed in Officiis Divinis, ut par est, & in aliis bonis studiis sese diligenter exercent. Canon XVII. Prælatorum comestiones, confabulationes illicitas, negligentiam in Divinis Officiis & celebratione Missarum sub pœna suspensionis prohibet, eisque districtè præcipit, ut Divinum Officium diurnum pariter & nocturnum, quantum eis Deus dederit, studiosè celebrent & devotè. Canon XXI. qui incipit: *Omnis utriusque sexus fidelis*, jubet primò, ut quisque fidelis, postquam ad annos discretionis pervenerit, omnia sua solus peccata confiteatur, saltem semel in anno, proprio Sacerdoti, & adjunctam sibi pœnitentiam, itudeat pro viribus adimplere. Jubet secundò, ut quilibet fidelis Sacramentum Eucharistiæ ad minus in Paschate reverentè suscipiat. Tertiò, sub pœna depositionis prohibet Sacerdoti, ne signo, vel verbo, vel alio quovis modo, peccata, quæ quis ei confessus fuerit, prodatur. Quis autem nomine *proprii Sacerdotis*, cui, juxta tenorem hujusce Canonis XXI. Concilii Lateranensis IV. annua Confessio fieri debet, intelligendus sit? operosa quæstio est, de quâ diù multumque disputatum est, & etiamnùm disceptatur. Alii quippè nomine *proprii Sacerdotis* solum

lum Parochum intelligendum volunt, quorum sententiam *Joannes Launojus* Doctor Sorbonicus in libro qui inscribitur: *Explicata Ecclesiæ Traditio circa Canonem*: Omnis utriusque sexus, mordicè tenet, ac prolixè probat. Alii nomine *proprii Sacerdotis* Summum Pontificem, Diocesenum Episcopum, & Parochum designari contendunt. Alii denique nomine *proprii Sacerdotis* intelligendos esse putant omnes promiscuè Presbyteros tam Sæculares, quàm Regulares à Romano Pontifice & Episcopo Diocesano ad audiendas Confessiones sine restrictione approbatos. Hanc gravissimam quæstionem magno animarum æstu hinc inde ventilatam, quæ me longiùs abduceret, hìc discutiendam non aggredior, sed solùm inhærendo vestigiis Sancti *Thomæ*, Doctoris Angelici, quo Magistro gloriòsior ac triumpho, quod mihi hac in re veritati magis consonum videtur, breviter aperire non gravabor. Censeo itaque cum Doctore nostro Angelico, nomine *proprii Sacerdotis* intelligendum esse Parochum, salvâ tamen Summi Pontificis in toto Orbe Christiano, & Episcoporum in suis Diocesibus auctoritate, ita ut qui peccata sua semel in anno ipsis vel Presbyteris, sive Sæcularibus, sive Regularibus, quos ad id muneris absque ulla restrictione delegarunt, confessi fuerint, Canon *Omnis utriusque sexus* paruisse ac fecisse satis censendi sint. Et primò quidem, quòd nomine *proprii Sacerdotis* intelligendus sit Parochus, id disertè docet S. *Thomas* in Supplemento 3. partis suæ Summæ quæst. 8. art. 4. ubi inquit, *utrùm sit necessarium, quòd homo confiteatur proprio Sacerdoti?* Respondet S. *Thomas* affirmativè, idque in Argumento secundo *Sed contra* pro-

bat hac ratione: *Sicut Episcopus se habet ad Diœcesim suam, ita Sacerdos ad suam Parochiam, sed non licet uni Episcopo in Diœcesi alterius Episcopale officium exercere secundum statuta canonum, ergo non licet uni Sacerdoti Parochianum alterius audire.* Ex quibus verbis liquet, S. Thomam nomine proprii Sacerdotis intellexisse Parochum, sicut post Sanctum Thomam benè multæ Synodi Nationales, quæ variis in locis fuerunt convocatæ, & quas longum esset hic recensere, eodem planè sensu nomen proprii Sacerdotis acceperunt, pro Parochiali scilicet Presbytero. Secundò, S. Thomas Artic. 5. jam laudatæ quæstionis principalem movet difficultatem, *Utrum aliquis possit alteri, quàm proprio Sacerdoti, confiteri ex privilegio vel mandato Superioris?* Et postquam partem affirmantem probavit, respondens ad objectionem sibi quarto loco propositam, hæc habet: *Nullus tenetur confiteri peccata, quæ non habet, & ideo si aliquis Pœnitentiario Episcopi, vel alteri ab Episcopo commissionem habenti confessus fuerit, cum sint sibi dimissa peccata, & quoad Deum, & quoad Ecclesiam, non tenetur ea confiteri proprio Sacerdoti, quantumcumque petat.* Et infrà: *Bonum est, quòd ille, qui auctoritate Episcopi confessionem audit, inducat consistentem ad hoc quòd confiteatur proprio Sacerdoti: quòd si noluerit, nihilominus eum absolvere debet.* Denique, S. Thomas in Opusculo contra impugnantes Religionem, postquam ostendit, Sacerdotes Regulares ex commissione Episcoporum, & Superiorum Prælatorum esse idoneos ad Prædicationis & Confessionis exercenda officia, inter diluendas sibi propositas objectiones, ad eam, quæ ex Canone XXI. Concilii Lateranensis IV. *Omnis utriusque sexus, petita*

tita est, sic respondet: *Sacerdos proprius non est solum Parochialis, sed etiam Episcopus, vel Papa, ad quos etiam magis pertinet cura ejus, quam ad Sacerdotem, ut multipliciter ostensum est. Proprium enim hic non accipitur, secundum quod dividitur contra commune, sed secundum quod dividitur contra alienum. Unde qui confessus est Episcopo suo, vel alicui habenti vicem ejus, confessus est proprio Sacerdoti. Quo loco innuit S. Thomas, proprii Sacerdotis nomine in Lateranensi Canone ita designari Parochum, ut tamen Summus Pontifex, Episcopi, eorum Pœnitentarii, & quivis Sacerdotes, cum Sæculares, tum Regulares absque restrictione ad excipiendas Fidelium Confessiones approbati, nequaquam excludantur, nec incurrant pœnas Canonis, qui apud ipsos peccata semel in anno deposuerint, immò præcepto Ecclesiæ omninò satisfaciant. Hanc genuinam Sancti Thomæ interpretationem circa sensum Canonis Lateranensis, *Omnis utriusque sexus*, approbaverunt Romani Pontifices, quotquot fuerunt à tempore Gregorii IX. ad nostra usque tempora, ut liquet ex eorum Constitutionibus, in quibus concedunt Religiosis Mendicantibus licentiam absque ulla limitatione audiendi Confessiones Fidelium, jubentque Episcopis, ut eos ad id muneris obeundum benignè suscipiant. Inter illos Romanos Pontifices, Joannes, dictus vigesimus secundus, damnavit in Extravaganti *Vas electionis*, anno mcccxxi. Joannem de Poliacio Theologum Parisiensem, quòd assereret, Confessiones Sacerdotibus Religiosis factas iterandas esse Parocho, neq; Pontificem Sacerdotibus Regularibus dare posse facultatem, ut Fideles tempore Paschali alteri, quàm Ecclesiæ suæ Parocho,*

confiterentur. Eisdem *Joannis de Poliac* errores, quos nonnulli anno millesimo quadringentesimo nono vindicare, ac mordicus defendere temerario ausu præsumebant, *Alexander V.* confixit Diplomate, quod incipit: *Regnans in excelsis &c.* Sed hæc ad veram assequendam intelligentiam hujus Canonis Lateranensis, *Omnis utriusque sexus*, breviter dicta sufficiant. Consule, si plura desideres, *Natalem Alexandrum* Dissertatione IV. in *Historiam Ecclesiasticam* Sæcul. XIII. & XIV. *De sensu Canonis, Omnis utriusque sexus.*

Alii Canones, qui conditi sunt in Concilio Generali Lateranensi IV. pertinent vel ad inhibendam simoniam, quæ tùm in dispensandis Sacramentis, tùm in conferendis Beneficiis, tùm in Monialibus ad Monasterium admittendis committi solebat; vel ad judiciorum Ecclesiasticorum formam spectant; quorum omnium explicationem, ut brevitati studeam, hîc non trado. Hoc unum dumtaxat te monitum velim, nempe in Jure Canonico, quotiès sine addito Concilium Generale laudatur, intelligi Concilium Lateranense IV.

D. Quandònam, à quo, & quibus de causis indictum est Concilium Generale Lugdunense primum?

M. Concilium Lugdunense I. quod est inter Oecumenica decimum tertium, anno MCCXLV. die Lunæ proximæ post Festum Nativitatis S. *Joannis Baptista* cæptum est Lugduni in Galliis apud Aedes Monachorum S. *Jussi*. Ei præfuit *Innocentius IV.* Pontifex Maximus, à quo fuit convocatum. Adfuere etiam, præter Cardinales, qui, jam purpurati, novum in hoc Concilio ex rubri pilei Insigni honorem

norem susceperunt, tres Patriarchæ Latini, Constantinopolitanus, Antiochenus, & Aquilejensis, centum & quadraginta Episcopi, *Baldwinus* hujus nominis II. Constantinopolitanus Imperator Latinus, & Regum Galliæ, Angliæ, aliorumque Principum Oratores. Ad istud Concilium citatus *Fridericus II.* Imperator, ut in eo causam diceret, venire renuit malè sibi conscius, Legatos suos tamen misit, quorum præcipuus fuit *Thadæus de Sueffa* Imperialis Cameræ Judex, Vir Belli, Jurisque peritissimus; & eloquentiæ vehementis. Peractis sollemnibus cærimoniis, quæ in his sacris cætibus actitari solent, *Innocentius IV.* peroravit in hæc verba: *O vos omnes, qui transitis per viam, attendite, & videte, si est dolor sicut dolor meus, & in ea Oratione* quinque protulit causas, quibus permotus fuerat ad istud celebrandum Concilium. Potissima causa, quæ huic convocando Concilio occasionem dedit, fuit dura illa persecutio, quâ *Fridericus II.* Imperator jam à multis annis Ecclesiam miserum in modum divexabat. Ille siquidem ingratus ac impius Princeps, quem à tenera ætate parente suo *Henrico* inter Imperatores hujus nominis V. orbatum, & multis civilibus Bellis lacessitum in suam tutelam susceperat *Innocentius III.* Pontifex Maximus, ei Apuliæ Siciliæque Regnum conservaverat, aditumque ad Imperium munierat, depulso in ejus gratiam *Othone*, qui quartus hujus nominis fuerat inauguratus Imperator; ille, inquam, ingratus ac impius Princeps non modò tot beneficiis, quibus Sedi Apostolicæ erat devinctus, gratiam nullam rependit, sed etiam, ut in Colloquiis primo & secundo observavimus, arma, quæ ex voto con-

con-

contra Saracenos ad Sacra Palæstinæ loca recuperanda conferre tenebatur, in Romanos Pontifices convertit. Graves cum *Innocentii III.* successoribus *Honorio III.* & *Gregorio IX.* similitudines aluit, & immanes concepit iras, præsertim adversus *Gregorium IX.* qui eum anathemate perculerat, quod Exercitum Christianum in Syriam ducens, turpem cum Sultano pactiōem iniisset, indèque reversus in Occidentem, complures Ecclesiæ Romanæ terras, quæ proditiōibus, quæ Marte aperto invasisset, totamque Italiani armis depopulatus esset, excitatâ in hoc ipsum Factione Gibellinorum, qui ei adhærebant, contra Guelphos, qui Romani Pontificis defensionem susceperant; ex qua Gibellinorum, & Guelphorum factione, in acerrima odia, mutuò exardescente, innumeræ clades, direptiones, captivitates, incendia, omnesque hostiles & barbaricæ immanitates totâ Italiâ impunè grassatæ sunt. Quin, eò usque processit *Friderici* Imperatoris in *Gregorium IX.* furor, ut non solum litteras adversus Sanctissimum illum Pontificem calumniis, probris, ac minis refertas scripserit, sed etiam, teste *Matthæo Parisio* in Historia Anglicana, hos versiculos sparserit, & in cubiculum Pontificis immitti curaverit:

*Fata docent, stellaque monent, aviumque volatus,
Totius Mundi melleus unus erit.*

*Roma diu titubans, variis erroribus acta,
Totius Mundi desinet esse caput.*

His Imperatoris versiculis Pontificem hocce Disticho respondisse scribit idem *Matthæus Parisius*:

*Fama refert, scriptura docet, peccata loquuntur,
Quòd tua vita brevis, pœna perennis erit.*

Tot

Tot diris ac luctuosis malis , quibus id temporis premebatur Ecclesia , ut occurreret atque præsentissimum afferret remedium *Gregorius IX.* & nefarios furentis Imperatoris saltem ex parte reprimeret ausus , Generale Concilium anno MCCXL. Romæ indixit , quod tamen celebrare non potuit , quia Episcopi , qui ex Gallia , & Hispania cum ali- quibus Cardinalibus Genuensium triremibus vecti ad illud accedebant , à *Friderici* Imperatoris classe Ditionis Pontificiæ terras infestante capti sunt , & ad Imperatorem perducti , cujus iussu fuerunt carceribus mancipati , ut constat ex litteris Præsulum , qui è clade evaserunt , ad *Gregorium IX.* & ex Epistolis consolatoriis ejusdem *Gregorii* Pontificis ad ipsos , quas in Annalibus Ecclesiasticis describit *Odoricus Raynaldus* . Eo , de tam gravi & infausto Episcoporum , Cardinaliumque casu , accepto nuncio , *Gregorius IX.* paulò post præ animi dolore excessit è vita , eique successit *Cælestinus IV.* qui post septemdecim dies ab electione sua è vivis itidem ereptus est . Tandem *Innocentius IV.* successor *Cælestini IV.* statim ac ad supremum evectus est Pontificatus culmen , de concordia Sacerdotum inter & Imperium ineunda seriò cogitavit , missis ad Imperatorem Legatis , qui postularent , ut Præsules , qui pugnâ navali capti , iniuste ab ipso detinebantur , libertati restituerentur , aliasque æquissimas ei proponerent pacis conditiones . *Fridericus* Imperator oblatas sibi à Legatis Summi Pontificis conditiones pacis se observaturum promisit per suos Oratores , quos ad Sedem Apostolicam de pace tractaturos misit . At superbum , infidum , versipellem , sibi non constantem Principem , pro-

missio-

missorum, pactorumque brevi pœnituit. Cùm igitur *Fridericus*, depositâ pœnitentiæ larvâ, insolentius se gereret, ac nulla superesset spes conciliandæ pacis, *Innocentius IV.* propositum & mentem *Gregorii IX.* secutus, Concilium Generale ad reprimendam *Friderici* temeritatem convocare decrevit. Sed quia difficile admodum erat illud Romæ celebrare, cùm tota Italia bellorum ac seditionum, motibus tum temporis jactaretur, Summus Pontifex structas à *Friderico* insidias fugiens, annuente Sanctissimo Rege *Ludovico IX.* in Gallias, tutissimum Romanorum Pontificum azylum, sese recepit, ubi ad celebrandum Concilium, Lugdunum, urbem clarissimam, delegit. Hæc igitur persecutio, quâ *Fridericus II.* Imperator diù vexavit Ecclesiam, potissima causa fuit convocandi istud Concilium, Lugdunense primum.

D. Hæc mota in Ecclesiam à *Friderico II.* Imperatore persecutio, fuitne sola causa convocandi Concilium Generale Lugdunense primum?

M. Præter hanc persecutionem, quâ *Fridericus* Imperator exagitavit Ecclesiam, quæque celebrando Concilio Generali Lugdunensi primo occasionem dedit, alias quatuor hujus Concilii convocandi causas recitat *Innocentius IV.* in Oratione, quam in ipso Concilio habuit, & in litteris, quibus Episcopos ad illud Concilium evocavit. Una ex his causis fuit necessitas ferendi subsidium Orientalibus Christianis adversus Saracenos, qui, captâ Hierosolymorum urbe, præsentem ruinam toti populo fidei minabantur, nec non extremam Imperio Constantinopolitano cladem, cujus tunc Latini vix reliquias tuebantur; conspirantibus ad-

ver-

versus ipsos Græcis, finitimisque barbaris, sublata omni spe obtinendi subsidium, propter continua bella, quibus *Fridericus* Imperator Occidentem distinebat, & omnia in Ecclesia suis dequæmiscebat. Alteram causam celebrandi Concilium Generale Lugdunense I. præbuit funesta illa Tartarorum irruptio, quæ iis temporibus Christianæ Reipublicæ incubuit. Gens quippè Tartarorum, armis furens, devastatâ primum, instar torrentis rapidissimi, utrâque Armeniâ, deindè direptis quæ inter Maria Caspium & Euxinum interjacent Provinciis, Georgianorum, & Mengrelinorum, Moscoviam, Poloniam, Transylvaniam, & Hungariam cædibus & incendiis populata est. Tertia causa, convocationis istius Concilii Generalis Lugdunensis primi fuit Schisma Græcorum, quod in dies augebatur. Quarta tandem causa fuit excessus Prælatorum ac Clericorum, qui mores non exigebant ad Sacrorum Canonum regulas. Diutina siquidem bella, & pullulantes ubique factiones in causa fuerant, cur collapsa esset Ecclesiastica Disciplina, moresque Clericorum in graviora quotidie vitia dilaberentur. Ad hanc igitur tollendam morum perversitatem, & ut Ecclesia pristinum, qui jam penè obsoleverat, dignitatis splendorem recuperaret, hoc Concilium Oecumenicum Lugdunense primum convocavit *Innocentius IV.* Pontifex Maximus.

Fuitne diù prorogatum Concilium Generale Lugdunense primum?

M. Brevi temporis spatio, & Actionibus, seu Sessionibus tribus absolutum est hoc Concilium Generale Lugdunense primum. Prima Actio, seu Sessio

Sessio habita est quarto Kalendas Julii anni MCCXLV. Altera post elapsos dies octo, & tertia, eaque postrema, paulò post, hoc est, XVI. Kalend. Augusti celebrata fuit. His tribus Sessionibus finis impositus est Concilio Generali Lugdunensi primo.

D. Expone, quæso, uberius ea quæ acta sunt in tribus illis Sessionibus Concilii Generalis Lugdunensis primi.

M. In priore Sessione conquestus est *Innocentius IV.* de Prælatorum excessibus. Infelicem Christianorum tum in Oriente, tum in Septentrione, statum exposuit, multaque dixit de sæviante *Friderici* Imperatoris in Ecclesiam persecutione, quamvis *Thadæus* procurator *Friderici*, ut Summi Pontificis, & Ecclesiæ gratiam magnificis promissis Domino suo conciliaret, multa statim in ipso Concilii limine spondidisset, videlicet *Fridericum* ereptas Ecclesiæ Romanæ ditiones redditurum, & pro illatis damnis, irrogatisque injuriis, facturum satis, Græcorum Imperium ad obedientiam Ecclesiæ reducendum, Tartaros, & Saracenos propriis sumptibus impugnaturum, & profligatas Terræ Sanctæ res pristino splendori restituturum. At, cum montes aureos *Fridericus* Imperator per suum Procuratorem *Thadæum* polliceretur, ut Ecclesiæ illuderet, ejusque judicium declinaret, tam splendidis promissis Imperatoris, qui toties sefellerat, stare minimè voluit *Innocentius IV.*

In Actione secunda Summus Pontifex *Friderici* Imperatoris sacrilegia, tyrannidem, censurarum Ecclesiæ contemptum, initum cum Saracenis foedus, & impudici cum Saracenis mulieribus amoris commercia, perjuria, aliaque scelera oculis

lis Patrum subjecit, quæ omnia *Thadæus*, Procurator *Friderici*, utcumque diluere conatus est, sed cum objecta crimina infirmâ defensione repelleret, inducias petiit, ut Dominum suum de his, quæ in Concilio gerebantur, certiorum faceret. Regis Christianissimi, & Regis Anglorum Oratoribus preces *Thadæi* commendatione suâ sustentantibus, concessæ ei sunt duarum Hebdomadarum induciæ. Sed monitus *Fridericus* Imperator, & in furorem actus Pontificem & Patres Concilii diris devovit, iudicesque recusavit. Quo responso ad Concilium perlato, multi, qui à *Friderico* stabant, ab ejus partibus recesserunt, & Patres Concilii, præsertim Hispaniæ Episcopi, contenderunt in *Fridericum*. Imperatorem animadvertendum esse secundum formam juris.

In tertia & ultima Sessione *Innocentius IV.* sententiam in *Fridericum* Imperatorem, sacro præsentem Concilio, tulit, quâ illum damnavit, è Fidelium communione deiecit, & Imperii dignitate atque Siciliæ Regno privavit. In eâ autem *Innocentii IV.* adversus *Fridericum* sententia singillatim recensentur scelera & sacrilegia, quorum impius ille Imperator fuit insimulatus; nempe declaratur reus violatæ pacis inter Ecclesiam & Imperium initæ; Sacrilegii in captione & violenta detentione Cardinalium, & aliorum Antistitum, qui ad Concilium à *Gregorio IX.* Romæ indictum proficiscebantur; Pontificiæ Authoritatis famosis in *Gregorium IX.* epistolis læsæ; invasionis patrimonii Sancti Petri; contemptus censurarum, quibus à *Gregorio IX.* fuerat innodatus; Ecclesiæ in sacris præsertim electionibus oppressæ; tyrannidis in Clericos, quos quel-

la subire coegerat; denique frustratæ Ecclesiæ Romanæ censu debito pro Regno Siciliæ, quod ab Ecclesia Romana Beneficiario jure tenebat. Has ob causas *Innocentius IV.* Pontifex Maximus, sententiam in *Fridericum* Imperatorem tulit.

D. Quo animi sensu hanc in se latam sententiam excepit *Fridericus* Imperator?

M. Furibundo animo hanc in se latam sententiam excepit *Fridericus* Imperator, quippè qui statim ac de ea certior factus est, coronam capiti imposuit, & Pontifici insultans: *Non adhuc, inquit, coronam meam perdiidi, vel Papali impugnatione, vel Synodali Concilio, nec sine cruento perdam certamine.* His dictis, arma corripuit, gravissima damna Pontifici & Ecclesiæ intulit, Principes contra Romanum Pontificem commovere conatus est, datis ad eos Encyclicis litteris, & quamvis Germaniæ Principes, post ejus exauctorationem, novum Imperatorem *Henricum Lantgravium* de mandato Romani Pontificis elegerint, sese tamen, quamdiù vixit, Imperatorem gessit, hincque factum est, ut Principes ac populi in diversas factiones abierint, ex quibus innumeræ clades & calamitates in Rempublicam Christianam redundarint usque ad mortem perduellis illius Imperatoris, qui tandem à Longobardis, qui in ipsum rebellarant, prælio victus, profugus in Siciliam secessit, & anno mccc. in Arce quadam Apuliæ obiit, morte ipsi illatâ à *Manfredo*, proprio suo, sed illegitimo filio, quem, pulvinari ori ægrotantis *Friderici* imposito, suis manibus illum suffocasse, asserunt *Ptolomæus Lucensis*, *Martinus Polonus*, *Villanius*, *S. Antoninus*, & *Cuspinianus*.

D. Edi-

D. Ediditne Concilium Generale Lugdunense primum aliquot Canones ad sancierendā Ecclesiæ disciplinam?

M. Septemdecim Canones, seu Decreta, condidit Concilium Generale Lugdunense I. quorum duodecim priora consulunt formæ Judiciorum Ecclesiasticorum. In aliis verò sequentibus agitur de cohibenda usura, de subsidio ferendo periclitanti Latinorum Imperio Constantinopolitano, de impediendis Tartarorum excursionibus, de Cruciatibus, hoc est, de iis, qui acceptâ cruce profectio- nem in Palæstinam voverant, quos censuris Ecclesiasticis, ipsâ etiam excommunicatione, cogi debere statuit sancta Synodus, ut votum suum in Terræ Sanctæ subsidium fidelitèr exequantur. Multa Decreta ex his septemdecim, quæ à Concilio Lugdunensi primo condita sunt; *Bonifacius* Papa VIII. inseruit in libro sexto Decretalium, eaque juxta Ordinem, quem eadem in libro sexto Decretalium sub diversis titulis habent, refert *Joannes Cabassutius* Cong. Oratorii Presbyter in *Notitia Ecclesiastica*, ad Sæculum Ecclesiæ decimum tertium, pag. 451. & seqq. ubi etiam nonnullas omissiones supplet, quæ *Binii*, Conciliorum Collectoris, diligentiam effugerunt. Testatur *Matthæus Parisius*, quòd cum hæc Decreta, seu Statuta ad notitiam audientium pervenissent, in conspectu omnium Sapientium placuerunt, & in hoc tam favorem, quàm gratiam Dominus Papa promeruit universorum. Verumtamen quadam eorum ante Concilium, quadam durante Concilio, quadam verò post Concilium sunt Statuta. Denique, in Concilio Generali Lugdunensi primo Octava Nativitati Beatæ Mariæ Vir-

Tom.V. T ginis

ginis decreta est, ad implendum votum à Cardinalibus emissum eo tempore, quo, post *Cælestini IV.* Romani Pontificis obitum, vacabat Sedes, & plus nimio retardabatur futuri successoris electio, eò quòd aliquot Cardinales à *Friderico II.* Imperatore capti, in carcere Amalphitano iniuste detinerentur, sicut observavimus in Colloquio secundo.

D. Duo Concilia Oecumenica Lugduni in Galliis Sæculo Ecclesiæ decimo tertio celebrata memorasti, & de primo, quod habitum est anno MCCXLV. satis hætenus disseruisti; nunc itaque continenti ordine Concilii Generalis Lugdunensis secundi convocationis Epocham, causam, Præsidem, numerum Patrum, Acta, & Canones breviter per-
censere debes.

M. Concilium Generale Lugdunense II. quod est inter Oecumenica XIV. convocatum fuit à *Gregorio X.* Pontifice Maximo anno MCCLXXII. quod tamen post biennium, hoc est, anno MCCLXXIV. celebratum est Lugduni in Galliis in Basilica Principe S. *Joannis* die VII. mensis Maii ejusdem anni. Ei præfuit *Gregorius X.* Quod enim duo Summi Pontifices *Sixtus IV.* & *Sixtus V.* ajunt, S. *Bonaventuram* Episcopum & Cardinalem, huic Concilio Generali Lugdunensi secundo præsedisse, sic intelligi debet, ut in vita S. *Bonaventuræ* observat *Galestinus*, quòd ei Summus Pontifex curam dirigendi Concilii commiserit, providendi nimirum quæ in eo essent proponenda. Nemo quippè dicet unquam, *Bonaventuram*, præsentem Romano Pontifici, loco, & ordine primas in Concilio tenere potuisse. Præter Patriarchas Orientis Latinos Constantinopolitanum, & Antiochenum, adfuere huic
Con-

Concilio quingenti Episcopi, septuaginta Abbates, Prælati inferiores mille, sicut testatur noster *Ptolomæus Lucensis* Scriptor Coævus lib. xxiii. *Historiæ Ecclesiasticæ* Cap. iii. Ad illud etiam accesserunt Oratores Regum Galliæ, Germaniæ, Angliæ, Siciliæ, & Tartariæ. Ineunti Concilio interfuit *Jacobus* Rex Aragoniæ, sed post secundam Sessionem discessit. Falluntur autem nonnulli Scriptores, quos inter censentur *Blondus*, *Trithemius*, *Platina*, *Vossius*, & alii, qui asserunt, *Michaëlem Palæologum*, Græcorum Imperatorem, ad Concilium Lugdunense II. venisse. Certissimè siquidem constat, *Michaëlem Palæologum* misisse dumtaxat ad Concilium Lugdunense II. suos Oratores, qui totum conciliationis Ecclesiæ Græcæ cum Latina negotium peragerent, & initam pacem ejus nomine jurarent. Quod, ut clariùs intelligas, observare debes, quòd *Michaël Palæologus*, postquam, devictis in Oriente Latinis, Urbem Constantinopolitanā an. mccc. lxi. recepisset, & Imperium Constantinopolitanum ad Græcos revocasset, ingruentem sibi cum exercitu *Carolus*, Siciliæ Regem, valdè pertimescens, Romanum Pontificem in suas partes trahere studuit, adeoque utriusque Ecclesiæ Græcæ & Latinæ unionis negotium sæpius propositum sine mora promoveri decrevit. Quocircà, cum *Gregorius X.* Generale Concilium Lugdunense II. convocaret, Oratores suos illuc destinavit, quorum precipui erant *Germanus* quondam Patriarcha, *Theophanes* Nicænus, *Joannes*, frater Imperatoris *Michaëlis Palæologi* & *Georgius Acropolita*, quibus utriusque Ecclesiæ Græcæ & Latinæ fœdus sancienti curam commisit, sicut testatur *Nicephorus Gre-*

goras lib. v. *Historiæ* his verbis: Proinde, inquit, tot difficultatibus circumventus Imperator (Michael Palæologus) penè ad desperationem compulsus, Legatos ad Papam mittit de ineunda Veteris & Novæ Romæ Ecclesiarum concordia, modò Caroli expeditionem averteret. Ea legatio à Pontifice benignè audita est. Ea se facile, quæ Imperator petivisset, consecuturum esse pollicetur &c. Porro, si huic Concilio Lugdunensi II. adfuisset Michael Palæologus Græcorum Imperator, quorsùm igitur ille Imperator Legatos ad hoc Concilium misisset, qui ejus nomine pacem Ecclesiæ Græcæ cum Latina jurarent? quorsùm, etiam Litteræ ejusdem Imperatoris, à suis Legatis delatæ, lectæ fuissent in hoc Concilio? Quorsùm, denique Gregorius XI. post istud Concilium Lugdunense ad Michaelē Palæologum litteras scripserat, quò eum certiolem faceret de his omnibus, quæ in sacro illo cætu gesta fuerant, & potissimùm de summa illa & incredibili lætitia, quâ omnes Prælati hujusce Concilii, ob initam Ecclesiæ Græcæ cum Latina concordiam, perfusi sunt. Hæc, ni mea me fallat mens, apertè probant, Michaelē Palæologum Græcorum Imperatorem non adfuisse Concilio Generali Lugdunensi II. Præter Patriarchas, Episcopos, & Abbates, vocavit ad istud Concilium Gregorius X. Viros duos doctrinâ & sanctitate celeberrimos, omnique exceptione majores, Thomam Aquinatem, & Bonaventuram, quorum Prior, scilicet S. Thomas, Doctor Angelicus, cum ad Concilium pergeret, in Monasterio Fossæ Novæ lethali ægitudine correptus, ad vitam migravit immortalem, magnumque sui reliquit desiderium. Sanctus vero Bonaventura, Doctor Seraphicus, in ipso

ipso Lugdunensi Concilio Cardinalis , & Episcopus Albanensis creatus est , cujus mors , quæ ante finem Concilii contigit , omnes Patres gravi mœrore affecit .

Præcipua causa convocandi istud Concilium Lugdunense II. fuit Ecclesiæ Græcæ cum Latina conjunctio, & Catholicorum Dogmatum adversus Græcorum Schismaticorum errores confirmatio . Ad istud siquidem maximi momenti conficiendum negotium suos legatos *Michaël Palæologus* , Græcorum Imperator , miserat ad Concilium , in quo tamen nullæ de Processione Spiritus Sancti, aut de aliis Græcos inter & Latinos controversis capitibus disputationes habitæ sunt, eò quòd de jis jam satis superque tractatum esset Constantinopoli à quatuor Fratribus Minoribus , quos *Gregorius X.* ante Concilium miserat ad *Michaëlem Palæologum* cum Formula Fidei, quam ipse cum suo Patriarcha Constantinopolitano , & Episcopis , Cleroque Ecclesiæ Græcæ profiteri deberet . Post Legatorum *Michaëlis Palæologi* Græcorum Imperatoris adventum , Summus Pontifex Missam solemnem celebravit , in qua Symbolum Græcè & Latinè decantatum est , illaque verba : *Qui à Patre Filioque procedit* , ter à Græcis repetita sunt . Imperatoris *Michaëlis Palæologi* litteræ , quæ lectæ sunt in quarta Sessione hujus Concilii, amplam Fidei professionem, juxta Formulam Fidei ab Apostolica Sede ipsi præscriptam , atque inter alia , Processionem Spiritus Sancti ex Patre Filioque , Purgatorii pœnas , & Romani Pontificis Primatum continebant , in fine autem postulabat *Michaël Palæologus* Imperator, ut Symbolum à Græcis , adjunctâ voce , *Filioque* , im-

mutari non juberetur: *Ut Ecclesia nostra dicat Symbolum*, inquit, *prout dicebat ante Schisma*, usque in *hodiernum diem*. Huic exoptatissimæ concordix Græcos inter & Latinos in Concilio Generali Lugdunensi II. initæ *Josephus* Patriarcha Constantinopolitanus, qui Latinis erat infensus, & eâ de causa ab Imperatore *Michaële Palæologo* Constantinopoli detentus & ad Concilium venire prohibitus fuerat, assensum præbere pertinaciter detrectavit, unde, in ordinem redactus est ab eodem Imperatore, & in ejus locum *Joannes Beccus*, seu *Veccus*, vir summâ pollens integritate & eruditione subrogatus est, qui, ut jam diximus in Colloquio II. agendo de Patriarchis Constantinopolitanis, coegit frequentem Episcoporum Synodum, in qua confirmavit omnia, quæ gesta ac definita fuerant in Concilio Generali Lugdunensi II. Complures verò Græcorum reconciliationem cum Latinis obstinatiùs detestati, carceribus, plagis & exiliis, ac tandem in Synodo altera communionis privatione multati sunt. Irridendi itaque potius, quàm confutandi sunt Græculi quidam, quos fingere non puduit, Concilium Lugdunense sub *Michaële Palæologo* Imperatore celebratum in partes Græcorum abiisse, & dogmata Latinorum condemnasse. Quam fabulam ab ipsis malè confarcinatam refert, eâdemque operâ refellit *Joannes Plusiadenus*, Dialogo de Synodo Florentina, apud Leonem Allatum libro secundo de perpetuo consensu utriusque Ecclesiæ cap. xv.

Præter hanc coniunctionem Ecclesiæ Græcæ cum Latina, duæ aliæ fuerunt convocandi Concilium Generale Lugdunense II. causæ, videlicet subsidium Terræ Sanctæ, & Ecclesiasticæ Disciplinæ,
mo-

morumque tum Cleri, tum plebis Christianæ re-
 formatio. Infra tres menses Concilium istud
 sex Sessionibus absolutum est. Pontifex, Cardina-
 les, & Episcopi polliciti sunt, se daturus decimas
 omnium proventuum Ecclesiasticorum pro belli
 Hierosolymitani subsidio, & ad Disciplinæ Eccle-
 siasticæ, morumque reformationem Canones, seu
 Constitutiones xxxi. ediderunt, quas deinde *Bo-
 nifacius* Papa VIII. in libro sexto Decretalium col-
 legit. Inter illas xxxi. Constitutiones, quæ à *Gre-
 gorio X.* sacro approbante Concilio Generali Lug-
 dunensi II. conditæ sunt, tres, quas hic breviter
 expendemus, sunt magni momenti. In prima Con-
 stitutione definitur, Spiritum Sanctum à Patre &
 Filio procedere, tanquam ex uno, non autem tan-
 quam ex duobus Principiis. Qua de re leges do-
 ctissimam Dissertationem Critico-Historicam *De
 Processione Spiritus Sancti*, quæ prima est inter Dis-
 sertationes Damascenicæ, quas eruditus noster
Michaël Lequien præfixit castigatissimæ, quam nu-
 per adornavit, Editioni Operum S. Damasceni. In
 secunda Constitutione, seu Canone secundo præ-
 scribitur modus, quo Cardinales, defuncto Sum-
 mo Pontifice, sese in Conclavi gerere, & Ponti-
 ficis electionem accelerare debent, ita ut si infra
 tres dies Pontifex electus non fuerit, unum dum-
 taxat ferculum tam in prandio, quàm in cæna, quin-
 que diebus sequentibus illis ministretur. Quibus
 elapsis, nihil ipsis obsonii, præter panem, vinum
 & aquam porrigatur, donec electio consummetur.
 Adhæc, Cardinales vehementer obsecrat & obte-
 statur *Gregorius X.* ut omni privato affectu, par-
 tiumque studiis depositis, & cujuslibet passionis,

conventionis, & obligationis vinculo soluti, publicam dumtaxat Ecclesiæ utilitatem in Summi Pontificis electione præ oculis habeant, & pro virili procurare studeant. Ea de Electione Romani Pontificis Constitutio revocata quidem fuit à Summis Pontificibus *Hadriano V.* & *Joanne dicto XXI.* sed postea renovata est à *Cælestino V.* & à *Bonifacio VIII.* relata in sextum Decretalium librum titulo *De electione & electi potestate cap. Ubi.* In duodecima Constitutione, seu Canone XII. damnantur excommunicatione ipso facto incurrendâ hi, qui *Regalia* de novo usurpare conantur, & omnes, qui hæc fieri procurant. Nomine autem *Regalium* intelligitur quoddam Jus, quod aliqui Reges sibi vendicant fruendi redditibus Ecclesiæ vacantis, & conferendi Beneficia curam animarum non habentia, quæ ab Episcopo conferri solent, donec novus Episcopus Juramentum fidelitatis Regi præstiterit, Investituram bonorum Ecclesiasticorum ab eo acceperit, ac Regias litteras, Sacramenti sui testes, impetraverit, quibus manum Regiam temporalibus bonis injectam auferri jubeat. Cum autem hæc *Regalia* cederent in damnum Ecclesiarum, novamque illis imponerent servitutem, Concilium Lugdunense II. sub pœna excommunicationis ipso facto incurrendæ prohibuit, ne quis deinceps *Regalia* usurpare conaretur, ut legitur in isto Canone XII. his verbis concepto: *Generali Constitutione sancimus, universos & singulos, qui Regalia, custodiam, sive guardiam advocacionis, vel defensionis titulum in Ecclesiis & Monasteriis, sive quibuslibet aliis piis locis de novo usurpare conantes, bona Ecclesiarum, Monasteriorum, aut locorum ipsorum vacan-*
tium

tium occupare præsumunt, quantacumque dignitatis honore præfulgeant, Clericos etiam Ecclesiarum, Monachos Monasteriorum, & personas cæteras locorum eorumdem, qui hæc fieri procurant, eo ipso excommunicationis sententia subicere. Clericos, qui Regalia de novo usurpantibus sese non opposuerint, privat idem Canon proventibus earum Ecclesiarum aut Locorum, in quibus Regalia de novo usurpantur: illos verò Clericos, qui se, ut debent, talia facientibus non opponunt de proventibus Ecclesiarum, seu locorum ipsorum, pro tēpore, quo præmissa sine debita contradictione permiserint, aliquid percipere districtius prohibemus. Jubet tandem idem Canon, ut hi, qui ab ipsarum Ecclesiarum, cæterorumque locorum fundatione, vel ex antiqua consuetudine, jura sibi hujusmodi vindicant, ab illorum abusu sic prudenter absterneant, & suos Ministros in eis sollicitè faciant abstinere, quòd ea, quæ non pertinent ad fructus sive redditus provenientes vacationis tempore, non usurpent, nec bona cætera, quorum se asserunt habere custodiam, dilabi permittant, sed in bono statu conservent. Ex quo Canone colligitur, quòd licèt Concilium Lugdunense II. Regaliam, quam vocant, non damnaverit, quoad illa loca, in quibus constabat, eam non fuisse contra jus usurpatam, sed antiquo usu firmatam & receptam esse; reprobavit tamen nonnullos abusus, qui in eam irrepserant, & districtè prohibuit, ne quis deinceps Regaliam de novo usurpare præsumeret, aut eam extenderet ad Ecclesias, Monasteria, & in loca, in quibus ante istius Decretum Synodi hæc consuetudo non erat recepta.

D. Mittamus, si placet, istud Regalia negotium, & post eam, quam jam prælibavimus, notitiam

ticiam Conciliorum Generalium , quæ sæculo Ecclesiæ decimo tertio fuerunt celebrata , veniamus ad Concilia Nationalia , & ab his incipiamus , quæ eodem sæculo ad exterminandam Albigenſium hæreſim habita eſſe , meminĩ te obſervare in ſuperiori ſæculo , ſeu Eccleſiæ duodecimo , ubi Hiftoriam Hæreſis Albigenſium deſcripſiſti .

M. Cùm peſtilentiſſima Albigenſium hæreſis , naſta ſæculo Eccleſiæ decimo tertio *Raymundi* Comit̃s Tolofani patrociniũ , impunè graſſaretur , & innumeras Eccleſiæ clades inferret , ad eam proſtigandam indiſtum eſt Sacrum Bellum , de quo in præcedenti Colloquio ſat egimus , & complura habita ſunt Concilia , quæ hic breviter indicabo . In primis , anno mcccviii. injuſtè & per ſummam immanitatem occiſo ad Rhodanum in Galliis uno ex tribus Legatis à Sede Apoſtolica miſſis, *Petro* videlicet de *Caſtro novo* , juſſu *Raymundi* Comit̃s Tolofani , eo ſolo nomine , quòd Sanctiſſimus ille vir conſtanti & impavido animo ei improperaſſet protectionem , quã Hæreticos Albigenſes , quorum fautor ac deſenſor erat , dignabatur , ſicut ſcribit *Petrus de Valle Cernaii* cap. ix. *Hiſtoriæ Albigenſium* , ad hanc dijudicandam *Raymundi* Comit̃s Tolofani cauſam indiſtum eſt à *Milone* , Sedis Apoſtolicæ Legato , Concilium *Montilenſe* anno mcccix. in quo *Milo* ſecutus conſilia Episcoporum , *Raymundo* Comiti Tolofano , qui ſimulatã pœnitentiã , Oratores ad *Innocentium III.* miſerat , ut ipſius nomine ſummam in omnibus Pontifici promitterent obedientiam , diem dixit , & ut apud Valentiam coram Partibus ſeſe liſteret , juſſit . Comparuit ſtatã die *Raymundus* Comes Tolofanus , cùmque ingen-

tem

tem sacri belli formidaret apparatus, promisit se in omnibus voluntati *Milonis* Sedis Apostolicæ Legati obtemperaturum. Quin, in pignus obstrictæ fidei septem Provinciæ Castra tradidit, consensitque, ut nisi promissa juramento firmata executioni mandaret, septem Castra in commissum Ecclesiæ Romanæ caderent; Megloriensis Comitatus ad eandem itidem reverteretur: ipse verò Excommunicationi, totaque ejus Ditio Ecclesiastico Interdicto subjaceret. Istud Juramentum, quo *Raymundus* Comes Tolosanus omnes imperatas sibi à *Milone* Summi Pontificis Legato conditiones adimplereturum se spondit, extat Manuscriptum in Archivis Urbis Carcassonæ in Galliis, & integrum refertur à Domino *de Catel* cap. vi. libri secundi *Historiæ Comitum Tolosanorum* pag. 245. Facto illo Juramento, *Raymundus* Comes Tolosanus venit cum *Milone* Legato ad Villam S. *Ægidii*, quæ est in Diocesi Nemausensi, ubi nudus ante fores Ecclesiæ stetit, moxque Legatus Summi Pontificis, stolâ in ejus collum injectâ, ipsum verberibus castigatum à censuris absolvit, & in Ecclesiam introduxit, ut videre est apud *Petrum de Valle Cernaii* cap. xi. & xii. *Historiæ Albigenensium*, & apud clarissimum *Catellum* libro secundo *Historiæ Comitum Tolosanorum*. Ecclesiæ reconciliatus *Raymundus*, Comes Tolosanus, promissis non stetit, & eam ob rem in Concilio quod Avinionæ à *Milone* Sedis Apostolicæ Legato an. mccc. convocatum est, comminatoria excommunicatio adversus eum lata est, si abjurata pedagia usurparet, Tolosanis etiam civibus omni Sacrorum usu interdictum, quòd promissa Legatis & Crucifignatis de Hæreticorum à Tolosa expulsionē necdum

dùm adimplere curassent, sicut refert *Petrus de Valle Cernaii* cap. xxxi. *Historiæ Albigenſium*. Tentavit tamen *Raymundus* ſeſe purgare de crimine, hæreſeos, & de nece ſancto viro *Petro de Caſtro novo*, Sedis Apoſtolicæ Legato, illata. At Epifcopi in Concilio eâ de re in Villa Sancti *Ægidii* eodem anno, ſeu mccc. congregati decreverunt, purgationem *Raymundi* Comitis Tolofani non eſſe admit- tendam, quòd juramenta de mandatis Sedis Apoſtolicæ implendis ſolemni ritu præſtita palàm vio- laſſet, undè in eum, omneſque illius fautores & adju- tores promulgata eſt excommunicationis ſen- tentia. Interim, Comes *Simon Monfortius*, Cruce- ſignati Dux exercitus, multas urbes Caſtraque *Ray- mundo* Tolofano Comiti armis eripuit, nec non, Fuxenſi Comiti, aliifque ad hæreticorum defen- ſionem conjuratis. Ut autem tota illa Ditio, quam armis ſubegerat *Simon Monfortius*, bonis moribus ac legibus temperari, & penitus Hæreſis exter- minari poſſet, neceſſarium eſſe judicarunt Epifcopi celebrare Concilium in Caſtro Appamiarum, in quo ſapientiſſimas leges condiderunt, quæ ipſorum, & Comitis *Simonis Monfortii* ſigillo munitæ ſunt, earumque obſervantiam viri nobiles, & omnes milites juraverunt. Ægrè amodùm tulit *Raymundus* Comes Tolofanus, quòd ſuis Ditionibus à *Simone Monfortio* Comite exueretur, & de iniuria ſibi illata conqueſtus eſt cum *Petro* Aragonum Re- ge, qui ejus ſortem dolens rogavit Epifcopos, quos *Arnaldus*, Archiepiſcopus Narbonenſis & Sedis Apoſtolicæ Legatus, in Concilio anno mccciii. in Caſtro *Vauri* pro negotio Albigenſium adunave- rat, ut *Raymundo* Tolofano Comiti ſatiſfactionem
offe.

offerenti , & obedientiam Ecclesiæ spondenti , aut saltem ejus filio , Terras à *Simone Monfortio* Comite ereptas restitui imperarent , eandemque gratiam concederent Comitibus Convenarum , & Fuxensi , & Gastoni Bearnensi , sub conditione satisfactionis ab eis ad Ecclesiæ arbitrium exhibendæ . Regis Aragonum preces repulit Synodus , quòd *Raymundus* Tolosanus Comes , nec non Fuxensis , & Convenarum Comites , & *Gasto* Bearnensis essent Hæreticis confœderati , ipsorum fautores manifesti , & ob hoc , aliaque crimina excommunicatione percussi . Hoc Episcoporum Responso ad iram excitatus *Petrus* Aragonum Rex , suppetias tulit *Raymundo* Comiti Tolosano , & aliis Comitibus Hæreticorum insanis fautoribus , ductoque centum millium armatorum exercitu *Murellum* seu *Muretum* obsedit . At Comes *Simon Monfortius* prælium intrepidus commisit , & Cælo pro Crucesignatorum exercitu pugnante , insignem , de qua in superiori Colloquio diximus , victoriam reportavit , in cujus victoriæ præmium *Petrus Beneventanus* , Sedis Apostolicæ Legatus , Archiepiscopi , Episcopi , Abbates , aliique viri Ecclesiastici in Concilio Montispeffulano anno MCCXIV. celebrato *Simonem* Comitem *Monfortium* , Hæreticorum debellatorem , & Fidei Catholicæ invictum propugnatorem , consentientibus consiliis & suffragiis elegerunt Principem Tolosæ , & omnium terrarum quas iusto bello Crucesignatorum exercitus *Raymundo* Comiti Tolosano eripuerat . Hanc electionem approbavit *Innocentius III.* & Concilium Generale Lateranense IV. sub eodem Pontifice anno MCCXV. habitum , decrevit ut Ditio *Raymundi* Comitis Tolosani

fani, quæ Crucesignatorum armis parta fuerat, & quam *Innocentius III.* Comiti *Simoni Monfortio* custodiendam commendaverat, in plena ejusdem Comitis *Simonis Monfortii* potestate ac possessione in posterum permaneret. Voluit tamen *Innocentius III.* ut Terræ, quas *Raymundus Comes* in Provincia habuerat, custodirentur, donec de illis provisio fieret vel in parte, vel in toto, filio dicti Comitis, *Raymundo juniore*, si tamen patris non imitaretur exemplum, sed certæ fidelitatis, & bonæ conversationis indiciis se misericordia dignum proderet. Denique, ad extirpandas Albigenensium hæresis reliquias, *Romanus*, S. Angeli Diaconus Cardinalis & Sedis Apostolicæ Legatus, Concilium Tolosæ anno mcccxxix. indixit, in quo pro hæresi profliganda & pace firmitus stabilienda Canones xlv. editi sunt, cum *Raymundus junior Comes Tolosanus* anno præcedente Ecclesiæ fuisset reconciliatus, & acceptis pacis conditionibus, quas ipsi Sanctus *Ludovicus Galliarum Rex* obtulit, jurejurando pollicitus esset, se pro suis viribus in hæreticos quoscumque inquisiturum, pœnisque statutis animadversurum, filiam verò suam *Alphonso Pictonum Comiti*, & S. Ludovici Galliarum Regis fratri, cum Tolosani Comitatus dote in matrimonium collocasset, sicut jam observavimus in superiori Colloquio.

D. Ut omnia Concilia Nationalia, quæ Sæculo Ecclesiæ decimo tertio ad sanciendam Ecclesiæ Disciplinam variis in locis habita fuerunt, perspicuo, & ad meam juvandam memoriam perquam apposito ordine percensere possis, ea juxta seriem Chronologicam disponere debes, incipiendo ab his
Con-

Conciliis Nationalibus, quæ Ecclesiâ Gallicanâ celebravit.

M. Benè multa Concilia Nationalia ad restaurandam collapsam Ecclesiæ Disciplinam Sæculo decimo tertio habita sunt in Galliis, quæ hic juxta Ordinem Chronologicum disposita breviter indicabo. Primum Concilium Nationale ad sanciendam Disciplinam Avenione anno MCCIX. *Hugo* Regiensis Episcopus, & *Theodisius*, Sedis Apostolicæ Legati, indixerunt, in quo pro Clericorum, & Laicorum correctione morum, qui, ob grassantem in illis partibus Albigenium hæresim, corrupti erant, conditi sunt Canones XXI. qui extant Part. I. Tomi XI. Concil. pag. 41. *Robertus de Corceone*, S. R. E. Cardinalis & Sedis Apostolicæ in Galliis Legatus, Concilium anno MCCXI. Parisiis convocavit, in quo plurima ad restituendam Ecclesiæ Disciplinam constituta sunt. Extant illius Concilii Canones in quatuor partes divisi. Prima pars, quæ spectat Clericos sæculares, complectitur Canones XX. Altera pars, quæ ad viros Regulares attingit, viginti septem habet Canones. Tertia pars, quæ est pro Monialibus, continet Canones XXI. Postrema pars, quæ pertinet ad Archiepiscopum & Episcopos, exhibet Canones XXI. qui omnes Canones habentur Part. I. Tom. XI. Concil. pag. 55. *Petrus Beneventanus* Sedis Apostolicæ Legatus anno MCCXIV. Concilium Monspeliense congregavit, in quo, ut mox diximus, *Raymundi* Comitis Tolosani Ditio *Simoni Monfortio* Comiti adjudicata est, & sancita Ecclesiæ Disciplina XLVI. Canonibus, qui inserti sunt Tomo XI. Concil. Part. I. pag. 103. Sub *Ludovico VIII.* Galliarum Rege *Petrus*

trus, Narbonensis Archiepiscopus, Provinciæ suæ Concilium anno MCCXXVII. convocavit, in quo decem Canones *de excommunicatis, perjuris, Judæis coercendis, condendis testamentis &c.* sanciti sunt, & extant Part. 1. Tomi XI. Concil. pag. 304. Biennio post celebrationem istius Concilii Narbonensis, seu anno MCCXXIX. *Romanus* Sedis Apostolicæ Legatus Concilium Tolosæ mense Novembri indixit, in quo actum est *de inquirendis & extirpandis Hæreticis, de libris Sacræ Scripturæ à Laicis non retinendis, de libertatibus Ecclesiarum, deque aliis Ecclesiasticæ Disciplinæ Capitibus.* Extant Canones XLV. in hoc Concilio Tolosano conditi Part. 1. Tomi XI. Conciliorum pag. 427. Paulò post, Archiepiscopus Turonensis Concilium Provinciæ suæ anno MCCXXXI. apud *Castrum Gonterii* coegit, in quo Canones triginta septem de Disciplina editi sunt, *de dirimendis clandestinis matrimoniis, de causis matrimonialibus, de modo instituendi Rectores Ecclesiarum, de Residentia Rectorum, seu Curatorum, de Procurationibus, de pœnis infligendis Clericis, qui sunt libidinosi & scortatores, de Monachis, quibus Regularis observantia disciplinæ, silentium, abdicatio peculii, & abstinentia à carnibus imperantur; de puniendis usurariis, de Judæis arcendis ab Officiis publicis & à testimoniis contra Christianos ferendis, & de aliis id genus Capitibus, quæ Disciplinam Ecclesiasticam spectant.* Hos triginta septem Canones Concilii Gonteriensis Conciliorum Collectores inseruerunt Tomo XI. Conciliorum Part. 1. pag. 439. *Walterus*, Episcopus Tornacensis & Sedis Apostolicæ Legatus, anno MCCXXXIII. *Biterris* Concilium habuit, in quo viginti sex Decreta constituta

tuta sunt de extirpandis Hæreticis Albigenſibus, & eorum fautoribus ſingulis diebus Dominicis excommunicandis. De ſcientia, moribus, examine, & titulo patrimonii eorum, qui ad ſacros Ordines ſunt promovendi. De Conſtitutionibus Lateranenſis Concilii Oecumenici circa vitam & honeſtatem Clericorum diligenter obſervandis, de patronis Eccleſiarum, & de Regulari Diſciplina Monachorum, quibus in virtute obedientiæ, & ſub obteſtatione divini Judicii præcipitur Canone xiv. ne quidquam proprium poſſideant, quia, ſunt verba Canonis, abdicatio proprietatis, ſicut cuſtodia caſtitatis, aded eſt annexa Regule Monachali, ut contra eam nec Summus Pontifex poſſit licentiam indulgere. Extant viginti ſex illi Canones Concilii Biterrenſis Tomo xi. Concil. Part. i. pag. 452. Elapſo anno à celebratione Concilii Biterrenſis, Joannes Arelatenſis Archiepiſcopus Concilium Provinciale anno mcccxxxiv. in ſua Metropli convocavit, in quo conſecti ſunt Canones xxiv. de executione Statutorum Concilii Lateranenſis IV. De Episcopis, qui in ſuis Diœceſibus Verbum Dei per ſe, vel per alios frequenter prædicare debent. De jramento, quod Saculares Poſteſtates, Magiſtratus, & Domini præſtare debent de exterminandis Hæreticis, qui, eorumque fautores, diebus Dominicis & feſtivis excommunicati denunciandi ſunt, & bonorum conſiſcatione, carcere, aliisque pœnis ſecundum Canones & Leges Principum pleetendi &c. Referuntur iſti Canones viginti quatuor Concilii Arelatenſis Tomo xi. Concil. Part. ii. in Appendice pag. 2340. In Concilio Narbonenſi, quod anno mcccxxxv. habitum eſt, Petrus Amelius Narbonenſis, Joannes Arelatenſis, Raymundus Aquenſis, Archiepiſcopi,

cæterique Præsules , piissima consilia , jubente Romano Pontifice , dederunt Fratribus Prædicatoribus , qui his in Provinciis Sacræ Inquisitionis Officium Auctoritate Apostolica contra Hæreticos Albigenfes exercebant , ut videlicet saluberrimis illis consiliis instruerentur de muneris istius rectè obeundi ratione , seu quo pacto contra Hæreticos sese gerere deberent . Capitula xxix. quæ hunc in finem in eo Concilio Narbonensi statuta sunt , habentur Tomo xi. Concil. Part. i. pag. 487. In Concilio Turonensi I. quod *Jubellus* hujus urbis Archiepiscopus anno mcccxxvi. celebravit , quatuordecim conditi sunt Canones , quorum primus Crucesignatos occasione alicujus delicti à Judice sæculari detentos , ab Ecclesiastico judice repeti jubet , adhibito etiam , si necesse sit , censurarum terrore. Canones ii. iii. & iv. Advocatos recipi vetant , nisi solido triennio Juri studuerint : Officiales nisi quinquennio : Notarios , nisi stylum Curiae & Statuta noverint . Canone viii. Infames declarantur , & flagellis digni , qui binas nuptias vel Sponsalia eodem tempore contrahunt , eademque pœna in sortilegos decernitur Canone ix. & in falsos testes Canone xii. Præterea , Episcopis Canone xiii. præcipitur , ut curam singularem gerant de Neophytis , seu recens ad Fidem Catholicam conversis ab hæresi aut Judaismo , eos in fide erudiant , & commodè sustentent , ne cogente paupertate ad vomitum redeant . Denique , Canone xiv. Abbatibus & Prioribus commendatur hospitalitas , maximè erga Religiosos , qui propter Christum bona , quæ habebant in sæculo , dimiserunt . In Concilio Campiniacensi , quod *Gerardus* Burdegalensis Archiepiscopus

copus cum Episcopis Provinciæ suæ an. MCCXXXVIII. peregit, Ecclesiastica Disciplina triginta & octo Canonibus sancita est. Canon III. excommunicat seculares homines, qui Ecclesias, Xenodochia, vel alias quascumque Religiosas domos aut personas importunis exactionibus gravare præsumperint. Canon x. præcipit, ut Causarum Matrimonialium cognitio committatur viris dumtaxat peritis & prudentibus, qui & per se ipsos testes examinent, vel saltem per eos, qui Canonicas Sanctiones non ignorant. Canon xii. vetat, ne Monachi, vel Canonici Regulares Advocatos aut Procuratores agant, nisi pro Ecclesiæ suæ evidenti utilitate, & obtentâ à Superioribus licentiâ. Canon xiv. Advocatû pauperibus à Curia dari jubet. Canon xix. decernit, ut qui Clericos capiunt ac verberant, non solum excommunicatione percellantur, sed nullus de posteritate ipsorum ad tertiam usque generationem ad Ecclesiasticum Beneficium & ordines admittatur. Monasticæ Disciplinæ multis Canonibus in hoc Concilio conditis consulitur, & inter cætera, quæ statuuntur Decreta, prohibetur Canone xx. Abbatibus, *ne aliquos recipiant pasto vel pecunia mediante*, sed si Monasterii non sufficiunt facultates, minuatur Monachorum numerus, & Canone xxv. inhibetur Monachis, *ne peculium habeant*, & si in morte habuerint, nec Superiori suo humiliter ac devotè reddiderint, *careant sepultura*. Capitula hæc triginta octo pro Disciplina tam Ecclesiastica, quam Monastica in isto Concilio Campiniacensi statuta extant Tomo xi. Concil. Part. I. pag. 557. In Concilio Turonensi secundo, quod *Jubellus* supra laudatus ejusdem ur-

bis Archiepiscopus anno MCCXXXIX. indixit, duodecim Canonibus sancita est Ecclesiæ Disciplina. Primus Canon tres testes in qualibet Parochia constitui jubet, qui de scandalis interrogati ab Archiepiscopo, vel Archidiacono, dicant veritatem. Canone III. præcipitur Sacerdotibus, ut in publicum procedant cum habitu, qui Ordinem suum deceat. Canones IX. & X. cavent, ne præcipiti motu, sed maturè præmissis monitionibus legitimis, feratur excommunicatio. Canone XI. Vita communis in Monasteriis accuratè servanda præscribitur. Habentur duodecim Concilii Turonensis II. Canones Tomo XI. Concil Part. I. pag. 556. Idem *Juhellus* Archiepiscopus Turonensis anno MCCXLII. Synodum Provinciam apud *Vallem Guidonis* in Diœcesi Cœnomanica celebravit, in qua septem præfiguntur Disciplinae Ecclesiasticæ, & Monasticæ capita. In primo statuitur, ut Viri Religiosi suam Regulam, & Regularis observantiam Disciplinae diligenter custodiant. In aliis verò sequentibus Capitibus agitur de jurisdictione Archidiaconorum, Archipresbyterorum, & Diaconorum. *Guillelmus* Narbonensis Archiepiscopus anno MCCXLVI. cum Provinciæ suæ Episcopis Concilium *Biterris* celebravit, in quo quadraginta sex Capita Disciplinae Ecclesiasticæ spectantia condita sunt, seu potius collecta ex superioribus Conciliis, præsertim ex Lateranensi IV. Oecumenico. Consilia etiam saluberrima, quæ triginta septem Capitulis continentur, Episcopi in hoc Concilio congregati dederunt Fratribus Ordinis Prædicatorum, quâ ratione videlicet in Sancti Officii executione, & in modo procedendi contra Hæreticos sese gerere

rere deberent. Extant istius Concilii Biterrensis Capita pro Ecclesiæ Disciplina quadraginta sex, una cum illis triginta septem Capitibus, quæ complectuntur consilia Fratribus Prædicatoribus Fidei Inquisitoribus data ab ejusdem Concilii Episcopis, Tomo XI. Concil. Part. 1. pag. 677.

Anno MCCXLVIII. *Petrus* Albanensis Episcopus, & *Hugo* S. Sabinæ Presbyter S. R. E. Cardinalis, & Sedis Apostolicæ Legati cum Episcopis quatuor Provinciarum, Narbonensis, Viennensis, Arelatensis, & Aquis, Concilium celebrarunt Valentiniæ ad Rhodanum in Delphinatu pro fide, pace & libertate Ecclesiæ, quibus viginti tribus Capitulis prospexerunt, & Capitulis XXII. & XXIII. in *Fridericum II.* Imperatorem pacis Ecclesiæ perturbatorem, & in omnes ejus fautores sententiam excommunicationis promulgarunt. Triennio post, seu anno MCCLI. *Joannes* Archiepiscopus Arelatensis Concilium Provinciale *Insulæ*, quæ Vindascini Comitatus in Provincia Villa est, congregavit, in quo circa Disciplinam Ecclesiasticam, videlicet de inquirendis Hæreticis, de Decimis, de Clandestinis Matrimonis &c. tredecim conditi sunt Canones, qui extant tomo XI. Concil. par. 2. in Appendice pagina 2349. Concilium Salmuriense anno MCCLIII. convocavit *Petrus de Lamballe* Turonensis Archiepiscopus, in quo de rebus ad Disciplinam Ecclesiasticam attinentibus, videlicet de celebratione Divinorum Officiorum, de custodia Sacramentorum, de Archidiaconis, Archipresbyteris, & Decanis ruralibus, de his, qui ad Ordines promovendi sunt, de Procuratoribus, de Commendis Ecclesiarum, de Monachis &c. Capitula XXII. sancita sunt, quæ habentur tom. XI.

Concil. par. 1. pag. 707. Anno sequenti, seu MCCLIV. Zoen Archiepiscopus Avenionensis, & Sedis Apostolicæ Legatus, Concilium apud *Albiam* indixit multis Narbonensis, Bituricensis, & Burdegalensis Provinciarum concurrentibus Episcopis & Prælati. In eo pro sancienda Ecclesiæ Disciplina unum & septuaginta statuta sunt Capitula, quorum viginti octo priora *de Hæreticis inquirendis & exterminandis* multa decernunt. Capitulum XXIX. imperat executionem Canonis, *Omni utriusque sexus*, de Confessione semel in anno facienda, & obligat Fideles ad Eucharistiæ susceptionem in Natali Domini, Pascha, & Pentecoste, ita ut Confessio Communionem præcedat. Alia Capitula de rebus bonum Ecclesiæ regimen spectantibus, maximè de Clericorum & Regularium vestibus, vita & honestate statuunt; eisque aurum & argentum in vestibus, fibulis, frænis, calcaribus & sellis, alearum & taxillorum ludos, venationem cum avibus & canibus, puerorum è sacro fonte susceptionem prohibent. Gerardus de Malemort Burdegalensis Archiepiscopus anno MCCLV. Concilium in sua Metropoli celebravit, in quo triginta Disciplina Ecclesiasticæ publicata sunt Capita, *de residentia Clericorum Beneficia habentium; de Quæstoribus, quibus sine licentia Summi Pontificis, vel Episcopi in Ecclesiis prædicare non permittitur; de Presbyteris aliarum Diæceson, qui in Ecclesiis ad Sacrum Ministerium absque Episcopi licentia admitti non debent; de Reliquiis, quas publicè coli prohibetur, nisi fuerint auctoritate Romani Pontificis approbatæ; de decimis, quarum detentores excommunicantur; de Sacramentis & Beneficiis, quæ absque ulla pretii exactione administrari, conferri &*

reci-

recipi debent ; de Confraternitatibus , quarum abusus rescinduntur . Extant istius Concilii Burdegalenfis triginta de Disciplina Ecclesiastica Capita tom.xi. Concil. part.1. pag. 730. Idem Gerardus de Malemort Archiepiscopus Burdegalenfis aliud Concilium anno mclviii. *Roffiaci* in Dicecesi Picaviensi habuit, in quo Decem Capitulis sancita est Ecclesiæ Disciplina, quæ extant tom. xi. Concil. part. 1. pag. 774. *Jacobus* Narbonensis Archiepiscopus eodem anno mclviii. Concilium apud Montempeffulanum coëgit, in quo octo promulgata sunt in rem Disciplinae Ecclesiasticæ Decreta, quorum primum rerum Ecclesiasticarum invasores, jurium Ecclesiasticorum usurpatores, libertatum, immunitatum, & personarum Ecclesiasticarum violatores excommunicatione ferit. Extant hæc octo circa Disciplinam Ecclesiæ Decreta tomo xi. Concil. par. 1. pag. 778. *Florentinus* Arelatensis Archipræsul Concilium cum suis Suffraganeis habuit anno mclx. in quo septemdecim editi sunt Canones, in quorum primo damnantur Phantastici, *Joachimi* Abbatis Sectatores, seu qui ejus nomine perniciofa sua dogmata tuebantur. In aliis Canonibus multa statuuntur circa Disciplinam Ecclesiasticam, videlicet de baptizandis parvulis in necessitate ; de Confirmationis Sacramento, nonnisi jejunis, & à jejunis administrando ; de Clandestinis Matrimoniis, quæ sub pena excommunicationis prohibentur ; de Vicariis perpetuis, quæ in Parochialibus Ecclesiis residere debent &c. Habentur septemdecim illi Canones Concilii Arelatensis tomo xi. Concil. part. 2. pag. 2359. *Petrus* Burdegalenfis Archiepiscopus eodem anno mclx. Provinciae suæ Concilium apud *Copriniacum*, seu Cam-

pinia celebravit, in quo undeviginti pro Disciplina Ecclesiastica præscripta sunt Capitula de *Vigiliis in Ecclesiis vel Cæmeteriis*, propter multos inde emergentes abusus, non faciendis; de *Commendis & collationibus vacantium Ecclesiarum*, quæ ad unum Archiepiscopum, vel Episcopum pertinere debent; de *jure patronatus*, de *decimis*, de *sepulturis*, de *modestia Clericorum in vestibus servanda*; de *congrua portione Vicariis Ecclesiarum & Capellanis seu Curatis assignanda &c.* Extant undeviginti illa Disciplinae Ecclesiasticæ Capitula tom. xi. Concil. par. i. pag. 799. Idem Petrus Burdegalenſis Archiepiſcopus alterum Concilium Copriniaſenſe anno mclxi. coëgit, in quo ſeptem Capitulis Diſciplinæ Eccleſiaſticæ fuit proviſum. In primo, loca, in quibus res, vel perſonæ Eccleſiaſticæ detinentur, ſubjiciuntur Interdicto. In aliis Capitulis agitur de iis, qui impediunt juriſdiſtionem Eccleſiaſticam; de compellendis excommunicatis, ut Eccleſiæ pareant, & ſatisfaciant, atque ſub pœna excommunicationis prohibetur Parochianis, ne tempore Interdicti generalis ad Eccleſias, durante Interdicto, accedant. Habentur ſeptem illa Diſciplinæ Eccleſiaſticæ Capitula tomo xi. Conciliorum parte i. pagina 821. Vincentius Turonenſis Archiepiſcopus anno mclxiv. Nannetenſe convocavit Concilium, in quo novem Decreta edita ſunt, in quibus prohibetur, ne Prælati, vel Patroni ſe obligent ad collationem vel præſentationem Beneficii vacantis; ne Clerici ſint venatores; ne Beneficia plura poſſideant. Beneficiariis imperatur reſidentia; & quemcumque laicum, qui bona Clericorum occupaverit ac detinebit, Cenſuris per Ordinarios ad reſtituendum compellendum eſſe ſtatui.

tuitur &c. Extant hæc novem Disciplinæ Ecclesiasticæ Capitula tom. xi. Concil. part. 1. pag. 826. Vincentius de Pilenis Archiepiscopus Turonensis Concilium Gonterienſe ſeu apud Caſtrum Gonterii habuit anno mclxviii. in quo octo præfixa ſunt Eccleſiaſtica Disciplinæ Capita contra bonorum Eccleſiaſticorum invaſores, qui excommunicantur, contra impediētes juridiſſionem Eccleſiaſticam, qui eidem pænæ ſubjiciuntur; contra excommunicatos, qui per annum vel ampliùs, excommunicationem ſuſtinent, nec abſolutionem petunt, quibus Eccleſiaſticam Sepulturam denegari debere ſtatuitur &c. Referuntur hæc octo Disciplinæ Eccleſiaſtica Capita tomo xi. Concil. part. 1. pag. 909. Duo Concilia Nationalia anno ſequenti mclxix. videlicet Andegavenſe, & Senonenſe fuerunt celebrata. Primum, ſeu Andegavenſe, duo Statuta edidit de non prohibendis donationibus, eleemoſynis, & legatis Eccleſiis aliisve piis locis faciendis: & de Clericis Beneficiatis, vel in Sacris Ordinibus conſtitutis, quibus inhibetur, ne coram Sæcularibus Judicibus cauſas dicant: Alterum, Concilium, ſeu Senonenſe, ſex conſtituit Decreta contra Clericos concubinariorum, contra uſurarios, quos ſepultura Chriſtiana privari jubet, ſi in peccato deceſſerint; contra eos, qui Clericos trabunt ad Sæcularia Judicia, contra Privilegiiorum abuſus. Renovat etiam iſtud Concilium Senonenſe Canonem Omnis utriuſque ſexus, eumque præcipit obſervari. Hæc Decreta Conciliorum Andegavenſis & Senonenſis inſerta ſunt tomo xi. Concil. part. 1. pag. 911. & 912. Sequuntur alia duo Concilia Nationalia, ſeu Compendienſe, & Avenionenſe, quæ anno mclxx. habitæ fuerunt. Concilii Compendienſis, quod Joannes de

de Courtenay Remensis Archiepiscopus convocavit, extant Constitutiones aliquot de iis, qui occupant & detinent bona Ecclesiastica, excommunicandis tomo xi. Concil. part. i. pag. 917. Concilii verò Avenionensis Capitula octo de Ecclesiæ Disciplina, videlicet de alienationibus bonorum Ecclesiasticorum revocandis; de legata pecunia ad arbitrium Executorum in causas pias dividenda; de Clerico, qui Episcopum, Præpositum, &c. graviter læserit &c. Habentur tomo xi. Concil. part. i. pag. 920. Joannes de Monteforello Archiepiscopus Turonensis Concilium Redonense in Britannia Minori anno MCCLXXIII. habuit, in quo septem Statuta edita sunt contra eos, qui manus violentas Episcopo, Abbati, vel Abbatissæ intulerint, aut Virum Ecclesiasticum occiderint, vel mutilaverint, quos anathemate ferit Concilium; contra bonorum Ecclesiasticorum invasores, qui etiam ipso facto excommunicari denunciantur. Præterea, Clericis præcipitur hospitalitas, quia quidquid habent Clerici, pauperum est, & domus eorum debent esse communes, inquiunt Patres istius Concilii Redonensis, cujus Statuta septem de Disciplina Ecclesiastica habentur tomo xi. Concil. part. i. pag. 933. Bertrandus de Sancto Martino Arelatenis Archiepiscopus Concilium Provinciale circa annum MCCLXXV. in sua Metropoli convocavit, in quo duo supra viginti condita sunt Decreta, quorum quatuor priora desiderantur; reliqua verò, quæ agunt de Censuris observandis; de Calicibus non vendendis aut pignorandis; de Casibus Episcopo, vel Papæ reservatis; de usurariis & adulteris publicis, qui diebus Dominicis & Festivis excommunicari debent, de Confessione annua proprio Sacerdoti facienda, de Confessione infirmorum &c. Extant

tant tomo XI. Concil. part. 2. in Appendice pagina 2368. Duo anno sequenti, seu MCLXXVI. habita sunt Concilia *Salmuriense & Bituricense*. In Concilio Salmuriensi quatuordecim Canonibus Disciplina Ecclesiasticæ consultum est. Beneficiorum curam animarum annexam habentium pluralitas Clericis Canone III. prohibita est. De vita & honestate Clericorum ac Monachorum agitur in aliis Canonibus, qui referuntur tom. XI. Concil. par. I. pag. 1011. In Concilio Bituricensi, quod *Simon Tituli Sanctæ Cæcilie* Cardinalis celebravit, Decreta sexdecim pro restauratione Disciplinae, & defensione Jurisdictionis, immunitatis, & libertatis Ecclesiasticæ condita sunt, quæ extant tom. XI. Concil. par. I. pag. 1017. *Joannes* Turonensis Archiepiscopus cum suis Suffraganeis Concilium habuit *Langessii* (quod est Oppidum in Turonibus) anno MCLXXVI. in quo sexdecim Canones editi sunt, quibus statutum est, ne *Matrimonia clandestina contrahantur; ne Presbyteri filios suos in Sacris Ordinibus genitos secum retineant, vel ipsis aut concubinis aliquid legent; ne Monachi vel Moniales plures in Monasteriis recipiantur; quàm ex ipsorum facultatibus sustentari possint &c.* Sexdecim istius Concilii Langentienis Canones extant tomo XI. Concil. par. I. pag. 1038. *Guillelmus de Flavacuria* Rotomagensis Archiepiscopus anno MCLXXIX. Concilium Provinciale apud *Pontem Audemari* celebravit, in quo Decretorum Concilii Bituricensis contra jurisdictionis, immunitatis, & libertatis Ecclesiasticæ perturbatores imperatur executio, & nonnulla alia Disciplinam tam Ecclesiasticam, quàm Monasticam spectantia statuuntur in XXIV. Capitulis, quæ extant tom.

tom. XI. Concil. part. I. pag. 1044. Eodem anno MCCLXXIX. *Bernardus* Arelatenſis Archiepiſcopus, Avenione Provinciale Concilium habuit, in quo præcedentium Conciliorum Canones contra libertatis & juriſdictionis Eccleſiaſticæ perturbatores fuerunt renovati ac confirmati; prohibetur etiam Clericis, ne mercaturam exerceant, cauſas dicant, aut Magiſtratus gerant; Religioſis verò, vel Sæcularibus exemptis inhihetur, ne excommunicatos publicè, vel nominatim interdictos, ſeu uſurarios manifeſtos, ad Sacramenta, vel Eccleſiaſticam ſepulturam admittant &c. Hujus Concilii Avenionenſis Capitula XV. de Eccleſiaſtica Diſciplina habentur tom. XI. Concil. part. I. pag. 1050. Alterum Concilium Avenionenſe anno MCCLXXXII. indictum eſt à *Bertrando Almarico* Arelatenſi Archiepiſcopo, in quo XI. Canones editi ſunt *contra omnes uſurarios, qui ipſo factò excommunicati denunciantur; agitur quoque de non permittendis ſine conſilio & aſſenſu Episcoporum alienationibus bonorum, & jurium Eccleſiarum; de inſtituendis Procuratoribus ad deſenſionem Clericorum Beneficiatorum, qui ab improbis litigatoribus coram diverſis Judicibus fatigabantur laboribus & expenſis; de Eccleſiarum Parochialium frequentatione Dominicis & ſolemnibus diebus; de Eccleſiaſtica juriſdictione &c.* Extant XI. Canones illius Concilii Avenionenſis tomo XI. Concil. part. I. pag. 1174. *Joannes* Turonenſis Archiepiſcopus ann. MCCLXXIX. Andegavis celebravit Concilium, in quo V. Canones jura & libertates Eccleſiaſticorum unicè ſpectantes editi ſunt, & habentur tomo XI. Concil. part. I. pag. 1074. idem *Joannes* Turonenſis Archiepiſcopus anno MCCLXXXII. Concilium in ſua Metro-

poli

poli habuit, in quo decem condidit Canones contra *Vexatores*; contra eos, qui ad rixas, vel ad lites incitant, in quos decernitur excommunicatio; contra *fures librorum & ornamentorum Ecclesiasticorum*; contra *Usurarios, & Ecclesiasticæ jurisdictionis ac libertatis oppressores*, qui excommunicati denunciantur; contra eos, qui *Viros Ecclesiasticos, aut Ecclesiarum Ministros impediunt*, ne decimas ad ipsos aut ad Ecclesias pertinentes colligant, aut percipiant. Præcipitur etiam in eodem Concilio Turonensi, ut *Processiones secundum piam consuetudinem fiant Dominicis, ac festivis diebus, & districtè prohibetur Clericis ac Religiosis, ne tabernas frequentent &c.* Prostant Canones X. hujus Concilii Turonensis tomo XI. Concil. par. I. pag. 1183. Simon de Belloloco Bituricensis Archiepiscopus cum suis Suffraganeis Concilium in sua Metropoli anno MCCLXXXVI. habuit, in quo triginta, quinque de *Disciplina Ecclesiastica promulgata sunt Capitula contra Matrimonia clandestina, contra Clericos, qui concubinas seu meretriculas in domibus habent, aut filios illegitimos alunt; contra impediētes jurisdictionem Ecclesiasticam, contra Usurarios publicos, contra transgressores Canonis, Omnis utriusque sexus, de Confessione singulis annis proprio Sacerdoti faciēda. Plura etiam de Monastica Disciplina statuta sunt in hoc Concilio Bituricensi, cujus Capitula XXXV. extant tomo XI. Concil. par. 2. pagina 1247. Rostagnus Arelatensis Archiepiscopus eodem anno MCCLXXXVI. Concilium Insulanum cum suis Suffraganeis habuit, in quo duodeviginti editæ sunt Constitutiones contra illos, qui propter damnum aliquod illatum excommunicati sunt, qui absolvi non debent donec sati sfecerint; contra bonorum Ecclesiasti-*

corum invasores, vel libertatis & jurisdictionis Ecclesiastica oppressores; contra Sæculares Dominos & Magistratus, eorumque Ministros, qui Clericum ceperint, nec jussi restituerint Episcopo, vel ejus Officiali cum omnibus ipsius bonis; quos excommunicatos denuntiari statuitur; eadem excommunicationis pœna infligitur illis, qui toxica in mortem vel abortum dicunt, vendunt, tradunt, aut ministrant, vel qui dantes aut ministrantes infra mensem Episcopo tanquam Judici non revelaverint. Jubet etiam idem Concilium Insulanium, ut Presbyteri Parochiales Baptismi ritum ac formam Parochianos suos doceant, quò parvulos urgente periculo baptizare possint, & ut Festum Sanctissimæ Trinitatis, & Festum S. Trophimi solemniter ritu per totam provinciam celebrentur &c. Extant illius Concilii Insulani duodeviginti Constitutiones tomo XI. Concil. part. 2. pag. 1335. Denique, alia duo Concilia Provincialia Rotomagensis nimirum & Auscitanum, in Galliis decimo tertio Sæculo habita fuerunt. Primum, scilicet Rotomagensis, ab Archiepiscopo Rotomagensi an. MCCXCIX. fuit convocatum, & in eo septem Decreta edita sunt de vita & honestate Clericorum; de religiosa Dominica diei & Festorum observantia, prohibetur etiam Clericis, ne in factis personalibus ac delictis Sæculari justitiæ sese subjiciant. Referuntur hæc septem Concilii Rotomagensis Decreta tomo XI. Concil. par. 2. pag. 1427. Concilium Auscitanum anno MCCC. congregatum est incerto loco, quem etiam Gabriel Cossartius in Collectione Conciliorum se ignorare ingenuè profitetur. In eo tredecim constituta sunt Disciplinæ Ecclesiasticæ Capita de libertate electionum; de illis qui occupant bona va-

can-

cantium Ecclesiarum ; de intrusis in Beneficia Ecclesiastica; de his, qui gaudent Jurepatronatus, quibus prohibetur, ne ab his, quos præsentant ad beneficia, aliquid prævio pacto extorqueant ; de temporibus ordinandi ; de Beneficiis Ecclesiasticis, quibus annexa est cura animarum, quæ minori viginti quinque annis nemini conferri debere præcipitur, &c. si secus factum fuerit, ipso jure irritum esse &c. Extant hæc tredecim Disciplinæ Ecclesiasticæ Capita tomo XI. Concil. par. 2. pag. 1468. Habes nunc brevem & compendiariam, descriptionem omnium Conciliorum Nationalium, seu Provincialium, quæ Sæculo Ecclesiæ decimo tertio in Galliis fuerunt celebrata.

D. Conciliorum Nationalium seu Provincialium, quæ in Ecclesia Gallicana Sæculo decimo tertio habita fuerunt, sylvam potiùs, quàm brevem, ut ais, descriptionem tradidisti. Quapropter obsecro te, ut summatim dumtaxat attingamus cætera alia Concilia Provincialia, quæ eodem Sæculo decimo tertio in Hispania, Anglia, Germania, & Italia fuerunt convocata?

M. Concilia Nationalia, seu Provincialia, quæ Sæculo Ecclesiæ decimo tertio in Hispania fuerunt celebrata, tanti non sunt, ut in iis perconsendis figillatim immoremur. Plura quidem referuntur Concilia Tarraconensia in Hispania eo Sæculo habita, quorum memoria vix superest, quò fit, ut de his Conciliis Tarraconensibus, in quibus nihil alicujus momenti occurrit, perfunctoriè agant *Baluzius lib. 4. Marca Hispanica, & Cardinalis Aguirrius tom. 3. Conciliorum Hispaniæ pag. 495. 496. 498. 502. 504. 505. & 523.* Prætermisissis itaque istis Conciliis Provincialibus Hispaniæ, veniamus ad Concilia

cilia Nationalia, seu Provincialia, quæ Sæculo XIII. in Anglia indicta fuerunt. In primis, *Hubertus Cantuariensis Archiepiscopus & Angliæ Primas* Londini apud Westmonasterium pro reformatione Ecclesiæ Anglicanæ celebravit Concilium anno ducentesimo supra millesimum, in quo XIV. conditi sunt Canones de celebratione Missæ, & Divini Officii recitatione absq; nimia festinatione aut protractione; de pœnitentiis à Sacerdotibus imponendis juxta Sacrorum Canonum statuta, videlicet post diligenter attentas circumstantias, idest, qualitatem personæ, quantitatem delicti, tempus, locum, causam, moram in peccato factam, & devotionem animi pœnitentis; de sententia excommunicationis & suspensionis non ferendâ, nisi canonicâ monitione præmissâ; de Beneficiis non conferendis vel promittendis antequam vacent; de Decimis; de Matrimonii trina denunciatione & publica celebratione; de peculio Monachis interdicto &c. Exrant hujus Concilii Londinensis quatuordecim de Disciplina Ecclesiastica Canones apud *Hovedenum* ad annum mcc. apud *Spelmannum* tomo 2. *Conciliorum Britannia*, & tomo xi. *Concil. part. 1. pag. 13.* *Stephanus Langtonus* S.R.E. Cardinalis & Archiepiscopus Cantuariensis Concilium apud *Oxonium* anno mcccxi. celebravit, cujus ad hunc annum meminere *Matthæus Parisius*, & *Matthæus Westmonasteriensis*. In hoc Oxoniensi Concilio multa fuerunt statuta ad reformationem status Ecclesiastici & Monasticæ Religionis; Festa, Vigiliæ, jejunia stabilita; Excommunicati Jurium Ecclesiasticorum pervasores, Regni perturbatores, Jurium Regalium usurpatores, falsi testes, & qui eos subornant, Calumnia-

lumniatores &c. *Spondanus* ad annum MCCXXII. refert post *Matthæum Westmonasteriensem*, paucis diebus ante istud Concilium Oxoniense comprehensum fuisse quemdam impostorem, qui suo lateri, pedibus ac manibus quinque vulnera crucifixionis Dominicæ ad seducendum populum impresserat: atque in eodem Concilio Oxoniensi simul cum eo alium nebulonem Hermaphroditum, ejus erroris fautorem, oblatum; utrumque sceleris convictam, & publicè confessum, judicio Ecclesiæ punitum esse. Edidit istud Concilium Oxoniense ad sancendam Disciplinam Ecclesiasticam quadraginta novem Capitula, quæ extant apud *Spelmannum* tom. 2. *Concil. Britannia*, & inserta sunt tomo XI. Conciliorum part. 1. pag. 271. Alterum Concilium Londinense Otto Cardinalis, & Sedis Apostolicæ per Angliam Legatus, anno MCCXXXVI. congregavit, in quo sancta est Disciplina Ecclesiastica uno & triginta Decretis de Ecclesiarum dedicatione; de digna Sacramentorum ministratone; de Rectorum residentia, de Beneficiorum pluralitate Sacris Canonibus prohibita; de Clericorum continentia; de Monastica Disciplina; de Episcoporum officiis &c. Extant hujus Synodi Londinensis Acta & Decreta apud *Matthæum Parisium* in *Historia Anglicana* ad annum MCCXXXVI. apud *Spelmannum* tomo 2. *Concil. Britannia*, & exinde inserta sunt tomo XI. Conciliorum part. 1. pag. 530. Bonifacius Cantuariensis Archiepiscopus anno millesimo ducentesimo sexagesimo primo Concilium Provinciale habuit *Lambethæ* in Anglia, in quo de jurisdictione, libertate & immunitate Ecclesiastica actum est, & in earum violatores ac perturbatores lata fuit excommunicationis sententia. Plures ea

de re in hoc Lambethensi Concilio editæ Constitutiones extant tomo 2. *Concil. Britannia*, & tom. xi. Conciliorum par. 1. pag. 803. *Ottobonus*, S. *Hadriani* Diaconus Cardinalis, an. MCCLXVIII. à *Clemente IV.* Pontifice Maximo missus Legatus Apostolicus ad reformandas Regnorum Angliæ, Scotiæ, atque Hiberniæ Ecclesias, instaurandamque in eis Sacrorum Rituum, morumque sanctiorum institutionem, Concilium Nationale Episcoporum totius Britanniæ, Hiberniæque Insularum, Londini, quæ primaria est Angliæ civitas, convocavit; in quo Sanctissimæ Constitutiones conditæ sunt de Sacramentorum administratione gratis faciendâ; de Consecratione Ecclesiarum infra annum ab earum constructione gratis itidem ab Episcopo exhibenda; de Clericorum habitu, tonsura & continentia; de Matrimoniis; de fructu Ecclesiarum vacantium; de regressu ad Beneficia; de pluralitate Beneficiorum; de residentia Episcoporum; de Monastica Disciplina, & de aliis id genus tam Virorum Ecclesiasticorum, quàm Monachorum reformationem morum spectantibus, quæ Capitulis quinquaginta quatuor continentur, & ab Anglis, Scotis, Hibernis ac Walliæ populis religiosè fuere observata usque ad illorum à Romana Ecclesia sub Henrico Rege VIII. defectionem. Denique *Joannes de Peckam* Archiepiscopus Cantuariensis, Angliæ Primas, Concilium Provinciale Lambethæ anno MCCLXXXI. cum suis Suffraganeis celebravit, in quo *Ottonis*, & *Ottoboni* Cardinalium, & Sedis Apostolicæ quondam in Anglia Legatorum, Constitutiones fuerunt confirmatæ, & viginti septem Disciplinæ Ecclesiasticæ constituta sunt Capitula, videlicet de Sacramento *Eucharistiæ*; de *Annalibus* & *Anni-*

niuersariis celebrandis ; de Baptismo & ejus effectu ; de Sacramento Confirmationis ; de Sacris Ordinationibus ; de Confessione & Absolutione ; de informatione simplicium , sive de catechizandis rudibus ; de hospitalitate exhibenda , præcipue Concionatoribus ; de falsis procurationibus ; de clandestinis inquisitionibus rejiciendis ; de Canonicis Regularibus Orainis S. Augustini ; de Professione tacita Monachorum , & Monialium , quæ incurritur post annum probationis expletum ; de filiis Presbyterorum , quos à parentum Beneficiis omnino arceri debere jubetur , ne contra justitiam in hereditate Crucifixi locus pateat successioni ; de Clericis plura Beneficia , quæ curam habent annexam animarum , possidentibus , quibus præcipitur , ut ea liberè & absolutè infra sex menses in Episcoporum suorum manibus resignent , unico dumtaxat servato &c. Hæc viginti septem pro restauratione Disciplina Ecclesiasticæ in Concilio Lambethensi condita Capitula extant apud Spelmannum tom.2. Concil. Britannia , & inserta sunt tom.xi. Conciliorum part.1. pag.1156. Plura non addam de Conciliis Provincialibus , quæ Sæculo XIII. in Anglia fuerunt celebrata , ex quibus facili negotio intelligere potes , quanta fuerit his temporibus Anglicanorum Præsulum in vindicanda jurisdictione Ecclesiastica constantia , in restauranda Disciplina vigilantia , in conservando avitæ fidei deposito sollicitudo . Quæ tamen omnia à Sapientissimis illis Præsulibus olim ad defensionem Ecclesiæ Catholicæ constituta , nunc , proh dolor ! in Anglia penitus eversa ac profligata jacent , & Catholicis , qui in Regno Angliæ , variis hæresibus miserum in modum funestato , ingemiscunt , hoc unum tantum superest solatium , fore ut *Jacobus* hujus no-

minis tertius, verus ac legitimus illorum Rex, tot Catholicorum Regum nepos, hæresque non degener, quem incredibili gaudio paucis abhinc mensibus excepit, & aliquandiù Roma possidere meruit, fidem Catholicam pristinum in gradum in Regno Angliæ restituat, damna per *Henricum VIII.* Ecclesiæ Romanæ importata magno cum fœnore resarciat, ac tandem illud, quod omnes Fideles ardentibus votis hætenus optaverunt, aliquandò summo Numinis beneficio perficiat, ut videlicet fides in Anglia lætis auspiciis lucem aspiciat, & luctuosa illa, quæ Religioni tanto sanguine steterunt, jurgia & bella feliciter extincta, gratuletur Ecclesiæ.

D. His omnibus Conciliis Provincialibus, quæ hætenus percensuisti, si ea adjunxeris quæ in Germania & Italia habita sunt, integram omnium Conciliorum Provincialium, quæ in toto Orbe Christiano ad sancendam Ecclesiæ Disciplinam sæculo decimo tertio fuerunt coacta, seriem habebo.

M. *Conradus* Cardinalis Portuensis & *S. Rufinæ* Episcopus, Sedis Apostolicæ in Germania Legatus, Concilium Provinciale anno mcccxxx. in Germania, loco tamen incerto, celebravit, in quo quatuordecim Ecclesiasticæ Disciplinæ condita sunt Capitula de *Continentia Clericorum*, de *pœnis infligendis Clericis concubinariis*; de *Simoniis*; de *Vicariis perpetuis*, qui *Parochialibus Ecclesiis cum portione congrua præfici debent*; de *his, qui Sæclimonalium pudicitie insidiantur &c.* Hæc quatuordecim Concilii Germanici Capitula *Binji & Cossartii* Notis illustrata extant tomo xi. Concilior. par. i. pag. 295. Concilium Colonienſe anno millesimo ducentesimo

mo sexagesimo *Conradus* Archiepiscopus Colonien-
sis convocavit, in quo de reformatione Cleri, vi-
delicet contra Clericos concubinos, negotiato-
res, illiteratos, & Simoniacos, condita sunt Capi-
tula XIV. quæ habentur tomo XI. Conciliorum,
par. I. pag. 785. Præter hæc quatuordecim de re-
formatione Cleri Capitula, alia viginti octo de re-
formatione Monachorum Benedictinorum in co-
dem Concilio Colonienfi statuta sunt, eaque recen-
sentur tom. XI. Conciliorum pag. 792. *Guido*, S. Lau-
rentii in Lucina Presbyter Cardinalis, Sedis Apo-
stolicæ in Saltzburgensi Provincia & Diocesi Pra-
genfi Legatus, Concilium Viennæ in Austria indi-
xit anno millesimo ducentesimo sexagesimo septi-
mo, in quo undeviginti Capitula sancita sunt de *vita*
& *honestate Clericorum*; de *puniendis Clericis concubi-*
nariis; de *excommunicandis his, qui bona Ecclesiarum*
occupant ac detinent, aut Clericis vim inferunt; de *plu-*
ribus Beneficiis, quibus annexa est cura animarum, quæ
à Clericis, absque Sedis Apostolicæ dispensatione, reti-
neri prohibentur, de *persolvendis Decimis*; de *ferenda*
excommunicatione in Usurarios tam Clericos, quàm
Laicos; de *Curatis, qui ad residentiam, subtractione*
fructuum, ab Episcopis compelli debent; de *Abbatibus,*
quibus inhibetur, ne Calices vel patenas seu sacras ve-
stes benedicere vel consecrare, aut munia Episcopalia
obire præsumant, nisi à Sede Apostolica speciale obti-
nuerint privilegium; denique de *Judæis coercendis,*
& de aliis rebus ad reformandam Ecclesiæ Disci-
plinam necessariis multa decernuntur in his undevi-
ginti Concilii Viennensis Capitulis, quæ extant
tomo XI. Conciliorum part. I. pag. 858. *Fridericus*
Saltzburgensis Archiepiscopus, & Sedis Apostolicæ

Legatus, Concilium Provinciale in sua Metropoli pro recipiendis Decretis Cōcilii Oecumenici Lugdunensis II. anno millesimo ducentesimo septuagesimo quarto congregavit, in quo viginti quatuor edita sunt Decreta de Provincialibus Ordinibus S. Benedicti Capitulis, quæ singulis annis ab Abbatibus cogi debere præcipitur, quia eorum neglecta celebratione, observantia Regularis fuerat collapsa; de obedientia & delictis Monachorum, quæ illic puniri jubentur, ubi commissa sunt; de Beneficiorum pluralitate Sacris Canonibus vetita; de residentia in Beneficiis, quibus cura animarum annexa est; de Vicariorum in Ecclesiis cum portione congrua institutione; de pœna, cui subiacere debent Clerici non Viatores, qui in Sacris Ordinibus constituti tabernam ingrediuntur, aut ad aleas vel taxillos ludunt; de vagis Scholaribus, quibus aliquid erogari prohibetur; de ludis, quos vulgus vocabat Episcopatum puerorum, in Ecclesiis, & à personis Ecclesiasticis fieri prohibitis, de celebrandis diebus festis Sanctorum Saltzburgensis Ecclesiæ Patronorum Ruperti, Virgilii & Augustini; de Ecclesiarum Advocatis, qui admonentur, ut ab indebitis vexationibus Ecclesiarum, & bonis ipsarum abstineant, debitisque juribus sint contenti. Hæc & alia hujusmodi Disciplinam tam Ecclesiasticam, quàm Monasticam spectantia decernuntur in his viginti quatuor Concilii Saltzburgensis in Bavaria Capitulis, quæ habentur Tomo XI. Conciliorum Part. 1. pag. 998. Siffridus Colonienſis Archiepiſcopus, anno millesimo ducentesimo octuagesimo Provinciale Concilium in sua Metropoli habuit, in quo de vita, honestate, & Officio Clericorum; de Sacramentorum administratione; de Clericis concubinariis; de Monacho

chorum & Monialium disciplina, & de aliis rebus Ecclesiasticis condita sunt duodeviginti Capitula, quę extant Tom. xi. Conciliorum Part. i. pag. 1107. Paulò post celebrationem istius Concilii Colonienfis, *Fridericus* supra laudatus, Archiepiscopus Saltzburgerfis, & Sedis Apostolicę Legatus, aliud Concilium in sua Metropoli anno mclclxxxi. congregavit, in quo Canones octodecim condidit *contra Ecclesiarum alienationes, Beneficiorum curam animarum annexam habentium pluralitatem, immodicos Visitatorum sumptus; contra Patronos & Judices, qui bona morientium Clericorum invadunt; Contra Clericos, qui de manibus Laicorum Ecclesias recipiunt, contra falsarios, contra eos qui violentas manus Clericis inferunt; de Monastica Disciplina &c.* Extant illius Concilii Saltzburgerfis octodecim de Disciplina Ecclesiastica Canones Tomo xi. Conciliorum, Part. i. pag. 1151. *Joannes* Tusculanus Episcopus, Sedis Apostolicę in Germania Legatus, Nationale Concilium *Herbipoli* in Franconia anno millesimo ducentesimo octogesimo septimo celebravit, in quo multa decernuntur de vita & honestate Clericorum, quibus vestes immodestę, tabernarum aditus, ludi taxillorum, frequentationes, ludi, & colloquia cum Monialibus, hastiludia, & torneamenta, gravium interminatione pœnarum prohibentur, & Clerici, qui Concubinas retinent, Beneficiis ipso facto privati denunciantur. De his & aliis rebus pro bono Ecclesię regimine quadraginta duo Capitula in isto Concilio Herbipolensi statuta sunt, quę extant Tomo xi. Conciliorum, Part. ii. pag. 1319. denique, prætermittere non debeo Concilium Budense, quod *Philippus* Firma-

nus Episcopus, in Hungaria, Polonia, Dalmatia, Croatia, Rama, Servia, Lodomeria, Gallicia, Cumania, Sedis Apostolicæ Legatus, in Castro Budensi, Vesprimiensis Diœcesis, anno millesimo ducentesimo septuagesimo nono celebravit, in quo **LXIX.** Canones conditi sunt de Disciplina Ecclesiastica, præsertim de habitu, vita, & honestate Prælatorum, omniumque Clericorum; de Episcopis ex Religiosis Ordinibus assumptis, vel deinceps assumendis, quibus præcipitur, ut sui Ordinis habitum deferant, alioqui Ecclesiæ ingressu & Pontificalium executione prohibeantur; de Divino Officio cum diurno, tum nocturno, quod distinctè & devotè à Sacerdotibus recitari jubetur; de Ecclesiastica jurisdictione; de publicis Concupinariis, qui ab Ecclesiæ ingressu arceri debent, nec non etiam illi, qui domos suas vel possessiones publicis meretricibus, adulteris, incestuosis, aut aliis infamibus personis locant, vendunt, vel donant. De his, & aliis non minoris momenti Ecclesiæ negotiis extant hujus Concilii Budensis Canones sexaginta novem Tomo XI. Conciliorum, Part. I. pag. 1073.

Quod spectat Concilia Nationalia, seu Provincialia, quæ sæculo decimo tertio ad sanciendam Ecclesiæ Disciplinam in Italia fuerunt celebrata, cum pauca sint, his levi digito defungemur. *Bonifacius* Archiepiscopus Ravennas anno millesimo ducentesimo octogesimo sexto Concilium in sua Metropoli celebravit, in quo novem ad restaurandam Ecclesiæ Disciplinam condita sunt Decreta de *joculatoribus & histrionibus non recipiendis; de Indulgentiis, quas Episcopis, Abbatibus, Archidiaconis,*

conis, Præpositis, & aliis, qui alunt aut vestiunt Pauperes, concedit prædicta Synodus Ravennaten-
sis; De Decimis, & de excommunicatione in illos fe-
renda, qui eas persolvere contemnunt; de Casibus,
qui Archiepiscopo in Ravennate Provincia reservan-
tur; de abrogandis & penitus abolendis Statutis, quæ
libertati & consuetudini Ecclesiæ sunt contraria, &
de aliis rebus Ecclesiasticis, quæ legi possunt in
novem hujus Concilii Ravennaten-
sis Decretis in-
sertis Tomo XI. Conciliorum Part. II. pag. 1238.
Otto Archiepiscopus Mediolanensis duo in sua Me-
tropoli celebravit Concilia, quorum primum ha-
bitum est anno MCCLXXXVII. & in eo decem pro
Disciplina Ecclesiastica statuta sunt Capitula, quæ
summatim recenset noster Bzovius ad annum
MCCLXXXVII. & habentur Tomo XI. Concilio-
rum Part. II. pag. 1331. Alterum Concilium
Mediolanense convocavit idem Otto, Archiepisco-
pus Mediolanensis, anno millesimo ducentesimo
nonagesimo primo, in quo post multa ad restau-
randam Ecclesiæ Disciplinam constituta, suppetiæ
ad Terram Sanctam recuperandam decretæ sunt,
ut videre est apud mox laudatum Bzovium ad an-
num MCCXCI. Num. XI. Sed de Conciliis tam Gene-
ralibus, quàm Nationalibus, quæ Sæculo XIII.
variis in locis habita fuerunt, satis hætenus dictum
sit. Nec enim in hoc amplissimo tractando argu-
mento diutiùs versari possumus, cum nobis in hoc-
ce Colloquio adhuc differendum incumbat de
Conciliis cum Oecumenicis, tum Nationalibus
seu Provincialibus, quæ Sæculo decimo quarto ce-
lebravit Ecclesiæ.

D. Fueruntne decimo quarto Ecclesiæ sæculo celebrata plura Concilia Generalia?

M. Unicum dumtaxat Sæculo decimo quarto celebratum est Concilium Generale, *Viennense* videlicet in Galliis, quod inter Concilia Oecumenica decimum quintum censetur, fuitque indictum anno mcccvi i. à *Clemente V.* Pontifice Maximo ob quatuor potissimum causas: primò, ob causam *Templariorum*, quorum Ordo, antehac Sanctissimus, publicâ tum temporis gravissimorum criminum infamiâ laborabat. Secundò, ob causam Fidei variis erroribus lacescitæ; *Fratricelli* nimirum, *Dulcinistæ*, *Beguardi* & *Beguinae*, quibus omnibus, ut in superiori Colloquio ostendimus, præverat Frater *Petrus Joannes Olivi* ex Ordine Minorum, varios errores sparserunt, ad quos compescendos præsentissimo remedio opus erat. Tertiò, ob subsidium Terræ Sanctæ. Quartò denique, ob restaurationem collapsæ Ecclesiasticæ Disciplinae; quæ, ut facilius in integrum restitui posset, Archiepiscopis & Episcopis singulis jussit Summus Pontifex *Clemens V.* ut per se vel per alios viros prudentes, Deum timentes, & habentes præ oculis, omnia, quæ correctionis & reformationis limam exposcerent, subtilitèr inquirerent, fidelitèr conscriberent, & ad Concilii notitiam perferrent. Huic Summi Pontificis præcepto præ cæteris aliis morem gessit, illudque executus est *Guillelmus Durandus* Mimatensis Episcopus, doctrinâ & pietate conspicuus, qui egregium edidit Tractatum inscriptum: *De modo Generalis Concilii celebrandi*. Hæ quatuor causæ convocandi Concilium Generale, *Viennense*, referuntur in Constitutionibus, quæ
Cle-

Clementina vulgò dicuntur, & in convocationis Diplomate, quod incipit: *Regnans in Calis &c.*

D. Concilium Generale Viennense fuitne, celebratum eodem anno, quo à *Clemente V.* Pontifice Maximo indictum est, seu anno millesimo trecentesimo septimo?

M. Concilii Oecumenici Viennensis, quod anno mcccvii. à *Clemente V.* indictum est, ad quadriennium procrastinata fuit celebratio. Quò factum est, ut illud solum fuerit apertum Kalendis Octobris anni millesimi trecentesimi undecimi. Locus, in quo habitum est istud Concilium, fuit Vienna Allobrogum, Archiepiscopalis Sedes ad Rhodanum in Galliis sita. Præfuit Summus Pontifex *Clemens V.* Adfuere, præter Cardinales, Patriarchæ Alexandrinus, & Antiochenus Latini ritus, centum & quatuordecim Episcopi sicut testatur *Guillelmi Nanzii* Continuator (trecentos tamen Antistites huic Concilio Viennensi interfuisse scribunt *Joannes Villanius* & *S. Antoninus*) Inferiorum Prælatorum ingens erat numerus, & Principum Oratores. Post septem circiter menses absolutum est istud Concilium, non verò post biennium, ut per errorem obreplit *Trithemio* Abbati.

D. Templariorum Ordinis originem, Auctorem, finem, & Officium, ad quod in Ecclesia excercendum fuit ille Ordo institutus, memini, te jam exposuisse in Colloquio sexto in Historiam sæculi undecimi. At, cum ille Templariorum Ordo, ut ibidem observasti, fuerit proscriptus, suppressus, ac penitus extinctus in Concilio Generali Viennensi, debes nunc explicare causam, ob quam istud Concilium aboleverit hunc Ordinem, qui, ut testan-

tur

tur Historici Scriptores, quos nuperrimè legi, erat in se laudabilis, bonus, Ecclesiæ utilis, & cui ex officio incumbere Christianæ ditionis fines in Oriente tueri, latrocinia, & incursiones Infidelium Christianos Terram Sanctam pietatis ergò perlustrantes infestantium armis inhibere.

M. Templariorum, seu Equitum militiæ Templi Ordinem multos annos famâ percelebrem floruisse, & Ecclesiæ egregiam navasse operam, nemo diffiteri potest. At, quod maximè dolendum est, Templarii illi Equites progressu temporis immensis opibus aucti, moribusque in deteriora mutatis, eò tandè nequitia prolapsi sunt, ut sui officii penitus immemores, occulta cum Saracenis & Turcis fœdera & conspirationes contra Christianos inirent, seque omni genere impietatis, & nefandæ libidinis flagitiis contaminarent. Inter horrenda crimina, quorum Templarii fuerunt insimulati, hæc præcipua habentur: Primò, quòd compellerent eos, qui huic Ordini nomen dabant, ut *Jesum Christum* abnegarent, & ter conspuerent Imaginem Crucifixi. Secundò, quòd eos cogerent, ut libarent in partibus pudendis oscula. Tertiò, quòd Magister Ordinis, & Præceptores libertatem illis permitterent aversam & nefariam libidinem impunè exercendi. Quartò, quòd cranium quoddam deauratum, prolixâque barbâ adornatum ethnico ritu adorarent. Propter hæc execranda scelera jure merito extinctus fuit in Concilio Generali Viennensi Templariorum Ordo, quippè qui ab Ecclesia cum fuisset institutus, & approbatus ut bonum Christi odorem longè latèque diffunderet, ut exemplum fidelium esset, ut Christianæ sanctitatis formam

mam ac imaginem conversatione sua exhiberet , & sanctum sibi propontum officium magno cum fervore exercens inserviret Ecclesiæ ; ab eo tandem sanctissimo sine prorsus degeneraverat , & generali infamiâ , ob morum corruptelam & abominanda flagitiâ , aspersus , non solum Ecclesiæ inutilis , sed perniciosus evaserat .

D. Cum aliquos Scriptores, præsertim *S. Antoninum* , & *Joannem Villani* de causa Templariorum differentes nudiustertius legerim , sine , quæso , ut nonnullas circa hanc Templariorum accusationem tibi proponam difficultates , quæ mihi , ut candidè fatear , haud leves esse videntur . Non nego quidem, Templarios horum scelerum, quæ mox retulisti , reos fuisse accusatos , sed *S. Antoninus* III. Part. Chronici . Titul. xxi. Cap. 1. & *Joannes Villani* Libro VIII. *Historiæ* Italicè scriptæ Cap. XIII. testantur , primos horumce criminum in Templarios accusatores ac delatores fuisse duos ex eodem Ordine falsos Fratres , ergâ Ordinis moderatores malè affectos , ac perditissimos viros , quorum unus erat Prior MontisFalconis in agro Tolosano , qui Parisiis à Templi Magistro ob hæresim & pessimos vitæ mores perpetuo carceri fuerat addictus ; Alter appellabatur *Noffus*, exul Florentinus, qui itidè ob crimina in carcerem à Prætorè Parisiensi fuerat conjectus . Hi duo proscripti ac scelesti viri , ut suæ libertati consulerent & saluti , prædicta sive vera , sive conficta , Templariorum facinora detulerunt ac propalarunt . Nemo autem non videt , hanc delationem nullum ad puniendos Templarios , & ad abolendum hunc Ordinem , qui antea de Ecclesia tam benè meritus erat , locum ha-

bere

bere debuiffe , utpotè factam ab iniquis viris , & ergà hujus Ordinis moderatores peffimè affectis , quos proinde ab accusatione & testimonio ferendo jura repellebant .

M. Non ab illis duobus dumtaxat ganconibus detecta sunt Templariorum flagitia , fed testium duorum millium depositione probata , nec damnati fuerunt Templarii nisi post factas tum in Gallia à *Clemente V.* Pontifice Maximo , & à *Philippo Pulchro* Galliarum Rege , tum etiam in Aragonia , in Anglia , & in Italia per Judices Ecclesiasticos , diligentes inquisitiones , quibus accessit innumerorum reorum , & præcipuorum hujus Ordinis Professorum aperta & libera confessio , ut constet ex bene multis Instrumentis sive Actis Inquisitionum , quæ laudat *Cl. Petrus Puteanus* in Historia damnationis Templariorum , quæ hic referre & expendere nimis longum esset . Sufficiet obiter observare , *Guillelmum de Parisiis* , Fidei per Gallias Quæsitorem Generalem , Ordinis Fratrum Prædicatorum , ad examen vocasse centum quadraginta Templarios ex Domo Templi Parisiensis , eosque , multis coram testibus integerrimis & probatissimæ fidei , super illis facinoribus Ordini objectis interrogatos , confessos una voce reos habuisse . Auditi sunt etiam inter cæteros Magnus Templi Magister *Jacobus Mola* Burgundus , *Guido* , Delphini Viennensis frater , & *Hugo de Peraldo* , qui eadem crimina confessi sunt . Quin , & ipse *Clementis V.* Pontificis Maximi Cubicularius , qui Ordinis Templariorum Eques erat , horumce criminum sese testem oculatum exhibuit , ut observat *Mariana* , Libro xv. *Historiæ Hispanicæ* Cap. xv. his verbis : in
his

his ipsius Pontificis Cubicularius, qui undecimo ætatis anno ad eum Ordinem adiunctus, visa factaque referebat. His omnibus addi debent publica fama, quæ Templariorum facinora ad Pontificis *Clementis V. & Philippi Pulchri* Galliarum Regis aures detulit, necnon decretorium iudicium contra Templarios post maturum & diuturnum examen in Concilio Generali Viennensi latum. Quis enim credat, (ait *Cabassutius* in sua Notitia Ecclesiastica pag. 490.) contigisse, ut tanta & ex tot dissitis Provinciis convocata Præsulum, Principum, Legatorum, atque insignium Doctorum multitudo, quorum haud exigua pars etiam sanguine vel affinitate plerisque illius Ordinis militibus conjuncta erat, in tam immane flagitium conspiraverit, atque adeò in tanti momenti causa, in qua de potentissimi & sæculari nobilitate illustrissimi Ordinis Orbe universo propagati non modò abolitione, sed etiam atrocissima damnatione, supplicioque agebatur? Undè meritò concludit idem Scriptor, gravi censurâ dignam esse *Trithemii*, aliorumque nonnullorum temeritatem, qui Templarios asserere ausi sunt falsis criminibus laceratos, circumventos, atque oppressos fuisse.

D. Necdùm in animum meum inducere possum, universum Templariorum Ordinem participem ac conscium esse omnium scelerum, quorum fuit accusatus. Nam primò, adeò horrenda & nefanda sunt scelera, quæ huic Ordini obijciuntur, ut penè incredibile sit, Viros nobilitate illustres, professione Religiosos, & obsequio Ecclesiæ mancipatos, deposito omni honoris, pudoris ac Religionis sensu, sese illis flagitiis per totum, quâ latè patet,

patet, Orbem Christianum contaminare potuisse, nemine inter illos reclamante, nemine tam nefanda & immania crimina execrante aut revelante. Præterea, quamvis juridicè auditi & examinati fuerint nonnulli Equites Templariorum Ordinis, nunquam tamen Ordo totus fuit in jus vocatus & auditus; Immò Confessiones horrendorum criminum ab illis Templariis interrogatis & auditis factas, vel metu, vel tormentis, vel promissis fuisse extortas, ex eo maximè probari potest videtur, quòd summus totius Ordinis Magister *Jacobus Mola*, plurimique alii Templarii, qui Parisis flammis addicti sunt, editam ante criminum confessionem revocarunt, ac se ipsos, Ordinemque, criminum objectorum puros & infontes palàm contestati sunt, mortemque intrepidi pro hujus veritatis defensione aspererunt & subierunt.

M. Cùm detestanda illa crimina innumeris depositionibus testium, inquisitionibus ac interrogationibus ubique locorum à legitimis Judicibus Ecclesiasticis factis, atque ipsorum reorum confessionibus probata, comperta ac explorata fuerint; flocci fieri debent omnes conjecturæ, quæ ad probandam Templariorum innocentiam adduci possunt. Facta quippè ex Actis, & Authenticis Instrumentis, non conjecturis & rationibus probantur. Fuerint licet Templarii Natalium splendore incolyti, professione Religiosi, & Ecclesiæ obsequiis dediti; postquam tamen à pio Instituti sui fine turpiter desciverunt, suæque libidini fræna impunè laxarunt, in his sensim sine sensu obscuratum est aurum, mutatus est color optimus, dispersi sunt lapides Sanctuarii, ita ut de illis rectè dici possit, quod

quod de *Origene* ajebat *Hieronymus* : *Ubi bene, nemo melius ; ubi male nemo pejus ;* ac verè in eos quadrent hæc communia Philosophorum Effata : *Corruptio optimi pessima : & ex generosiori vino fit asperius acetum .* Quòd verò in tanta corruptione morum nullus in Templariorum Ordine reclamaverit, nullus de his immanibus flagitiis apud Ecclesiam conquestus fuerit , id certè mirum tibi videri haud debet, cum ejusdem silentii suppetat exemplū, quod nostris temporibus contigit, in spuriiis Mylticis, *Michaëlis de Molinos* Discipulis , qui licèt in sua Secta nefandas veterum Gnosticorum impudicitias omnes ad unum æmulerentur, nullus tamen inter illos per non leve temporis spatium de his sceditatibus & abominationibus apud Ecclesiam conquestus est , sed potius singuli datā operā altissimo sibi imposito silentio sollicitè studuerunt , ut non prodirent in publicum , sive quia suis commodis, & illicitis voluptatibus affatim indulgere volebant, sive quia verebantur , ne suæ Sectæ monstra libidinum prodentes , suæ famæ jacturam facerent , & in se concitarent odium aliorum , quos eadem operā diffamassent . Eandem silentii Templariorum in tanta Ordinis sui morum corruptione causam fuisse facilè crediderim . Verum quidem est, plurimos Templarios , & in primis *Jacobum Mola*, summum Ordinis Magistrum , paulò antequam vivi Parisiis comburerentur, revocasse , quam priùs ediderant, scelerum confessionem , eundemque Ordinis Magistrum , cum ad supplicium raperetur, hæc verba palam fecisse, quæ ex probatè fidei Authoribus refert *Mariana* libro xv. de *Rebus Hispaniæ* capite decimo : *Ego extremo vitæ tempore , cum inutili men-*

Tom.V. Y dacio

dacio locus esse non debet, vera esse nego, ac per omnia numina juro, quæ de Templariorum impietate, criminibusque & ante jactata, & nunc recitata sunt. Ordo enim ille sanctus, justus, ac orthodoxus est. Ego tamen extremo supplicio dignus, qui Pontifice, Regeque hortantibus, flagitia impia sceleraque mentitus sum in Ordinem meum de Religione Christiana optimè meritum: Quod utinam, ò utinam factum non esset! sed quod unum superest, meis delictis, si venia locus est, ignosci postulo, ultròque graviores etiam pœnas depono &c. Id ita contigisse, sicut narrat Mariana, non inficias eo, contendo tamen, ex ea præcedentis scelerum confessionis revocatione, quâ Jacobus Mola Summus Ordinis Magister, plurimique Templarii, antequam ignis supplicium perferrent, publicè declararunt, se ipsos, & Ordinem criminum objectorum puros & infontes esse, inferri non debere confessiones criminum à Templariis factas, metu pœnarum elicitas ac extortas fuisse. Nam primò, etsi Magister Ordinis, & alii nonnulli Templarii priùs editam scelerum confessionem revocaverint, nihiloseciùs multò plures Templarii in priori confessione semper sibi constantes perseverarunt. Secundò, ipsa rei gestæ series, ipsa Inquisitionum Acta ex Regio Chartulario deprompta, nec non Clementis V. Pontificis Maximi Diplomata apertè demonstrant, maximam Templariorum partem spontè ac liberè horrenda flagitia confessam fuisse, eorumque infamem notam universo Ordini inussisse. Tertiò, extant & vetera & recentia exempla hæreticorum, & sceleratorum virorum, qui extrema supplicia subire maluerunt, quàm suos errores vel scelera fateri, quales fuerunt Priscillianistæ, quo-

quorum vulgare ac tritum erat effatum: *jura, per-jura, secretum prodere noli*, ut nihil in præsentia dicam de *Circumcellionibus*, de *Joanne Hus*, *Hieronymo Pragensi*, & aliis Hæreticis, qui ab Ecclesia convicti, & solemni judicio damnati, nunquam suos errores ejurare voluerunt, & mortem irreortis oculis aspexerunt, atque impavidis animis opetierunt, quorum tamen in perferendo ignis supplicio constantia seu pervicacia illos insontes fuisse minimè probat, sicut in confesso est apud omnes Catholicos. Nihil ergo ex hac præcedentis scelerum confessionis revocatione factâ à Magistro Ordinis, & aliis Templariis; nihil etiam ex ipsorum in perferendo ignis supplicio constantia, seu potius pervicacia, extundi potest ad vindicandum hunc Templariorum Ordinem à scelerum infamia, quâ fuit aspersus, ac demùm in Concilio Generali Viennensi omninò extinctus. Obiter tamen advertere debes, hunc Templariorum Ordinem non fuisse in Concilio Generali Viennensi à *Clemente V.* damnatum & abolitum ex rigore juris, seu per modû sententię definitivæ, quam summus Pontifex ferre non potuit, quia totus Ordo Templariorum in jus vocatus & auditus non fuerat. Hi siquidem, qui hujus Ordinis defensionem susceperant Parisiis coram Apostolicis Commissariis, procuratore legitimâ non erant instructi, & se Procuratores instituere non posse absque præsentia & consensu Magistri Ordinis responderunt, ut constat ex Actis publica Notariorum manu exceptis, & relatis à *Petro Puteano* in sua Historia Templariorum. Verùm, quamvis *Clemens V.* hunc Templariorum Ordinem non ex rigore juris, seu per

modum sententiæ definitivæ , non damnaverit , illum tamen tot turpitudinum maculis infamem , proscripsit , abolevit , & suppressit de plenitudine potestatis , & per viam provisionis seu Ordinationis Apostolicæ , ut videre est in damnationis sententia à *Clemente V.* sacro Viennensi approbante Concilio latâ , quæ incipit his verbis : *Ad providam* , ubi hæc leguntur : *Ordinis* , (seu Templariorum) *statum* , *habitum* , atque nomen , non sine cordis amaritudine & dolore , sacro approbante Concilio : non per modum diffinitivæ sententiæ ; cum eam super hoc secundum inquisitiones & Processus , super his habitos , ferre non possemus de jure : sed per viam Provisionis , seu Ordinationis Apostolicæ , irrefragabili & perpetuò valitura sustulimus sanctione , ipsum prohibitioni perpetuæ supponentes &c. ex quibus verbis liquet , Templariorum Ordinem justâ de causa , damnatum & abrogatum esse , licet in jus vocatus & auditus non fuerit .

D. Circâ Abolitionem Ordinis Templariorum factam in Concilio Generali Viennensi hæret adhuc animo scrupulus , quem mihi eximas velim . Legi in Scriptoribus superiùs à me laudatis , videlicet in *Joanne Villani* , & *Sancto Antonino* , abolitionem Templariorum profectam esse ex avaritia *Philippi Pulchri* Galliarum Regis ad eorum bona inhiantis . Sic enim scribit *S. Antoninus* III. Part. Chronicorum Titul. xxi. Cap. i. Parag. iii. Creditur tamen magis inductus (*Philippus Pulcher*) ad extorquendam pecuniam ab illis , seu Templariis , & bona eorum , & ex odio concepto contra Magistrum *Mansionis* , quàm ex zelo justitiæ . Quibus verbis apertè innuit *S. Antoninus* , Templarios fuisse insontes , eorum-

rumque Ordinem extinctum fuisse instigante ac promovente *Philippo Pulchro*, qui eorum bona, quæ maxima in Galliis erant, sibi vindicare, eaque quovis modo obtinere volebat.

M. Promovit quidem *Philippus Pulcher* Rex Christianissimus Templariorum damnationem, & Ordinis abolitionem non ut accusator, non ut denunciator, vel partialis promotor, sed ut Dei Minister, Pugil Fidei Catholica, legis divinae zelator, ad defensionem Ecclesiæ, ut constat ex Regis Protestatione, ipsius litteris ad Summum Pontificem *Clementem V.* insertâ, quas ex Scriniis Regiis laudat *Petrus Puteanus* in Historia Templariorum. Puras etiam manus, animumque ab avaritiæ labe immunem, eo in negotio habuisse *Philippum Pulchrum*, disertè testatur *Clemens V.* in Diplomate, quod incipit, *Regnans in Cælis*, in quo Regem his verbis compellat: Deindè verò Tu, cui eadem fuerant facinora nunciata, non typo avaritiæ, cum de bonis Templariorum nihil tibi vindicare vel appropriare intendas.... sed fidei orthodoxæ fervore, tuorum Progenitorum vestigia clara sequens, accensus, de præmissis, quantum licitè potuisti, te informans, ad instruendum & informandum nos super iis, multas & magnas nobis informationes per tuos Nuncios & Litteras destinaisti. Sed *Philippi Pulchri* in promovenda Templariorum Ordinis abolitione animum ab avaritiæ sordibus alienum manifestò ostendit bona fides & diligentia, quâ Rex ille Christianissimus votis ac mandatis Pontificis post extinctum illum Ordinem è vestigio obsecutus, Investituram hujusmodi bonorum, Equitibus S. Joannis Hierosolymitani concessit, eosque toto, quâ latè patet, Regno in possessionem

misit omnium bonorum immobilium ad Templarios pertinentium, & ex mobilibus exiguum dumtaxat ac modicam summam, *Clemente V.* Pontifice Maximo ultrò consentiente, sibi vendicavit, in justam expensarum in hujus causæ prosecutione à se factarum compensationem, sicut constat ex Instrumento, quod læpè laudatus *Petrus Puteanus* ex Regesto veteri Senatus consultorum Parisiensis Curiz transcripsit, illudque inseruit in *Historia Templariorum*. Scio, aliquot esse Scriptores Italos, videlicet *Joannem Villani*, *S. Antoninum*, quos laudasti, & insuper *Trithemium* Abbatem in *Chronico Hirsaugiensi*, *Paulum Æmilium* in lib. *De Rebus Gestis Francorum* in *Philippo Pulchro*, atque *Papirium Mafsonum* lib. III. *Annalium*, qui in *Philippum Pulchrum* Galliarum Regem in causa Templariorum non satis æqui fuerunt, eumque avaritiæ in promovenda Templariorum Ordinis abolitione insinularunt. Sed illi Scriptores decepti sunt falsis rumoribus, qui per Italiam increbuerant, majorisque auctoritatis esse debent rerum in causa Templariorum gestarum Monumenta autographa, quæ in Regiis Scriniis integra etiamnum asservantur, necnon Pontificia Diplomata *Clementis V.* & sententia lata in Ordinem Templariorum in Concilio Generali Viennensi, quàm privatorum quorundam Scriptorum narratio. Non desunt etiam Scriptores cœvi, quos inter censentur Continuator *Guillelmi Nangii* ad annum MCCCVIII. & *Bernardus Guidonis* Lodovensis Episcopus ex Ordine Fratrum Prædicatorum assumptus, in *Chronico Romanorum Pontificum*, qui disertè testantur, abolitionem Ordinis Templariorum profectam esse non ex avaritia *Philippi*

lippi Pulchri Galliarum Regis , sed ex foetore , & clamore criminum immanium , quibus tam Ordo Templariorum , quam Ordinis Professores erant contaminati , quibus excitatus est Christianissimus ille Rex , ut omnes Templarios toto Regno capi , & in carcerem abjectâ omni cunctatione conjici juberet , atque à *Clemente V.* Pontifice Maximo postulare extinctionem illius Ordinis , ad quem delendum satis erat fama seu infamia publica tam fœdorum & immanium criminum , quam nulla purgatione abstergere poterant Ordinis capita , & membra ; *Infamia* siquidem *publica* , *habet locum accusatoris* , ut docet *S. Thomas* secundæ secundæ Quæst. LXVII. Art. III. in Responsione ad secundum sibi objectum argumentum . His itaque falsis rumoribus adversus *Philippum Pulchrum* Galliarum Regem , quibus decepti fuere nonnulli Scriptores Itali , nulla fides haberi debet , sicut nec ullam prorsus fidem merentur quidam alii Scriptores , qui narrant , *Clementem V.* Pontificem Maximum , & *Philippum Pulchrum* Galliarum Regem à *Jacobo Mola* , magno Ordinis Templariorum Magistro , paulò antequàm vivus Parisiis combureretur , ad Divinum Tribunal vocatos , dictâ die obiisse . Hæc quippe narratio fabulis accensenda est , cum nihil simile ab antiquis Scriptoribus memoriz proditum sit , non à *Guillelmi Nangii* continuatore , non à *Joanne Villani* , *S. Antonino* , *Trithemio* , *Paulo Emilio* , & aliis ; etsi quidam illorum , ut mox observavimus , calumnias in *Philippum Pulchrum* Galliarum Regem falsis rumoribus vulgatas in sua Chronica absque examine retulerint . Sed satis hætenus dictum sit de Templario-

rum damnatione, eorumque Ordinis abolitione decretâ in Concilio Oecumenico Viennensi.

D. Recense nunc, juxta Ordinem suum, omnia, quæ gesta ac definita fuerunt in Concilio Generali Viennensi?

M. Concilium Oecumenicum Viennense tribus Sessionibus fuit absolutum. In priore, quæ habita est die xvi. mensis Octobris in Ecclesiâ Metropolitana *Sancto Mauritio* sacrâ, *Clemens V.* Pontifex Maximus, celebrationis Concilii causas exposuit; postea de Templariorum causâ, de subsidio Terræ Sanctæ, de Clericorum reformatione varii Tractatus, ac multæ deliberationes habitæ sunt. In altera Sessione, quæ tertiâ die Aprilis anni trecentissimi duodecimi ineuntis habita est, præsentē *Philippo Pulchro* Galliarum Rege, qui circâ Quadragessimam, cum filiis & fratribus, multorumque Prælatorum ac Procerum comitatu advenerat, discussis diuturno examine, qui in Templariorum causa conscripti fuerant, processibus, *Sacro approbante Concilio*, promulgata est sententia, quâ planè extinctus est Templariorum Ordo, eorumque bona Equitibus Sancti Joannis Hierosolymitani adjudicata fuere. Tertiâ & postrema Sessio habita est pridie Nonas Maji, & in ea promulgata fuit Clementina prima *De Summa Trinitate*, & *de Fide Catholica*, ubi damnantur tres *Petri Joannis Olivi* errores, primus, quo assererat, Christi adhuc viventis latus lanceâ perfoctum fuisse; alter, quò negabat, Animam rationalem esse formam corporis; Tertius, quo habitus Fidei & virtutum in Baptismo infundi inficiabatur. Contra primum errorem profitetur Sancta Synodus, *Christum, spiritu*
emise

emisso, perforari lancea sustinuisse latus, ut inde formaretur Ecclesia coniux Christi. Contra secundum errorem definivit, ut si quisquam deinceps asserere, defendere seu tenere pertinaciter præsumpserit, quòd Anima Rationalis seu intellectiva non est forma corporis humani per se & essentialiter, tanquàm hæreticus sit censendus. Contra tertium errorem sauxit, hanc opinionem, quæ dicit tam parvulis, quàm adultis conferri in Baptismo gratiam informantem & virtutes, tanquam probabiliorem, & Dicitis Sanctorum ac Doctorum modernorum Theologiæ magis consonam & concordem eligendam esse ac propugnandam. Beguardorum, & Beguinarum, nec non Fratricellorum, & Dulcinistarum, errores, de quibus diximus in superiori Colloquio, fuerunt itidem in hoc Concilio Generali Viennensi damnati per Clementinam Ad nostrum, quæ legitur inter Clementinas, titulo de Hæreticis. Volunt aliqui cum S. Antonino editas pariter fuisse in eodem Concilio Viennensi Clementinam Ex gravi; De Usura, quâ hæreseos damnati sunt, qui pertinaciter assererent, Usuram non esse peccatum; item Clementinam Ne in agro, De statu Monachorum; Clementinam quoque Dudum; De Sepulturis; & Clementinam Religiosi; De Privilegiis, & excessibus Privilegiatorum. Verùm istas Clementinas in hoc Concilio Generali fuisse publicatas non constat apud omnes. Habita est in hoc Concilio Viennensi deliberatio de subsidio Terræ Sanctæ, ad quod ferendum sese promptissimum exhibuit Philippus Pulcher Rex Christianissimus, qui promisit, se infra annum cum liberis, fratribus, ingentique Procerum ac Nobilium numero transfretaturum; Gallicani verò Præsules Deci-

Decimas ad sexennium ad hoc sacrum perficiendum opus concesserunt , quod à Summo Pontifice & Concilio approbatum est , sicut refert *Guillelmi Nangii* continuator . Sed deliberationes, consilia , & promissa hoc de sancto negotio habita , executioni non fuerunt mandata , & in irritum ceciderunt . Denique , in Concilio Generali Viennensi , cùm *Philippus Pulcher* Galliarum Rex vehementer urgeret *Clementem V.* ut memoriam *Bonifacii VIII.* damnaret , noluit Pontifex Maximus Regis voluntatem implere, sed invidiosissimum istud negotium hoc pacto composuit ac finivit . Memoriam *Bonifacii VIII.* vindicavit quidem , eumque Catholicum & legitimum fuisse Pontificem declaravit ; famam tamen *Philippi Pulchri* Galliarum Regis integram esse voluit , editoque Decreto statuit , nullam Regi , ejusve filiis , aut hæredibus pœnam , vel detrimentum aliquod inferri , aut ullam infamiae notam inuri posse ob gesta contra *Bonifacium VIII.* sicut refert *S. Antoninus III. Part. Chronic. Titul. xl. Cap. iii.*

D. Cùm nullum aliud Concilium Generale, præter Viennense, in Galliis, fuerit Sæculo decimo quarto celebratum, ad habendam plenam aliorum hujus Sæculi Conciliorum notitiam, breviter nunc, quoad ejus fieri poterit, differere debemus de Conciliis Nationalibus, seu Provincialibus, quæ eodem Sæculo XIV. ad restaurandam Ecclesiæ Disciplinam in Gallia, Hispania, Italia, Anglia , & Germania habita fuerunt .

M. Primum Concilium Nationale, quod in Galliis habitum est Sæculo decimo quarto, fuit Concilium *Compendiense*, indictum ab Archiepisco-
po

po Remensi *Roberto de Courtenay* anno mcccī. in eo septem edita sunt Capitula, quæ spectant Disciplinam Ecclesiasticam & Clericorum immunitates; videlicet, excommunicati sunt Laici Judices, qui multas pro Clericorum criminibus exigunt, eademque censurâ perculsi sunt Abbates, qui conspiraverint in suos Episcopos, seu contra jurisdictionem Episcopalem de mutua defensione fœdus inter se iniverint. Fulminati pariter sunt Magistratus, qui non patiebantur, ut Laici in foro Ecclesiastico convenirentur: decretum etiam est, ut ubicumque à Judice temporali caperetur Clericus, à Divinis cessaretur Officiis. Extant hujus Concilii Compendiensis septem Capitula tomo xi. Concil. part. 2. pag. 1472. *Amaneus* Auscitanus Episcopus Concilium Provinciale anno mcccīī. celebravit apud *Nugarolium* (Armeniacorum id oppidum est in Dicecesi Auscensi situm ad Garumnæ fluvium) in quo Decreta undeviginti edita sunt contra Clericos peregrinos, qui, absque suorum Episcoporum commendatitiis litteris sacra facientes, excommunicantur; contra Judices temporales, qui sese causis Ecclesiæ admiscentes eidem censuræ subjiuntur; contra perjuros, qui denunciantur excommunicati, intestabiles & infames; contra decimarum detentores, concubinarios, usurarios; adulteros manifestos &c. qui omnes excommunicatione feriuntur. Extant istius Concilii Nugaroliensis undeviginti Decreta Disciplinam Ecclesiasticam spectantia tomo xi. Concil. par. 2. pag. 1478. Alterum Concilium Compendiense *Robertus de Courtenay* Archiepiscopus Remensis coëgit anno mccciv. in quo decretum est, illos ipso facto esse excommuni-

catos, qui alios nominatim excommunicatos & interdictos ad Divina, vel ad Ecclesiasticam Sepulturam admittunt, aut Sacrorum celebrationi coram hujusmodi hominibus ab Ecclesia proscriptis interesse præsumunt. Item denunciantur ipso facto excommunicati hi, qui Matrimonia clandestina contrahunt, procurant, aut præsentia suâ cohonestant; necnon Magistratus, qui vectigalia Clericis imponunt, & tallias atque collectas ab iis exigunt. Denique, præcipitur Clericis, ut mensâ frugali utantur, sintque contenti juscule & duobus ferculis in conviviis, nisi superveniant Magnates. Extant hujus secundi Concilii Compendiensis pro reformatione Ecclesiasticæ Disciplinæ quinque Capitula tom.xi. Concil. part. 2. pag.1493. *Amaneus* mox laudatus Auscitanus Archiepiscopus Concilium in Metropoli sua anno mcccviii. congregavit, in quo actum est de juribus Ecclesiæ vindicandis, de celebratione Missarum, de usuris, de Monachis, & de aliis hujusmodi morum reformationem spectantibus. Habentur hujus Synodi Auscitanæ Canones sex tomo xi. Concil. par.2. pag.1500. *Philippus de Marigny* Archiepiscopus Senonensis Concilium Parisiis congregavit anno mcccxi. cujus ad vigorem Ecclesiasticæ Disciplinæ renovandum, & abusus quosdam extirpandos *contra detentores bonorum Ecclesiæ, & contra citationes generales* extant Capitula tria tom.xi. Concil. pag.1602. *Gaufridus* Turonensis Archiepiscopus cum suis Suffraganeis & Abbatibus Concilium Salmurienſe anno mcccxv. coegit, in quo quatuor promulgati sunt Canones contra perturbatores jurisdictionis Ecclesiasticæ, & contra Archidiaconos, qui ab examinandis pecunijs

exi-

exigunt. Extant quatuor illi Concilii Salmurientis Canones tomo xi. Concil. par. 2. pag. 1617. Eodem anno *Amaneus* Auscitanus Archiepiscopus alterum Nugaroliense habuit Concilium, in quo quinque Decreta edita sunt; quibus statuitur, ut Domini temporales non occupent Ecclesias vacantes: ut Clerici à Judicibus Sæcularibus non compellantur: ut supplicio ultimo damnatis Pœnitentiæ Sacramentum non denegetur &c. Extant quinque hujus Concilii Nugariolensis Decreta tom. xi. Concil. par. 2. pag. 1620. *Robertus de Courtenay* Archiepiscopus Remensis eodem anno mcccxv. Silvanectense celebravit Concilium, in quo *Petrus* Episcopus Catalaunensis, & Galliarum Regni Cancellarius, qui multorum criminum reus accusabatur, absolutus est, & in Sedem suam restitutus, ut videre est apud *Guillelmi Nangii* Continuatores ad annum mcccxv. Idem *Robertus de Courtenay* Remensis Archiepiscopus aliud Silvanectense Concilium habuit anno mcccxvii. in quo contra invadentes bona Ecclesiastica actum est, & statutum, eos, si intra octo dies non satisfecerint, arctioribus censuris esse cogendos. *Guillelmus de Meloduno* Senonensis Archiepiscopus Concilium in sua Metropoli convocavit anno mcccxx. in quo quatuor promulgata sunt Decreta de servando jejunio in Vigilia Festi Corporis Christi; de cessionem à Divinis, quando Clericus à Judice Laico detinetur; de professione Monachorum; de vita & honestate Clericorum, quibus prohibetur, ne caligas peregrini coloris, comam, barbamque prolixam gerant. Eadem Decreta iisdem ferè verbis concepta publicavit *Guillelmus de Meloduno* Archiepiscopus Senonensis in

Con-

Concilio , quod cum suis Suffraganeis Parisiis celebravit anno mcccxxiii. *Gasbertus Arelatensis, Jacobus Aquensis, & Bertrandus Ebredunensis*, Archiepiscopi, cum suarum Provinciarum Episcopis, Concilium Avenione anno millesimo trecentesimo vigesimo sexto celebrarunt, in quo plurima in morum & disciplinæ reformationem, Clericorum privilegia & immunitates, nonnulla etiam contra bonorum & jurium Ecclesiasticorum invasores, censurarum Ecclesiæ contemptores, & circa Ecclesiasticam jurisdictionem, res matrimoniales, & testamentarios statuta fuere, ac quinquaginta novem edita Capitula, quæ *Petrus Gassendus*, Vir doctissimus, & Ecclesiæ Dinienfis Præpositus, publici juris fecit, & ad calcem *Historiæ Ecclesiæ Dinienfis* edidit, eaque postea *Coffartius*, & *Binius* suæ Conciliorum Collectioni inseruerunt tom. xi. part. 2. pagina 1717. *Guillelmus de Flavacourt* Auscitanus Archiepiscopus Concilium Marciacense eodem anno mcccxxvi. congregavit, in quo quinquaginta sex edita sunt Capitula de ætate & qualitate Ordinandorum; de litteris dimissoriis; de Officio Archidiaconi; de Officio Ordinarii; de perjuriis, exceptionibus, appellationibus, de Ecclesiis, & Clericorum immunitate ac libertate, de Censuris, de Reliquiis & Indulgentiis, de Ecclesiarum constructione & consecratione, necnon de aliis Ecclesiasticæ Disciplinæ Capitibus; quæ extant tom. xi. Concil. par. 2. pag. 1747. Alterum Marcianense Concil. habuit idem *Guillelmus de Flavacourt* Auscitanus Archiepisc. ann. mcccxxix. in causa *Anesancii* Episcopi Adurenfis à perditionibus occisi, in quo decretum est, ut sicarii, qui istud parricidium commiserant, ab Ecclesiæ con-

for-

sortio amoverentur, & quicumque eos hospitio exciperent, anathemate configerentur. *Guillelmus de Bria* Archiepiscopus Remensis Concilium Silvanectense celebravit anno MCCXXVI. in quo ordo habendi Concilii Provincialis per Remensem Provinciam in posterum observandus stabilitur; jurisdictio & immunitas Ecclesiæ confirmantur, solutio accurata decimarum sub pœna excommunicationis imperatur; hi, qui sunt excommunicati, ab actione, patrocínio, & testimonio repelluntur; clandestina matrimonia sub pœna excommunicationis prohibentur. Extant illius Concilii Silvanectensis Canones VII. tom. XI. Concil. par. 2. pagina 1768. Idem *Guillelmus de Bria* Remensis Archiepiscopus Concilium Compendiense ann. MCCXXXIX. peregit, in quo statutum est, ut Constitutiones pro Juribus, immunitatibus, privilegiis & bonis Ecclesiæ tuendis latæ executioni mandarentur, sicut. & Constitutiones contra usurarios editæ. Præcipitur etiam, ut singulis diebus Dominicis excommunicati denuncientur omnes & singuli usurpantes, impediētes, & perturbantes ordinariam jurisdictionem Ecclesiasticam. Extant hujus Concilii Compendiensis Canones VII. tom. XI. Concil. part. 2. pag. 1775. *Petrus* Archiepiscopus Rotomagensis Concilium in Monasterio *B. Mariæ de Prato* propè Rothomagum anno MCCXXX. celebravit, in quo de Divinis Officiis religiosè celebrandis; de vita & honestate Clericorum, ac Monachorum; de Decimarum Collectione; de promovenda Sacra Expeditione; de Casibus Sedi Apostolicæ, & Episcopis reservatis; de promulgandis & observandis Superiorum Conciliorum Provincialium Constitutionibus,

bus, & de aliis Disciplinæ Ecclesiasticæ Capitibus actum est. Tredecim Constitutiones, quæ in hoc Concilio Rothomagensi editæ fuerunt, habentur tomo XI. Concil. part. 2. pag. 1783. *Petrus* Archiepiscopus Turonensis anno millesimo trecentesimo trigesimo sexto Concilium habuit in Castro Gonterii Diœcesis Andegavenſis, in quo duodecim edita sunt Decreta pro Libertate & Immunitate Ecclesiastica, & contra jurisdictionis & bonorum Ecclesiæ invasores ac detentores. Habentur duodecim illius Concilii apud *Castrum Gonterii* celebrati Decreta tomo XI. Concil. part. 2. pag. 1842. Eodem anno millesimo trecentesimo trigesimo sexto *Fulcrandus* Archiepiscopus Bituricensis Concilium in sua Metropoli convocavit, in quo plurima ad Disciplinam Ecclesiasticam restaurandam sancita sunt, nonnullæ Constitutiones Provinciales, quæ injuriâ temporis & desuetudine penè exoleverant, fuerunt renovatæ, & aliæ contra violantes Ecclesiasticam jurisdictionem, contra perturbatores pacis & libertatis Ecclesiæ, de novo promulgatæ sunt. Extant Canones duodecim in hoc Concilio Bituricensi editi tom. XI. Concil. in Appendice pag. 2522. Paulò post celebrationem illius Concilii Bituricensis, Trium Provinciarum Arelatenſis, Ebredunensis, & Aquisgranensis Archiepiscopi Concilium Avenionense II. anno millesimo trecentesimo trigesimo septimo celebrarunt, in quo quinquaginta novem Decreta Concilii Avenionensis I. habiti anno MCCCXVI. repetita & confirmata sunt, eisque alia decem addita pro bono Ecclesiæ regimine, ac morum reformatione. Extant hæc LXIX. Concilii Avenionensis II. Decreta, seu Canones, tomo XI. Con-

Conciliorum part. 2. pag. 1852. & apud *Baluzium* cum ejusdem Notis in *Concilia Galliæ Narbonensis* pag. 341. *Joannes* Remensis Archiepiscopus Concilium Noviomense anno millesimo trecentesimo quadragesimo quarto celebravit, in quo sanciti sunt Canones septemdecim, qui mores, Disciplinam, jurisdictionem, & Ecclesiæ libertates spectant, & extant tomo XI. Concil. par. 2. pag. 1886. *Guillelmus* Senonensis Archiepiscopus Concilium Parisiis indixit anno millesimo trecentesimo quadragesimo sexto, in quo tredecim edita sunt Decreta de immunitate Clericorum contra Sæculares Magistratus; de habitu Clericorum; de legatis Ecclesiæ in alios usus non convertendis, quàm in quos relicta sunt; de observandis antiquis Decretalibus, & Clementinis Constitutionibus; de Xenodochiis, Leprosariis, & Eleemosynariis. In Canone ultimo conceduntur Indulgentiæ his, qui horâ *ignitegii*, seu serò, cùm tegitur ignis, ter recitant Salutationem Angelicam. *Petrus* Narbonensis Archiepiscopus Concilium anno millesimo trecentesimo quinquagesimo primo habuit *Biterris*, in quo octo Decreta condita sunt de inclinatione capitis ad Sanctissimum Nomen *JESUS*; de reverentia Sacro Christi Corpori exhibenda, cùm ad ægrotos deferretur; de Indulgentiis, quæ conceduntur orantibus pro Summo Pontifice, Rege, & Prælati; de observatione & executione Canonis *Omnis utriusque sexus &c.* Hujus Concilii Biterrensis Acta & Decreta Vir clarissimus *Baluzius* Notis illustravit & edidit inter *Concilia Galliæ Narbonensis* pag. 91. indeque inserta sunt tomo XI. Conciliorum par. 2. pagina 1922. *Simon* Turonensis Archiepiscopus anno

Tom.V.

Z

mille-

millesimo trecentesimo sexagesimo quinto Concilium Andegavense celebravit, in quo triginta quatuor conditi sunt Canones de collatione Beneficiorum; de vita, honestate, & frugali mensa Clericorum; de Beneficiatorum, & maximè curam animarum habentium residentiâ; de Monachorum & Canonicorum Regularium vestibus reformandis; de abstinentia à lacte & butyro diebus jejuniorum, & præsertim Quadragesimali tempore &c. Extant hujus Concilii Andegavensis triginta quatuor Canones tomo XI. Conciliorum part. 2. pagina 1939. His Conciliis Provincialibus in Galliis Sæculo decimo quarto celebratis duo alia dumtaxat addam, videlicet *Vaurense*, & *Narbonense*, quorum primum, seu *Vaurense*, à trium Provinciarum Narbonensis, Tolosanæ, & Auscensis Archiepiscopis anno MCCCXLVIII. habitum est apud *Vaurum* Occitanie oppidum, Gallicè *Lauaur* dictum, in quo condita sunt centum triginta tria Decreta Disciplinam Ecclesiasticam spectantia. Primum, quod est prolixissimum, complectitur fidem Catholicam, seu Catechesim ad Christianarum plebium informationem accuratam de Septem Sacramentis; de Virtutibus Theologicis & Moralibus; de Donis Spiritus Sancti; de eleemosynis corporalibus & spiritualibus; de vitiis capitalibus; de decem præceptis Decalogi. In aliis Decretis, seu Canonibus agitur de Causarum Matrimonialium judicio; de jurisdictione & libertate Ecclesiastica contra invasorum & oppressorum injurias tuendâ; de Instrumentis, Contractibus, & Juramentis; de vestibus Canonicorum & familiarium Episcopi, & cujusvis alterius Prælati; de portione congrua Curatorum; de auditio-

ne

ne Missæ Parochialis Dominicis diebus ; de Matri-
moniiis clandestinis ; de Canonicorum studiis ; de
Indulgentiis , quæ conceduntur convenientibus ad
Missam *Beatæ Mariæ* , & his , qui orant pro Roma-
no Pontifice , vel qui ad sonum campanæ circa So-
lis ortum pro pace & prospero statu Ecclesiæ quin-
quies Orationem Dominicam in honorem quinque
vulnerum Salvatoris nostri , & septies Angelicam
Salutationem ad honorem septem gaudiorum , quæ
de Filio suo Beata Virgo habuit , devotè recitave-
rint &c. Extant hujus Concilii Vaurenſis centum-
triginta tria Decreta tom.xi. Concil. par. 2. pagi-
na 1969. & apud *Baluzium* cum suis Notis Concil.
Galliæ Narbon. pag. 124. Concilium Narbonense,
jubente *Gregorio XI.* Pontifice Maximo, *Petrus* Nar-
bonensis Archiepiscopus in sua Metropoli celebra-
vit anno mcccLxxiv. & in eo viginti octo Discipli-
næ Ecclesiasticæ edita sunt Capitula , quorum qua-
tuor priora agunt de celebrandis Synodis . In aliis
verò plurima statuuntur contra fictos Apostolos ,
qui absque missione prædicabant ; contra excom-
municatos, qui sepulturâ privari debent ; contra
bonorum Ecclesiasticorum invasores , vel jurisdi-
ctionis, & Immunitatis Ecclesiasticæ oppressores ;
contra eos, qui blasphemant in Christum, Beatam
Virginem, & Sanctos &c. Extant viginti octo istius
Concilii Narbonensis Decreta apud *Baluzium*.
Concil. *Galliæ Narbon.* pag. 301. & tomo xi. Con-
cil. in Appendice pag. 2497. Hæc sunt omnia Con-
cilia Nationalia, seu Provincialia, quæ Sæcul. XIV.
in Galliis celebrata fuerunt .

D. Perçense nunc Concilia Nationalia , seu
Provincialia , quæ Sæculo xiv. in Hispania habita
sunt.

M. De Conciliis Nationalibus , seu Provincialibus , quæ in Hispania ad restaurandam Ecclesiæ Disciplinam Sæculo xiv. habita sunt, lato calamo disserit , eaque doctissimis Notis illustrat Eminentissimus *Josephus de Aguirre* Tomo III. *Conciliorum Hispaniæ*, à quibus nos, ne longiùs , quàm par sit, nostrum protrahatur Colloquium , breviter expediemus . In Primis, *Gonsalvus* Archiepiscopus Tolletanus anno mcccii. celebravit Concilium *Pennafidelense* (Vaccæorum Hispaniæ Tarraconensis id oppidum est) in quo præcipitur Clericis ut horas Canonicas recitent , concubinas dimittant , Eucharistiam morientibus administrent , Confessionum arcana omninò celent . Præterea , institutus est dies Festus in honorem B. *Ildephonsi* , aliaque de Decimis , & Immunitatibus Ecclesiarum statuta sunt . Constitutiones Ecclesiasticas xv. in hoc Concilio *Pennafidelenfi* promulgatas refert Cardinalis *de Aguirre* Tomo III. *Conciliorum Hispaniæ* pag. 538. Prætermitto Concilia Tarraconense , & Salmanticense , quæ anno mcccxi. fuerunt celebrata, & quorum Acta refert Cardinalis *de Aguirre* pag. 546. & 547. quia in his duobus Conciliis nihil occurrit , quod sit memoriâ dignum . Celebre fuit Concilium Vallisoletanum , quod *Guillelmus* Sabinensis Episcopus , & Sedis Apostolicæ in Hispania Legatus, anno mcccxi. celebravit, in quo præcipitur , ut quovis biennio Synodi Provinciales , & annis singulis Diocesanae celebrentur : Ut Curati Parochianos suos necessaria ad salutem edoceant : Ut Sæculares iudices , qui Clericos ad Tribunalia sua de rebus & causis Ecclesiastici Fori litigare compulerint , excommunicati denuntientur :

tur :

tur : Ut feriatio à servilibus operibus Dominicis & Festivis diebus observetur . Excommunicantur falsi testes , Advocati , mediatores , & omnes, qui ad falsum testimonium ipsos inducunt , donec pro damnis illatis fecerint satis . Denique, agitur de vita & honestate Clericorum , de solutione Decimarum , de abstinencia Quadragesimalis , & quatuor temporum , de pœna Simoniaci imponenda, de Clericorum studiis , de excommunicandis his , qui sacrilegos , maleficos , incantatores , ariolos consulunt , & auguriis attendunt . Extant Disciplinae Ecclesiasticæ Canones xxvii. in Concilio Valisoletano conditi , quos edidit Card. *de Aguirre* Tomo iii. Concil. Hispaniæ pag. 556. *Joannes* Archiepiscopus Toletanus tria Concilia celebravit , quorum primum habuit in sua Metropoli anno mcccxxiii. cujus Acta legi possunt apud Eminentissimum Cardinalem *de Aguirre* , qui primus ex MS. *Mondexarenfi* ea in lucem protulit Tomo iii. Concil. Hispaniæ pag. 560. Alterum Concilium in sua itidem Metropoli Toletana convocavit idē *Joannes* Archiepisc. Toletanus anno mcccxxiv. in quo Concilii Vallisoletani Decreta renovarunt Patres , & quædam alia disciplinam & Clericorum mores spectantia statuerunt . Legendus est Cardinalis *de Aguirre* , qui octo Constitutiones Ecclesiasticas in hoc secundo Concilio Toletano sancitas , & cum MS. *Mondexarenfi* collatas inseruit Tomo iii. Concil. Hispaniæ pag. 576. Idem *Joannes* Archiepiscopus Toletanus Concilium Provinciale , *Complutense* dictum , apud Alcalam tenuit anno mcccxxv. in quo tres Constitutiones ad Clericorum mores pertinentes, quæ in Synodo Toletana anno mcccxxiv.

habitâ promulgatæ fuerant , lucidiùs promuntur & explicantur , ut videre est apud eundem Cardinalem *de Aguirre* pag. 578. Denique *Ægidius* Archiepiscopus Toletanus duo Concilia Provincialia coegit , quorum primum in sua Metropoli celebravit anno mcccxxxix. & in eo quinque Decreta condita sunt de illiteratis ad Clericatum non promovendis ; de studio Theologiæ & juris Canonici in Ecclesiis Cathedralibus instituendo ; de executione Canonis : *Omnis utriusque sexus* pro Confessione singulis annis facienda &c. Extant hæc quinque illius Concilii Toletani Decreta apud sæpè citatum Cardinalem *de Aguirre* Tomo III. Concil. Hispaniæ pag. 609. Alterum Concilium idem *Ægidius* Archiepiscopus Toletanus anno millesimo trecentesimo quadragesimo septimo celebravit, quod alii appellant *Toletanum* , sed à Cardinali *de Aguirre* meliùs *Complutense* dicitur , cùm apud *Complutum* fuerit congregatum . In eo præcipuè actum est de vita , & honestate Clericorum ; de abusuum correctione ; de coercendis bonorum Ecclesiasticorum in vasoribus , vel gravem injuriam personis Ecclesiasticis inferentibus &c. Quatuor Canones in hoc Concilio editos refert Cardinalis *de Aguirre* Tomo III. Concil. Hispaniæ pag. 614. Legi possunt etiam apud eundem Cardinalem quædam alia Concilia Provincialia Sæculo decimo quarto in Hispania celebrata , quæ nos consultò prætermittimus , quia nihil in eis, quod singulari aliqua observatione dignum sit , offendimus .

D. Fueruntne in Italia Sæculo decimo quarto convocata plura Concilia Nationalia , seu Provincialia ?

M. Qua-

M. Quatuor dumtaxat Concilia Nationalia, seu Provincialia, in Italia Sæculo decimo quarto convocata, & à *Raynaldo* Ravennate Archiepiscopo fuisse celebrata, memorant Scriptores; quorum primum ab Episcopis Provinciæ Ravennatis, Præside *Raynaldo* Archiepiscopo Ravennate, in Metropoli habitum est anno millesimo trecentesimo septimo, illiusque meminit *Rubeus* lib. vi. *Historia Ravenn.* Alterum Concilium Ravennense idem *Raynaldus* Archiepiscopus indixit in sua Metropoli anno millesimo trecentesimo undecimo, in quo triginta duo Decreta edita sunt de Episcoporum defunctorum solemnibus exequiis, de incertis Reliquiis, quæ sub Altaribus recondi debent, & fidelium venerationi non exponi; de auditione Missæ Parochialis Dominicis diebus; de pœnis, quæ infligi debent his, qui blasphemant in Deum, Beatam Virginem & Sanctos, vel qui censuras Ecclesiasticas contemnunt, nec admoniti resipiscere volunt; de eleemosynis, quæ ab Episcopis, Capitulis, & Monasteriis, quorum sufficientes sunt redditus, fieri debent &c. De his, & de aliis Disciplinæ Ecclesiasticæ Capitulis extant Canones xxxii. Tomo xi. Conciliorum Part. II. pag. 1569. Tertium Concilium idem *Raynaldus* Archiepiscopus Ravennas anno millesimo trecentesimo decimo quarto celebravit *Argentea*, quod Ravennatis Diœceseos Castrum est, & in eo ad promovendum divinum cultum, ad morum reformationem, ad stabilendam Clericorum vitæ puritatem, honestatem & modestiam in vestibus, ad bona Ecclesiastica contra invasores conservanda, & ad sancienda alia hujusmodi Disciplinæ Ecclesiasticæ Capita conditi

Z 4

sunt

sunt decem Canones, qui extant Tomo XI. Concil. Part. II. pag. 1613. Quartum denique Concilium idem Ravēnas Archipræsul *Raynaldus* an. MCCCXVII. Bononiæ congregavit, in quo Constitutiones Ecclesiasticæ in superioribus Conciliis editæ, denuò fuerunt approbatæ, ac viginti quatuor Decreta, sancita sunt de custodia vacantium Ecclesiarum: de vita & honestate Clericorum: de certo numero Canonicorum in Ecclesiis Cathedralibus statuendo: de Saliariis Notariorum, & Sigilliferorum &c. Extant hujus Concilii viginti quatuor Decreta, Tomo XI. Concil. Part. II. pag. 1655.

D. Veniamus ad Concilia Nationalia, seu Provincialia, quæ in Anglia Sæculo decimo quarto habita sunt, & ea compendiosè describe, quæ in his ad restaurandam Ecclesiæ Disciplinam fuerunt statuta.

M. *Henricus Spelmanus*, qui omnia Concilia Provincialia, & Diocesana Angliæ, Scotiæ, & Hiberniæ in duobus Tomis Londini anno MDCLXIV. typis excusis, studiosè collegit ac digessit, de Conciliis Nationalibus, seu Provincialibus, quæ Sæculo XIV. in Anglia fuere celebrata, disserit Tom. I. r. à pag. 438. usque ad pag. 660. ex quo nos pauca hîc desorabimus. Inter Concilia, quæ Sæculo XIV. in Anglia ad sancendam Ecclesiæ Disciplinam fuerunt celebrata, primum est Londinense, quod anno MCCCXI. *Walterus* Cantuariensis Archiepiscopus cum suis suffraganeis habuit, in quo ad regimen Ecclesiasticum meliùs ordinandum conditi sunt octo Canones de Testamentis; de Visitatione Archidiaconorum, de introductionibus, institutionibus, & provisionibus ad Ecclesiastica Beneficia;

cia; de Immunitatibus Clericorum &c. Acta & Canones illius Cōcilii Londinensis habentur apud *Spelmannum* Tom. 2. pag. 488. Alterum Concilium Londinense *Simon Mepham* Archiepiscopus Cantuariensis congregavit anno mcccxxviii. in quo novem conditi sunt Canones de cessandis à servilibus operibus in die Parasceves; de celebrando Festo Conceptionis *B. Mariæ* Virginis; de immunitatibus Clericorum; de oblationibus & Decimis; de Testamentis; de publicandis Bannis matrimonialibus &c. Acta & Canones hujus Concilii Londinensis refert *Spelmannus* Tomo 2. pag. 493. Idem *Simon Mepham* Archiepiscopus Cantuariensis Concilium in suis *Ædibus Lambethanis* circa annum mcccxxx. celebravit, in quo decem Decreta edita sunt de ornamentis & officio Altaris; de Confessionibus audiendis; de servando sigillo Confessionis; de administrando ægrotis Sacramento Extreme Unctionis; de clandestinis Matrimoniis; de prævio habendo examine eorum, qui ad Sacros Ordines sunt promovendi; de non alienandis Ecclesiarum bonis; de excommunicandis tēr, aut quater in anno Sortilegis, Maleficis, Perjuris & Incendiariis &c. Acta & decem Canones hujus Concilii Lambethensis legi possunt apud *Spelmannum* Tomo 2. pag. 497. Refert etiam *Spelmannus*, eundem *Simonem Mepham*, Archiepiscopum Cantuariensem, aliud Concilium, *Maghsfeldense* dictum, celebrasse anno mcccxxxii. in quo edita est Constitutio, quæ Dies Festos, qui pio animi affectu per totum annum observari debent, enumerat, ut videre est apud citatum *Spelmannum* Tom. 2. pag. 500. *Joannes Straford*, Archiepiscopus Cantuariensis,

tria

tria Londini indixit Concilia . Primum habuit anno MCCCXLI. & in eo edita est unica utilissima Constitutio ad compescendam avaritiam Clericorum , qui in Beneficia necdum vacantia se intrudere , & eadem per fas & nefas occupare moliebantur , ut legere est apud *Spelmannum* , qui hujus Concilii Londinensis Constitutionem inseruit Tomo 2. pag. 546. Alterum Concilium Londini idem *Joannes straford* Archiepiscopus Cantuariensis habuit anno MCCCXLI. in quo ea , quæ pro bono Ecclesiæ regimine in superioribus Conciliis jam statuta fuerant , duodecim editis Canonibus renovata ac confirmata sunt , extantque apud *Spelmannum* Tom. 2. pag. 572. Tertium Concilium Londini idem Archipræsul *Joannes Strafard* celebravit anno MCCCXLI. in quo Disciplina Ecclesiastica firmata est septemdecim Decretis de habitu & honestate Clericorum ; de conditionibus servandis in dimissione Beneficiorum ; de Decimarum & oblationum fraudatoribus ; de debitis intestatorum solvendis , & de Testamentorum executione ; de Matrimoniis clandestinis ; de excommunicandis his , qui jurisdictionem Ecclesiasticam impediunt , & qui herbas , aut arbores , in Cæmeteriis Ecclesiarum & Cappellarum crescentes , metunt , velunt , dissipant , absque Rectorum arbitrio &c. Extant hujus Concilii circa Ecclesiasticam Disciplinam septemdecim Decreta apud *Spelmannum* Tomo 2. pag. 581. *Simon* Cantuariensis Archiepiscopus tria celebravit Concilia . Primum est Lambethense II. in quo promulgata est Constitutio Synodalis , in qua præcipitur , ut Clerici capitalium criminum convicti Episcopalibus carceribus perpetuò

petuò mancipentur, ac tenui victu sustententur. Alterum, est Maghfeldense II. in quo præfixi sunt dies Festi, qui per annum observari debent. Tertium, est Lambethense III. in quo unica edita est Constitutio, in qua Presbyterorum stipendia præfiniuntur, iisque ex una Diœcesi in alteram absque litteris dimissoriiis emigratio prohibetur. Acta & Statuta trium illorum Conciliorum inseruit *Spelmannus* Tomo 2. pag. 597. 609. & 610. Denique, *Joannes Thoresby* Archiepiscopus Eboracensis anno MCCCXLVII celebravit Concilium Eboracense, & in eo decem publicavit Constitutiones Ecclesiasticas contra immodestias & irreverentias, quæ fiebant in Ecclesiis & Cæmeteriis; contra Nutrices parvulos suffocantes; contra eos, qui decimas non soluunt, vel qui alienant bona Ecclesiastica, vel clandestina contrahunt matrimonia &c. Decem istæ Constitutiones Ecclesiasticæ in hoc Concilio Eboracensi publicatæ extant apud *Spelmannum* Tomo 2. Concil Britannicæ. Hæc sunt omnia Concilia Nationalia, seu Provincialia, quæ in Anglia Sæculo XIV. ad restaurandam Ecclesiasticam Disciplinam habita sunt. Fuerunt quidem alia nonnulla Concilia Provincialia sub finem Sæculi XIV. in Anglia ad proscribendos *Wicleffi* errores celebrata, sed quia Historiam *Wicleffianæ* Hæreseos ad Colloquia nostra in Historiam Sæculi XV. remisimus, opportuniùs etiam hæc Anglicana Concilia adversus *Wicleffianam* hæresim habita referemus in nostris Colloquiis in Historiam Sæculi XV. ubi de *Wicleffiana* hæresi datâ operâ disferemus. Hic tantum breviter observare debes, pacatam fuisse Angliam, & præclaris Religionis mo-

monumentis toto Orbe illustratam, quamdiù ab illa Sanctissimorum Canonum norma non deflexit; sed apud illam obsolescere cœpisse antiquum, illud, quo florebat, decus, cum primùm vetustæ Religionis integritatem novis opinionum commentis, doctrinarum divortiis, perpetuis de Mysteriorum nostrorum Sanctitate contentionibus, ac præcipiti sacris in rebus innovandi licentiâ adulterare cœpit. Heu! fortunata olim Britannia, nunc velut Insula fluctuans, turbis, tempestatibus ac naufragiis undique jactatur, tot abrepta ventis in diversa pellentibus, quot varias pugnantesque Sectas una nunc miserè confectatur, quodque gravius est, ejus incolæ, post extinctam avitam Religionem, suos legitimos Reges Cathólicos expulerunt, similesque evaserunt his hominibus, qui, cum sint à multis infessi, correptique impuris Spiritibus, rapiuntur ab iisdem, vexantur sævissimè, suumque in se furorem acuentes, non membris, non capiti parcunt, neque possunt suo regi spiritu, dum à multis alienis & adventitiis agitantur.

D. Ut nihil planè desit notitiæ, quam hætenus tradidisti, Conciliorum Nationalium, seu Provincialium, quæ Sæculo XIV. in rem Discipline Ecclesiasticæ fuerunt variis in locis celebrata, necesse est ut Concilia Provincialia, quæ eodem Sæculo in Germania habita sunt, extremis, ut dicitur, digitis, attingas, & sic Colloquio nostro finem imponamus.

M. Duo tantùm Concilia Provincialia, quæ sunt majoris momenti, Colonienſe nimirum, & Saltzburgenſe, in Germania Sæculo XIV. celebrata referam, & ea, quæ in his pro restauratione Eccle-

Ecclesiasticæ Disciplinæ sancita sunt, paucis verbis complectar. Concilium Colonienſe anno mil-leſimo trecentefimo decimo habitum eſt ab *Henrico* Archiepiſcopo Colonienſi, & in eo duodetrigin-ta edita ſunt Decreta contra eos, qui manus vio-lentas Clericis inferunt; contra Laicos, qui veſti-galia, & quasvis exactiones Eccleſiis imponunt; contra Clericos Concubinariorum & Sanctimonialium conſupratores; contra Matrimonia clandestina. Innovantur & confirmantur Decreta *Engilberti*, Colonienſis quondam Archiepiſcopi, contra inva-ſores & detentores rerum Eccleſiaſticarum. Præ-cipitur etiam, ut Statuta *Siffredi*, Colonienſis quondam Archiepiſcopi, de vita, honeſtate Cleri-corum, obſerventur & executioni mandentur, ſi-cut & *Conradi* Archiepiſcopi Colonienſis Statuta de reformatione Monachorum Benediſtinorum, alia-que huiusmodi Disciplinam tam Eccleſiaſticam, quàm Monaſticam ſpectantia decernuntur in his duodetriginta Capitulis, quæ extant Tomo XI. Concil. Part. 2. pag. 1517. Concilium Saltzbur-genſe anno mil-leſimo trecentefimo octogefimo ſe-xto à *Pilgrino* Saltzburgenſi Archiepiſcopo, & Se-dis Apoſtolicæ Legato fuit celebratum, & in eo ſeptemdecim condita ſunt Capitula de Ritu Ca-thedralis Eccleſiæ, quem ſinguli Clerici in Divi-nis Officiis ſequi obſtringuntur; de cenſuris & ca-ſibus Epifcopo, aut Sedi Apoſtolicæ reſervatis, à quibus ſub pœna ſuſpenſionis Presbyteri abſolve-re non debent; de Clericorum habitu; de Orna-mentorū Eccleſiaſticorum, & Sacrorum vaſorum uſu; de cenſuris ferendis in Dominos tempo-rales, qui Collectis, talliis, & exactionibus Cle-
ricos

ricos vexant ; de Immunitate Ecclesiarum & Viro-
rum Ecclesiasticorum ; de pœnis in eos decernen-
dis, qui bona vacantium dignitatum & Ecclesiarum
occupant , rapiunt , usurpant , & in suos usus con-
vertunt ; de excommunicandis Usurariis , & his ,
qui Clericos ad sæcularia tribunalia trahunt , & de
ipsismet Clericis , qui coram sæculari iudice res-
pondent , excommunicatione itidem feriendis ; de
non admittendis ad sacrum faciendum Presbyteris
peregrinis , ignotis , & absque testimonialibus li-
teris passim volitantibus &c. De his , & aliis rebus
ad morum correctionem , vitæ honestatem , & Ec-
clesiasticam Disciplinam spectantibus plura decer-
nuntur in his Concilii Saltzburgensis Capitulis, quæ
extant Tomo XI. Concil. Part. 2. pag. 2061. Ha-
bes nunc omnia Concilia Nationalia seu Provin-
cialia , quæ Sæculo Ecclesiæ decimo quarto in Gal-
lia , Italia , Hispania , Anglia & Germania ad
fanciendam Ecclesiæ Disciplinam fuerunt celebra-
ta , quæque ipse pro ratione Instituti leviori digito
perstrinxi , Concilii cujusque locum , tempus , oc-
casionem , rerum in eo gestarum seriem , Canonum
conditorum numerum , locum , ubi etiamnum re-
periuntur illi Canones , tribus quasi verbis notasse
contentus . At , cum singulos Canones , brevitati
consulendo , enumerare , ac fusiùs exponere non
licuerit , poteris , si uberiores illorum Canonum
expositionem habere desideres , consulere amplissi-
mam omnium Conciliorum editionem adornatam
à Binio , Labbeo , & Cossartio , nec non cujusque
gentis Collectanea Synodica , videlicet *Britannica*
Spelmanii , *Gallica* Sirmondi , & Baluzii , *Hispani-*
ca Loaisæ , Ferdinandi Mendosæ , & Josephi de
Agu-

Aguirre S. R. E. Cardinalis, ex quibus quàm plurima hauries, quæ in studio Antiquitatis, & Disciplinæ Ecclesiasticæ magno tibi adjumento erunt.

COLLOQUIUM V.

*De Viris Illustribus, qui doctrina, vitæ-
que Sanctimonia Sacula Ecclesiæ
XIII. & XIV. illustra-
runt.*

MAGI-
STER.

IN perenne Ecclesiæ Catholicæ decus & gloriam cedit, quòd in ea omni ævo floruerint Viri Illustres, qui illibatis suis moribus, doctrinâ, eruditione, & præclaris monumentis eam exornarunt, atque tam sacræ, quàm Ecclesiasticæ tuendæ antiquitati additi, novitates exploserunt, suæque nomina æternitati consecrarunt. Contrà verò Hæretici, rerum novarum cupidi, varios in errores præcipientes feruntur, dùm apud illos, ut verbis utar Vincentii Lirinensis, pro Cælesti dogmate humana superstitiones introducuntur, dùm benè fundata antiquitas scelestâ novitate subruitur, dùm Superiorum instituta violantur, dùm rescinduntur scita Patrum, dùm convelluntur definita Majorum, dùm sese intra sacratæ atque incorruptæ vetustatis castissimos limites prophana ac novellæ curiositatis libido non continet. De Viris itaque illustribus, qui Sæculis XIII. & XIV. magnum Ecclesiæ splendorem contulerunt, sermonem in hocce Colloquio habituri sumus. Sed quia
in

in tanta eruditorum Scriptorum segete nimis longum esset singulorum vitam, mores, gestaque copiose describere, ut magnitudo rerum dignitasque postularer, de illis pauca dumtaxat delibabo, ut Colloquiorum nostrorum brevitates jubet, & Opera, quæ lucubrarunt, referam quàm brevissimè poterò.

D. Cùm rerum concinna dispositio lumen, memoriæ maximè afferat, obsecro te, ut Viros Illustres, qui Sæculis XIII. & XIV. præcipuâ laude aliquâ floruerunt, in decem distribuas Classes, itaut in prima sint celebriores Orientis Scriptores; in altera Galli; in tertia Itali; in quarta Hispani; in quinta Angli; in sexta Germani; in septima Monachi; in octava Scriptores ex Ordine Fratrum Prædicatorum; in nona Theologi Scholastici, qui Ordinem Fratrum Minorum illustrarunt; & in ultima insignes Jurisconsulti. Sic discretè & electè in decem Classes digestos omnes illos Scriptores promiscuè non confundam, & illorum nomina, eruditionis genus, & ea quæ ediderunt Opera, faciliùs memoriæ meæ mandabo.

M. In Ecclesia Orientali Sæculo decimo tertio fuerunt aliqui Scriptores, quos hic continenti ordine recensebo. *Nicolaus*, patriâ Hydruntinus, vulgò *Otrante*, floruit anno mcci. & Græcè scripsit vârios Tractatus adversus Latinos, videlicet Tractatum de Processione Spiritus Sancti, in quo Hugonem Etherianum, cujus mentionem fecimus in Colloquio quinto in Historiam Sæculi duodecimi, refellere conatur. Edidit etiam idem *Nicolaus* Tractatum De pane fermentato à Christo in suprema Cæna Discipulis suis tradito, & Tractatum De jejuniis Latinorum in Sabbato, conjugio Sacerdotum, aliisque argu-

argumentis, quorum fragmenta nonnulla refert *Leo Allatius* in libris *de consensu Occidentalis, & Orientalis Ecclesiæ*. Circa idem tempus claruerunt quatuor alii Scriptores Græci, nimirum *Nicetas, Michaël Acominatus Choniata, Nicetas Acominatus, & Joel*, quorum primus, ceu *Nicetas*, ex Magnæ Ecclesiæ Constantinopolitanæ Cartophylace factus Archiepiscopus Thessalonicensis, scripsit Dialogorum libros sex *de Processione Spiritus Sancti* contra Latinos, edidit quoque *Responsionem ad Interrogata Basilii Monachi*, quæ extat in *Jure Græco-Romano* lib. 5. pag. 345. *Michaël Acominatus Choniata*, Athenarum Archiepiscopus, composuit *Orationem funebrem in mortem fratris sui Nicetæ*, quæ habetur in *Bibliotheca Patrû* tom. xxv. pag. 180. Scripsit etiam quosdam Sermones, inter quos est unus *de Cruce*, qui teste *Labbeo* in sua *Bibliotheca MS.* adhuc extant inediti in *Bibliotheca Regis Christianissimi*. *Nicetas Acominatus*, dictus etiam à patria *Choniates*, frater fuit prædicti *Michaëlis Acominati*, Athenarum Archiepiscopi. Sub Imperatoribus *Alexio Comneno, & Isaacio Angelo* ad præcipuas Aulae dignitates evectus est, sed captâ anno mccciv. à Latinis Constantinopoli, Nicæam in Bithynia profectus est, ubi anno mccv. obiit. Scripsit hic *Nicetas Choniates* libros xxi. quibus Historiam annor. lxxxv. complexus est ab obitu *Alexii Comneni* Imperatoris, ubi desinit *Zonaras*, usque ad annum millesimum ducentesium tertium. Hæc *Nicetæ* Historia edita est Parisiis in *Typographia Regia* cum aliis *Byzantinæ Historiæ* Scriptoribus. Author est idem *Nicetas* librorum viginti septem *Thesauri Orthodoxæ Fidei*, quorum quinque priores vertit latinè &

cum doctissimis Notis anno MDLXXX. Parisiis edidit *Petrus Morellus*, & extant in Bibliotheca Patrum, tomo xxv. Reliqui libri perierunt, præter fragmentum ex libro vigesimo de ordine, qui observari debet ab his, qui è Saracenica superstitione ad Christianam fidem convertuntur, quod Græco Latinum editum, est in secundo volumine Auctarii ad Bibliothecam Patrum ann. 1624. *Joel* fuit Chronographus Græcus, qui edidit *Chronographiam Compendiariam* ab Orbe condito usque ad *Alexii Duca Murzulphi*, Græcorum Imperatoris, obitum, idest, usque ad annum MCCIV. quo à Latinis capta est Constantinopolis, ut ostendimus in primo Colloquio. Hanc *Joelis* Chronographiam Græco-Latinam, unâ cum *Georgii Acropolita* Historia, typis Regiis edidit *Leo Allatius*, Parisiis anno MDCLI. Hic autem *Georgius Acropolita*, cujus Historiam unâ cum *Joelis* Chronographia, Parisiis publicavit *Leo Allatius*, fuit patriâ Constantinopolitanus, doctus, diligens, prudens ac fidelis Scriptor, qui continuavit Historiam Byzantinam ab an. MCCIV. quo à Latinis capta est Urbs Constantinopolis, usque ad annum MCCLXI. quo eadem Urbs à *Michaële Palaeologo*, Græcorum Imperatore, recuperata fuit. De hoc *Georgio Acropolita* multa habet *Leo Allatius* in Diatriba De *Georgiis & eorum Scriptis*. His Scriptoribus Græcis, qui Sæculo XIII. in Ecclesia Orientali floruerunt, addi meritò debent duo Patriarchæ Constantinopolitani, *Manuel Caritopulus*, & *Germanus* hujus nominis II. nec non *Nicephorus Blemmida*, insignis Monachus, qui oblatus sibi à *Theodoro Lascari* Patriarchatum Constantinopolitanum modestè recusavit. Prior, seu *Manuel Caritopu-*

topulus, edidit *Solutiones quarundam Quæstionum*. Scripsit etiam *Decretum de Translatione Episcoporum*, & *Decretum de jure Patronatus*, quæ extant in *Leunclavii Jure Græco-Romano* lib. 3. pag. 238. & seq. Alter Patriarcha Constantinopolitanus, seu *Germanus* hujus nominis II. multas Epistolas, Orationes, & Homilias composuit. Opus etiam de *Processione Spiritus Sancti adversus Latinos: Responsionem Synodicam ad delegatos Fratres Minores & alios: Opuscula de Azymis, de Purgatorio, & de tribus modis administrandi Baptisma* scripsit idem *Germanus* Patriarcha Constantinopolitanus, ut testatur *Leo Allatius* lib. 2. de consensu Eccles. Orient. & Occid. cap. 14. §. 3. His duobus Patriarchis Constantinopolitanis jure merito præponi debet *Nicephorus Blemmida*, non solum quia sibi oblatam Patriarchalem dignitatem pertinaci modestiâ recusavit, ut mox diximus, sed quia etiam Latinis impensè favit, eorumque dogmata adversus suos constanter propugnavit. Reperiuntur quidem etiamnum inter Opera hujus *Nicephori Blemmidæ* Opuscula quædam, in quibus adversus Latinorum dogmata, præcipuè de Processione Spiritus Sancti disputat. At *Leo Allatius* lib. 2. de consensu Occid. & Orient. Eccles. cap. 14. §. 4. asserit, vel *Nicephorum Blemmidam* necdum discussâ causâ hæc Opuscula juvenem procudisse, & re postea diligentius examinatâ revocasse; vel potius hæc Opuscula à Græcis Schismaticis sub *Nicephori Blemmidæ* nomine fuisse protrusa, cum in prædictis Opusculis neque sint rationum pondera, neque doctrina, neque styli ratio eadem, quæ in cæteris ejusdem *Nicephori Blemmidæ* Opusculis observantur. Patriarchalem Eccle-

fixæ Constantinopolitanæ dignitatem, quam, ut diximus, modestè recusavit *Nicephorus Blemmida*, obtinuit *Arsenius*, dictus *Autorianus*, qui scripsit *Synopsim Canonum*, ex Patribus, Synodorumque Statutis collectam, & in titulos cxli. digestam, quæ extat Græco-Latina in secundo tomo *Bibliothecæ Juris Canonum Henrici justelli*. Composuit etiam idem *Arsenius*, Patriarcha Constantinopolitanus, *Testamentum*, quod Græco-Latinum publicavit doctissimus *Cotelerius* tomo 2. *Monumentorum Ecclesiæ Græcæ* pag. 168. Inter Historicos Græcos, qui sæculo Ecclesiæ XIII. claruerunt, primas tenet *Georgius Pachymeres*, patriâ Nicænus, qui *Historiam Rerum Constantinopolitanarum sub Imperatoribus Michaelæ, & Andronico Palæologis* ab anno mclviii. usque ad annum mcccvi. in tredecim libros digestam continuavit, eamque integram, ac doctissimis Notis illustratam *Petrus Possinus* Soc. Jesu Romæ Græco-Latinam publicavit duobus tomis comprehensam, quorum prior prædiit anno mclxvi. Alter anno mclxix. Aliorum Operum, quæ scripsit idem *Pachymeres*, & quorum multa adhuc incedita in Bibliotheca Regis Christianissimi asseruantur, prolixum satis Catalogum exhibet *Leo Allatius* in sua Diatriba de *Georgiis, & eorum Scriptis*. Erga Romanam Ecclesiam non benè affectum fuisse *Pachymerem*, ideòque circumspectè esse legendum rectè monet *Possinus*.

Verùm omnes illos Scriptores Græcos, quos hætenus laudavi, *Joannes Veccus*, Patriarcha Constantinopolitanus, doctrinâ, vitæque sanctimoniâ longo post se intervallo reliquit. Ille quippè est, qui, ut diximus in Colloquio secundo,

agen-

agendo de Patriarchis Constantinopolitanis, unionem Ecclesiæ Græcæ cum Latina ardentibus votis exoptavit, inivitam in Concilio Lugdunensi II. invito animo ad extremum usque vitæ spiritum cum suis sociis propugnavit, & plura pro Latinorum doctrina adversus Græcos scripsit Opera, quæ refert *Leo Allatius* lib. 2. de *Consensu Eccles. Occid. & Orient.* cap. 15. §. 8. & quorum nonnulla idem *Allatius* edidit in *Græcia Orthodoxa*.

Joannes Veccus, Patriarcha Constantinopolitanus, malorum, quæ sub *Andronico* Græcorum Imperatore pro defensione unionis Ecclesiæ Græcæ cum Latina constanter passus est, Socios habuit *Georgium Metochitam*, & *Constantinum Meliteniotam*, qui unâ cum ipso in exilium missi sunt, & Latinorum dogmata adversus Græcos editis lucubrationibus vindicarunt, ut videre est apud Leonem *Allatium* loco mox laudato §. 9. & 11. His *Joannis Vecci* Sociis haud immeritò adjungi potest *Simon*, ortu Cretensis, ex Ordine Fratrum Prædicatorum, qui iisdem temporibus tribus Tractatibus *De Processione Spiritus Sancti etiam ex Filio*, cum Græcis Schismaticis strenuè conflixit. Non defuerunt tamen eâ ætate Græci Schismatici, qui in Latinos scripserunt, inter quos *Georgius Cyprius* contra *Joannem Veccum* Patriarcham calumum strinxit, quem ille graviore rationum pondere, utpotè pro veritate pugnans, confutavit. *Georgius Moschabar*, Magnæ Ecclesiæ Cartophylax, multa itidem in Latinam Ecclesiam, ejusque dogmata, suis lucubrationibus oblatravit, quibus *Joannes Veccus* Patriarcha perdoctè respondens, Schismatici illius Autoris impetum fastumque compressit. Con-

Constantinus Acropolita, Magnus Logotheta, plures *De Processione Spiritus Sancti* Tractatus contra Latinos scripturavit. Hi sunt Scriptores Græci, qui in Ecclesia Orientali Sæc. XIII. floruerunt. Prætermittere tamen haud debemus *Gregoriū Abulpharajum*, natione Arabem, professione Medicum, & Sectâ Jacobitam, seu Melchitam, qui eodem sæculo variis scientiis instructus, & præcipuè medicinæ gloriâ clarus fuit, ediditque *Compendium Dynastiæ X.* Dynastiis absolutum, ex variis variarum gentium monumentis depromptum, quod Arabicè & Latine vulgavit *Pocockius* Oxonii anno MDCLXIV.

D. Prosequere, quæso, seriem aliorum Scriptorum Græcorum, qui Sæculo XIV. aliquâ nominis celebritate claruerunt.

M. De Palamitarum erroribus, quibus Sæculo XIV. Ecclesia Orientalis haud parùm exagitata fuit, satis diximus in Colloquio tertio, ubi de Hæresibus, quæ Sæculis XIII. & XIV. in Ecclesia emerferunt, disseruimus. Quapropter, hic sufficiet breviter referre Scriptores Græcos, qui in hac controversia, *Barlaamum* inter & *Gregoriū Palamam* in Oriente exorta, hinc inde aliqua Opera ediderunt. Palamitarum errores Scriptis propugnarunt non solum *Gregorius Palamas*, horumce errorum Author, cujus Orationes duas *Combesisius* noster in *Auctario Bibliothecæ Græcorum Patrum* edidit, sed etiam *Isidorus Patriarcha*, & *Philotheus*, ex Monacho Metropoli Heracleensis, & postea Patriarcha Constantinopolitanus, nec non *Josephus Bryennius* Oratione de *Transfiguratione*. Favet etiam Palamitarum erroribus *Joannes Cantacuzenus*, Græcorum Imperator, vir alioqui eruditione insignis,

&

& in Historia versatissimus, quippè qui, assumpto sibi *Christoduli* nomine fictitio, eleganti non minùs quàm diffuso stylo concinnavit *Historiam Rerum à duobus Andronicis Imperatoribus & à se ipso gestarum* ab anno MCCCXX. usque ad annum MCCCLVI. libris quatuor comprehensam, quæ latinè ex *Jacobi Pontani* versione, unà cum ipsius & *Gretseri* Notis prodit Ingolstadii anno MDCIII. Parisiis verò Græcè & Latinè cum utriusque Notis anno MDCXLV. Edidit etiam idem Imperator *Joannes Cantacuzenus* Orationes tres, & Apologiam, seu Assertiones IV. pro *Fide Catholica adversus Saracenos & Alcoranum*, quæ Græco-Latinæ prodierunt Basileæ annis MDLV. Extat etiam in Bibliotheca Vaticana Opus ejusdem Imperatoris manuscriptum, cui titulus est: *Contradictiones adversus Prochorum Cydonium*. At illos Scriptores Græcos, Palamitarum errorum patronos, confutarunt, & Catholicam adversus eos eruditæ Scriptionibus veritatem propugnarunt alij Scriptores Græci, *Barlaamus*, *Gregorius Acindynus*, Monachus Græcus, *Nicephorus Gregoras*, qui author est *Historiæ Byzantinæ* ab anno MCCIV. usque ad annum MCCCXLI. *Joannes Cyparissiotus*, *Demetrius Cydonius*, & *Manuel Calecas*, Ordinis Prædicatorum, vir longè doctissimus. *Cyparissoti* Sermones aliquos *Palamicarum Transgressionum* ingentis Operis, quod in libros quinque divisum extat MS. in Bibliotheca Regis Christianissimi, & nostri *Manuelis Calecæ* librum de *Essentia & Operatione* adversus *Gregorium Palamam* edidit doctissimus noster *Combesius* in *Auctario Bibliothecæ Patrum Græcorum*.

Præter illos Autores Græcos, qui in Con-

troverſia Barlaami, & Gregorii Palamæ eruditionis ſuæ ſpecimina ultrò citròque præbuerunt, alii re-
 cenſentur Scriptores Græci, qui Sæculum XIV.
 doctrinâ ſuâ in Oriente illuſtrarunt, quos hic indi-
 gitare ſufficiet: *Nicephorus Calliſtus* Hiſtoriam Ec-
 cleſiaſticam ex *Euſebii*, *Socratis*, *Sozomeni*, *Theo-*
doreti, *Evagrii*, aliorumque Scriptorum monumen-
 tis contexuit, quam tamen fabulis & quiſquiliis
 paſſim reſperſit. Hoc *Nicephori Calliſti* Opus con-
 ſtabat olim libris viginti tribus, & Hiſtoriam à
 Chriſto nato uſque ad *Leonis* Imperatoris, dicti
Philophi, mortem, ideſt, uſque ad annum 911.
 complectebatur, ſed nunc extant tantum illius Ope-
 ris libri octodecim, qui à nato Chriſto uſque ad
Phocæ Imperatoris obitum, ſeu ad annum DCX. pro-
 grediuntur. Hanc *Nicephori Calliſti* Hiſtoriam La-
 tinè vertit *Joannes Langius*, quæ typis excuſa eſt
 Baſileæ anno MDLII. Antuerpiæ anno MDLXII. &
 ibidem curâ *Frontonis Ducai* Græco-Latinè prodiit
 anno MDCXXX. *Maximus Planudes*, Monachus Græ-
 cus, & *Andronico* Imperatori apprime charus,
 ſcripſit librum de *Proceſſione Spiritus Sancti contra*
Latinos, quem *Arcudius* Notis illuſtratum, unâ cum
 Reſponſionibus *Befſarionis* edidit inter Opuscula
 aurea Romæ an. MDCXXX. Alia idem *Maximus Pla-*
nudes Opera, variaſque conſcripſit Episto-
 las, quæ partim in lucem prodierunt, partim adhuc MSS.
 teſte *Lambecio*, aſſervantur in Bibliotheca Cæſarea.
Theophanes, Archiepiſcopus Nicænus, composuit
 Opus inſigne adverſus *Judeos*, in duos tomos divi-
 ſum, & *Concordiam veteris ac Novi Teſtamenti* ad-
 verſus eoſdem. Hæc duo *Theophanis* Opera habentur
 MSS. in Collegio Romano Soc. Jeſu. Quædam
 alia

alia ejusdem *Theophanis* Opuscula adhuc in Bibliotheca Vaticana MSS. asservari testatur *Posssevinus* in Appendice ad *Apparatum Sacrum* pag. 16. *Isaacus Argyrus*, Monachus Græcus, edidit *Computum*, quem versione suâ ac Notis illustratum publicavit *Dionysius Petavius* tomo 3. *De Doctrina Temporum* pag. 359. *Matthæus Blastares*, Monachus itidem Græcus, composuit *Syntagma*, seu *Synopsin Alphabeticam Rerum*, quæ in Sacris Canonibus comprehenduntur. Hoc *Syntagma* cum suis Notis in lucem extulit CL. *Beveregius*, & Græco-Latinû publici juris fecit Oxonii anno MDCLXXI. Extat quoque ejusdem *Matthæi Blastaris* Opusculum de *Causis seu Questionibus Matrimonii* Græco-Latinum libro octavo juris Græco-Romani, quod *Leunclavius* publicavit. Causæ Græcorum Schismaticorum acerrimus propugnator fuit *Nilus Cabasilas* Archiepiscopus Thessalonicensis, quippè qui contra Latinos duos edidit libros, qui adhuc extant, quorum primus est de *Causis divisionum in Ecclesia*; Alter est de *Primatu Papæ*. Plurima etiam ejusdem *Nili* Archiepiscopi Thessalonicensis contra Ecclesiam Latinam Opuscula manuscripta recenset *Leo Allatius* in sua Dissertatione *De Nili* cap. 14. pag. 49. Odium, quo *Nilus Cabasilas* Latinam Ecclesiam prosequabatur, æmulatus est ejus nepos *Nicolaus Cabasilas*, & in Sede Thessalonicensi Successor. Ille siquidem duos Tractatus contra Latinos scripsit, unum de *Processione Spiritus Sancti*; Alterum, quo *S. Thomam Aquinatem*, sibi refellendum sumpsit. Qua in re insignem nactus est adversarium Scriptorem Græcum *Demetrium Cydonium* superiùs à nobis citatum, qui pro defensione Summæ *S. Thomæ Aquinatis* Contra

Gentes, ejusque Summæ Theologicæ, egregium librum Apologeticum adornavit. Auctor est iste, *Nicolaus Cabasilas* librorum sex *De Vita in Christo*, quos *Jacobus Pontanus* Soc. Jesu Theologus Latine vertit, & publicâ luce donavit Ingolstadii anno MDCIV. unâ cum ejusdem *Nicolai Cabasilæ* Oratione in sceneratores, quam *Jacobus Pontanus* Latine itidem vertit. Plura alia Opuscula scripsit hic *Nicolaus Cabasilas*, quorum aliqua typis excusa sunt, alia adhuc MSS. in Bibliothecis habentur, ut testatur *Leo Allatius* in sua Dissertatione *De Nilis* pag. 55. ubi eorum Catalogum texit. Denique, Græcorum, qui Sæculo XIV. aliquâ in Oriente doctrinæ laude claruerunt, agmen claudent duo Scriptores Græci cognomine *Nili*, quorum primus, seu *Nilus*, Metropolita Rhodius, Latinorum fuit hostis acerrimus, & Auctor est *Enarrationis Synopticæ de Sanctis & Oecumenicis Synodis*, quæ à *Justello* patre, edita ad calcem *Nomocanonis Photiani*, fuit postea à *Justello* filio inserta in *Bibliotheca Juris Canonici*. Ejusdem *Nili* Metropolitæ Rhodii Orationem in Sanctam Matronam ex Insula Chio oriundam Græc-Lat. evulgavit *Leo Allatius*. Alter Scriptor Græcus, dictus *Nilus Damyla*, Monachus in Creta Insula, Latinis pariter hostem infensissimum sese prodidit, & adversus ipsos scripsit: *Opus de Ordine in divina Triade*, & *de Processione Spiritus Sancti*, quod extat MS. in Bibliotheca Vaticana. Alios tres Tractatus contra Latinos composuit idem *Nilus Damyla*, qui MSS. extant in Bibliotheca Regis Christianissimi, & quorum nonnulla fragmenta citat *Leo Allatius* in suis libris *De Eccles. Occid. & Orient. perpetuo consensu*.

D. Cum

D. Cùm florentissimum Galliarum Regnum Viris eruditione claris semper abundaverit, pergratum mihi erit nosse Scriptores Gallos, qui Sæculis XIII. & XIV. Ecclesiam, remque litterariam suis perdoctis lucubrationibus ornarunt, illustrarunt, nobilitarunt.

M. De Gallis Scriptoribus, qui Sæcul. XIII. & XIV. Monasticam, vel Regularem vitam professi, eruditione præfulserunt, vel juris Civilis & Canonici peritiâ insignes, maximam sibi apud omnes famam compararunt, in hac Classe omninò prætermittam; quia de illis suo loco, idest, in Classibus, in quas utriusque Sæculi Scriptores distribuimus, datâ operâ mox dicturi sumus. In hac itaque secunda Virorum Illustrium Classe eos dumtaxat Scriptores Gallos reponam, qui ad Monachorum, vel Regularium, aut Jurisconsultorum Classes referri minimè possunt. Floruit in primis Sæculo XIII. in Galliis *Guillelmus de Seliniaco*, qui Archiepiscopatu Senonensi, & Nivernensi Episcopatu singulari modestiâ recusatis, Antisiodorensis Ecclesiæ, cujus Decanus erat, electus est Episcopus, & postea ad Sedem Parisiensem invitatus, & jussu *Honorii III.* Pontificis, translatus fuit. Obiit anno MCCXXIII. & Author est *Summæ Theologicæ*, quæ typis excusa, prodiit Parisiis anno MD. *Rigordus*, Christianissimi Regis *Philippi Augusti* Medicus & Chronographus, *Gesta*, seu *Historiam* ejusdem *Philippi Augusti* conscripsit, quam *Ludovico VIII.* Galliarum Regi nuncupavit, eamque tomo 5. *Veterum Historiæ Franciæ Scriptorum* edidit *Franciscus Duchesnius*. Hos Scriptores eruditione & eximiâ morum pietate superavit *Guillelmus, Alvernus* à patria cognominatus, &

& Episcopus Parisiensis omni litterarum genere, instructissimus. Doctissimis Operibus nomen suum celebravit, quorum Indicem *Labbeus* in Dissertatione de Scriptoribus Ecclesiasticis exhibet. Huic tamen *Guillelmo* Episcopo Parisiensi tribui non debent *Dialogi septem de Sacramentis*, qui sub ejus nomine Lipsiæ anno MDXXII. & Lugduni an. MDLXVI. prodierunt. Illorum quippe *Septem Dialogorum de Sacramentis* germanum Authorem esse *Guillelmum* Parisiensem juniorem ex Ordine Fratrum, Prædicatorum, qui eodem Sæculo XIII. vixit, rectè observat *Theophilus Raynaldus* in libro de bonis & malis libris Erotemate X. Certè stylus septem illorum Dialogorum valdè discrepat à stylo *Guillelmi* Episcopi Parisiensis, & in eorum calce citantur *S. Thomas Aquinas*, & *Petrus de Tarentasia*, qui posteriores sunt *Guillelmo* Parisiensi Episcopo, qui obiit anno MCCXLVII. Collegium Sorbonicum, ex quo innumeri prodierunt Viri eruditi, & de Ecclesia optimè meriti, condidit anno MCCLII. *Robertus de Sorbona*, à natali vico ita cognominatus, Canonicus primùm Sueffionensis, deindè Parisiensis. Scripsit Opuscula tria ascetica, videlicet de Conscientia; de Confessione; & Iter Paradisi, quæ extant in Bibliotheca Patrum tomo xxv. *Henricus de Segusio* Archiepiscopus Ebredunensis, & postea ab *Urbano IV.* Cardinalis Episcopus Ostiensis creatus, ob eximiam in utroque jure eruditionem, Splendor & Fons juris appellatus, scripsit *Summam* utriusque juris, quæ vulgò dicitur *Aurea Summa Hostiensis*. Edidit etiam *Expositionem* in sex libros *Decretalium*, jussu *Alexandri IV.* Pontificis Maximi. *Jacobus de Vitriaco* è vico *Argentolii* propè Parisios ortus,

Acconensis Episcopus in Palæstina, deinde Cardinalis Episcopus Tusculanus à Gregorio IX. creatus, scripsit libros tres *Historiæ Orientalis & Occidentalis*; *Conciones in Evangelia & Epistolas totius anni*; & *Vitam S. Mariæ Ogniacensis*, quæ habetur apud *Surium* ad diem xxiii. mensis Junii. *Henricus Bonicollus*, in Sacra Facultate Parisiensi Doctor, tanta cum laude Philosophiam & Theologiam Parisiis docuit, ut totius Academiæ Parisiensis suffragio Doctor solemniter nuncupari meruerit. Multa scripsit Opera, inter quæ præcipuè censentur *Summa Questionum Theologicarum: Quodlibeta Theologica in IV. libros Sententiarum*, & liber de *Viris Illustribus*, seu de *Scriptoribus Ecclesiasticis*, quem à tempore, quo desit *Sigebertus Gemblacensis* Monachus, ad suam usque ætatem perduxit. Inter Illustres Scriptores, qui sæculo XIII. in Galliis floruerunt, locum, meâ quidem sententiâ, habere non debent *Guillelmus de Sancto Amore*, & *Joannes de Poliac*, quorum primus in Sacra Facultate Parisiensi Doctor Theologus, contra recentes Fratrum Prædicatorum & Minorum Ordines, gravissimas, ut jam observavimus, in Academia Parisiensi turbas excitavit, & adversus illos scripsit libellum de *Periculis novissimorum temporum*, quem à capite ad calcem erroribus scatentem *Alexander IV.* Pontifex Maximus, post habitam relationem quatuor Cardinalium, quibus illum examinandum commiserat, damnavit tanquam iniquum, scelestum, & execrabilem. Alter verò, seu *Joannes de Poliac*, Doctor etiam Theologus in Sacra Facultate Parisiensi, nonnullos errores circa Sacramentum Pœnitentiæ in Scholis & Prædicationibus vulgavit, quos *Joannes XXII.* dili-

genti

genti excussos examine, & habitâ solerti cum S.R.E. Cardinalibus collatione, *tanquam falsos & erroneos, à sacra doctrina devios*, auctoritate Apostolicâ reprobavit. Quod spectat Scriptores Gallos, qui Sæculo XIV. floruerunt, unum præ cæteris aliquâ laude dignum inveni, videlicet *Nicolaum Oresmum*, Theologum Parisiensem, & Navarrici Collegii Gymnasiarcham, qui postea ex Decano Metropolitane Rothomagensis Ecclesiæ, Lexoviensis Episcopus creatus est an. MCCCLXXVI. Scripsit librum de *Communicatione Idiomatum*, Tractatum contra *Astrologos Judiciarios*, & Tractatum de *Mutatione Monetarum*, qui extat in Bibliotheca Patrum Editionis Lugdunensis tom. xxvi. Alia quàmplurima ejusdem *Nicolai Oresmii Scripta*, & in his Sermones cxv. in Bibliothecis Navarrensi, Vaticana, & Augustinianorum Parisiensium MSS. asservata recenset *Joannes Launojus* Doctor Parisiensis tomo 2. *Historiæ Gymnasii Navarrici* pag. 458. Non defuerunt quidem Sæculo XIV. in Galliis alii Academici Parisienses, qui Theologiam in Scholis docuerunt, & de ea libros scripserunt, ut patet ex eorum Catalogo, quem *Egassius Bulaus* texit tomo IV. *Historiæ Universitatis Parisiensis*, at, ut candidè fatear, isti Academici non magnum sibi pepererunt nomen, & in censum Virorum Illustrium venire haud merentur, eò quòd, neglecto Scripturæ Sacræ & Sanctorum Patrum studio, in pertractandis frigidis, jejunis & spinosis quibusdam Theologiæ Scholasticæ quæstionibus omne otium tempusque frustra contriverint. Quâ de re *Nicolaus de Clemengiis* Theologus Parisiensis (qui vixit Sæculo XIV. & obiit ineunte Sæculo XV.) in libro de *Studio Theologico*, quem *Lucas*

Dac-

Dacherius edidit tomo VII. *Spicilegii*, jure merito conqueritur his verbis: *Quocirca miror Theologos nostri temporis paginas Divinorum Testamentorum ita negligenter legere, & nescio quarum satis steriliū subtilitatum indagine sua ingenia conterere, utque utar verbis Apostolicis: Languere circa quæstiones ac pugnas verborum; & quid sibi volunt illa verba Apostolica? illos procul dubio reprehendere volunt, qui omīssa fertili ac fructuosa arbore Sacrarum Scripturarum, in silvaticis & sterilibus pabulum doctrinæ requirunt, inter quas languere dicuntur Solebant antiqui Patres & Theologi, quorum per Ecclesias sunt approbata Scripta, nihil dicere vel astruere, nisi quod Scripturarum testimonio posset confirmari. Nunc autem plerosque videmus Scholasticos sacrarum inconcussa testimonia litterarum tam tenuis æstimare momenti, ut ratiocinationem ab auctoritate ductam, velut inertem & minimè acutam sibilo ac subsannatione irrideant, quasi sint majoris ponderis quæ phantasia humanæ imaginationis adinvenit, quàm quæ Divinitas cælitus aperuit &c.* Plura itaque de Scriptoribus Gallis in præsentia non dicam, maxime cum de Monachis, Regularibus, & Jurisconsultis, qui Sæculis XIII. & XIV. in Galliis floruerunt, opportuniùs in sequentibus Classibus, in quas illos distribuimus, sermonem simus habituri.

D. Florueruntne in Italia Sæculis XIII. & XIV. multi eruditi Scriptores?

M. Præter Romanos Pontifices ex Italia oriundos, qui doctrinâ & pietate celebres Catholicam Ecclesiam summa cum laude gubernarunt, benè multi doctissimi Monachi, Regulares, & Jurisconsulti insignes, Italiam Sæculis XIII. & XIV. illustra-

strarunt perdoctis Scriptis, quæ, juxta præscriptum ordinem, commodius referemus in quatuor posteris Classibus Scriptorum utriusque Sæculi. In ista porrò tertia Virorum eruditorum Classè duos duntaxat proferam præclaros Scriptores Italos, qui decimo quarto Ecclesiæ Sæculo litteras impensè coluerunt, & magnam nominis æstimationem, apud egregiè cordatos homines sibi conciliarunt. Primus est *Joannes Villanius* Florentinus, qui libris **XII**. Historiam Italicè scripsit, à primis *Nembrothi* temporibus ad annum usque **MCCCXLVIII**. quo è vivis excessit. Hanc *Joannis Villanii*, qui inter optimos Historicos laudatur, Historiam continuavit *Matthæus* ejus frater. Alter illustris Scriptor Italus, est *Franciscus Petrarca*, qui Aretii, Patre Florentino exule, natus est anno **MCCCIV**. Fuit Vir excellentis ingenii & exquisitæ doctrinæ, *reflorescentis*, ut ait *Erasmus* in Ciceroniano, *eloquentiæ apud Italos Princeps, suæ ætate celebris ac magnus*. Parmensis Archidiaconus, tum Cathedralis Ecclesiæ Patavinæ extitit Canonicus. Præter Epistolas & Carmina, quæ præsertim in canendis erga *Lauram* suis amoribus juvenis adhuc scripsit in amæna valle propè Avenionem, quam Incolæ *Clausam* vocant, excellentes edidit Dialogos de Remediis utriusque fortunæ: libros duos de Vita Solitaria, & totidem de Otio Religiosorum: Dialogos de vera Sapientia, & de Contemptu Mundi: Psalmos Septem Pœnitentiales: librum unum de Republica optimè administranda: alterum de Officio & Virtutibus Imperatoris: libros quatuor Rerum memorandarum, & alia hujusmodi elegantissima Opuscula, quæ omnia typis excusa prodierunt Basileæ anno **MDLIV**. & **MDLXXXI**.

Testa-

Testatur tamen *Casimirus Oudin* in Supplemento ad librum *Bellarmini* de Scriptoribus Ecclesiasticis, librum *Francisci Petrarce*, qui inscribitur: *De casibus Virorum Illustrium*, adhuc manuscriptum reperiri in Bibliotheca Colbertina, ibidemque extra ejusdem Authoris Rerum familiarium Epistolarum libros viginti quatuor manuscriptos, quorum novem tantum editi sunt. Obiit *Franciscus Petrarca* in Arquato, agri Patavini pago, an. MCCCLXXIV. ætatis suæ LXX. Lubens hic prætermitto duos insignes Scriptores Italos, quorum primus fuit *Dantes Aligerus* Poëta eximius, patria Florentinus, qui Sæculo XIII. in Arte poëtica potissimum excelluit, sed cum esset nimium dentatus, mordax, & maledicus obrectator, ab ipsamet patria sua proscrip-
tus est, exulque vivere coactus. Alter Scriptor Italus, fuit *Joannes Boccacius*, patriâ itidem Florentinus, qui Sæculo decimo quarto vixit & obiit. Plures conscripsit libros, in quibus sese obscenum, impium, & maledicentissimæ linguæ vitum ubique prodit.

D. Progrediamur, si placet, ad quartam Virorum Illustrium Classẽ, in qua tibi onus incumbit differendi de Scriptoribus Hispanis, qui Sæculis decimo tertio & decimo quarto celebriorẽs fuerunt.

M. Cum de Scriptoribus Hispanis, qui Sæculis XIII. & XIV. Vitam Monasticam, aut Regularem egerunt, simus suo loco dicturi, tres dumtaxat magni nominis, & Episcopalibus Infulis ornatos hic producam Hispaniæ Scriptores, quorum primus est *Rodericus Ximenes*, gente Navarrus, & Archiepiscopus Toletanus. Interfuit Concilio Oc-

cumenico Lateranensi IV. sub *Innocentio III.* Pontifice Maximo anno MCCXV. celebrato, ubi, ob suam singularem eruditionem, summam, quâ pollebat, eloquentiam, & variarum linguarum peritiam magno in honore habitus est. Libros novem scripsit de *Rebus Hispaniæ*, ab Herculis in eas regiones adventu usque ad annum MCCXLIII. His subjunxit Ostrogothorum, Suevorum, Alanorum, & Wandalorum compendiosam Historiam. Edidit denique Historiam Arabum, & Historiam Romanorum. Hæc omnia *Roderici Ximenis Opera Andreas Schottus* publicavit tomo 2. *Hispania Illustrata*. Alter Scriptor Hispanus, qui eodem Sæculo decimo tertio floruit, est *Lucas*, Tudensis Episcopus, patriâ Legionensis, & *Gregorio IX.* Pontifici Maximo apprime charus. Scripsit libros tres adversus Hæreticos Albigeneses, quos primus in lucem emisit *Joannes Mariana* Ingolstadii anno MDCXII. & exinde cum Notis *Joannis Mariana, Gretseri*, & *Schotti* in Bibliothecam Patrum relati sunt tomo XXV. Descripsit etiam idem *Lucas* Tudensis Episcopus, jussu *Berengariæ* Hispaniarum Reginae, *Vitam & Miracula S. Isidori*, quæ extat apud *Mabillonium* Sæculo II. Benedictino, & apud *Bollandum* ad diem IV. Aprilis. *Chronicon* quoque *S. Isidori* multis additionibus locupletavit *Lucas* Tudensis Episcopus, & ad suam usque ætatem perduxit, quod ab *Andrea Schotto* editum est tomo 2. *Hispania Illustrata*. Tertius postremò Episcopus, qui Sæculo XIV. in Hispaniis floruit, est *Alphonsus Vargas*, patriâ Toletanus, in Sacra Facultate Parisiensi Doctor Theologus, Uxamensis primùm, deindè Pacensis Episcopus, ac demùm Archiepiscopus Hispalensis, ex Ordine Ere-

mitarum S. *Augustini* assumptus. Scripsit *Commentarios in IV. libros Sententiarum*, quos Discipulis in Facultate Parisiensi dictaverat, & *Quæstiones in Aristotelis libros tres de Anima*, quibus inter Theologos Scholasticos primi subscellii locum obtinere meruit.

Cùm Angli Scriptores, quos in quinta Classe Virorum Illustrium constituimus, omnes fermè fuerint Monachi, aut Dominicani, aut Franciscani, unum tantùm aut alterum in hac Classe laudabo; de Monachis verò, Dominicanis, & Franciscanis Scriptoribus, qui ex Anglia oriundi Sæcula decimum tertium, & decimum quartum eruditione illustrarunt, copiosè in his Classibus, in quas illos ordinavimus, dicturus. Floruit itaque in Anglia Sæculo decimo tertio *Gervasius Tilberiensis*, ita cognominatus à *Tilberia*, quod Oppidum est in Anglia, in littore Thamesino situm. *Henrici III.* Anglorum Regis nepos fuit, à quo ditionis Arelatenis Marescallus factus, non modò Regis sui, sed & *Ottonis IV.* Imperatoris benevolentiam sibi conciliavit. Scripsit *Commentarium de Imperatorum Romanorum, Gothorum, Lombardorum, Britonum, Francorum, Anglorumque Regnis*. Edidit etiam librum *de Mirabilibus Mundi*, & *Historiam Angliæ tripartitam*, quam *Baleus* digessit in tres columnas, atque inde *Tricolumnium* inscripsit. Alia ejusdem *Gervasii* Opera recensent *Baleus*, *Pitsens*, & alii, qui Scriptorum Anglorum Catalogum texuerunt. Alter Scriptor, qui eodem Sæculo XIII. in Anglia eruditionis laude claruit, appellatur *Robertus*, Episcopus *Lincolniensis*, dicitur etiam *Großthead*, Gallicè, *Grosse teste*. Hunc *Robertum*, *Lincolniensem* Epi-

scopum, magnis encomiis celebrant Scriptores Angli, asseruntque, eum, præter paupertatem, vitæ Sanctimoniam, reliquasque virtutes Christiano Præsule dignas, ingentis animi fuisse, acris ingenii, in re litteraria ad summum penè apicem evectum, in litteris sacris pariter ac profanis, in linguarum Hebraicæ, Græcæ, & Latinæ scientia, in Astronomia, & universa Philosophia supra communem Doctorum sortem eruditum. Idem tamen de *Roberto* Lincolnienſi Episcopo judicium non ferunt alii Scriptores ob acriorem illam, quam ad *Innocentium IV.* Pontificem Maximum scripsit Epistolam, quæque cum Pontifici ita invisum reddidit, ut ab eo fuerit anathemate percussus, sicut testatur *Henricus Knigton* natione Anglus, Canonicus Regularis Monasterii Leicæstrenſis, qui sub finem XIV. Sæculi claruit, in suo *Chronico de eventibus Angliæ* quinque libris comprehenso. Multa Opuscula & Commentaria scripsit *Robertus* Lincolnienſis Episcopus, varios Sermones, Tractatus, & alia Opera, quorum quædam edita sunt, alia adhuc manuscripta in Bibliothecis asservantur. Verùm, inter Scriptores Anglos Sæculi decimi tertii principem locum meritò obtinere debet *Edmundus Rich.* Archiepiscopus Cantuarienſis, doctrinâ celeberrimus, & sanctitate adeò insignis, ut in Sanctorum album ab *Innocentio IV.* Pontifice Maximo relatus fuerit. Scripsit Sanctus ille Archiepiscopus *Speculum Ecclesiæ*, quod extat in Bibliotheca Patrum tomo xxv. Scripsit etiam *Constitutiones XII.* quas vulgavit *Linuodus* in *Provinciali Anglico*.

Eâdem brevitate expédiam me à Scriptoribus Germanis, quos in sexta Virorum Illustrium Classe col-

collocavimus . Licet enim bene multi Monachi, & Religiosi Viri tam ex Ordine Fratrum Prædicatorum, quam ex Ordine Fratrum Minorum, Germaniam Sæculis XIII. & XIV. perdoctis suis Scriptis illustrarint, eos tamen in ista Classe non recensebo, utpotè de illis, eorumque Operibus, in his, quas mox subjiciam, Virorum Illustrium Classibus abundè dicturus. Hos itaque dumtaxat Scriptores Germanos hic laudabo, qui ad sequentes Classes revocari non possunt . Sub initium decimi quarti Ecclesiæ Sæculi claruit in Germania *Siffridus*, Misnensis Ecclesiæ in Saxonia Presbyter, qui scripsit *Chronicon* ab Orbe condito usque ad annum MCCCVI . quod *Pistorius* tomo I. *Rerum Germanicarum* edidit. Nonnulli hunc *Siffridum* perperam confundunt cum altero *Siffrido* Ordinis Prædicatorum, Cyrenensi Episcopo titulari, & Moguntini Archiepiscopi Vicario, cujus meminit *Trithemius* . Hic enim *Siffridus*, Ordinis Prædicatorum, floruit decimo quinto Sæculo, hoc est, circa annum millesimum quadringentesimum septuagesimum . *Albertus Argentinensis*, natione Germanus, Sæculo decimo quarto, hoc est, circa annum MCCCLXXVI . eruditionis famam toti Orbi innotuit & scripsit *Chronicon* à *Rudolphi Habsburgensis* Imperio usque ad *Caroli IV.* Imperatoris mortem, hoc est, ab anno MCLXXI . usque ad annum MCCCXXVI . quod editum est à *Christiano Urstizio*, cum aliis *Rerum Germanicarum* Scriptoribus . Denique, sub finem ejusdem Sæculi decimi quarti virtute & doctrinâ præluxit in Germania *Marsilius ab Ingen*, Ecclesiæ S. *Andreae* Coloniensis Canonicus & Thesaurarius, Heidelbergensis Academiæ Conditor, primusque Doctor ac Rector.

Scriptit *Commentaria in IV. libros Sententiarum*, quæ typis excusa prodierunt Argentorati anno MDI. Alia ejusdem Authoris Scripta recenset *Baleus Centuriâ VI I. Cap. v.* quæ adhuc in tenebris delitescunt. Sed hos Scriptores breviter indicasse, & digitum, ut fieri solet, ad fontes intendisse sufficiat. Pergamus nunc ad septimam Classem Virorum Illustrium, in qua locum dedimus omnibus Monachis, qui Sæculis XIII. & XIV. in diversis Orbis nationibus insignes extiterunt.

D. Cedo, si placet, nomina, patriam, & Scripta omnium Monachorum, qui tum doctrinâ, tum pietate Sæculis XIII. & XIV. in diversis Orbis nationibus insignes extiterunt.

M. Ordiam ab his Monachis, qui Sæculum XIII. eruditione illustrarunt. In primis *Dodechinus* natione Germanus, Abbas Cænobii S. *Dysibodi*, scripsit *Historiam Sanctam*, sive de peregrinatione in *Palæstinam*, & *Appendicem ad Chronicon Mariani Scoti* ab anno MLXXXIV. usque ad annum MCC. *Helinandus*, natione Gallus, Monachus *Frigidi Montis*, Ordinis Cisterciensis, in *Diœcesi Bellovacensi*, *Historiam* ab Orbe condito usque ad annum millesimum ducentesium quartum scripsit libris XLVIII. comprehensam, quam P. *Bertrandus Tissier* *tomo VIII. Bibliothecæ Cisterciensis* edidit, unâ cum ejusdem *Helinandi Sermonibus*, & *Epistola ad Galterum*. Scripsit etiam idem *Helinandus* *Martyrium S. Gereonis*, & *Sociorum*, *Sanctorumque Victoris, Cassii, Florentii*, & aliorum, quod extat apud *Surium* ad diem x. Octobris. *Petrus*, natione Gallus, Monachus *Vallis Cernaij*, Ordinis Cisterciensis, in *Parisiensi*, vel, ut habet *Aubertus Mirans*, in *Car-*
no.

notensi Diœcesi, scripsit *Historiam Albigensium*, & *sacri Belli*, quod in eos susceptum est, Duce & Principe *Simone Monfortio*, Comite postea *Tolosano*, eamque *Innocentio III.* Pontifici Maximo nuncupavit. Hanc *Petri de Valle Cernaïj* *Historiam Albigensium* primus in lucem extulit *Nicolaus Camuzacius*, *Trecensis* Canonicus, anno *MDCXV.* & deinde *tom. v. Historicorum Francorum Francisci Duchesnii*, & *tomo VII.* *Bibliotheca Cisterciensis* inserta fuit. *Guntherus*, Monachus Ordinis Cisterciensis, in Diœcesi *Basileensi*, scripsit ex ore *Martini Abbatis*, qui rebus gestis interfuerat, *Historiam capta & Latinis*, Duce *Balduino*, *Urbis Constantinopoleos*, quam *Historiam* edidit *Canisius* *tomo v. Antiquæ Lætionis.* *Arnoldus*, primò *Hildeseimensis* Præpositus, & postea *Lubecensis* Abbas, *Chronico Sclavorum*, cujus Author est *Helmoldus* Presbyter, Supplementum addidit, hoc est, illud continuavit ab anno *MCLXXI.* ad annum usque *MCCIX.* Eum in rebus Sclavonicis præcipuè mereri fidem, sed in cæteris parùm diligentiz præstitisse, observat *Vossius* *lib. 2. de Historicis Latinis* cap. 55. Eodem Sæculo decimo quarto *Otto à Sancto Blasio*, Monachus *S. Blasii*, Ordinis *Benedictini*, in Diœcesi *Constantiensi*, ad *Chronicon Ottonis Frisingensis* Appendicem adjecit, quam ab anno *MCXLVI.* ubi desinit *Otto Frisingensis*, perduxit usque ad annum *MCCX.* Ejusdem Ordinis *Benedictini* Monachus fuit *Matthæus Paris*, seu *Parisius*, natione *Anglus*. Scripsit *Historiam Anglicanam à Guillelmi Conquestoris adventu usque ad annum quadragesimum tertium Henrici III. Angliæ Regis*, hoc est, ab anno *MLXVI.* usque ad an. *MCCLIX.* quo vivere desuit. Scripsit etiam idem *Matthæus*

Parisi Historiam minorem, in qua compendiosè narrat ea, quæ prolixiùs in Historia majori prodiderat; item Additamenta ad Historiam, & Vitas aliquot Sanctorum, & Gesta Abbatum Cœnobii Albanensis, cujus erat alumnus. Hic tamen obiter observare debes, hunc Scriptorem, *Matthæum Parisium*, nullam mereri fidem in his, quæ scripsit de Ecclesia Romana, & de Summis Pontificibus, quos passim injuriarum plaustris onerat, & canino dente carpit, mordet & exagitat. Hinc *Henricus Spondanus* in *Continuatione Baronii* ad annum MCCXXV. Num. VI. ait, se nullam adhibere fidem *Matthæo Parisio* in rebus Pontificum & Ecclesiæ Romanæ mentiri solertissimo. Nec silentio prætermittere possum judicium, quod de eodem Historico, *Matthæo Parisio*, profert *Baronius* ad annum nongentesimum nonagesimum sextum his verbis: *Quàm fuerit animo infensissimo ergà Apostolicam Sedem, quivis facillè poterit intelligere: nisi probra illa fuerint additamenta, ejus qui edidit. Quæ si quis demat, aureum sanè dixeris Commentarium, utpotè quod ex publicis monumentis, totidem verbis redditis, egregiè contextum & coagmentatum inveniat. Millos facio, brevitatis ergo, multos alios Monachos, qui Sæculo XIII. aliquâ eruditionis laude claruerunt, tresque dumtaxat subnectam, qui Classi Monachorum eruditorum ejusdem Sæculi XIII. jure merito accenseri debent. Primus est *Casarius*, natione Germanus, Cœnobii Heisterbacensis in Diœcesi Colonienſi Ordinis Cisterciensis Monachus, qui Libros, seu Dialogos XII. scripsit de Miraculis & Visionibus sui temporis. Scripsit etiam idem *Casarius* tres libros de Vita S. Engelberti Archiepiscopi Colonienſis: plures Homi-*

lias,

lias, seu *Conciones Morales super omnes Dominicas & Festa totius anni*, & alia Opera, quæ exhibet *Carolus Vischius* in Bibliotheca Cisterciensi. Observant tamen periti Critici, *Cesarium* Monachum fuisse nimium credulum, quippè in suis xi. Dialogis de *Miraculis & Visionibus* non satis accurato Criterio veras Historias à falsis secrevit, & interdum nugas & fabulas, quas undique corrasit, sine ullo prorsus delectu inseruit. *Casario* Monacho eruditione inferior non fuit *Godefridus* Monachus, natione itidem Germanus, qui scripsit *Annales* ab an. mclxii. ad annum mcccxxv. quos primus in lucem edidit *Marquardus Freherus* inter Scriptores Germanicos tomo 1. pag. 229. Ultimus Sæculi XIII. Monachus, qui inter Scriptores eruditos locum habere debet, est *Guillelmus de Nangis*, natione Gallus, Ordinis S. *Benedicti* in Cœnobio Sandionysiano propè Parisios. *Chronicon* scripsit ab Orbe condito ad annum mccc. Hoc *Guillelmi de Nangis* *Chronicon* continuavere postea duo Anonymi Monachi ejusdem Cœnobii Sandionysiani, quorum prior desinit in anno mcccxl. Alter in anno mcccxlvi. Scripsit quoque idem *Guillelmus Nangius* *Gesta S. Ludovici Galliarum Regis*, ejusque filii *Philippi*, cognomento *Audacis*. *Chronicon Guillelmi Nangii* ab anno dumtaxat mxxiii. una cum ejusdem *Chronici* duabus Monachorum Anonymorum continuationibus exhibet *Lucas Dacherius* tomo xi. *Spicilegii*, *Gesta* verò, seu *Historiam*, quam idem *Guillelmus Nangius* descripsit, *S. Ludovici Galliarum Regis*, ejusque filii, cognomento *Audacis*, inter alios Scriptores Hist. Francorum evulgarunt *Pithæus*, & *Duchefnius*.

Ex Monachis Scriptoribus, qui Sæculum XIV. eruditione illustrarunt, duos tantum hic proferam videlicet *Engelbertum*, & *Henricum Steronem*, quorum primus, seu *Engelbertus*, natione fuit Germanus, Monachus Ordinis S. *Benedicti*, & Cænobii Admontensis in Styria Abbas. Scripsit librum *de ortu, progressu & fine Imperii Romani*, qui editus est Basileæ anno MDLIII. & extat tomo xxv. Bibliothecæ Patrum. Scripsit etiam *Engelbertus* Carmen Heroicum, seu *Panagerim* in Coronationem *Rudolphi Habsburgensis* Imperatoris, & hæc *Panageris* in Collectione Historicorum Germanicorum reperitur. Plura alia Opera Theologica, Philosophica, & Ascetica eidem *Engelberto* Monacho attribuit *Possevinus* in Apparatu. Alter Monachus, seu *Henricus Stero*, natione pariter Germanus, & *Benedictini* Ordinis in Altaicho Germaniæ Cænobio Monachus fuit. Annales scripsit ab anno primo *FridERICI Barbarossæ* Imperatoris, usque ad annum primum *Rudolphi Habsburgensis* Imperatoris, idest, ab anno MCLII. usque ad annum MCCLXXIII. Annales istos primus edidit *Marquardus Freherus* inter Scriptores Rerum Germanicarum, sed illos auctiores dedit *Henricus Canisius* tomo I. Antiquæ lectionis. Scripsit etiam idem *Henricus Stero* Historiam *de rebus gestis Rudolphi Habsburgensis, Adolphi Nassavii, & Alberti Austriaci Imperatorum* ad annum usque MCCC. cui Appendicem usque ad annum MCCCXXV. addiderunt *Ulricus* & *Conradus Wellingi* fratres, Monachi Cænobii Augustani Sanctorum *Uldarici & Asæ*, Ordinis *Benedictini*. Hanc *Henrici Steronis* Historiam cum *Wellinghorum* continuatione publicavit *Marquardus Freherus* tomo I. *Scriptorum*
Rerum

Rerum Germanicarum anno MDC. Ex hac *Henrici Steronis* Historia, ut observant eruditi Critici, *Eberardus*, natione Germanus, Cœnobii Althahensis Ordinis Benedictini Monachus, qui Sæcul. XIV. floruit, plurima hausit, ac retulit in *Annales*, quos edidit, de *Ducibus Austriæ, Bavariæ, & Sueviæ*, quique extant apud *Henricum Canisium* tom. 1. *Antiq. lect.* Sed satis diximus de Monachis, qui Sæculis XIII. & XIV. floruerunt. Nunc paulò altiora canamus, & de celeberrimis toto Orbe Scriptoribus Ordinis Fratrum Prædicatorum, quos in octava Virorum illustrium Classe constituimus, uberiùs differamus, eorumque Scripta liberiori stylo prosequamur.

D. Innumeros ex Clarissimo Fratrum Prædicatorum Ordine, cujus institutor fuit *S. Dominicus*, ex nobilissima *Gusmanorum* familia in Hispania natus, prodiisse Scriptores, qui perdoctis suis Operibus grassantes hæreses extirparunt, Schismata extinxerunt, Theologiam illustrarunt, fidelium mores ad pietatem informarunt, atque de universa Ecclesia optimè meriti sunt, unâ voce omnes prædicare ac publico sermone celebrare solent. Quocircà, te etiam atque etiam rogo, ut nobiliores Scriptores Ordinis Fratrum Prædicatorum, qui Sæculis XIII. & XIV. Ecclesiam doctrinæ suæ splendore collustrarunt, hic in medium proferas, eorumque præclara gesta, & Opera, quæ scripserunt, compendiosâ quidem, sed accuratâ narratione recenseas.

M. Bibliothecam omnium Scriptorum Ordinis Fratrum Prædicatorum, cæteris, quæ hætenus in lucem prodierunt, longè accuratiorē, nup̄r

për adornavit doctissimus noster *Jacobus Echardus*, eamque duobus Tomis in Folio comprehendit, qui nunc sub Parisiensi prælo sudant, publicâ propediem luce donandi. In ea ordinanda Bibliotheca diù multùmque insudavit vir ille doctissimus, & in id totus incubuit, ut Scriptorum Ordinis Fratrum Prædicatorum, qui jam noti erant, diligenti Criterio recenseret ac vindicaret Opera, aliorum vero ejusdem Ordinis Scriptorum, qui antehac incogniti erant, quique in Bibliothecarum angulis ad tineas & blattas relegati delitescabant, manuscriptos codices è tenebris erueret, in publicam lucem revocaret, atque doctissimis Notis Criticis & Historicis illustraret. Hoc utilissimum Opus dum expectant Viri eruditi, ipse, ne officio meo deesse videar, illustriorum saltèm Scriptorum Ordinis Fratrum Prædicatorum, qui Sæculis XIII. & XIV. eruditionis & pietatis laude claruerunt, seriem breviter, quantum fieri poterit, describam, eorumque genuina Opera à spuriiis secernere pro viribus satagam.

Catalogum omnium Scriptorum Ordinis Fratrum Prædicatorum incipiunt nonnulli à *S. Dominico*, Sanctissimo ejus Institutore. Afferit quippè *Antonius Senensis* in Bibliotheca Scriptorum Ordinis Fratrum Prædicatorum, *S. Dominicum* edidisse contra Albigeneses duos libros, qui in ignem conjecti ad Catholicam fidem probandam, diversis vicibus, insigni miraculo, ab igne penitus illæsi resilierunt. Eidem *S. Dominico* Commentarios in Epistolas *S. Pauli*, in Epistolas Canonicas, in Psalterium, in Evangelium *S. Matthæi*, & in Apocalypsim tribuit *Antonius Senensis*, & post eum *Possevinus*,

vinus, quos sequitur noster *Maluenda* in Annal. Ordinis Fratrum Prædicatorum. Alii denique volunt, S. *Dominicum* esse Authorem cuiusdam Tractatus de Corpore Christi. Verum, quin assensum his Scriptoribus præbeamus, hæ rationes obstant. Primò, quia *Petrus de Valle Cernaïj* in ea, quam edidit, *Historia Albigensum*, non librorum meminit, quos adversus Albigeneses ediderit S. *Dominicus*, sed unius dumtaxat Schedulæ, quæ ad confundendos Hæreticos ab ipso in ignem conjecta evidenti miraculo illæsa evasit. Præterea, nemo ex iis, qui S. *Dominici* gesta olim memoriæ prodiderunt, meminit, ab eo scriptos fuisse ullos libros, cum alioqui nonnulla longè minutiora, seu minoris momenti, non taceant *Vincentius Bollovacensis*, *Humbertus*, *Theodoricus*, & S. *Antoninus*. Non est autem verosimile, antiquos omnes S. *Dominici* Encomiastes fuisse adeò oscitantes, ut rem, quæ Sanctum illum Patriarcham haud parùm commendasset, ignoraverint; vel si noverint, altissimo silentio edita ab ipso Opera præterire voluerint. Tertiò, quis suum in animum inducat, tantam fuisse Fratrum Ordinis Prædicatorum incuriam, ut non solum Institutoris sui Opera silentio premi, & oblivione intercidere, sed negligentiam non ferendam omnino perire permiserint, cum alia variorum Scriptorum Opera longè minoris pretii maxima veneratione servaverint, & ad posteritatem transmiserint. Tractatum de Corpore Christi non esse adjudicandum S. *Dominico*, sed potius Fratri *Dominico de Pantaleonibus*, qui in Ordine Fratrum Prædicatorum multò post S. *Dominicum* vixit, testantur Scriptores *Dominicani*, *Susatus* in Chronico, & *Antoninus*

nus Senensis in Bibliotheca, quos sequitur *Malnenda* in Annalibus. Ceterum, etsi *S. Dominicus* inter Scriptores locum non habeat, omnium tamen virtutum, doctrinæ, & præclare gestorum gloriâ illustris fuit, atque fecundissimus parens omnium Scriptorum Ecclesiasticorum, quos peperit Ordo Prædicatorum, & quorum calamis Fidem Catholicam propugnavit, ejusque dogmatum adversus Hæreticos asseruit & illustravit veritatem, sicut in sequenti Colloquio ostendemus.

Scriptorum itaque Ordinis Fratrum Prædicatorum Catalogum ordiar à *B. Jordano*, è Saxonia nobili genere oriundo, Theologo Parisiensi, & ejusdem Ordinis post *S. Dominicum* Generali Magistro electo in Comitibus Parisiensibus anni mcccxiij. Hic Sapientissimus Ordinis moderator, præter ardentissimum salutis animarum desiderium, quo, *S. Dominicum* imitatus, jugiter flagrabat, singulari doctrinâ, religiosâ prudentia, ac multis aliis præclaris virtutibus, quæ ipsi omnium admirationem conciliabant, emicuit. Post celebrata Parisiis Comitibus Generalia anno mcccxxvi. Loca Sancta Palæstinæ invisere, & Ordinis Conventus his in partibus constitutos visitare deliberaverat. Sed ejus consilia inopinatum interturbavit naufragium, & Ordini hunc summum Virum eripuit. Navi si quidem, quâ vehebatur, atroci irruente tempestate submersa est. Ejus tamen corpus repertum, in Aconense Fratrum Prædicatorum Cœnobium delatum est, ibique honorificè conditum. Hujus Viri Sanctitatem post ejus obitum Deus miraculis illustravit, ut videre est in ejus vita, quæ extat apud *Surium*, & apud *Bollandum* ad diem xiii. mensis Februa-

bruarii. Egregia eruditionis ac pietatis monumenta reliquit B. *Jordanus*. Duos libros, unum de *Ponderibus*, & alterum de *Lineis*, teste *Nicolao Triveto* in *Chronico* ad annum MCCXXI. scripserat B. *Jordanus*, antequàm Ordini Prædicatorum nomen daret, ex quibus eum in sæcularibus scientiis, & præcipuè in Mathematicis Disciplinis excelluisse facile colligitur. Sublimioribus deindè scientiis navatâ operâ, plures utiliores composuit libros. Scripsit enim librum de *initio Ordinis Fratrum Prædicatorum*: Epistolas plures ad Fratres, quorum nonnullæ editæ, aliæ adhuc manuscriptæ leguntur. Conscripsit etiam *Commentarium in Apocalypsim*, qui confundi non debet cum *Commentario in Apocalypsim*, quem lucubravit alter *Jordanus*, natione itidèm Saxo, Ord. Eremitarum Sancti Augustini, qui floruit decimo quarto Sæculo. Alia denique in *Priscianum*, & ad Grammaticam spectantia Opuscula scripsit B. *Jordanus*, atque Author est piæ cujusdam rationis Orandi B. Virginem, ergâ quam singulari pietate erat affectus, quæ *Coronula B. Virginis* dicitur. Ad promovendum in Ordine Fratrum Prædicatorum cultum B. Virginis, hunc morem instituit B. *Jordanus*, ut Religiosi hujus Ordinis, post perolutum *Completorii*, quod vocant, Officium, solemniter canerent Antiphonam *Salve Regina* &c. qui mos apud Fratres Prædicatorum etiamnùm laudabiliter viget ac frequentatur.

Vincentius, natione Gallus, patriâ Burgundus, Ordinis Fratrum Prædicatorum, & *Conventus Bellovacensis*, undè suum cognomen sumplit, alumnus, Regnante in Galliis S. *Ludovico*, floruit, suumque magnum, & ex variis Auctoribus defloratum

raturum cōcinnavit *Speculum*, quod in quatuor partes ab ipso fuisse distributum, videlicet in *Naturale*, *Doctrinale*, *Historiale*, & *Morale*, communis erat eruditorum opinio, antequàm perdoctus noster *Jacobus Echard* antiquissimū manuscriptum Codicem *Speculi* Vincentii Bellovacensis detexisset in Collegii Sorbonę Bibliotheca. Ex eo siquidem manuscripto Codice Sorbonico Clarissimus ille Auctor, in libro, quē nuperrimē in lucem edidit, & cui hunc titulum præfixit: *Summa S. Thomę vindicata*, hanc pervulgatam opinionem explosit, & sole clariùs evicit, *Vincentium Bellovacensem* non in quatuor partes, sed in tres dumtaxat suum divisisse *Speculum*, scilicet in *Naturale*, *Doctrinale*, & *Historiale*, subindēque quartum *Speculum*, seu *Morale*, quod tribus præcedentibus assutum est, tanquam spurium ac planē supposititium esse rejiciendum. In primo Speculo, seu *Naturali*, quidquid est in Mundo visibilium & invisibilium juxta sex dierum creationis seriem congruentissimē complectitur *Vincentius Bellovacensis*. In secundo Speculo, seu *Doctrinali*, scientias & artes omnes à Grammatica ad Theologiam usque pervadit. In tertio Speculo, seu *Historiali*, Gesta omnium gentium ab ipsis mundi primordiis ad annum usq; millesimum ducentessimum quinquagesimum prosequitur. Ad istud amplissimum perficiendum Opus, *S. Ludovicus*, Galliarum Rex, sumptus liberalitè suppeditavit, quibus opus erat ad comparandum innumeros propemodum codices, quibus usus est *Vincentius Bellovacensis* in illo immensi planē laboris conscribendo Opere, ex quo eum fuisse indefessi studii, varię eruditionis, & infinitę Lectionis virum, facilē quisquis judicare potest.

potest. Alia Opuscula scripsit *Vincentius Bellovacensis*, videlicet libros quatuor *De Gratia Dei*, sive *De Myſteria Redemptionis humana*: librum unum *de Laudibus B. Virginis Maria*: Alterum librum *de Laudibus S. Joannis Evangelistæ*: librum unum *de Eruditione Puerorum Regalium ad Margaritam Galliarum Reginam*, *S. Ludovici conjugem*: denique *Consolatorium de morte amici*, ad *S. Ludovicum Galliarum Regem*. Non me fugit, disertum nostrum *Melchiorum Canum* vitio vertere *Vincentio Bellovacensi*, quod in rebus historicis, plus æquò credulus fuerit. Sed advertere debuisset perdoctus ille Theologus, *Vincentium Bellovacensem* in suo Speculo Historiali noluisse proprio Marte describere Historiam, sed solum in animo habuisse, simpliciter referre, & ordinare ea Historiæ monumenta, quæ ex variis Scriptoribus hauserat, à Lectoribus tamen cum aliquo delectu accipienda, sicut ipsemet candidè profitetur in sui Operis Prologo. Capite quarto his verbis: *Præsertim cum hoc ipsum Opus utique meum simpliciter non sit, sed eorum potius ex quorum dictis ferè totum illud contexui. Nam ex meo ingenio pauca, & quasi nulla addidi. Ipsorum igitur est auctoritate, meum autem sola partium ordinatione. Qua in re non culpandum, sed potius laudandum esse censeo Vincentium Bellovacensem*, quippè qui multa Historiæ monumenta, velut varia Auctorum, ex quibus ea excerpsit fragmenta, aliàs peritura, posteris servavit. Undè, sicut etiamnum iis gratias referre solemus, qui vel veterum Opuscula in Bibliothecarum angulis delitescencia producunt in lucem, vel Scripta, ut vocant, fugitiva, vel Epistolas, Dissertationes leviores, & similia, suis Dia-

riis inserta ab interitu secunda reddunt, quamvis in his haud pauca sint, quæ accuratum lectoris examen ac delectum postulent; ita etiam fateamur necesse est, nos plurimum debere *Vincentio Bellovacensi*, qui in suo Opere quàm plurima Historiæ monumenta, quasi fragmenta ex variis Scriptoribus collecta, expeditâ methodo disposuit, digessit, ordinavit, & ab interitu vindicavit, ut deinceps prudens & sagax lector ea non promiscuè & indiscriminatim, sed prævio adhibito examine ac delectu accipere ac discernere posset.

Hugo de Sancto Caro, natione Gallus, ex *Barcinoneta*, Oppido Delphinatus, oriundus, Ordinem Fratrum Prædicatorum Sæculo XIII. doctrinâ suâ maximè illustravit. Ex Doctore Theologo Parisiensi, & Provinciali Franciæ, primus Ordinis Fratrum Prædicatorum ab *Innocentio IV.* Pontifice Maximo creatus est Cardinalis Tituli *S. Sabinae*, & Legationibus Apostolicis in Germania & Gallia, præclarè functus. *Hugonem de Sancto Caro* fuisse Archiepiscopum Lugdunensem quidam scribunt, sed certa illius Ecclesiæ monumenta illos falsi convincunt. Satis ad summi illius viri gloriam ornamenta sunt, quæ reverà possedit, etsi adscrititia, seu aliundè emendicata ei non accersatur dignitas. In *Vetus ac Novum Testamentum* Commentarios locupletissimos edidit, quadruplicem Sacrorum Codicum sensum perspicuâ, doctâ, piâ, solidâque brevitate exponens. Composuit etiam *Speculum Sacerdotum & Ecclesiæ: Sermones de Tempore & de Sanctis*. Auctor est quoque *Expositionis Specialis in Psalmos*, uti testantur *S. Antoninus, Bellarminus, Simlerus, & Labbens*, qui Minoritarum, hanc Expositionem in
Psalmos

Psalmos *Alexandro Halensi* perperam adscribentium, figmentum rejiciunt. Sed inter Opera, quæ edidit noster *Hugo à Sancto Caro*, liber *Concordantiarum*, ob ingentem utilitatem, quam ex illo Sacrorum Bibliorum studiosi percipiunt, primas tenet. Opus sanè apprimè necessarium, ingenti labore, summâque diligentia compositum, in quo concinnando fertur, quingentos Fratres Ordinis Prædicatorum adhibuisse manus, Operis Præside, Authore, & Ordinatore *Hugone à Sancto Caro*. Obiit doctissimus ille Cardinalis anno MCLXIV. ejusque corpus Lugdunum in Galliis translatum apud Fratres Prædicatorum sepultum est.

Joannes Columna, Patriâ Romanus, Archiepiscopus Messanensis ex Ordine Fratrum Prædicatorum assumptus, claruit eodem Sæculo XIII. seu anno millesimo ducentesimo quinquagesimo quinto, non verò Sæculo decimo quarto, sicut ait *Trithemius Abbas*, ducem errantem secutus *Philippum Bergomatem*, qui libro XIII. *Supplementi Chroniconum* refert nostrum *Joannem Columna* ad Sæculum XIV. seu ad annum MCCCXIII. Composuit *Joannes Columna* libros decem, quos *Marè Historiarum* inscripsit. Sed hoc Opus, quod interdum laudat *B. Antoninus*, adhuc ineditum est, sicut & aliud Opus, quod scripsit idem noster *Joannes Columna*, *De Viris Illustribus*, quodque ipse Romæ in Bibliotheca Casanatensi apud Fratres Prædicatorum Conventus Minervitani manuscriptum perlegi. Opus profectò rerum delectu, styli elegantia, & argumentorum varietate, dignum amica manu, quæ illud è tenebris tandem aliquando in publicam lucem educat. Præter hæc Opera à nostro *Joanne*

Columna lucubrata, ipsum quoque *Pontificum Historiam* conscripisse, testatur Auctor Operis *De Hierarchia Subcaelesti*; quod manuscriptum extat Parisiis in Bibliotheca Victorina.

Humbertus de Romanis natione Gallus, sic dictus ab oppido *Romans* Viënenfis Diœcesis in Delphinatû, quod *Humberti* natale solum fuit, Ord. Fratrum Prædicatorum Parisiis in Cœnobio S. *Jacobi* nomen dedit, & postquàm litteras sacras ac Theologiam summa cum laude docuisset, ob eximiam pietatem & doctrinam electus est in Comitiiis anni MCCLIV. Budæ in Hungaria habitis quintus Ordinis Fratrum Prædicatorum Generalis Magister. Hanc præfecturam sapientissimè gessit *Humbertus* eo præsertim tempore, quo *Guillelmus à Sancto Amore*, Parisiensis Doctor, Ordinibus Religiosis insensissimus, cum aliis ejusdem farinae sociis junctus, concionibus, & libris, ingentem Fratribus Prædicatoribus & Minoribus invidiam conflabat, & totus in eorum perniciem incumbens, haud levem eis molestiam faceſſebat. Has *Guillelmi à Sancto Amore* in Ordinem Fratrum Prædicatorum molitiones prudentiâ suâ dissipavit, & Ordini gravissimis jactato procellis tranquillitatem restituit *Humbertus*. Tandem cum novem annos Ordinem Sanctissimè rexisset, in Comitiiis Londinensibus ann. MCCLXIII. in quibus Sanctus *Thomas Aquinas* jure suffragii pro Provincia Romana petitus est, Præfecturam abdicavit, & in Cœnobium Valentinum ad Rhodanum secessit, ubi obiit anno MCCLXXVI. Scripsit *Humbertus* Commentarios in Regulam S. *Augustini*: libros sex *De Eruditione Religiosorum*, qui etiam *Speculum Religiosorum* inscribuntur: Tractatum *De*
Votis

Votis Substantialibus Religionis : librum *De Officiis Ordinis Prædicatorum* : & libros duos *de Arte concionandi* , seu *de modo promptè cudendi Sermones* , qui duo postremi libri confundi non debent cum alio Opere in quatuor libros diviso , quod eundem præfert titulum , seu *de modo promptè condendi Sermones* , hoc siquidem Opus doctissimus *Mabillonius* in *Itinere Italico* ex manuscripto Codice Abbatiz S. Salvatoris Bononiensis tribuit cuidam Canonico Regulari Anonymo , qui ante extinctos Templarios vixit . *Vitas Fratrum* , seu librum *de Origine ac Viris Illustribus Ordinis Prædicatorum* , multi Scriptores adjudicant *Humberto Præposito Generali Ordinis Prædicatorum* , sed alii probabilius censent , *Gerardum de Fracheto* , natione Gallum , patriâ Lemovicensem , egregium Concionatorem Ordinis Prædicatorum , hunc librum jussu *Humberti* scripsisse , quem adhuc MS. extare in Monasterio Rubræ Vallis apud Bruxellam , Duaci , & alibi , testatur *Gerardus Vossius* lib. 2. *de Historicis Latinis* cap. 59. Scripsit etiam idem *Gerardus de Fracheto* *Chronicon* à creatione Mundi usque ad annum mclxvi. quod in pluribus Bibliothecis adhuc MS. asservatur .

Albertus , Lavingæ apud Suevos ex nobilissima Dynastarum Bolstatensium familia oriundus , Ordini Fratrum Prædicatorum nomen dedit anno mccxxi. in quo eâ nominis celebritate claruit , ut *Magnus* , etiam vivens , vulgò appellaretur . Parisiis magno discipulorum concursu & applausu docuit , fabulæ tamen loco haberi debet , quod tradunt nonnulli , cum videlicet , ob frequentissimum auditorum concursum , Parisiis in publica pla-

tea, longè à Conventu Fratrum Prædicatorum, distante, quæ *Alberti Magni* nomine nuncupata sit, Gallicè *Place Maubert*, publicè docere, sub dio coactum fuisse. Id, inquam, fabulæ loco haberi debet, tum quia nullo Historiæ Francorum, aut Urbis Parisiensis Monumento id probari potest; tum quia etiam hujus plateæ nomen, non ab *Alberto Magno*, sed à Feudo *Mauberti*, cujusdam Civis Parisiensis, derivatum esse, certis & indubitatis monumentis constat. *Albertum Magnum* Ratisponensi Ecclesiæ invitum præfecit *Alexander IV.* Pontifex Maximus anno mclix. quâ de re *Humbertus*, quintus Ordinis Prædicatorum Generalis Magister, ad *Albertum Magnum* scripsit Epistolam, *Basilio*, & *Ambrosio* dignam, quâ veluti atrocissimum crimen illi improperat, quòd hanc dignitatem Angelicis humeris formidandam non recusasset, additque, malle se videre *Albertum* feretro jacentem & ad tumulum efferendum, quàm Sede Episcopali sublimatum. Episcopatum, quem invitus subierat *Albertus Magnus*, impetratâ post biennium ab *Urbano IV.* illum abdicandi veniâ, dimisit, & veluti gravissimâ sarcinâ exoneratus, ad quietem vitæ religiosæ inter suos fratres Conventus Colonienfis rediit, ubi obiit anno mclxxx. & in universo Fratrum Prædicatorum Ordine sacris honoribus colitur die xv. Novembris. Quantâ eruditione præditus fuerit *Albertus Magnus*, ejus Opera, quæ xxi. Tomis comprehensa Lugdani edidit P. *Jammy* Ordinis Prædicatorum, apertè demonstrant. Quin, & alia Opera ab ipso lucubrata fuisse, quæ vel adhuc MSS. latent in Bibliothecis, vel temporis, rerum omnium edacis, injuriâ perierunt,

runt, plures asserunt. Quædam tamen Opera illius nomen præferunt, quæ perperam ei tribuuntur. Libri **xii.** *De Laudibus Beate Virginis Mariæ* tomo vigesimo editi, non *Alberto Magno*, sed *Richardo à Sancto Laurentio*, Pœnitentiario Rothomagenfi, adjudicari debent, ut probant *Theophylus Raynaldus* in Diptychis Marianis, & *Hyppolitus Maracius* in Bibliotheca Mariana, fidemque faciunt manuscripti Codices, ex quibus duodecim illi libri editi sunt Duaci anno mdcxxv. Liber itidem *De Mirabilibus*, superstitionibus refertus, *Albertum Magnum* parentem non habet, sed alium planè Auctorem, minus *Alberto Magno* similem, quam homini Simiam. Liber quoque *De secretis Mulierum* non est *Alberti Magni*, nec viri cuiuspiam docti, sed potius hominis nugacissimi, qui librum, ex meris nugis contextum nomine suo edere non ausus, *Alberti Magni* nomen ei inscripsit, ut acceptus magis ac vendibilior esset, non secùs ac impii quidem homines sub augusto *Salomonis* nomine libros magicæ artis, qualis est *Clavicula Salomonis*, edere, ac in vulgus spargere præsumpserunt, Multos in Ordine Fratrum Prædicatorum discipulos doctrinâ & pietate conspicuos habuit *Albertus Magnus*, præsertim *S. Thomam de Aquino*, & *Thomam Cantipratensem*, quorum primus doctissimis, quæ scripsit, Operibus, & quibus Ecclesiam illustravit, amplissimam dicendi suppeditat materiam, quam instituti argumenti brevitatis hic fusiùs prosequi non patitur. Pauca itaque circa doctrinam & Opera *S. Thomæ Aquinatis* observabo, postea, de *Thoma Cantipratano*, qui fuit alter *Alberti Magni* discipulus, continenti ordine dicam.

S. *Thomas Aquinas*, Ecclesiæ Doctor, vulgò *Angelicus*, ob vitæ & doctrinæ puritatem, nuncupatus, natione fuit Italus, patriâ Neapolitanus, ex nobilissima Comitum Aquinatum prosapia oriundus. Monachis Cassinensibus, dùm adhuc quinquennis esset, primis litterarum rudimentis imbuendus traditus est, nunquàm tamen Monasticum habitum in Cœnobio Cassinensi induit, quamvis aliter visum sit doctissimo *Mabillonio*, qui in suo *Itinere Italico* citat verus Cœnobii Cassinensis Martyrologium, in quo Nonis Martii legitur, *Thomam Aquinatem primò Cassinensem Monachum fuisse, postmodum in Ordine B. Dominici Fratrem Prædicatorem effectum*. Verùm, quamvis negari haud possit, S. *Thomam Aquinatem*, dùm adhuc quinquennis esset, Deo fuisse oblatum à parentibus, & Ordini Benedictino destinatum, invictis tamen argumentis demonstrari potest, eum nunquàm Monachum Cassinensem fuisse. At enim, si Sanctus *Thomas Aquinas* Monachus Cassinensis fuit, antequàm Ordini Fratrum Prædicatorum nomen daret, quorsum igitur Monachi Cassinenses permiserunt, ut parentes eum è Cœnobio Cassinensi amotum mitterent Neapolim, quò humanioribus litteris, & Philosophicis excoleretur disciplinis? Cur patre, matre, sororibus ac fratribus infrendentibus, quòd *Thomas Aquinas* Mendicantium Ordini Fratrum Prædicatorum sese addixisset, Abbas, & Monachi Cassinenses parentibus se non adjunxerunt? Cur suum Religiosum sibi contra leges Ecclesiæ sublatum non conquetti sunt? Profectò Monachi Cistercienses Cœnobii Fontis Novæ *Thomam Aquinatem*, apud se sepultum sibi ereptum vehementer indolue-

luerunt, & ad Summum Pontificem suas querimoniae detulerunt, eritne credibile, Monachos Cassinenses *Thomam Aquinatem*, vivum, summæ spei adolescentem, ab Ordine Fratrum Prædicatorum vix nascente quasi subreptum, neglexisse, & permisisse ut parentes ipsum detinerent in carcere? Præterea, nec *Guillelmus de Thoco*, nec *Bernardus Guidonis* Lodovensis Episcopus, nec alii, qui *S. Thomæ Aquinatis* vitam postea scripserunt, ullibi innuunt, eum Cassinensem Monachum fuisse, immò *Guillelmus de Thoco* in ejus Vita disertè asserit, illum, postquam Neapoli studiorum peregisset cursum, Ordinem Prædicatorum fuisse ingressum. Nec dici potest, *Thomam Aquinatem* per solemnem oblationem à parentibus factam, & per receptionem ad Monasticum habitum censi debere Monachum Cassinensem; id, inquam, nullo pacto dici potest, quia fatetur ipsemet *Mabillonius* tom. 3. *Veterum Analektorum* pag. 476. & 477. hanc puerorum solemnem oblationem, & ad Monasticum habitum receptionem jam duodecimo Ecclesiæ Sæculo in desuetudinem penitus abiisse. His permotus rationibus, facile crediderim, præsumi illum *S. Thomæ Aquinatis* Monachatum interpolatrice aliquâ manu adjectum fuisse huic veteri Cœnobii Cassinensis Martyrologio, quod laudat doctissimus *Mabillonius*. Ordinem Fratrum Prædicatorum ingressus *Thomas Aquinas*, in carcerem conjectus est à Matre & fratribus, qui omnes aditus tentarunt, ut ejus constantiam labefactarent. Tandem è carcere dimissus & Ordini restitutus *Thomas* confestim Coloniam missus est, ut sub *Alberto Magno* philosophicis, & Theologicis studiis navaret

ope-

operam. Ex quo evidentè colligitur, errare *Wadinghum* in *Annalibus Minorum*, & quosdam alios *Franciscanos Scriptores*, qui asserunt *Alexandrum Halensem* Ord. Minorum, fuisse *Parisiis præceptorem S. Thomæ Aquinatis*. Nam quî, amabo, fieri potuit, ut *Alexandrum Halensem* *Parisiis præceptorem* habuerit *Thomas Aquinas*, quem constat, nunquàm *Parisiis Philosophiæ & Theologiæ* studuisse, sed eum, statim atque è Castro, in quo à Matre & fratribus detinebatur, dimissus est, à *Joanne Teutonico* Magistro Ordinis *Coloniam* deductum esse anno millesimo ducentesimo quadragésimo tertio, ubi *Alberti Magni* per quadriennium Scholas frequentavit, indeque, confectis studiis, *Parisiis*, ut Scholas regeret, & Theologiam edoceret, missus est an. MCCXLVI I. vel ineunte MCCXLVIII. quo anno *Thomas* *Parisiis* superstitem invenire, haud potuit *Alexandrum Halensem*, utpotè qui jam vivere desierat anno millesimo ducentesimo quadragésimo quinto, cùm cursum Theologicum vix *Thomas* *Coloniæ* sub *Alberto Magno* esset auspicatus. *Alexandrum* itaque *Halensem* fuisse *S. Thomæ Aquinatis* Præceptorem, novum figmentum est, antiquis omninò ignotum, & egregiè confutatum à nostro *Natali Alexandro* in Opusculo *De Titulo Præceptoris S. Thomæ ex Elogio Alexandri Halensis expungendo*, quod extat in calce septimi tomi *Historiæ Ecclesiasticæ* Editionis *Parisiensis* in Folio. Doctoralibus Infulis *Parisiis* insignitus *Thomas Aquinas*, totus divinis Operibus intentus, aut eruditioni, qua præcellebat, aut prædicationi, qua immotus erat, aut Orationi, qua devotus, aut Scripturæ Sacra, qua profundus, sedulus vacabat, ut ait *Joannes*

nes XXII. in Bulla ipsius Canonizationis . Totum
vitz suæ tempus docendo , scribendo , concionan-
dò cùm peregisset Sanctus ille Doctor , tandèm
eruditionis & sanctitatis famâ toti Orbi notissimus
ad vitam migravit immortalem anno ætatis suæ
quingagesimo incunte , die VII. Martii anni
MCCCLXXIV. in Monasterio *Fosse Nova* , Cisterciens-
is Ordinis , ad quod diverterat , in Gallias iter
faciens , ut Concilio Generali Lugdunensi II. de
mandato Gregorii X. Pontificis Maximi interesset
ad disputandum contra Græcos . Hinc eruditus
noster *Bernardus Guiard* Doctor Parisiensis in Opu-
sculo , quod ea de re edidit , contendit , S. *Thomam*
Aquinatem linguam Græcam calluisse , quâ ei ad
disputandum contra Græcos opus erat . Alii ta-
men , inter quos censetur doctissimus noster P. *Nicolaï* ,
Theologus itidem Parisiensis , negant , S. *Thomam*
linguæ Græcæ peritum fuisse . Ipse hanc con-
troversiam , quæ longius me abduceret , in medio
relinquo . In Sanctorum numerum à *Joanne XXII.*
anno MCCCXXIII. relatus est S. *Thomas* , eumque
Pius V. anno MDLXVII. quintum Ecclesiæ Docto-
rem dixit . Sacrum ejus Corpus Ordini Prædica-
torum dedit *Urbanus V.* quod Tolosam anno
MCCCLXVIII. translatum est . Ejusdem S. *Thomæ*
brachium *Urbanus V.* largitus est Conventui Pari-
siensi S. *Jacobi* , Ordinis Prædicatorum , quo sa-
cro thesauro ditatus ille conventus , viros omni
tempore protulit doctissimos , & egregios doctri-
næ S. *Thomæ* defensores . Inter Opera , quæ scrip-
sit S. *Thomas* , & quæ XVII. tomis sunt comprehen-
sa , eminet *Summa Theologica* , omnium Theologo-
rum encomiis celebrata , quam tamen *Joannes Lau-*
nojus

nojus, Doctor Parisiensis, & morosus, si quis unquam fuit, Sæculi proximè elapsi Censor, Sancto Thomæ abjudicare tentavit duobus nixus argumentis, quæ hic breviter diluemus. Primum argumentum, est merè negativum (quo insignis ille *Aristarchus* frequenter uti solebat) petitum ex silentio *Clementis VI.* Pontificis Maximi, qui in Sermone, quem de *B. Thomæ* recens numero Cœlitum adscripto habuit, omnium librorum, quos composuit Sanctus ille Doctor, Catalogum summa cum diligentia, maximoque studio conscripsit, & tamen de Summa Tripartita, ne verbum quidem habet. Hæc igitur Summa Tripartita non est genuinus fœtus *S. Thomæ*. Hoc est palmare *Launoij* argumentum, quod nullo negotio exsufflatur. Norunt quippè omnes periti Critici, argumentum negativum in quæstionibus facti nullius planè roboris esse, ubi ex adverso positiva militant argumenta ab Authorum cœvorum testimoniis petita. Esto itaque *Clemens VI.* eo in Sermone non meminerit Summæ *S. Thomæ*, at Authores *Clemente VI.* antiquiores, immò *S. Thomæ* suppare, Summæ Tripartitę disertam mentionem fecerunt, eamque Sancto Thomæ vindicarunt, videlicet *Guillelmus de Toco*, *Guillelmus Lamarensis*, *Ægidius Romanus*, *Joannes Teutonicus*, *Nicolaus Trivetus*, *Demetrius Cydonius*, *Durandus*, *Durandellus*, *Bartholomæus Pisanus*, *S. Antoninus*, & alii, quorum testimonia profert, ac latè expendit noster *Natalis Alexander* in Opusculo, quod edidit contra *Launojum*, cui titulus est: *Summa S. Thomæ vindicata*. Concidit itaque primum istud *Launoij* argumentum negativum petitum ex silentio *Clementis VI.*

cūm

cùm huic silentio opponantur probatissimæ fidei Scriptores, & Codices manuscripti, qui *Clemente VI.* antiquiores sunt, & Summam Tripartitam Sancto *Thomæ* asserunt. Non minus elumbe ac frigidum est alterum, quod *Launojus* proponit, argumentum. Ait quippè, ea, quæ in Secunda Secundæ sub nomine *S. Thomæ* leguntur, totidem, verbis haberi apud *Vincentium Bellovacensem* in Speculo Morali. Porro dici non potest, *Vincentium Bellovacensem* illa sumpsisse à *S. Thomæ*, quia *Vincents Bellovacensis* mortuus est an. *mccclvi.* quo tempore Angelicus Doctor annum duntaxat circiter trigessimum attigerat. Certè non inficias eo, hoc *Launoij* argumentum non nihil negotii exhibuisse, viris eruditis, qui hoc Speculum Morale *Vincentio* nostro *Bellovacensi*, ceu legitimo Authori, tribuendum esse putarunt, illosq; ut ab eo sese extricarent argumento, varios excogitasse modos, quos hic referre supervacaneum omninò esset. At nodum istum felicissimè solvit jam citatus noster *Jacobus Echardus* in libro, quem edidit & inscripsit: *Summa S. Thomæ suo Authori vindicata.* Ex tribus si quidem pervetustis, sinceris, & optimæ fidei manuscriptis Codicibus Operis *Vincentii Bellovacensis*, quorum primus asseruatur in Bibliotheca Sorbonica, alter in Bibliotheca Colbertina, & ultimus in Bibliotheca Majoris Conventus Parisiensis Eremitarum Sancti Augustini, ex his, inquam, tribus manuscriptis Codicibus invictè demonstrat *Echardus* primò, *Vincentium Bellovacensem* suum prægrande Opus non in quatuor, sed in tres duntaxat partes, seu in tria Specula distribuisse, nimirum *Naturale, Doctrinale, & Historiale*, ut videre est

Capi-

Capite xvii. Prologi Operis *Vincentii Bellovacensis* in tribus laudatis Codicibus MSS. Ostendit secundò, *Echardus*, hoc Speculum Morale fuisse attributum *Vincentio Bellovacensi* à quodam falsario & plagiario Scriptore alicujus Ordinis Mendicantium, sed non Fratrum Prædicatorum familiarum, qui in illud convasavit plura non solum ex *S. Thoma*, sed etiam ex aliis Scriptoribus, *Vincentio Bellovacensi*, & Sancto *Thoma* posterioribus. Denique, probat *Echardus*, hoc Speculum Morale à falsario illo confarcatum, & *Vincentio Bellovacensi* attributum, non nisi post annum mcccxx. prodidisse, subindèque longè post obitum *Vincentii Bellovacensis*, & Sancti *Thomæ*. Hæc tria capita, quæ rem planè conficiunt, tam evidentè demonstrat hic eruditus Scriptor, ut profectò in meridiana luce cæcutiret ille, qui propter istud Speculum Morale, falsò attributum *Vincentio Bellovacensi*, & compilatum à quodam plagiario, qui *Vincentio Bellovacensi*, & *S. Thoma* posterior fuit, negare, aut in dubium revocare vellet, integram Summam Tripartitam esse germanum *S. Thomæ* Opus. Pari certitudine *S. Thomæ* adjudicari debet Officium de Corpore Christi Domini, quod in universa Ecclesia Latina canitur. At enim, non solum domestici Scriptores, nempe *Guillelmus de Toco*, qui fuit *S. Thomæ* cœvus, & canonizationis ejus promotor, in ipsius vita, apud *Bollandum* ad diem vii. Martii, *Ptolomæus Lucensis*, discipulus *S. Thomæ* in Chronico, & *S. Antoninus III. P. Chronicorum*, hoc Officium de Corpore Christi à *S. Thoma*, jussu *Urbani IV.* Pontificis Maximi compositum esse testantur, sed etiam benè multi ex omni Natione, Religione

&

& Ordine illustres hoc Officium Corporis Christi Sancto *Thoma* tribuendum esse constanter profitentur, videlicet *Dionysius Carthusianus* in Expositione Hymnorum, *Jacobus Bergomas* in supplemento Chronicorum, *Platina* in Vita *Urbani IV.* *Onuphrius Panvinus* in Annotationibus ad *Platinam*, *Joannes Chapeavilleus*, Canonicus & Vicarius Generalis Ecclesie Leodiensis in Tractatu Historico de vera Origine Festi Corporis Christi, *Possevinus*, *Bellarminus*, & *Labbeus* Soc. Jesu in Catalogis de Scriptoribus Ecclesiasticis, *Spondanus*, & *Odoricus Raynaldus* ad annum MCCLXIV. & innumeri alii Scriptores Catholici, quibus ne ipsi quidem hæretici, ut Centuriatores Magdeburgenses, & *Hospinianus* hac in re ausi sunt refragari, ut videre est in *Expostulatione*, quam noster *Natalis Alexander* direxit ad P. Joannem Paulum Oliva Societatis Jesu Præpositum Generalem, & in qua diluit leves quasdam conjecturas, quibus *Henschenius*, & *Papebrochius* in Actis Sanctorum mensis Aprilis, in Appendice ad diem v. permoti fuerant ad negandum, hoc Officium Corporis Christi compositum esse à S. Thoma, illudque F. Joanni Leodiensi Clerico ex directione S. Julianæ Virginis attribuendum. Verum, eruditi illi Patres, convicti tandem rationibus *Natalis Alexandri*, ultrò palinodiam decantarunt, & omnibus Scriptoribus in Officio Corporis Christi Sancto Thomæ tribuendo consentientibus lubentissimè subscripserunt. Plura de S. Thoma, ejusque Operibus addere non patiuntur temporis angustia. Dicam dumtaxat obiter, S. Thoma, velut Scholæ Principi, assurgere, ac fasces submittere omnes Theologos, ejusq; doctri-

Ærinam à Christo Domino approbatam his verbis: *Bene scripsisti de me Thoma*, ab Ecclesia per Summos Pontifices & Concilia multis elogiis commendatam, terribilem Dæmonibus esse, & invisam turbæ Tartaræ, ex orco per os *Buceri* hæretici clamanti: *Tolle Thomam & dissipabo Ecclesiam*.

Thomas Cantipratanus, qui in Conventu Coloniensi sub *Alberto Magno*, una cum *S. Thoma Aquinate*, Philosophiæ, & Theologiæ operam dedit, patriâ fuit Brabantinus, in Oppido *Lewis* non procul *Bruxellis* nobili genere natus. *Cantipratani* cognomentum ei hæsit, quòd in Cœnobio *Cantipratensi* Canonicorum Regularium propè *Camericum* illorum suscepisset Institutum, antequàm Fratrum Prædicatorum Ordini sese addiceret. Tanta fuit ejus eruditionis ac pietatis fama, ut Episcopus inauguratus, & Episcopo *Camericenti* Suffraganeus datus sit, cujus vices triginta circiter annos infatigabili zelo obiit. Duos edidit libros *de Apibus*, in quibus plura illustria facta, miracula & exempla sui temporis refert. Scripsit etiam *Vitas Beatae Christinae* Virginis, cognomento *Mirabilis*; *Beatae Lutgardis* Monialis *Cisterciensis*, *B. Margaritæ Iprensis*, & librum unum *De Vita Sanctæ Mariæ Ogniacensis* adjecit duobus aliis libris vitæ ejusdem Sanctæ à Cardinali *Jacobo de Vitriaco* scriptis. Alterius libri ex variis Authoribus à se multo labore compilati, cui titulus erat: *De Natura Rerum* mentionem facit *Thomas Cantipratanus* lib. 2. *de Apibus* capite ultimo. At hic liber necdùm in lucem prodiiit. Græcæ linguæ peritum fuisse *Thomam Cantipratanum*, eumque rogatu *S. Thomæ Opera Aristotelis* latinitate donasse scribunt nonnulli, id tamen certo

certò non constat. Vitam *Thomæ Cantipratani* conscripfit *Gregorius Colvenerius* eamque præfixit libris ejusdem Authoris de *Apibus*, quos edidit, & Notis illustravit anno MDXVM.

Thomæ Cantipratano coævus fuit *Raymundus Martini*, Oppido Subiratenfi in Catalonia ortus, Ordinis Fratrum Prædicatorum, Conventus Barcinonensis alumnus, Vir Hebraicæ, Chaldaicæ, Arabicæ linguæ, teste *Nicolao de Lyra* doctissimo Scripturarum interprete, longè peritissimus. Ad judæorum pervincendam & domandam perfidiam, duo doctissima composuit volumina, quorum unius titulus: *Capistrum Judæorum*: Alteri, *Pugio Fidei*. Primum periisse creditur, alterum verò inscriptum *Pugio Fidei* ex Codice MS. Bibliothecæ Collegii Fuxensis, collato cum aliis Codicibus MSS. *Tolosano*, *Barcinonensi*, & *Majoricano* Fratrum Prædicatorum, in lucem emissum est, ac doctissimis Notis illustratum à Domino *Josepho de Voisin*, qui eandem operâ detexit duos hujus libri *Raymundi Martini* insignes Plagiarios, videlicet *Petrum Galatinum* Ordinis Fratrum Minorum, & *Porchetum de Salvaticis* Ordinis Carthusianorum. Horum primus, seu *Petrus Galatinus*, quidquid in *Arcanis Catholice Veritatis* ab ipso editis Rabbinicæ eruditionis ostentat, id totum ex nostri *Raymundi Martini Pugione Fidei* suffuratus est, nullibi laudato Auctoris nomine. Alter verò, seu *Porchetus de Salvaticis*, multa quidem ex hoc *Raymundi Martini* Opere compilavit in suo libro, quem inscripfit: *Victoria adversus Judæos*, at saltè *Petro Galatino* fuit candidior, atque modestior, quippè qui plagium suum ingenuè professus est, fontemque coronavit,

ex quo hauserat. Utriusque Plagiarii furtum detexit, & in apertam lucem produxit in suis Prologomenis in Pugionem Fidei mox laudatus Dominus *Josephus de Voisin*, de Ordine Predicatorum, benè meritus. *Ptolomeus Lucensis*, natione Italus, ex Civitate *Luca* oriundus, Ordini Prædicatorum nomen dedit, & Sancti *Thomæ Aquinatis* discipulus fuit; postea Joanni XXII. Pontifici Maximo à sacris Confessionibus, ac tandem Episcopus *Torcelensis* in Ditione Veneta creatus est. Scripsit *Annales* rerum tum Sacrarum, tum Civilium ab an. MLX. usq; ad an. MCCCII. Item *Chronicon Pontificum atq; Imperatorum*. Prodiit utrumq; Opus Lugduni anno MDCXIX. *Annales* inserti sunt tom. XXV. Bibliothecæ Patrum pag. 949. Scripsit etiam *Ptolomeus Lucensis* Historiam Ecclesiasticam libr. XXIV. cōprehensam. Sed hæc Historia Ecclesiastica adhuc manuscripta extat in Bibliotheca Vaticana, & sæpè ab *Qdorico Raynaldo* in Annalibus Ecclesiasticis laudatur. Sæpius mihi Romæ existenti venit in mentem, hanc manuscriptam *Ptolomæi Lucensis* Historiam Ecclesiasticam è tenebris erutam, ac Notis illustratam tandem aliquandò publicâ luce donare. Sed aliis studiis impeditus, quod meditabar aggredi necdum potui. Propositum tamen non abjeci, &, si suppetant vires, hujus Historiæ Editionem aliquandò adornabo, ne hoc thesauro, hætenus abcondito, diutius priveretur Litterarius Orbis. De *Ptolomeo Lucensi* agunt *Blondus* libro 13. *Volaterranus* lib. 22. *Joannes Gerardus Vossius* in libro de Historicis Latinis, *Possevinus* in Apparatu Sacro, *Casimirus Oudinus* in Supplemento De Scriptoribus Ecclesiasticis à *Bellarmino* omissis, & alii.

Eodem

Eodem tempore floruit *S. Raymundus Pennafortius*, Ordinis Prædicatorum, Barcinonæ nobili familia natus, qui Magister Generalis Ordinis Prædicatorum post *B. Jordanum* electus, cum biennio sanctissimè Magistratum gessisset, eo se, mœrentibus omnibus, spontè abdicavit. Insignia reliquit ingenii sui monumenta Ecclesiæ utilissima. *Gregorius IX.* Pontifex Maximus, qui *Raymundum Pennafortium* Pœnitentiarii dignitate ornaverat, quique perspectum habebat, quantâ juris, Sacrorumque Canonum peritiâ esset instructus, ei curam demandavit Pontificum Romanorum Decretales Epistolas, antehac parùm ordinatè dispositas, confusas, & immixtis nonnullis vel supposititiis, vel dubiis admodùm turbatas, in ordinem redigendi, obscura illustrandi, & certa ab incertis discernendi. Hoc arduum Opus suscepit *Raymundus Pennafortius*, illudque trium annorum spatio, ingentique labore ita feliciter absolvit, ut ab eo tempore post habitis aliis Collectionibus, sola *Raymundi* Collectio auctoritatem habeat, & inter cæteras præstet. Scripsit etiam *Raymundus Pennafortius*, rogante *Sugerio* Hispaniæ Provinciali, *Summam Casuum Conscientiæ*, quæ, ut fatentur omnes, maximam lucem præfert iis, qui vel hanc Theologiæ partem pertractant, vel qui pœnitentiæ Sacramentum administrant, ne videlicet mollius, quàm par sit, aut severius, quàm oporteat, cum Pœnitentibus agentes, à recta viâ, quâ incedere debent, malè abrepti deflectant. Obiit *S. Raymundus Pennafortius* virtutum & miraculorum gloriâ spectatissimus, annum penè centesimum agens, ipsa die Epiphaniæ anni mcccclxxv. & inter Sanctos à Cle-

mente VIII. Pontifice Maximo relatus est anno MDCI.

Præter S. Raymundum Pennafortium, fuerunt alii Sæculi XIII. Scriptores Ordinis Prædicatorum, qui *Summas Theologicas*, seu *Morales*, composuerunt, scilicet *Guillelmus Peraldus*, & *Uldaricus Argentinenſis*, quorum primus, natione Gallus, Vienneſis in Delphinatu Diœceſeos, ſcripſit *Summam Virtutum & vitiorum*, quam S. Antoninus Prædicatoribus utilem aſſerit, eamque Joannes Gersonius, Sacræ facultatis Pariſienſis Cancellarius, in lib. *De examinatione Doctrinarum* part. 2. Consideratione iv. plurimum commendat. Alia etiam Opera conſcripſit *Guillelmus Peraldus*, quem aliqui Lugdunenſem Archiepiſcopum fuiſſe falſò dicunt, cum *Gersonius* loco mox laudato de hac Summa verba faciens, hæc habeat: *Cujus Auctor*, seu *Guillelmus Peraldus*, contemporaneus ſatis fuit *Guillelmo Pariſienſi*, & *S. Thomæ*, vir ſine gradu, de *Conventu Prædicatorum Lugdunenſium*. Alter, quem appellavi, Scriptor, seu *Uldaricus Argentinenſis*, fuit doctor eximius, & Auctor *Summæ Theologicæ*, quam à Doctoribus impenſè laudatam aſſerit *Dionyſius Carthuſianus*. Multi Scriptores Joanni Teutonico, qui poſt S. Raymundum Pennafortium fuit Ordinis Prædicatorum Generalis Magiſter, attribuunt *Summam Caſuum Conſcientiæ*, quæ inſcribitur *Summa Confefſorum*, & ab Authore etiam *Summa Joannina* dicitur. Verùm, hæc Summa Joannem Teutonicum Authorem habere non poteſt, quia in ea citatur *Summa S. Thomæ*, quod certè Joanni Teutonico in mentem venire haud potuit, utpotè Argentinx defuncto anno MCLIII. quo tempore necdum S. Thomas

Do-

Doct̃or Parisiensis fuerat inauguratus, adeoque de Summa Theologica nequidem cogitauerat. Probabilius itaque est, hanc *Summam Casuum Conscientiæ* ab altero Joanne Ordinis Prædicatorum esse scriptam. Locum tamen inter Viros illustres jure merito obtinere debet Joannes Teutonicus Ordinis Prædicatorum Magister Generalis, quem *bonitate conspicuum, aspectu & affectu gratiosum, multiplici idiomate eruditum prædicant, ac viventem, defunctumque miraculis claruisse*, testantur S. Antoninus, & alii, qui de rebus Dominicanis scripsere. Denique, inter Viros Illustres Ordinis Prædicatorum, qui Sæculo XIII. doctrinâ & pietate claruerunt, sedem habent innumeri alii, sed præsertim Brocardus, Jacobus de Varagine, vulgò de Voragine appellatus, Theodoricus de Appoldia, Conradus, & Martinus Polonus, de quorum Operibus pauca hîc attingemus. Brocardus, Argentoratensis, accuratissimam scripsit *Terræ Sanctæ Descriptionem*, in qua ea, quæ oculis usurpaverat, narrat. Jacobus de Varagine, urbe Ligurum maritimâ oriundus, & à Nicolao IV. Genuensis Archiepiscopus renunciatus, Vir fuit in Deum adeò devotus, & in pauperes munificus, ut in eos integros ferè Archiepiscopatus sui redditus distribueret, pacis adeò amans, ut Guelphorum, Gibellinorumque animis conciliatis, optatam concordiam diu exulem in Urbem feliciter reduxerit. Biblia Sacra primus in Italicam linguam summâ fide & diligentia transtulit. Scripsit etiam *Vitas Sanctorum. Sermones de Tempore, & de Sanctis: Mariæ*, seu librum *de Laudibus Deiparæ Virginis*, & *Genuense Chronicon*. Verum, pro eâ sinceritate, quam in describenda Historia Ecclesiastica profite-

ri teneor, dissimulare non possum, nostrum *Jacobum de Varagine* nimis credulum fuisse, & in *Vitis Sanctorum* scribendis haud satis accuratum, sicut testatur diligentissimus Scriptor *Melchior Canus* lib. xi. de *Locis Theologicis* cap. vi. *Theodoricus de Appoldia*, patriâ Thuringus, & Erfordii natus, Vitam Sancti *Dominici*, Ordinis Prædicatorum Institutoris, octo libris accuratissime concinnavit. Scripsit etiam (teste nostro *Leandro Alberto* lib. iv. de illustribus Ordinis Prædicatorum Viris) Vitam *S. Elizabethæ*, *Andreae* Regis Ungarorum filiz, & *Ludovici* Langraviz Thuringiz Viduæ. Hanc Vitam *S. Elizabethæ* in octo libros divisam *Vossius* lib. 2. de *Historicis Latinis* nostro *Theodorico de Appoldia* adjudicat, sed cum nullum pro sententia sua argumentum proferat, illius hac in re judicium, flocci fieri debet. *Conradus*, natione Germanus, Vitam *S. Dominici* eleganti stylo conscripsit. Postremò *Martinus Polonus* natione & nomine, non Scurus, aut Italus, ut quidam perperam scripserunt, Romæ sub *Nicolao III.* Pœnitentiarius munus gessit, & ab eodem Romano Pontifice ad Archiepiscopatum *Gnesneensem* in Polonia assumptus. Sed dum iter aggressus ad suam pergeret Ecclesiam, Bononiæ obiit ann. mclxxviii. *Chronicon* à Christo nato ad annum usque mclxxviii. conscripsit. Ipsum non esse Authorem fabulæ toties explosæ de *Joâna Papissa*, sed eam fabulam alienâ manu ejus Chronico adiectam fuisse, memini me alibi ex antiquioribus Codicibus manuscriptis Chronici *Martini Poloni* luculentè ostendisse. Scripsit etiam, noster *Martinus Polonus* librum inscriptum, *Memorabilia Romæ: Summam Juris Canonici, & Sermones de*

de Tempore & de Sanctis. Sed hæc de præcipuis Ordinis Fratrum Prædicatorum Scriptoribus, qui Sæculo XIII. floruerunt, dixisse sufficiat. Si enim plura addere, & de aliis propemodum innumeris ejusdem Ordinis Scriptoribus, quos consultò prætermisi, singillatim differendi onus suscipere vellem, dies profectò me deficeret, & vix ullum exitum nostra posset reperire oratio.

D. Laudasti sanè perillustres & omni exceptione majores Ordinis Fratrum Prædicatorum Scriptores, nec dubito, quin hic Ordo toto orbe celeberrimus alios Sæculo XIV. dederit Ecclesiæ nobiles Scriptores, quorum doctrinam, & Opera, rogo te ut continuâ serie referas, ac breviter exponas.

M. Ordo Fratrum Prædicatorum Sæculo XIV. clarissimos protulit Scriptores, qui doctrinâ, & pietate conspicui amplissimum dicendi suppeditant argumentum, quod tamen ipse, velim nolim, angustis limitibus continere debeo, cum mihi certos fines, terminosque in hisce Colloquiis nostris constituerim, extra quos egredi non possum. Duo insignes Ordinis Prædicatorum viri Sæculo XIV. Chronicon scripserunt, videlicet *Nicolaus Trivetius*, & *Bernardus Guido*, quorum primus claris in Anglia parentibus natus, generis nobilitati scientiam ac pietatem junxit. Chronicon scripsit ab anno mxxxvi. ad annum usque mcccxi. in quo licet de rebus Anglicanis potissimum scribere in animo habuerit, res tamen Francorum & aliarum gentium passim recensuit. Hoc *Nicolai Triveti* Chronicon edidit *Lucas Dacherius* tomo viii. *Spicilegii*. Scripsit etiam *Nicolaus Trivetius* Commentaria in

Genesim, in Leviticum, in Psalterium, Catenam ex patribus in universam Scripturam, Commentarios in libros S. *Augustini* de Civitate Dei, quod libreta varia, Tractatum de Missa, & quàmplurima alia Theologica, Historica, & Philologica Opera, quæ recentent *Baleus*, *Pitsens*, *Altamura*, *Possevinus* &c. Scio, *Theophylum Raynaldum* in libro, quem stylo ferreo contra Fratres Prædicatores exaravit, & cui hunc titulum præfixit: *De Immunitate Cyriacorum*, Commentarium nostri *Nicolai Triveti* in Opus S. *Augustini* De Civitate Dei perfrictâ fronte appellare ignorantias, ineptias, gerras, & anilitates. Sed omnem fidem sibi abrogavit malè feriatu ille Author, quippè qui tot maledicta, calumnias & convicia in celebriores Ordinis Prædicatorum Scriptores eo in libro congesit, ut humanitatis, & Religionis-sensum ferè exuisse videatur. Sed hunc magnum Ardelionem, & Ordinis Fratrum Prædicatorum æmulum obtrectatorem satis pro suis meritis plantino sale defricuerunt duo è nostris Scriptores *Vincentius Baronius* in quinque libris Apologeticis, & *Casalas* in libro, cui titulus est *Candor Lilii*. Alter, quem indicavi, Scriptor, *Bernardus Guido*, natione fuit Gallus, patriâ Lemovicensis, Tolosanum primùm Inquisitor, ac postea Lodoventis in Provincia Narbonensi Episcopus. Scripsit Chronicon Romanorum Pontificum, Imperatorum, & Regum Francorum usque ad annum mcccxxx. quod Joanni XXII Pontifici Maximo nuncupavit. Composuit etiam Vitas Sanctorum, quæ Tolosæ extant in Bibliotheca Fratrum Prædicatorum, quinque prægrandibus Voluminibus exarata, insuper Tractatus De Conciliis, De Officio Missæ, Chron

Chronologiam Episcoporum Lemovicensium, ac Tolosanorum Comitum, Acta S. Thomæ Aquinatis, Acta omnium generalium Capitulorum Dominicani Ordinis, & alia Opera, quæ adhuc MSS. habentur apud Fratres Prædicatores Tolosanos, vel asseruantur in Bibliotheca Colbertina, sicut testatur *Casimirus Oudin* in Supplemento Bellarmini *De Scriptoribus Ecclesiasticis* pag. 595. Duos illustres Viros nomine affines, Sæculis XIII. & XIV. tulit Prædicatorum Ordo, quorum unus dictus est *Reinerius*, seu *Reinerus Sachonus*, natione Italus, patriâ Placentinus; alius posterior ætate, appellatur *Raynerius*, natione itidem Italus, patriâ Pisanus. Prior, seu *Reinerus Sachonus*, ex Hæretico Waldensi, & Episcopo Sæctæ Catharorum, divinâ affulgente gratiâ, factus est non solum Fidei Catholicæ professor, sed eximius defensor, Theologiæ, Jurisque Canonici peritissimus, & Inquisitor Fidei, in Longobardia circa annum mcliv. Scripsit Opusculum *de Hæreticis*, in quo præcipuè Sæctæ Waldensium errores insectatur, ut jam observavimus in Colloquiis in Historiam Sæculi xii. agendo de Waldensium Hæresi. Alter, dictus *Raynerius*, qui Sæculo XIV. floruit, Summam edidit, quæ *Pantheologia* inscribitur, quam sæculo proximè elapso doctissimus Pater *Joannes Nicolai* Sacræ Facultatis Parisiensis Doctor, Ordinis Prædicatorum, auctam & illustratam publicâ luce donavit. In hac Summa, seu *Pantheologia*, *Raynerius* collegit ex S. *Thoma*, semotis Scholæ subtilitatibus, prope modum infinita ad locupletandas conciones aptissima. Hinc igitur nostro *Raynerio* plurimum debent Concionatores, sicut etiam nostro *Joanni de S. Gemina-*

miniano, qui eodem Sæculo XIV. præter Sermones de Tempore, de Sanctis, & Funebres, scripsit *Summam* admodum utilem Prædicatoribus, *De similitudinibus rerum*, quæ decem libros complectitur, & in qua naturalia præclarè ad mores accommodat, additis interdum Scripturæ Sacræ & Sanctorum Patrum Sententiis. Hanc *Joannis de S. Geminiano* *Summam* commendat *S. Antoninus* 3. parte Chronici cap. 23. §. 2. De *Joanne Parisiensi* Ordinis Prædicatorum, & de ejus errore circa modum præsentia realis Corporis Christi in Eucharistia, satis diximus in Colloquio tertio. Hic tantum obiter advertere debes, hunc *Joannem Parisiensem*, Sæculi decimi quarti Scriptorem, perperam à multis Viris eruditis confundi cum altero *Joanne* eiusdem Prædicatorum Ordinis, qui vel ob ingenii acumen, vimque ac excellentiam doctrinæ, vel à familia sua, *Pungens Asinum* cognominatus est. Hic enim *Joannes*, dictus *Pungens Asinum*, Sæculo decimo tertio in Sacra Facultate Parisiensi celeberrimus Doctor, & Professor fuit, atque in Conventu *S. Jacobi* Fratrum Prædicatorum Parisiensium Scholas rexit ante *S. Thomam Aquinatem*, sicut testantur *Stephanus de Salanaco*, & *Bernardus Guido* antiqui rerum Dominicanarum Scriptores, & ex his *Maluenda* in Annalibus Ordinis ad annum MCCXXXVII. pag. 50.

Duos eximios Ordinis Prædicatorum Theologos, qui Sæculo XIV. Episcopalibus infulis insigniti, magnâ nominis celebritate claruerunt, hic prætermittere haud possum, videlicet *Durandum à Sancto Porciano*, & *Petrum de Palude*. Horum primus, seu *Durandus à Sancto Porciano*, natione fuit

fuit Arvernus, Sacre Facultatis Parisiensis Doctor, Sacri Palatii Apostolici Magister, Episcopus Aniciensis à Joanne XXII. primum designatus anno mcccxxiii. deinde ad Meldensem Episcopatum translatus anno mcccxxvi. Scripsit librum *De Jurisdictionum Origine*, & Commentarios in iv. Libros Sententiarum, in quibus suo, quàm S. Thomæ Aquinatis Magistri sui, sensui malens adhærescere, in varios lapsus est errores, quibus libros suos maculavit. Hinc Durandellus, ejus nepos, S. Thomam adversus ipsum strenuè vindicavit, egregio Opere, quod incipit his verbis: *Sedens adversus fratrem tuum loquebaris, & adversus filium matris tue ponebas scandalum: Existimasti quòd ero tui similis: Arguam te &c.* Extat hoc Durandelli Opus MS. in Bibliotheca Regalis Abbatie S. Victoris Parisiensis. Petrus de Palude, filius Girardi Varembonii Toparchæ in Bressia, Sacre Facultatis Parisiensis Doctor, & Patriarcha Hierosolymitanus fuit. Joanni XXII. qui, ut Doctor particularis, opinioni de procrastinanda Visione Beatifica post universalis Judicii diem plus æquò favere videbatur, se opposuit, & subscripsit deliberationi & Doctrinali Judicio, quod datum est à Magistris Sacre Facultatis Parisiensis in Conventu à Philippo Valesio, Galliarum Rege, ad prædictam examinandam opinionem indicto in Nemore Vincennarum anno mcccxxxiii. ubi communi Doctorum suffragio statutum est, reiiciendam esse hanc novam opinionem, quam Summus Pontifex Joannes XXII. non asserendo seu opinando protulit, sed solummodò recitando, ut constat ex Autographo Instrumenti ea de re editi, Regique Christianissimo porrecti, quod in Archivo Majore

Majoris Conventus Fratrum Prædicatorum Parisiensium, & in Scriniis Theologiæ Facultatis Parisiensis etiamnum asseruatur. Alia, quæ gessit *Petrus de Palude*, ignota sunt. Quod enim scribunt nonnulli, eum postea in Orientem profectum, ac in Cypro mortuum & sepultum esse, à vero procul abest. Obiit quippè Parisiis, & in Ecclesia Majoris Conventus Fratrum Prædicatorum sepulturæ mandatus, ut videre est in ejus Epitaphio. Scripsit *Petrus de Palude* Commentarios in universam Scripturam Sacram, Tractatum *De Causa immediata Ecclesiasticæ Potestatis*, Commentarios in libros iv. Sententiarum, & alia Opera, quæ partim edita sunt, partim MSS. extant in nonnullis Bibliothecis, partim hominum incuriâ, temporumque injuriâ interciderunt.

Angliam Sæculo XIV. duo præstantissimi Theologi Ordinis Fratrum Prædicatorum illustrarunt, videlicet *Robertus Holkot*, & *Thomas Stubbs*, sive *Stobæus*. Primus Nortamptoniæ in Anglia natus, & in Academia Oxoniensi Doctor ac Professor, Commentaria scripsit in librum *Sapientiæ*, in *Canticum Canticorum*, in septem priora capita Ecclesiastici, & in iv. libros *Sententiarum*. Alia Opera composuit *Robertus Holkot*, quorum alia edita sunt, alia adhuc extant in Bibliothecis MSS. quæ recensentur à nostro *Altamura* in Bibliotheca Prædicatorum pag. 126. & in Appendice pag. 479. & à Joanne Baleo Centuriâ v. *De Scriptoribus Britannicis* cap. 84. Alter, seu *Thomas Stubbs*, siue *Stobæus*, patriâ Eboracensis, & Sacræ Theologiæ Doctor, *Chronicon* scripsit *Episcoporum Eboracensium*, à Sancto Paulino ad Joannis Thoresbei obitum, hoc est, à pri-

à prima Sedis fundatione usq; ad ann. MCCCLXXIII. Extat Chronicon editum inter Scriptores Anglicanos. Quàm plurima ejusdem Authoris Opera Theologica, adhuc inedita, referunt *Altamura* in Bibliotheca Fratrum Prædicatorum, & *Baleus* Centuriâ IV. De Scriptoribus Britannicis cap. xxxvi.

Ab his clarissimis Ordinis Fratrum Prædicatorum Sæculi XIV. Scriptoribus sejungi minimè debent tres alii ejusdem Ordinis illustres Scriptores, qui eodem sæculo, in Theologia Ascetica, ut constans est omnium opinio, excelluerunt, videlicet *Joannes Taulerus*, *Henricus Suso*, & *Catharina Senensis*, de quorum Operibus pauca dicemus. *Joannes Taulerus*, natione Germanus, Ordinem Prædicatorum in Conventu Colonienfi professus, egregius concionator, & vitæ Spiritualis Magister absolutissimus evasit. Complura Opuscula scripsit vernaculo sermone, quæ ad Dei amorem, & ad pietatem legentium animos accendunt, quorum præcipua ex Germano idiomate in Latinum vertit *Laurentius Surius* Carthusiæ Colonienfis alumnus, eaque, cum ejus Vitæ, & conversionis Historia, edidit Ordine sequenti: *Conciones de Tempore*: *Conciones de Sanctis*: *De veris virtutibus*, & *institutionibus divinis*: *Epistola pia*: *Prophetie*: *Cantica Spiritualia animæ Deum amantis*: *De novem rupibus*, seu *Gradibus perfectionis Christianæ*: *Speculum lucidissimum*, & *Exemplar Domini nostri Jesu Christi*: *Exercitia de Vita & Passione Christi*: *Convivium M. Echardi jucundum & pium*: *Colloquium Theologi & Mendici*: *Oratio fidelis preparatoria ad mortem*: *Præparationes quinque notabiles ad mortem felicem*: *De decem Cæcitatibus*, & *quatuordecim Divini*

vini amoris radicibus . Pro Taulero , de quo iniquè & acerbè judicavit Eckius , vir alioquì doctissimus , Apologiam adornavit Vitæ Spiritualis insignis Magister Ludovicus Blosius , Lëtienſis Abbas , qui inter alia , hæc de Taulero nostro habet : Eckius non putans se falli , dicit : Utinam Taulerus prorsus lateret , & non involaret in Monasteria ! Ego verò in nomine Domini dico : Utinam Taulerus ubique gentium cognitus esset , atque à quàmplurimis diligentissimè Legeretur ! Verùm Eckius , licèt minùs circumspèctè damnaverit Taulerum , nondùm à se satis studiosè lectum , nequaquam tamen hoc malignè fecisse credendus est , sed feruens ille zelus , quo invehebatur in Lutherum Hæresiarcham , facile illi persuasit , ut præproperè iniquam de Sanctissimo viro Taulero sententiam ferret . In tradendis vitæ Asceticæ documentis Taulero inferior haud fuit Henricus de Suso , natione Svevus , ex nobili Comitum Montensium genere natus . Paternum cognomen non usurpavit , nec Henricus Mōtensis ex patre suo , sed Henricus Suso ex matre sua , scēminā Sanctissimā , appellari voluit . Nomen Jesu carni suæ supra cor itylo inscripsit , ejusq; passioni toto vitæ tempore se conformare studiis omnibus conatus est . In salutem proximorum procurandam , & nomen Jesu prædicandum incomparabili fervore incubuit . Ejus vitam scripsit Laurentius Surius , Carthusianus , quam inter Acta Sanctorum mensis Januarii tomo 2. ad diem xxv. Exhibet Bollandus . Omnia Henrici Susonis Opera è Svevico idiomate in Latinum vertit ; ac publicâ luce donavit idem Surius , videlicet Dialogum Sapientiæ , & Ministri ejus , sive Horologium Sapientiæ ; Conciones ; Epistolas ; Dialogum de veritate cum Ap-

pen-

pendice; Libellum de novem Rupibus; centum meditationes Dominicae Passionis; Officium quotidianum de aeterna Sapientia. De quibus Henrici Susonis Operibus jam laudatus Surius in Epistola Nuncupatoria ad Blossum Lxtiensem Abbatem hoc iudicium profert: Credo equidem, neminem tam Saxeo esse petore, qui non celestis gratia inexperta prius illustratione sit nonnihil immutandus, si se sedulum horum præbere lectorem non recusaverit; His Scriptoribus coæva fuit S. Catharina Senensis, quam eximia sanctitas cum singulari eruditione conjuncta, Stigmatum Christi Domini impressio, prophetiæ, discretio spirituum, miraculorum charismata, ac summa contemplativæ, activæque vitæ perfectio plurimum commendarunt. Ut Florentinis absolutiorem à censuris, quibus interdicebantur sacris, impetraret, susceptâ, eorum nomine, Legatione, Avenionem ad Gregorium XI. Pontificem Maximum sese contulit, cumque ad cogitatum consilium de referenda Romam Apostolicâ Sede perticiendum efficacius impulit. Mortuo Gregorio XI. non parvo adjumento fuit Urbano VI. ejus Successori tempore funesti schismatis, quo in Occidente scissa est Ecclesia. Epistolas trecentas sexaginta, quatuor graves & pietatis plenas ad varios Pontifices, Cardinales, Reges, Principes, & alios scripsit, ac nonnulla Opera ascetica, quibus planè ostendit, quo spiritu ageretur. In his quippè leguntur abditiora divinitatis arcana ei revelata, Dei ergâ ipsam singularia amoris argumenta, & documenta Sanctitatis plena, quibus Lectores ad germanam pietatem, & ad diligendum Deum maximè inflammantur. Obiit Romæ S. Catharina an. MCCCLXXX.

ætatis suæ trigesimo tertio . A Pio II. Pontifice ,
 Maximo in numerum Sanctarum Virginum relata
 est an. mccccxi. S. Catharinæ Vitam scripsit B. Ray-
 mundus de Vineâ , Capuanus , Ordinis Fratrum
 Prædicatorum Magister Generalis , antea hujus
 Sanctæ Virginis Confessarius , & omnium ipsius
 arcanorum conscius . Hic ille est Raymundus Ca-
 puanus , qui Ordinis Prædicatorum Præfecturam
 gessit tempore luctuosissimi Schismatis , quo di-
 visa erat Ecclesia , & Religiosi ejusdem Ordinis do-
 mesticis eâ de causâ dissidiis agitabantur . Gallia,
 Hispania , Scotia , & Regnum Neapolitanum par-
 tes Clementis VII. Avenione sedentis sequebantur .
 Elias Ordinis Prædicatorum Magister Generalis
 ab illo stetit . Reliquæ Provinciæ Italiæ , Germa-
 nia , Hungaria , Anglia , Polonia , Dalmatia ,
 aliæque regiones , & Provinciæ Urbani VI. Romæ
 sedentis partibus adhærebant . In hac communi
 animorum divisione , Religiosi itidem Ordinis
 Prædicatorum duas in partes distracti sunt , & hi ,
 qui Urbani VI. partes susceperant , illius jussu au-
 no mccccxxx. Bononiæ habuerunt Comitia , in qui-
 bus , abdicato Elia, Ordinis Magistro , qui Clemen-
 tem VII. pro legitimo Pontifice agnoscebat , Ray-
 mundum de Vineâ Capuanum , vitæ sanctitate , do-
 ctrinæque laude inter alios eximium , Ordini præ-
 fecerunt , quò factum est , ut Prædicatorum Ordo
 Schismate divulsus duos supremos moderatores
 tum temporis haberet . Præter Vitam S. Catharinæ
 Senensis , quam scripsit Raymundus Capuanus , &
 quæ inter Acta Sanctorum mensis Aprilis tomo 3.
 ad diem 30. refertur ab Henschenio , & Papebrochio ,
 scripsit etiam idem Raymundus Capuanus Vitam

San-

Sanctæ Agnetis de Monte Politiano Ordinis Prædicatorum, & *Tractatum in Magnificat*, quem pulcherrimum atque devotum appellat *Stephanus Senensis*, Prior *Carthusiæ Sanctæ Mariæ de Gratia* prope *Ticinum*, in *Epistola ad Fratrem Thomam Antonium de Senis*, de *Virtutibus*, & *Gestis Sanctæ Catharinæ Senensis*, datâ die xxvi. Octobris anni mccccxi. Possem benè multos alios recensere præclaros Ordinis Fratrum Prædicatorum Scriptores, qui doctrinâ & sanctitate nomen suum Sæculo XIV. nobilitarunt, illudque cum gloria ad notitiam posteritatis transmiserunt, sed his referendis, ne longior sim, lubens superfedebam, maximè, cum hanc nobilem spartam suscepit, eamq; felicissimè adornabit jam citatus noster *Jacobus Echard* in *Bibliotheca Scriptorum Ordinis Prædicatorum*, duobus tomis in folio comprehensâ, quam omni ex parte accuratissimo studio elaboratam prope diem in lucem emissurus est. Unum dumtaxat addam Scriptorem, videlicet *Nicolaum Eymericum*, eoque agmen Scriptorum Ordinis Fratrum Prædicatorum Sæculi XIV. claudam. Gerundæ in *Catalonia* natus est *Nicolaus Eymericus*, Ordinis Fratrum Prædicatorum Professor, omni scientiarum genere abundè cumulatus. Inquisitoris Generalis per totum *Aragonie* Regnum maximâ cum laude & Ecclesiæ utilitate perfunctus est. Plurima scripsit Opera, quæ eius doctrinam, & in evertendis hæresibus zelum apertè demonstrant. Præter *Tractatus Philosophicos*, *Commentarios* edidit in quatuor *Evangelia*, in *Epistolas S. Pauli ad Galatas* & ad *Hebræos*, *Sermones de Tempore* & de *Sanctis*, librum *De duabus Christi naturis*, item

alterum librum *De tribus personis in Deo*, librum *De excellentia Christi & B. Virginis*, librum *De Romani Pontificis Potestate*, & alia Opera, quæ in Conventu Gerundensi Ordinis Fratrum Prædicatorum MSS. extare dicuntur. Sed præ cæteris Operibus, quæ scripsit noster *Nicolaus Eymericus*, potissimum illud commendatur, cui titulus est, *Directorium Inquisitorum*, quod publicavit, & doctissimis Notis illustravit *Franciscus Pegna*, illudque in Epistola ad *Gregorium XIII.* nuncupatoriâ appellat præclarum & vetustate venerandum Opus, in quo summa Religionis capita continentur, & quæ ad hæreticam iniquitatem coercendam & extirpandam conducunt, piè & eruditè præscribuntur, & quidquid ad Sacrum Inquisitionis Officium securè exercendum exigitur, artificiosè ac methodicè demonstratur. Observat etiam idem *Franciscus Pegna*, multos adversarios nactum fuisse *Nicolaum Eymericum*, dùm viveret. Sed non est mirandum, inquit idem Author, cùm ea ferè sit eruditorum conditio, aut infelicitas. Habet quæque virtus sua adversa, & obstantia vitia, & quò altiores sunt turres, majoribus ventorum flatibus concutiuntur: & ut rectè protulit *Horatius*:

Sapius ventis agitur ingens

Pinus, & celsa graviore casu

Decidunt turres, feriuntque summos

Fulgura montes.

Hæc magna est, & postrema Viri, (seu Nicolai Eymerici) laus, eum acri odio hæreticos omnes habuisse, cunctasque hæreses detestatum fuisse: res verò ad fidem Christianam, & Religionem Catholicam spectantes, summa Religione & pietate coluisse. Hæc, & alia benè multa in commendationem Nicolai Eymerici

merici habet *Franciscus Pagn.* in ejus Vitz Breviario, quod *Directorio Inquisitorum* præmisit. Sed hætenus dictum sit de præcipuis & illustrioribus Scriptoribus, qui Sæculis XIII. & XIV. prodierunt ex Ordine Fratrum Prædicatorum, quem *Alexander IV.* Pontifex Maximus hoc dignatus est elogio: *Hic est Ordo honestate floridus, præclarus scientia, virtute sæcundus, conversatione purus, à Sede Apostolica meritò appellatus. Hujus Ordinis Fratres sacrarum litterarum studiis incumbunt, animarum profectibus, Divinis Officiis incessanter intendunt, Prædicationi ardentè insistent, & lumen doctrinae ubique diffundunt.*

D. Cùm Ordo Fratrum Prædicatorum summâ semper fuerit necessitudine devinctus cum Ordine Fratrum Minorum, convenientissimum esse videtur, ut, post laudatos illustres Ordinis Fratrum Prædicatorum Scriptores, seriem nunc texas celebriorum Theologorum, qui in Ordine Fratrum Minorum Sæculis XIII. & XIV. eximie eruditionis laude claruerunt.

M. Concordiæ sine ulla æmulatione sincerissimæ utriusque Ordinis, Fratrum videlicet Prædicatorum, & Fratrum Minorum, antiqua & indubitata extant testimonia, quæ frustra moliantur invidi delere ex hominum memoria, aut ex animis utriusque Ordinis Religiosorum. Hinc missos legimus utriusque Instituti Patres à *Gregorio IX.* ad Tartaros, aliosque Orientis populos fidei prædicandæ causâ. Hinc, teste *Spondano*, ad annum MCCLXXIV. ab ejusdem nominis *Gregorio X.* injunctum Provincialibus Prædicatorum & Minorum, ut suos Fratres mitterent bello sacro indicendo &

prosequendo ardentius . Et multò antè ad annum MCCXXXIII. ex eodem *Spondano*, duo Dominicani, & Franciscani , tanquàm Summi Pontificis Legati accesserunt ad Græcos , pacis cum Ecclesia Latina instaurandæ causâ , *quam enim* , inquit *Spondanus*, *tot Cardinalium auctoritate haud præstare potuerat* , *Gregorius IX. sibi procurandam statuit per Fratres Prædicatores & Minores* , *illa maximè tempestate* , *doctrina* , *pietate*, *atque integritate præstantes*. Hinc denique , teste eodem *Spondano* ad annum MCCXLV. *Innocentius IV.* Fratres Prædicatores , & Minores infestatione Magnatum vexatos suâ protectione, & auctoritate Apostolicâ communivit . Cùm igitur uterque Ordo de Ecclesia benè meritis arctissimis charitatis vinculis , quæ nunquam abrumpi poterunt , fuerit semper ligatus , necesse est , ut post recensitos nobiliores Ordinis Prædicatorum Scriptores , eos nunc in medium proferamus clarissimos Theologos, qui in Ordine Fratrum Minorum eruditionis præstantiâ cæteris antesteterunt . Incipiam verò à *S. Francisco* , natione Italo , Assisii in Umbria nato , Ordinis Fratrum Minorum Patriarcha , qui simplicibus verbis , sed divino Spiritu , quo erat perfusus , scripsit Regulas, Collationes, Epistolas, Cantica, Apophthegmata, Familiaria Colloquia, Prophetias, Parabolas, & exempla, Benedictiones, Sententias communes, Sermons, Orationes piissimas, aliaque Opuscula , ac demùm Testamentum . Quæ omnia *S. Francisci* Opera collegit , atque Parisiis edi curavit *Joannes de la Haye* Ordinis Fratrum Minorum anno MDCXLI. De his etiam *S. Francisci* Operibus consuli potest *Wadinghus* tomo 1. Annalium , & in Biblio-

bliotheca Ordinis Minorum . Inter Theologos Scholasticos , qui Sæculo XIII. doctissimis suis Scriptis in Ordine Fratrum Minorum nominis sui famam longè latèque propagarunt , Principem locum obtinet *Alexander de Hales* , natione Anglus , patriâ Glocestriensis , Vir pietatis eximie , Sacre Facultatis Parisiësis Doctor, & *S. Bonaventuræ* præceptor , non tamen *S. Thomæ Aquinatis* , ut superius observavimus . Adeò in Theologia Scholastica excelluit , ut vulgò à suis *Fons Vitæ* , *Doct̃or Doct̃orum* , & *irrefragabilis* , appelletur . Multa scripsit Opera, quorum indicem exhibet *Lucas Waddinghus* in Bibliotheca Scriptorum Ordinis Minorum , ex quo tamen Viri eruditi censent expungi debere *Summam Virtutum* , *Commentarium in Metaphysicam* , & *Commentarios in iv. libros sententiarum* , ut videre est apud nostrum *Natalem Alexandrum* in Opusculo I. de *Collatione Dominicani cum Fratre Minore* , quod est in Appendice ad tom. VII. *Historiæ Ecclesiasticæ* . Vitam *Alexandri Halensis* descripsit mox laudatus *P. Joannes de la Haye*, ejusdem Ordinis Professor , in qua , ut probet *S. Thomam Aquinatem* ex *Summa Alexandri Halensis* mutuatum esse plurima , adducit cap. XI. nonnulla Scripturæ Sacræ loca , quædam *S. Augustini* , vel aliorum Patrum , Auctorumque testimonia, quædam etiam rationes & objectiones , quas *S. Thomam* , Doctorem Angelicum , ex *Alexandro Halensi* de verbo ad verbum mutuatum esse pertendit . Verùm ipse etsi lubentissimè fatear , magnam fuisse *S. Thomæ* de *Alexandro Halensi* , ejusque doctrinæ existimationem , hunc tamen Doctorem Angelicum ex *Summa Alexandri Halensis* plurima in suam

de verbo ad verbum transcripſiſſe, exiſtimo, putidam calumniam eſſe, quæ multis momentis falſi convinci poteſt. Primò, quia ſi quis utramque *Summam*, ideſt *Alexandri Halenſis*, & *Sancti Thomæ*, Doctòris Angelici, conferat, facilè comperiet, *Summam Alexandri Halenſis* ab ordine *Summæ S. Thomæ*, methodo, ſublimitate, ſtylo, nitore, eruditione, & ratiocinandi vi toto cælo diſtare. Prætereà; ſi S. Thomas ex *Summa Alexandri Halenſis* plurima in ſuam transfudiſſet, omni procul dubio doctòr ille Angelicus laudaret aliquandò *Alexandrum Halenſem*, ex quo tam præclara excerptiſſet, ſicut alios Auctores, ex quibus aliquid hauſit, ſæpius in ſua *Summa*, honoris ergò, appellat. Porro, *Alexandrum Halenſem* ne ſemel quidem in ſua *Summa* laudat S. Thomas. Denique, ſi quid ponderis haberet Patris Joannis de la Haye conjectura, nullus eſſet Theologus, qui ab altero non eſſet dicendus accepiſſe, cum nemo ſit, qui aliquibus Scripturæ Sacræ, aut Patrum teſtimoniis non utatur, quibus in iſdem controverſiis uſus eſt alter; Nemo qui momenta graviora, ab Hæreticis objectari ſolita, vel trita in Scholis argumenta non diluat, propriâ quiſquis eruditione ac methodo eadem tractans, diſcutiens ac ediſſerens. Mirum itaque nemini videri debet, quòd S. Thomas, ſummo ingenii acumine pollens, & in Scriptura Sacra, & Sanctorum Patrum Operibus apprime verſatus, eadem interdum in ſua *Summa* laudet Scripturæ Sacræ, & Sanctorum Patrum teſtimonia, eaſdemque præviderit objectiones, & argumenta, quæ aliquandò habentur etiam in *Summa Alexandri Halenſis*. Optima quippè ratio, res com-

communis est. Nec minùs Scripturam Sacram ac Sanctos Patres pervoluerat *S. Thomas*, quàm *Alexander Halensis*, atque in penetrandis & præoccupandis objectionibus, quæ adversùs quæstiones, quas tractabat, opponi poterant, non minori ingenii vi ac sublimitate præditus erat, quàm *Alexander Halensis*. Nullam ergo fidem merentur *P. Joannes de la Haye*, aliique Scriptores, qui effutiunt, *S. Thomam Aquinatem* ex Summa *Alexandri Halensis* plurima, suppresso ejus nomine, in sua Summa mutuatum fuisse. Quod profectò eximie Doctoris Angelici modestiæ, humilitati, generoso & grato adversùs Magistros animo contumeliosum esse, nemo est qui non videat.

Alexander Halensis Discipulum habuit *S. Bonaventuram*, natione Italum, Balneoregii in Tuscia ortum, qui anno ætatis vigesimo secundo Ordinem Fratrum Minorum ingressus, eâ vitæ innocentiam, morumque integritate vixit, ut *Alexander Halensis*, ejus Præceptor, dicere soleret, videri sibi Adamum in *Bonaventura* non peccasse. Tantâ eruditionis famâ claruit, & cum tanto omnium applausu, sacræ Facultatis Parisiensis doctoris insulâ decoratus, Theologiam publicè docuit, ut ejusdem Facultatis Cancellarius, *Joannes Gersonius* in Epistola, quam Lugdunum ad quemdam Fratrem Minorem scripsit an. mccccxxvi. his verbis eum magnificè commendat: *Sint alii Doctores, qui dicantur Cherubici, hic, seu Bonaventura, verissimo nomine Saraphicus simul & Cherubicus, quia inflammat affectum, & erudit intellectum, reducit & unio ad Deum per amorem excitativum, dum alii multi solum diavaricant & dispergunt intellectum per præcisiones,*

nes, prioritates & posterioritates, & signa & contingentia, cum tamen unum sit necessarium. De Doctrina etiam S. Bonaventura idem Cancellarius ad finem libri de Examinatione Doctrinarum hoc iudicium profert: Porro, si queratur à me quis inter cæteros Doctores plus videatur idoneus? Respondeo sine præiudicio, quod Dominus Bonaventura, quoniam in docendo solidus est, & securus, pius, iustus & devotus. Præterea, recedit à curiositate quantum potest, non immiscens positiones extraneas, vel doctrinas saculares Dialecticas aut Physicas terminis theologicis obumbratas more multorum, sed dum studet illuminationi intellectus, totum refert ad pietatem & religiositatem affectus &c. Ordinis Fratrum Minorum electus Minister Generalis, Bonaventura, eo, communi Fratrum suffragio sibi credito, officio præclare functus est, & ad restaurandam sensim collapsam Ordinis Seraphici disciplinam multa gessit, totique Ordini maximè profuit. Concilio Generali Lugdunensi II. interfuit, ubi Cardinalis, & Episcopus Albanensis à Gregorio X. creatus, paulò post Lugduni obiit die xv. Julii anni mclxxiv. quem Funerari Oratione laudavit noster Petrus à Tarentasia, Cardinalis Episcopus Ostiensis, & post Gregorium X. Summus Pontifex, dictus Innocentius V. sumpto pro Orationis suæ themate lamentabili Davidis. textu libri 2. Regum cap. 1. vers. 26. Doleo super te mi frater Jonatha. Sanctorum Fastis solemniter Ecclesiæ ritu Bonaventuram adscripsit Sixtus IV. anno mccccclxxxii. & inter Doctores Ecclesiæ eum censerì debere decrevit Sixtus V. Pontifex Maximus, qui etiam omnia, quæ S. Bonaventura reliquit ingenii sui, & doctrinæ monumenta, diligenter

ter, & summo cum examine undique conquiſita, octo in tomos diſtributa curavit publicâ luce donari, Romæ anno MDLXXXVIII. ut videre eſt apud *Wadinghum* in Bibliotheca Minorum, ubi de Operibus S. *Bonaventuræ* fuſiſſimè diſſerit. Præcipuam S. *Bonaventuræ* in ſcribendo dorem *Trithemius* in Chronico dilucidè exprimit his verbis. *Profundus eſt, non verbosus; ſubtilis, non curioſus; diſertus non vanus: flammantia, non inſtantia verba proferens: undè & ſecuriùs legitur, faciliùs ab amante intelligitur, frequentatur dulciùs, & fluctuoſiùs retinetur.* Ejuldem Sancti Doctōris Opera hoc elogio celebrat S. *Antoninus* 3. parte Chronicorum tit. xxiv: *Intellectus ejus perſpicacitatem, inquit, omnia Opuscula ejus redolent iis, qui divinam ſcientiam requirētes, hanc libentiùs, quàm vanitatem Ariſtotelicam venerantur.*

S. *Bonaventuræ* cœvi fuerunt duo illuſtres Ordinis Minorum Scriptores, natione Angli, *Rogerus Baconus*, & *Richardus de Mediavilla*, quorum primus, Sacræ Theologiæ Doctōr Oxoniensis fuit, à *Joanne Pico*, *Mirandulæ Comite*, *Vir ingenioliſſimus* appellatus, & ab hominibus ſui temporis Doctōr *Mirabilis* dictus. Ad eum S. *Bonaventura* Opusculum ſuum miſit *De paupertate, labore manuum, & legendi ſtudio*. Reconditos naturæ reſſus *Rogerus Baconus* acutiſſimo ſuo ingenio penetravit, curioſa quæque rimatus eſt, latentes rerum cauſas penitiùs indagavit, & mirabiles quosdam effectus longè ſupra communem hominum, captum extulit in lucem, adhibitis ad id machinis non ſine ſummâ ingenii ſolertiâ excogitatis. Hinc non tantum apud imperitum, vulgus, ſed
apud

apud doctos etiam , ei impactum est *Magi* nomen. Quamobrem in Magicarum artium suspicionem adductus, in iudicium vocatus est ab *Hieronymo de Esculo* totius Ordinis Minorum Generali Ministro anno MCCLXXVIII. ut videre est apud *Wadingum* in Bibliotheca Minorum , ubi ejusdem *Rogerii Baconi* Operum accuratum texit Catalogum. *Richardus de Mediavilla* , Oxoniensis Academiae Doctor itidem fuit , tamque celebre id ætatis sibi nomen comparavit , ut *Doctores solidi, copiosi, & fundatissimi* nomen consecutus sit . Multa scripsit hic Doctor , in Theologia Scholastica, in Sacris Litteris , & jure Canonico peritissimus , de quibus legendi sunt *Balens* Centuriâ IV. *De Scriptoribus Britannicis* pag. 359. *Pitsæus* *De Scriptoribus Angli* pag. 386. & *Wadingus* in Annalibus , & in Bibliotheca Minorum . His duobus Scriptoribus Anglis meritò addi debet *Joannes Peckamus* , Ordinis Minorum , natione pariter Anglus , qui in Oxoniensi Academia cum magno Auditorum applausu & admiratione publicè prælegit , eâque eruditionis famâ claruit , ut ad Sedem Cantuariensem , per cessionem *Roberti Killwarbei* Archiepiscopi Cantuariensis vacantem , à *Nicolao III.* Pontifice Maximo fuerit sublimatus , & Romæ anno MCCLXXVIII. illius Ecclesiæ Archiepiscopus consecratus. Permulta scripsit Opera *Joannes Peckamus* quorum quædam edita sunt ; videlicet *Collectanea Bibliorum : Constitutiones quadraginta septem* de variis argumentis : *Perspectiva Communis* . Alia verò ejus Opera inedita sunt, & adhuc MSS. latent in Bibliothecis Angliæ , sicut testantur *Balens*, & *Pitsæus* in Catalogo Scriptorum Anglorum . Floruit etiam in Anglia
circa

circa annum MCCLX. Joannes Guallenfis, Ordinis Minorum, ob eximiam doctrinam passim *Arbor Vitæ* appellatus. Ejus Opera tam edita, quam inedita recenset Baleus cap. 48. Centuriæ IV. De Scriptoribus Britannicis. Ad Ordinem Fratrum Minorum Sæculo XIII. hoc est, anno MCCXL. transiit Albertus, Cœnobii Stadenfis in Diœcesi Bremensi, Ordinis S. Benedicti Abbas. Apud Fratres Minores, quorum Institutum amplexus erat, tantam existimationem sibi peperit, ut totius Ordinis Franciscani Generalis Minister fuerit electus. Scripsit Chronicon ab orbe condito ad annum MCCLVI. in quo melioris notæ Authores sequutus, Historiam vetustiorum temporum, tum verò præcipuè res Germanicas illustrat. Primus istud Alberti Chronicon edidit Reinerus Reineccius Hemstaldii anno MDLXXXVII. quod fuit postea recusum Witembergæ anno MDCVIII.

Sub finem Sæculi XIII. floruit in Ordine Fratrum Minorum Guillelmus Lamarensis, qui adversus Doctrinam S. Thomæ Aquinatis, cujus æmulus erat, librum edidit, quem inscripsit: *Corrèctorium Operum Fratris Thomæ*. At Egidius Romanus, Scriptor ejusdem sæculi, ex gente Columna, apud Italos illustrissimâ, oriundus, Ordinis Eremitarum S. Augustini, & Prior postea Generalis, necnon Archiepiscopus Bituricensis, hunc librum Guillelmi Lamarensis egregiè confutavit, atque ad vindicandam doctrinam Sancti Thomæ, inter cujus Discipulos primarius, illiusque doctrinæ studiosissimus semper fuit, librum composuit, qui inscribitur: *Corrèctorium Corruptorii Fratris Thomæ*, seu *Defensorium Fratris Thomæ*, in cujus libri Apologeti-

tici Præfatione meritò invehitur *Ægidius Romanus* in quosdam malè feriatos, qui, ut inquit, *Doctrinam S. Thomæ, qua fulget Ecclesia, immò veritatem, quam docuit, depravare nituntur, ipsius Sermonibus veritate plenis, & Spiritu veritatis instigante conscriptis, detrahentes*. Hunc eximium Doctorem, quem Academia Parisiensis tanti fecit, ut *Doctores Fundatissimi* honorificum nomen ei detulerit; doctrinæ suæ vindicem habere meruit *S. Thomas*, Theologorū Princeps, & Scholarum Angelus, in quem *Guillelmus Lamarensis*, togæ suæ nimiùm amans, alienæ impotentèr æmulus, aperto Marte insurrexerat.

D. Tenenturne Fratres Minores sequi in Scholis doctrinam *Alexandri Halensis*, aut *S. Bonaventuræ*, sicut Fratres Prædicatores in verba *Sanctæ Thomæ* jurare, & ab ejus doctrina ne latum quidem unguem desciscere obstringuntur?

Fratres Minores nec in *Alexandri Halensis*, nec in *S. Bonaventuræ* verba jurare coguntur, sed *Johannis Scoti* Doctores Sacre Facultatis Parisiensis, Theologi subtilissimi, quem Magistrum venerantur, doctrinam in Scholis sequuntur, pro ea acerrimè pugnant, & Scotistarum nomine gloriantur. Quâ de re olim *Gersonius*, Sacre Facultatis Parisiensis Cancellarius, in Epistola jam citatâ ad quemdam Fratrem Minorem Lugduni commorantem, conqueritur paulò durioribus hisce verbis: *Et ecce proh dolor! Doctores isti duo Ales & Bonaventura, videntur quasi sepulti cum illis, quorum non est memor amplius, præsertim in cordis amore. Extolluntur alii quidam, quorum sint utinam nomina in libro vitæ! non enim Studiosis invidemus. Sed multæ alios ipsorum litteræ fecerunt sub nomine subtilitatis insa-*

inspire, cum *sequacibus eorum &c.* Sed quidquid dicat *Gersonius*, quem in *Scotum*, ejusque discipulos, minus æquum fuisse asserunt Fratres Minores, certum est, *Joannem Scotum* novam instituisse Scholam, quam anno mcccxx. florere cœpisse, & progressu temporis celeberrimam evasisse probat doctissimus *Antonius Pagius*, Ordinis Minorum, in sua *Critica Historico Chronologica Baronii* ad annum mcxc. num. 10.

D. Expone, quæso te, paulò uberius, quis fuerit iste *Joannes Scotus*, novæ Scotistarum Scholæ institutor, & quâ in re potissimum excelluerit?

M. Quæ ex patria oriundus sit *Joannes Duns*, cognomento *Scotus*, nihil certi affirmare possum, maximè cum ea de re Angli, Scoti, & Hiberni acerrimè inter se digladientur, singulis certatim illum sibi vendicantibus, asserit tamen *Lucas Waddingus*, Minorum Annalista, eum natione fuisse Hibernum, & Duni in Ultonia natum. Ordini Fratrum Minorum juvenis adhuc nomen dedit, & in Philosophia ac Theologia Scholastica adeò excelluit, ut *Doctor Subtilis* fuerit appellatus. Nihil erat tam obscurum, densâque caligine involutum, quod ille, sibi saltem, non redderet perspicuum, & clarum; nihil tam occultum & abstrusum, quod acutum ingenio suo ad litteras planè factò, & ad miraculum subtili atque acuto, non penetraret, nihil denique tam nodosum, quod ille non dissolveret. Theologiam docuit primùm Oxonii in Anglia, deinde Parisiis. Asserunt nonnulli Scriptores, *Joannem Scotum*, dùm Oxonii in Anglia doceret, tantâ sui nominis gloriâ hanc Cathedram Theologicam fuisse moderatum, ut triginta plusquam Scho-

Scholarium millia, ejus audiendi gratiâ, Oxonium undique confluerint. Multa Opera Philosophica & Theologica scripsit subtilis ille Doctor, quæ duodecim tomis comprehensa, ac Notis illustrata *Lucas Wadinghus*, unâ cum ejus vita, Lugduni edi curavit anno MDCXXXIX. In hac *Wadinghi* Operum *Scoti* Editione Tomi v. vi. vii. viii. ix. & x. complectuntur magnum *Scoti* Commentarium in iv. libros Sententiarum, dictum *Oxonienſe*, eò quòd *Oxonii* à *Scoto* fuiſſet elucubratum. Tomus verò undecimus continet *Reportatorum Pariſienſium* libros iv. qui quaſi compendium rude ſunt jam citati magni Commentarii *Scoti* in iv. libros Sententiarum, quod *Oxonienſe* appellatur. De hoc Opere *Reportatorum Pariſienſium* hanc cenſuram fert *Wadinghus*: præter ſtylum longè diverſum à ſcripto *Oxonienſi*, diſcrepat etiam ab eodem valdè doct̃rina. Adde, longè humiliùs & inferius eſſe priori Opere, proinde ingenio jam provectioris Doct̃oris ſubtilis indignum. Haſtenus *Wadinghus*; qui hac ratione factum eſſe ait, ut, neglectis *Reportatis Pariſienſibus*, omnes inhæreant *Oxonienſi* Commentario. Sed de Operibus *Joannis Scoti* conſule eundem *Wadinghum* tomo 3. Annalium, & in Bibliotheca Fratrum Minorum. Scribit in Annalibus Eccleſiæ noſter *Bzovius*, ſecutus *Paulum Jovium*, infelici vitæ exitu *Joannem Scotum* fuiſſe extinctum, cumque comitiali morbo laborantem, & nimis feſtinato funere elatum, cum, redeunte vitâ, ſerò morbi impetum natura diſcuteret, fruſtrâ miſerabili mugitu opem petiſſe, pulſatoque diu lapide, elifo tandem capite periſſe. Verùm, hanc fabulam pluribus momentis refellit *Wadinghus*, quorum

præcipuum petitur ex usu, qui in Conventu Coloniensi Fratrum Minorum, ubi mortuus est *Joannes Scotus*, semper obtinuit, sepeliendi videlicet Fratres non in Sepulchris concameratis, sed in humo effossâ, alligatis manibus & pedibus defuncti, atque injectâ supra Corpus Cadaveris terrâ. Juxta quem ritum si quis, etiam vivus sepeliatur, neque spirare, neque mugire, neque gradus ascendere, neque lapidem pulsare poterit semel sepultus. Explosâ itaque hac fabulâ, hoc unum certum est, *Joannem Scotum*, Doctorem subtilem obiisse Coloniæ anno mcccviii. sexto Idus Novembris.

Duos ejusdem Ordinis Fratrum Minorum, eximios Theologos *Joannes Scotus*, discipulos habuit, videlicet *Franciscum Mayronium*, & *Guillelmum Okamum*. Primus natione fuit Gallus, è Diniensi Provinciæ Oppido oriundus, Theologus Facultatis Parisiensis, & *Doctoris Acuti* nomine clarus. Exercitationem illam celebrem à Facultatis Parisiensis Baccalaureis in Aula Sorbonica haberi solitam instituit hic *Franciscus Mayronius*, quam vulgò *Sorbonicam* appellant, & quæ incipit à sexta hora matutina, & desinit in sexta vespertina, sine præside, sine socio, sine prandio & pastu, sine ulla emigratione, in eadem perpetua corporis & animi contentione, per duodecim horas continuas omnibus & singulis arguentibus respondetur. Quam exercitationem abique aliquo salutis detrimento vix fieri posse facile credidissem, nisi ipse dum Actus meos Academicos Parisiis quatuordecim abhinc annis in studio Licentiæ peragerem, contrarium proprio experimento didicissem. Scripsit *Franciscus Mayronius* Commentarium in
iv. li-

iv. libros Sententiarum : librum unum de Formalitatibus: Sermonum de Tempore librum unum: & alterum librum Sermonum de Sanctis . Scripsit etiam quæstiones Quodlibetales , quas in Codice MS. vetustissimo , in quo plures continebantur quæstiones , quàm in Quodlibetis editis , apud se habuisse testatur *Antonius Pagius* ad annum mxc. num. xi. *Guillelmus Okamus* , gente Anglus , & *Joannis Scoti* alter discipulus fuit , sed ejus doctrinæ postea impugnator acerrimus . In Aristotelica Philosophia adeò profecit , ut ob Logicas meditationes, & cætera Philosophica & Theologica Theoremata subtilitèr inventa , subtiliùsque firmata , *Venerabilis inceptor* , & *Auctor invincibilis* vulgò appellaretur . Scholam Nominalium instauravit , eorumque subtilitates & argutias jam penè obsoletas & emortuas excitavit . Ad *Ludovicum Bavarium* , Imperatorem , qui id ætatis Ecclesiam funesto Schismate turbavit , sese contulit , eumque sic affatus est : *Tu me defendas gladio , & ego te defendam calamo* . Partes *Petri de Corbario* , Franciscani Antipapæ , strenuè fovit , & adversùs *Joannem XXII.* legitimum Pontificem , à quo fuerat excommunicationis fulmine percussus , acerrimè scripsit , præsertim in Tractatu, quem contra Summi illius Pontificis Constitutionem , quæ incipit . *Quia Vir reprobus Michaël* , edidit , quemque inscripsit : *Opus nonaginta dierum* , ubi Summum Pontificem *Joannem XXII.* passim insectatur , centiès repetitis his verbis : *Dicit iste Hæreticus* . Tractatus , quos edidit *Guillelmus Okamus* adversùs *Joannem XXII.* editi sunt à *Goldasto* tomo 2. *Monarchiæ* , sicut & alii Tractatus , quos adversùs eundem Summum Pontifi-

tificem scripturavit *Michaël Casenas*, Ordinis Fratrum Minorum Generalis Minister, qui à *Ludovico Bavari* Imperatoris partibus stetit, & à *Joâne XXII.* atque à suis meritò damnatus est anno *MCCCXXIX.* & *MCCCXXXI.* ut videre est apud *Spondanum*. Multa alia Opera scripserunt *Guillelmus Okamus*, & *Michaël Casenas*, de quibus legendus est *Wadinghus* in Annalibus, & in Bibliotheca Fratrum Minorum, ubi etiam probare nititur, *Guillelmum Okamum*, & *Michaëlem Casenatem* ad meliorem frugem sese recepisse, & pœnitentes obiisse. Quod licet ipse inficias ire nolim, incertum tamen esse, puto, dicente *S. Augustino* in libro de Doctrina Christiana: *Sicuti non potest malè mori, qui benè vixit, ita vix benè moritur, qui malè vixit.* Et sanè, multos legimus in omnibus Ecclesiæ Sæculis surrexisse erroris & Schismatis Duces, atque ab avita Religione populorum animos abalienasse; Sed qui reverterentur deindè deserti in castra, suisque se affeculis subducerent, vix unum alterumve legimus. Ut ut sit, proterviam *Guillelmi Okami*, & *Michaëlis Casenatis* retudit, & pro *Joanne XXII.* Apologiam adornavit *Alvarus Pelagius*, Ordinis Fratrum Minorum, Episcopus primùm Coronensis in Achaja, & postea Antistes Silvensis in Lusitania constitutus, qui vixit eodem Sæculo XIV. hoc est, circa annum *MCCCXL.* Scripsit etiam idem *Alvarus Pelagius* duos libros de *Planctu Ecclesiæ*, quos nuncupavit *Petro Gomesio*, Ordinis Fratrum Minorum Generali Ministro, & alia Opera, de quibus legendus est *Wadinghus* in Bibliotheca Scriptorum Ordinis Minorum pag. 15.

Præter *Mayronium*, & *Okamum*, duos alios
 Tom.V. Ff cele-

celebres Discipulos habuit *Joannes Scotus*, quos hic prætermittere non debeo. Primus est *Antonius Andreas*, Ordinis Minorum, Philosophus & Theologus insignis, *Doct̃or Dulcissimus* à suis nupatus, qui Commentarium scripsit in iv. libros Sententiarum. Alter est *Joannes Bassolis*, Ordinis Minorum, *Doct̃oris Ordinatissimi* nomen consecutus, qui Miscellanea Philosophica & Medica, necnon Commentaria in iv. libros Sententiarum ad posteros transmisit. Denique, ne in aliis recensendis Ordinis Fratrum Minorum Scriptoribus in immensum diffundar, quatuor dumtaxat celebriores subnectam, videlicet *Nicolaum de Lyra*, *Petrum Aureolum*, *Astesanum*, & *Raymundum Lullum*, qui sæculo XIV. floruerunt. In primis, *Nicolaus de Lyra*, natione, non Brabantinus, nec Flandricus, nec Anglus, ut falsò putarunt varii Scriptores, sed Normannus, è *Lyra* Normandiæ vico, Judaicis parentibus ortus est, unde *Lyranus* vulgò dictus. Ordinem Fratrum Minorum in Cænobio Vernoliensi professus est, & in Sacra Facultate Parisiensi Doctoralibus Infulis exornatus, per plures annos Sacram Scripturam Parisiis summa cum laude interpretatus est. Præter quæstiones veteris & novi Testamenti, *Postillam* paritèr edidit, seu brevia Commentaria in universam Scripturam Sacram, quæ simul cum ordinaria *Strabi* Glossa, & Interlineari *Anselmi* Laudunensis reperitur. Scripsit etiam idem *Nicolaus Lyranus* Tractatus in Judæos, Commentarios in iv. libros Sententiarum, & alia Opera, de quibus legendus est *Lucas Wadinghus* in Bibliotheca Scriptorum Ordinis Minorum. Obiit *Nicolaus Lyranus* Parisiis die xxiii. Octobris anni

ni mcccxl. & in Aula Capitulari Conventus Fratrum Minorum sepultus. *Petrus Aureolus*, natione Gallus, Vermetiæ, Oppido ad Isaram fluvium, natus, Ordinem Minorum professus, Laureâ Doctorali in facultate Parisiensi insignitus est. Dein, ad Archiepiscopatum Aquensem anno mcccxxi. promotus fuit, atque ob ingenii perspicaciam, *Doctor Facundus* appellatus. Edidit *Petrus Aureolus* Breviarium Bibliorum, sive Epitomen universæ Scripturæ Sacræ juxta sensum litteralem: Compendium Theologiæ: Commentarios in iv. libros Sententiarum: librum de Conceptione B. Virginis Mariæ: Tractatum de Paupertate & usu pauperum rerum: Sermones &c. *Astesanus*, natione Italus, ex *Asta*, Subalpinorum urbe nobili, oriundus, clauit in Ordine Fratrum Minorum, & scripsit Summam Casuum Conscientiæ in octo libros distributam, quæ vulgò *Astesana* dicitur, obiitque circa annum mcccxxx. *Astesanus* alterum paulò post in Ordine Minorum floruisse, Auctorem Commentariorum in libros Sententiarum, & in Apocalypsim, ac Sermonum de Tempore, rectè observat *Wadinghus* in Bibliotheca Scriptorum Ordinis Fratrum Minorum. Circa *Raymundum Lullum*, quem Tercio Ordini S. *Francisci*, nomen dedisse, & Sæculo XIV, floruisse scribunt Authores Minoritæ, non nulla jam observavimus in Colloquio tertio, ubi ostendimus primò, multas propositiones, ex libris *Raymundi Lulli* excerptas, à *Gregorio XI. Pont. Maximo* fuisse ceù Hæreticas proscriptas, ut liquet ex ipsius Diplomate, relato à nostro *Eymerico* in Directorio Inquisitorum, quod Diploma nec subreptitium, nec supposititiū esse, ibidem evicimus. Secun-

do, commonstravimus, *Raymundo Lullo*, propter illas propositiones hæreticas, infamem hæreseos dicam impingi non debere, quia certissime constat, eum correctioni & judicio Ecclesiæ omnia sua subjecisse Opera, ut multis probat *Wadinghus*, Minorum Annalista, & post ipsum *Joannes Baptista Solle-rius*, continuator *Bollandi* in Dissertatione Historica de *Orthodoxia & libris B. Raymundi Lulli genuinis ac supposititiis*, quam inseruit tomo v. De Actis Sanctorum mensis Junii. Ex quo sequitur, non minus Orthodoxiam; immò & sanctitatem *Raymundi Lulli* vindicari posse; quàm vindicari solet Orthodoxia, & Sanctitas *Joachimi* Abbatis, quem, sicut observavimus in Colloquio III. in Historiam sæculi duodecimi, *Honorius III.* Pontifex Maximus defendit contra ejus Calumniatores; tametsi Abbatis *Joachimi* liber contra *Petrum Lombardum*, Oecumenici Concilii Lateranensis IV. judicio fuisset confixus, idque eâ solùm de causa, quòd Abbas *Joachimus* scripta sua mandavit Romano Pontifici assignari Apostolicæ Sedis judicio approbanda, seu etiam corrigenda, ut ait ille Summus Pontifex in Brevis Pontificio, quod ad Antistites Cusentinum, & Bisiniacensem in gratiam Abbatis *Joachimi* destinavit. De Vita, & Gestis *Raymundi Lulli*, ortu Majoricensis; leges post *Wadingum*, jam citatum *Joannem Baptistam Solle-rium* ad diem xxx. mensis Junii, ubi ex variis Scriptoribus omnia collegit, quæ spectant conversionem *Raymundi Lulli*, frequentes ejus peregrinationes, pro dilatatione Fidei Catholicæ susceptos labores, heroicas virtutes, Martyrium pro fidei defensione, ei à Saracenis Bugiæ in Africa illatum, cultum, quo Majori-
censes

censes eum ut Martyrem venerantur, & miracula, quæ patravit post mortem. Quæ licet omnia indubium, hic revocare non aulam, his tamen fidem adhibere non teneor, quia Ecclesia Romana, cæterarum Mater & Magistra, necdum *Raymundi Lulli* Heroicas virtutes, Martyrium, & miracula vindicavit. Innumeros penè libros scripsit *Raymundus Lullus*, quorum Catalogus, quem post *Wadinghum* exhibet ad diem xxx. Junii pag. 697. *Sollerius*, *Bollandi* continuator, tomo v. de *Actis Sanctorum*, complectitur libros trecentos triginta & unum, non computatâ Appendice aliorum librorum, qui sub ejus nomine circumferuntur, quique ad Chimiâ majori ex parte attinent. Sed, ut candidè fatear, difficilè in animum meum inducere possum, ab uno *Raymundo Lullo*, tot variis occupationibus, peregrinationibus, & concionibus distracto, tantam librorum copiam, non dico componi attentius, sed vel transcribi commodè potuisse. De Scriptis *Raymundi Lulli* varia ac diversa sunt Authorum judiciâ, quibus referendis, ne longior sim, consultò superfedebo, unum dumtaxat, quod Lullistis suspectum esse haud potest, proferam judicium *Wadinghi*, qui tomo 3. *Annalium Minorum* ad annum mcccxv. quo obiit *Raymundus Lullus*, sic de ejus Operibus censet: *Quid de genuinis Lulli Operibus sentiam*, inquit, *liberè pronuntiabo. Opus Theologicum in libros Sententiarum, eâ majorem ingerit admirationem, quò copiosius, miris & inusitatis modis loquendi, omnia fidei comprehendit arcana, deque singulis Theologia controversiis plures instituit quæstiones. Libri de Contemplatione, & pia quæque argumenta, quæ tractat, devotionem*

rant, & fidei dilatandæ præferunt ardorem. Præter hæc, varii sunt Tractatuli, vario sine & tempore compacti, qui vagum & versatile, & ad omnia paratum hominis indicant ingenium. Artes Magna, & Parva, & Inventiva veritatis, admirabiles habent ambages, & sinuosos anfractus, per quos nec Dædalo liceat incedere, nec ingeniosissimis aliquandò viris etiam filum sufficiat Ariadnæ, quin in itinere, vel judicio sæpè deficiant. Paucos, vel nullos invenias, qui hanc artem, vel artium omnium secretissimum & mysteriosum, quod fingunt, Seminarium, vel, ut, alii volunt ludibrium, perfectè assequantur in universis autem hominis Operibus stylus inconcinnus, inæqualis, non solum humilis, verùm passim barbarus, idiotismis aliorum idiomatum ubique scatens. Methodus irregularis, inculta & confusa: Rerum gestarum neque seria, neque lenis, sed levis & aspera, aliquandò ridicula, vera tamen & sincera narratio. Modi, & termini loquendi à communi dissident loquela Theologorum, & pleraque ejusdem assertiones à communi nostri ævi doctrina. Candidè etiam fatetur ibidem Wadinghus, majorem partem propositionum, quas noster Eymericus in suo Directorio Inquisitorum, tanquam hæreticas perstringit, offendi in Operibus Raymundi Lulli: sic enim inquit: Porro ex reliquis propositionibus, quas Eymericus centum exscripsit in Directorio, major & potior pars verè in ejus Operibus reperitur, quarum nonnullæ duriores & crassiores sunt, quàm eas communis Theologorum schola admittat, aut sine censuris elabi permittat. Hactenus Wadinghus, cujus accurato de Raymundi Lulli Operibus judicio lubentissimè subscribo.

D. Jam intelligo, benè multos ex utroque
Ordi-

Ordine Fratrum Mendicantium , Prædicatorum , & Minorum Sæculis XIII. & XIV. prodiisse præclarissimos Scriptores, nec dubito, quia in aliis duobus Ordinibus Mendicantium , videlicet Eremitarum S. Augustini , & Carmelitarum , celebres itidem floruerint Scriptores , quos profectò silentio prætermittere haud debemus .

M. In Ordine Fratrum Eremitarum S. *Augustini* floruit sub finem Sæculi XIII. & initium Sæculi XIV. *Ægidius* , patriâ Romanus , Ordinis Eremitarum S. *Augustini* Prior Generalis , deinde Bituricensis Archiepiscopus . S. *Thomæ Aquinatis* , cujus discipulus fuerat , acerrimum sese præbuit vindicem , & , sicut antea observavimus , contra *Guillelmum Lamarenses* , Minoritam , qui S. *Thomæ* doctrinam primus impugnauerat , librum composuit , quem inscripsit *Correctorium Corruptorii Operum F. Thomæ* . Laureâ Doctorali in Sacra Facultate Parisiensi donatus , ob eximiam , quâ fulgebat , eruditionem , *Doctōris Fundatissimi* , omnium virorum eruditorum calculo , promeritus est . Interfuit Concilio Generali Viennensi celebrato anno mcccxi. ac demùm Avenione meritis plenus obiit die xxii. Decembris anni mcccxvi. Multa scripsit *Ægidius Romanus* Philosophica , Theologica , Moralia , Commentarios in Cantica Canticorum , in Epistolam S. *Pauli* ad Romanos , & in Epistolam primam ejusdem Apostoli ad Corinthios , nec non librum de *Ecclesiastica Potestate* , quem *Philippus Bergomensis* in Supplemento Chronicorum ad annum mcccxvi. recenset , ubi etiam *Ægidium Romanum* miraculis claruisse , & sanctitatis merito *Beatum Doctorem* appellatum scribit .

Præter *Ægidium Romanum*, alii duo ejusdem Ordinis Eremitarum S. *Augustini* Priores Generales Sæculo XIV. Theologiam Scholasticam perdoctis suis lucubrationibus illustrarunt, videlicet *Thomas Argentinensis*, & *Gregorius Ariminensis*, quorum primus, seu *Thomas Argentinensis*, natione Germanus fuit, patriâ Argentoratensis, unde nomen traxit, Theologus Parisiensis, Ordinis Eremitarum S. *Augustini* Prior Generalis electus Parisiis anno MCCCXLV. cùmque annos XII. Magistratum gessisset, è vita migravit Viennæ in Austria, anno MCCCLVI. Extant etiamnum Commentarii, quos edidit in IV. libros Sententiarum. Cæterum, confundi haud debet iste *Thomas Argentinensis* cum altero ejusdem cognominis *Thoma de Argentina* Ordinis Prædicatorum, qui sub finem Sæculi XV. hoc est, anno MCCCXCV. claruit, & scripsit Sermones, Meditationes, Epistolas, & Quæstiones, ut testantur *Trithemius*, & *Simlerus*. Alter Ordinis Eremitarum S. *Augustini* Generalis Prior, seu *Gregorius Ariminensis*, natione fuit Italus, patriâ Ariminensis, Facultatis Parisiensis Doctor, & Theologorum sui temporis subtilissimus. Edidit Commentarios in IV. libros Sententiarum, in Epistolas S. *Pauli*, & in Epistolam Canonicam S. *Jacobi*, librum de *Usuris*, & Sermones de Tempore, & de Sanctis. Inter Illustres etiam Sæculi XIV. Scriptores Ordinis Eremitarum S. *Augustini*, jure ac merito recenseri debent *Augustinus Triumphus*, & *Richardus Hampolus*. Summam de Potestate Ecclesiastica edidit *Augustinus Triumphus*, Italus, quam Joanni XXII. nuncupavit, necnon *Milleloquium* S. *Augustini*, quod *Bartholomæus Urbinas*, ejus discipu-

scipulus, absoluit, & *Clementi VI.* dicavit, teste *Trithemio*. Natione Anglus & patriâ Eboracensis fuit *Richardus Hampolus*, qui in plures Sacræ Scripturæ libros edidit Commentarios, & alia quædam Opuscula ascetica, quæ extant in Bibliotheca Patrum tomo xxvi. Prætermitto, brevitatis ergò, alios complures Ordinis Eremitarum *S. Augustini* Scriptores, qui Sæculo xiv. in Theologia Scholastica versatissimi Commentarios in iv. libros Sententiarum adornarunt, vel in arte concionandi diù multùmque exercitati Sermones ediderunt, & alia id genus Opuscula Sacra.

In Ordine Carmelitarum Complures itidè Sæculo præsertim xiv. extiterunt eruditi Theologi Scholastici, qui Commentarios in iv. libros Sententiarum scripserunt; eximii Scripturæ Sacræ Interpretes, qui Commentarios in Scripturam Sacram concinnarunt; Egregii Concionatores, qui Sermones, & libros de Vita Asceticâ lucubrarunt, de quibus singillatim differere, cùm mihi non permittant angustia temporis, duos celebriores hic tantùm laudabo, quorum primus, & unus instar omnium est *Joannes Baconus*, natione Anglus, in Sacra Facultate Parisiensi Doctor Theologus, qui tantam in resolvendis Theologiæ Scholasticæ questionibus famam consecutus est, ut *Doctoris Resoluti* nomen obtinere promeritus fuerit. Scripsit Commentaria in iv. libros Sententiarum, Compendium Legis Christi; Quodlibetica quædam Carmeliticum Ordinem spectantia, Commentaria in libros Sancti Augustini de Civitate Dei, & de Trinitate, & in libros Sancti Anselmi de Incarnatione Verbi, Tractatus varios adversus Judæos, Sermones

nes varios, & alia Opera, quæ adhuc inedita sunt, quorum Catalogum satis longum texunt *Baleus*, *Pitfeus*, aliique, qui de Scriptoribus Anglis, eorumque Operibus disserunt. Alter Scriptor Ordinis *B. Mariæ de Monte Carmelo*, qui Sæculo XIV. floruit, est *Guido de Perpiniano*, è Ruscinonensi Comitatu Oriundus, qui hujus Ordinis Prior Generalis fuit, deindè Majoricensis in Insulis Balearibus Episcopus, demùm Elnensis. Scripsit librum *de Hæresibus ad Gaucelinum* Cardinalem Episcopum Albanensem, & *Concordiam quatuor Evangelistarum*. Ejusdem *Guidonis* Commentarium in Decretum *Gratiani* extare MS. in Bibliotheca Regis Christianissimi testatur *Stephanus Baluzius* in suis Notis in *Gratianum*, pag. 642. & *Casimirus Oudinus* in Supplemento *Belarmini* de Scriptoribus Ecclesiasticis asserit, *Tractatum de perfectione Vitæ*, quem scripsit idem *Guido de Perpiniano*, reperiri MS. in Bibliotheca *Colbertina*. Si plura de Scriptoribus Ordinis Carmelitarum scire aveas, leges *Joannem Baptistam de Lezana*, qui eorum Annales concinnavit, & *Tritheimium*, qui de illorum origine & laudibus scripsit.

D. De his Scriptoribus plura scire non desidero, sed unam duntaxat sub finem hujusce Colloquii percipio habere notitiam illorum Authorum, quos in decima classe Scriptorum Sæculi XIII. & XIV. reposuisti, quique de Jure Canonico scripserunt, aut Epistolas Decretales Romanorum Pontificum in unum corpus redegerunt.

M. Seriem Authorum, qui Sæculis XIII. & XIV. de Jure Canonico scripserunt, incipiam à doctissimis Romanis Pontificibus, qui his duobus Sæculis Ecclesiam rexerunt, & Epistolas Decretales edide-

ediderunt , quarum deindè variz factæ sunt Compilationes , quæ ad Jus Canonicum , seu Pontificium attineant . Et primò quidem *Innocentius III.* Pontifex Maximus , benè multas scripsit Epistolas , quas duobus libris collegit , edique curavit *Guillelmus Sirletus* , postea Cardinalis , Romæ anno MDXLI. His duobus Epistolarum *Innocentii III.* libris , quatuor alios ineditos ex manuscripto Codice Bibliothecæ Collegii Fuxensis adjecit , ac evulgavit Tolosæ anno MDCXXXV. *Franciscus Bosquetus* , postea Episcopus Montispeffulanus , à quo etiam additæ sunt eruditæ Notæ . Verùm , omnium curas longè superavit *Stephanus Baluzius* , qui Parisiis anno MDCLXXXI. pulcherrimam & castigatissimam adornavit Editionem omnium , quas reperire potuit , *Innocentii III.* Epistolarum , quæ certè quantum ad Historiam Ecclesiasticam illius temporis illustrandam , & ad Jus Canonicum excellendum conferant , jam observarunt Viri eruditi . Præter tot Epistolas , quas , ob varia Ecclesiæ emergentia negotia , scripsit *Innocentius III.* alia ejus Opera seorsim edita in duos tomos coniecta sunt , quorum priori continentur in primis *Sermones* , varique pii *Tractatus* , ut de *Mysteriis Missæ* , de *contemptu Mundi* , de *Sanctorum veneratione* , & *Acta* , atque *Decreta Concilii Lateranensis* , *Hymnus* etiam in *Christum* & *ejus Matrem* .

Honorius III. multas etiam scripsit Epistolas . Quamvis enim tres tantum illius Pontificis Epistolæ in Collectione Conciliorum habeantur , aliæ tamen occurrunt apud *Odoricum Raynaldum* , *Bzovium* , *Wadinghum* , *Duchenium* , & alios Ecclesiasticos Scriptores , præter Compilationem integram

De

Decretalium ab *Innocentio Cironio*, Cancellario Ecclesiæ Tolosanæ, editam anno MDCXLV. Inter Juris Canonici peritos Pontifices Romanos censeri debet *Gregorius IX.* cujus sexdecim Epistolæ inter Pontificias relatæ fuerunt, & aliæ non paucæ variis in locis publicatæ reperiuntur. Hujus Summi Pontificis jussu, sicut antea observavimus, *S. Raymundus Pennafortius*, Ordinis Prædicatorum, Decretalium libros quinque ex prioribus Compilationibus collegit, & anno MCCXXX. vulgavit. Quod quidem ut clariùs intelligas, observare debes, post editum *Gratiani Decretum* novas subindè à sequentibus Romanis Pontificibus emanasse Epistolas, & Constitutiones, quæ eam jus facerent in rebus Ecclesiasticis, earum accessione locupletari Canoniceam Disciplinam necesse fuit. Primus itaque *Bernardus*. Præpositus Papiensis, ac deindè Episcopus Faventinus, Decretales præsertim suæ ætatis Pontificum Epistolas in quinque libros collegit paulò antè annum MCXC. Hæc est prima Collectio, seu Compilatio Epistolarum Decretalium Romanorum Pontificum. Emergentibus deindè aliis subindè Sedis Apostolicæ Constitutionibus, secunda Collectio, seu Compilatio ter à tribus Authoribus confecta est, *Gilberto* videlicet Abbate, *Alano* Episcopo Antiodorensi, & *Joanne Galensi* seu *Valensi*, Volaterris in Tuscia nato. Prævaluit tamen ea Collectio, seu Compilatio, quam *Joannes Valensis* composuit. Tertiam Collectionem ex Regestis *Innocentii III.* compilaverat *Bernardus*, Archidiaconus Compostellanus, quæ non est recepta. Unde *Innocentius III.* aliam Collectionem, quam vocamus *Tertiam*, confici jussit, & auctoritate publicâ

blicâ munivit . Quartam collectionem compilari curavit idem Summus Pontifex *Innocentius III.* cui aliam quintam Collectionem addidit *Honorius III.* Ex his itaque quinque Collectionibus, seu Compilationibus Epistolarum Decretalium Romanorum Pontificum , voluit *Gregorius IX.* successor *Honorii III.* ut *S. Raymundus Pennafortius* novam Compilaret Collectionem , quæ quinque libris constat, & cæteris aliis Collectionibus longè accuratior censetur . Post illos quinque Decretalium libros à *S. Raymundo* jussu *Gregorii IX.* editos , duobus voluminibus constare cœpit Juris Pontificii Corpus , Decreto scilicet *Gratiani* , & *Decretalibus* . Nam licet à sequentibus Pontificibus conditæ fuerint Constitutiones non paucæ , non nisi tamen circa annum mccc. in unum volumen digestæ fuerunt jussu *Bonifacii VIII.* qui partim suas , partim Superiorum post *Gregorium IX.* Pontificum , ipsiusque *Gregorii IX.* posteriores Decretales collegit , & simul cum illis duorum Conciliorum Generalium Lugdunensium Decreta . Quæ *Bonifacii VIII.* Compilatio *Sexti* nomine donata est , eò quòd *Bonifacius VIII.* librum suum annexi voluerit quinque aliis libris Collectionis , seu Compilationis , jussu *Gregorii IX.* factæ à *S. Raymundo* . Post mortem *Bonifacii VIII.* & *Benedicti XI.* aliàs X. Sedem Pontificiam Româ Avenionem transtulit *Clemens V.* qui Constitutiones Generalis Concilii Viennensis , cui præfuit anno mcccxi. unâ cum nonnullis suis Constitutionibus atque Epistolis Decretalibus , ante , aut post prædictum Concilium emissis , colligi curavit . Sed , eo ante promulgationem defuncto , proximus ejus Successor *Joannes XXII.* eas aucto-
ritate

ritate publicâ donavit, ediditq; viii. Kal. Novemb. ris anno secundo Pontificatus sui, idest anno Christi mcccxvii. Hæ autem Constitutiones, seu Epistolę Decretales, cū solum *Clementem V.* partim per se, partim per Synodum Generalem Viennensem ab eodem Pontifice celebratam, Authorem, habeant, *Clementina* dictæ sunt, quamvis *Clemens V.* eas sub titulo libri vii. *Decretalium* vulgare destinasset. Denique, *Joannes XXII.* vulgò nuncupatus, Avenione Sedens, iv. Idus Novembris anni Pontificatus sui noni, idest, Ærę Christianæ mcccxxiv. proprias Constitutiones numero viginti sub 14. titulis libro uno promulgavit, quæ *Extravagantium* nomine designantur, quòd extrâ Juris Canonici Corpus olim vagarentur; immò, idem *Extravagantium* nomen nunc quoque retinent, licet in Juris Pontificii Corpus fuerint translata.

Intèr peritos juris Canonici, seu Pontificii, Interpretes, qui Sæculo XIII. floruerunt, primas tenet *Innocentius IV.* qui primus *Commentarios in quinque Decretalium libros* Lugduni in Galliis composuit, quo tempore Concilium habuit ea in Urbe Lugdunense I. in quo *Fridericum II.* Imperatorem, anathemate perculit. Suâ doctrinâ promeritus est Summus ille Pontifex, ut à Viris juris utriusque Consultis *Pater juris*, & *Organum veritatis* appellaretur, Scripsit etiam *Innocentius IV.* Apologeticum librum *De jurisdictione Imperii*, & *Auctoritate Pontificis*, contra *Petrum de Vineis*, qui pro *Friderico II.* atque Imperatorum potestate contra Pontificiam scripturierat.

Bernardus, dictus *Compostellanus*, quòd esset Ecclesiæ Compostellanæ in Hispania Presbyter, jussu

jussu *Innocentii IV.* Pontificis Maximi, *Casus Decretalium* confecit, & eruditos in eos *Commentarios* lucubravit, quos *Apparatus* vocant. *Henricus Hostiensis*, Segulii in Diœcesi Taurinensi natus, adeo in doctrina juris excelluit, ut *juris utriusque Monarcha* dictus fuerit, & ob eximiam eruditionem Ebrodunensis primum Archiepiscopus ab *Innocentio IV.* creatus, deindè ab *Alexandro IV.* quo hortante scripserat in Decretales, ad Cardinalis dignitatem evectus fuerit, ac Episcopi Hostiensis titulo cohonestatus, à quo Episcopatu vulgò *Hostiensis* nuncupatur. Inter Opera, quæ edidit, duo imprimis celebrantur, videlicet *Summa juris Canonici*, vel, ut alii volunt, *utriusque juris*, quæ aurea vocatur, & alterum Opus, quod *Lectura* dicitur, quo nomine *Commentarii* intelliguntur in quinque Decretalium libros, qui in duo volumina sunt distributi. *Henrici Hostiensis* discipulus fuit *Guillelmus Durandus Speculator*, sive *Durantes*, ex Provincia oriundus apud Podium Missonium natus. In Mutinensi Academia juvenis admodum *Gratiani Decretum* interpretatus est, & postea in Curia Romana Causarum Auditor, ingens illud Opus, quod *Speculum* inscripsit, ante annum ætatis suæ vigesimum quartum componere cœpit, & non nili intra unum & viginti annos, ipsomet teste, absolvit, illudque perfectum *Ottobono* tituli Sancti *Adriani* Cardinali nepoti *Innocentii IV.* nuncupavit. Præter istud *Speculum* in quatuor libros distinctum, sic appellatum, quod forenses homines variarum causarum hominem in eo speculentur, ac velut in speculo inspiciant, scripsit etiam *Rationale Divinorum Officiorum* in libros octo distinctum, quod an-

no MCCLXXXVI. absoluit, Commentarium quoque in Canones Concilii Oecumenici Lugdunensis II. cui ipsemet interfuit, & *Repertorium Juris*, quod unà cum ejus aliis Operibus prodiit Lugduni annis MDXVI. & MDLI. Citantur præterea ab eo conscripta tum *Speculum Legatorum*, in quo de ipsorum Officio & potestate lato calamo scribit, & *Commentaria in Decretales*. Ad Episcopatum Mimatensem in Gallia anno MCCLXXXVI. provectus est iste *Guillelmus Durandus Speculator*, ac decennio post obiit Romæ, sepultus in Fratrum Prædicatorum Ecclesia S. Mariæ super Minervam. Perperam nonnulli confundunt hunc *Guillelmum Durandum Speculatorem*, Mimatensem Episcopum, cum altero *Guillelmo Durando*, qui fuit etiam post ipsum Episcopus Mimatensis, & scripsit librum *de Ordine celebrandi Generalis Concilii* occasione Concilii Oecumenici Viennensis, quod tum temporis celebrari debebat. Constat etenim *Guillelmum Durandum Speculatorem*, Episcopum Mimatensem, ad tempora Concilii Generalis Viennensis non pervenisse, adeoque non esse Authorem hujusce libri, *de Ordine Celebrandi Generalis Concilii*, sed verum illius libri Authorem esse alterum *Guillelmum Durandum*, qui fuit itidem Episcopus Mimatensis, & nepos *Guillelmi Durandi Speculatoris*. Denique, inter eruditos juris Canonici Interpretes, qui Sæculo XIII. illustriores fuerunt, reponi debent *Bartholomæus Brixianus*, & *Garfias*, quorum primus natione Italus fuit. Jurisconsultus & Historicus celebris, *Gregorio IX.* Pontifici Maximo familiarissimus. Scripsit multos Tractatus Juris, quinque libros in Decretales, & Chronicon de

Ur-

Urbibus Italix. Obiit *Guillelmus Brixianus* anno MCCLVIII. ætatis suæ LXXXIV. Ejus cum laude meminere *Trithemius* in Catalogo Scriptorum Illustrum, & *Raphael Volaterranus* lib. XXI. *Commentariorum Urbanorum*. Alter verò, seu *Garzias*, natione Hispanus, Decretales interpretatus esse dicitur, circa annum MCCLXXXV. Opere imperfecto. Edidit quoque *Glossas* in Sextum Decretalium, & Summæ, quæ *Pisanella* vocatur, quædam adjecit.

D. Alios, si qui fuerunt, Sæculo XIV. periti Interpretes Juris Canonici, seu Pontificii, breviter percurramus, & tandem Colloquio nostro, quod solito longius protraximus, finem imponamus.

M. Inter peritos Juris Canonici, seu Pontificii Interpretes Sæculi XIV. primum locum tenet *Guido Baius*, alias *de Bayso*, *Patritius Regienfis*, qui Jus Canonicum interpretatus est Bononiæ anno MCCLXXXIII. qua in Urbe Archidiaconus creatus est, & eâ dignitate cognomen *Archidiaconi* apud posteros meruit. Inter plura Opera, quæ de Jure Canonico edidit, præsertim celebrantur ejus Commentaria in universum Gratiani *Decretum* anno MCCC. absoluta, quæ, ob doctrinæ in his contentæ quasi fragrantiam, *Rosarii* nomine insigniuntur. *Decretales* etiam interpretatus est, ejusque Opera Venetiis edita sunt magna ex parte anno MDCXXX. Hujus *Guidonis Baii* discipulus fuit *Joannes Andrea* in agro Florentino natus, Jurisconsultus peritissimus, qui Bononiæ per annos propè quinquaginta Decreta Pontificum magnæ cum laude interpretatus est, & scripsit primò *Glossemata* in sextum Decretalium post *Guidonem*

Baisium, Archidiaconum, præceptorem suum, quem impensè coluit. Deindè, in *Clementinas* Scholia scripsit, quæ contextui annexa pro Glossis leguntur. Postremò, in *Gregorii IX.* Pontificis *Maximi Decretales* Commentarium edidit sub *Novellarum* titulo. Grassante peste Bononiæ obiit *Joannes Andrea* anno MCCCXLIII. & sepultus est in Ecclesia Fratrum Prædicatorum. Hic *Joannes Andrea*, dum adhuc in vivis esset, in filium suum adoptavit *Joannem Calderinum*, patriâ Bononiensem, qui inter Juris Canonici Interpretes Clarissimus evasit, & *Clementis VI.* Pontificis Maximi Consiliarius fuit. Plurima de Jure Canonico Opera scripsit *Joannes Calderinus*, & præter ejus Commentaria in libros Decretalium, Decisiones, Consilia, & alia, quæ recenset *Simlerus* in Epitome, extat, ejus Tabula continens, authoritates & sententias Bibliorum; prout in Compilationibus Decretorum & Decretalium inducuntur secundum Alphabeti ordinem, emendata à *Thoma Dumbergio Mémingo*, Spirensis Civitatis Consule, & excusa à *Petro Drach* anno MCCCCLXXXI. Incertum est, quo anno è vivis excesserit *Joannes Calderinus*, cum tamen Bononiæ decessisse, & in marmoreo Sepulchro apud Fratres Prædicatores tumulatum esse, certissimè constat. In Gallia Sæculo XIV. floruit Juris Canonici Interpres eximius *Joannes Monachus*, patriâ Ambianensis, Ordinis Cisterciensis, qui primus *Glossas* in *Sextum* vulgavit. Postea Cardinalis creatus, apud *Philippum Pulchrum* Francorum Regem anno MCCCIII. *Bonifacii VIII.* Legatum egit. *Extravagantes*, sive Constitutiones Romanorum Pontificum, necdum in Corpus Juris re-

latas,

latas, interpretatus est, & Opusculum scripsit, cui titulus: *Defensorium juris*, ubi reos docet, quâ ratione sese adversus Actores tueri debeant. Fundavit in Academia Parisiensi in gratiam Studentium anno mccc. i. Collegium, quod etiamnum *Cardinalis Monachi* dicitur, ubi humatus est, hoc appposito titulo: *Hic jacet Joannes Monachus, Ambianensis Diæcesis, Tituli Sanctorum Marcelli & Petri Presbyter Cardinalis, fundator istius domus: qui obiit Avenione anno Domini mccc. xiii. die xxii. Augusti*. Eodem sæculo jus Canonicum Parisiis ingenti cum laude professus est *Henricus Boich*, Brito e Diæcesi Leonensi, ut ipsemet testatur in principio Commentariorum suorum. Scripsit Commentarios in *quinque libros Decretalium*, quos se in Scholis Parisiensibus anno mccc. xlix. perfecisse declarat. Denique, in Italia Sæculo XIV. quinque celeberrimi claruerunt Jurisconsulti, nimirum *Dinus*, *Joannes Anguissola*, *Joannes Lignanus*, *Bartolus de Saxoferrato*, & *Baldus de Ubaldis*. Primus, seu *Dinus*, *Mugellanus* cognomine, à *Mugello* agri Florentini oppido, Professorum juris Bononiensium, suo tempore præstantissimus fuit. Commentarios scripsit in *librum sextum Decretalium*, *Consilia*, ac plurima alia de jure Civili. E' vivis excessit Bononiæ anno mccc. ii. & apud Fratres Prædicatores sepultus est, ut scribit *Forsterus*. Alter, seu *Joannes Anguissola*, Cæsenz in Flaminia natus, Patavii primum, deinde circa annum mccc. Bononiæ Jus Pontificium maxima cum laude interpretatus est. Ex ejus Scriptis vix aliud sapere est, quam liber de *Sponsalibus*, & *Matrimoniiis*, quem *Joannes Andrea*, doctissimus Jurisconsultus, cujus antea

meminimus, sibi vendicaverat. Sed, furto comperto, hic liber suo vero ac legitimo Authori, seu *Joanni Anguissolæ* adjudicatus est. *Joannes Lignanus*, à *Lignano* agri *Mediolanensis* oppido oriundus, unde & cognomen sumpsit; jussu *Urbani V.* Pontificis Maximi scripsit circa annum *MCCCLXV.* Librum *de Pluralitate Beneficiorum*, cui & alios adjecit *de Permutatione*, *de Horis Canonicis*, *de Censura Ecclesiastica*, atque *Interdicto*, *de Duello*, *de Hæresibus*, & *de Repræfaliis*. Ejus in omnes *Decretales Commentaria Patavii* servantur in majoris templi Bibliotheca. *Bartolus de Saxoferrato* natus est anno *MCCCLII.* in *Umbriæ* Urbe, quæ olim *Sentinum*, nunc *Saxoferratû* dicitur, unde ipse hoc cognomen accepit. Vir fuit ingenio subtili & acuto, assiduus in studio legum, tantaque celebritate Jus Pisus, ac postea *Perusii* professus est, ut ad eum ob summam eruditionis & ingenii famam ac gloriam undequaque studiosorum turba conflueret, ipse verò, ob admirabilem legum peritiam, & consiliorum soliditatem, fuerit vulgò appellatus *Jurisconsultorum Princeps*, *lumen ac stella: Juris lucerna*, *speculum ac veritatis Pater*. Multa scripsit Opera, quæ *Jurisconsultis* notissima sunt, obiitque, ut alii volunt, anno *MCCCLV.* vel, ut censet *Lancelotus* in ejus Vita, anno *MCCCLIX.* Hujus *Bartoli de Saxoferrato* discipulus fuit *Baldus de Ubaldis*, *Perusii* natus, qui in sua Patria docuit summa cum laude & auditorum frequentia. Dein, à *Joanne Galeatio*, Duce *Mediolanensi*, qui *Ticini*, seu *Papiæ*, Academiam erexerat, & Scholas studiis bonarum litterarum florentes excitaverat, *Papiam* accersitus ut juvenes in jurisprudentia institueret, ibi per mul-

multos annos publicè jurisprudentiam professus est, & præter quinque Responsionum volumina, aliaque Opuscula, Commentarios scripsit, quibus totum fere Jus utrumque multùm Illustravit. Egregium etiam Commentarium scripsit pro asserendo *Urbani VI.* tempore Schismatis, Pontificatu anno *MCCCLXXVII.* quem ex MS. vaticano edidit *Odoricus Raynaldus* ad calcem tomi *XVII.* Annalium Ecclesiasticorum. Allegantur etiam quædam alia ejusdem *Baldi* Opera nondùm prælo subjecta, veluti liber, quem *Peculium* inscripsit, & Tractatus de illustribus utriusque Juris Doctoribus, sive de Commemorationibus famosissimorum Doctorum in utroque Jure: & Opusculum, cui titulum fecit: *Practica Juris utriusque.* Hujus doctissimi Jurisconsulti laudes hoc Disticho celebravit quidam Poeta.

*Qui Baldum Juri negat accendisse lucernam,
Ille potest medio Sole negare diem.*

De anno, quo obiit *Baldus*, inter Scriptores non convenit. Alii quippè dicunt, eum è vita migrasse die *xxviii.* mensis Aprilis anni *MCCCC.* Alii volunt, eum mortuum esse anno *MCCCCXIII.* Sunt etiam nonnulli, qui asserunt, *Baldum* Ordini Fratrum Minorum nomen dedisse, idque colligere sibi videntur ex ejus Sepulchri Epitaphio, quod *Ticini* in Templo Sancti *Francisci* legitur:

*Clauditur hic Baldus, Francisci tegmine fultus
Doctorum Princeps, Perusina conditus arce.*

Verùm, ex hoc *Baldi* Epitaphio tantummodò colligitur, *Baldum* in Ecclesia Franciscanorum fuisse sepultum; vel, ut ait *Boissardus*, eum sepeliri voluisse amictum habitu *S. Francisci*, eò quòd putaret, id plurimum ad animæ salutem conducere.

posse. Quod sanè à multis aliis Viris , qui tamen Ordinem *S. Francisci* nunquàm professi sunt , pietatis ergò , eâ ætate factitatum esse , certis documentis compertum habemus. Expungendus itaque est *Baldus* ex Scriptorum Ordinis Fratrum Minorum Catalogo , cui cum accenset *Lucas Wadinghus* in sua Bibliotheca Scriptorum Ordinis Minorum, ubi etiam recenset Opera ejusdem *Baldi*, quem falsò sibi persuasit fuisse Franciscanum .

D. Habeo nunc quamdam quasi imaginem celebriorum Scriptorum, qui Sæculis XIII. & XIV. floruerunt , quorum notitia mihi deinceps apprime utilis ac necessaria erit , ut facili negotio deprehendere possim , quandò quis Scriptor claruerit ? quænam ab ipso Opera edita fuerint ? quâ valuerit autoritate in Orbe litterario ? nùm fabulosus , aut parùm accuratus audiat ? nùm plagiarius fuerit , & cujus Scrinia compilaverit ? Hunc etiam ex ea notitia fructum haud exiguum percipiam , ut nunquàm in nullius pretii Scriptoribus evoluendis oleum & operam perdam , atque si mihi aliquandò Bibliothecam instruere velim , in libris , vel manuscriptis Codicibus comparandis , & tempore , & nummis (quod multis sæpius contingere solet) fraudari non possim .

★ ★

★

COLLOQUIUM VI.

De Doctrina Fidei, de Disciplina tam Ecclesiastica, quàm Monastica, & de Ethices Christianæ Doctrina, quæ Saculis XIII. & XIV. in Ecclesia obtinuit.

MAGISTER.

Hæreticos Calvinistas, & Lutheranos, qui Waldensium, & Albigenſium errores ſuſcitarunt, non pudet aſſerere, *Innocentium III.* Pontificem Maximum, antiquam Eccleſiæ Doctrinam Sæculo XIII. immutaſſe, eumque in Concilio Lateranenſi IV. celebrato anno MCCXV. duo monſtroſa Confeſſionis Sacramentalis, & Tranſubſtantiationis figmenta inter Articulos fidei repoſuiſſe. Calvinus, [poſt hominum memoriam impudentiſſimus Hæreſiarcha, in ſuo Concilii Tridentini ſupra omne venenum peſtifero antidoto ait, nullum per annos mille fuiſſe in Eccleſia Confeſſionis uſum, donec, inquit, *Innocentius III.* cum pauculis cornutis beſtiis laqueum hunc populo Chriſtiano induxit, quem Tridentini Patres adſtringunt. Hujus procaciſſimi hæreſiarchæ veſtigiis inſiſtens Joannes Dallaus, Sæctæ Calvinianæ Pſeudo-Miniſter, Catholicum dogma de Sacramentalis Confeſſionis uſu ac neceſſitate omni conatu impugnavit quatuor libris anno MDCLXI. Genevæ editis, in quorum ſecundo probandum ſuſcipit, novitiam eſſe apud Chriſtianos Confeſſionis Sacramentalis, ſeu Auricularis, Di-

sciplinam, ejusq; Institutionem *Innocentio III.* Pontifici Romano acceptam referri debere. Idem effutiunt heretici de Transubstantiationis Catholico dogmate, cujus pariter Authorem faciunt *Innocentium III.* dictitantque, istud *Transubstantiationis* nomen esse in Ecclesia novum, insolens & peregrinum, in Scripturis non legi, non fuisse ab Apostolis vel Sanctis Patribus usurpatum, sed à Concilio Lateranensi IV. cui præfuit *Innocentius III.* post mille ducentos annos in Ecclesiam fuisse inductum. His putidis calumniis hæretici, nugarum mercatores & mendaciorum Architecti, Ecclesiam Romanam infamare satagunt, & quamvis sæpius doctissimis Ecclesiæ Catholicæ Scriptorum Polemicorum lucubrationibus, ita ad incitās fuerint redacti, ut nec hiscere, nec mustitare possent, nihilosecius sic errori obfirmato animo adhærent illi insignis perviciaci homines, ut tot ac tantis argumentorum molibus non succumbant, tantis ponderibus non fatiscant, tantis malleis non conquassentur, tantis postremò fulminibus non conterantur, sed potius perfrictâ fronte vitra fracta, rejectas quisquiliās, & confutatas jamdudum suas in Ecclesiam Romanam jactatas contumelias novam in scenam inducere, easque, crambis instar recoctæ, ad nauseam usque obtrudere non erubescant. Has igitur millies elisas hæreticorum calumnias hic jure merito silentio prætermittere possem, maximè cum necessitatis Confessionis Sacramentalis, & Transubstantiationis panis & vini in Corpus & Sanguinem Christi Catholica dogmata satis superque in nostris præcedentibus Colloquiis ex perpetuo Ecclesiæ usu, ex constanti San-
ctq.

ſtorum Patrum tam Græcorum, quàm Latinorum traditione, & ex definitionibus Conciliorum adverſus hæreticos probaverim, & à novis ac planè abſurdis illorum commentis vindicaverim. Verùm, Cùm in hocce Colloquio de Doctrina Fidei, quæ Sæculis XIII. & XIV. obtinuit, dicturi ſimus, neceſſe omninò eſt, ut breviter oſtendamus, *Innocentium III.* Pontificem Maximum, nihil omninò immutaſſe Sæculo decimo tertio in antiqua fidei doctrina circa Confeſſionis Sacramentalis neceſſitatem, & Tranſubſtantiationem panis, & vini in Corpus, & Sanguinem Chriſti in Auguſtiſſimo Eucharistiæ Sacramento, adeoque explodendam eſſe hanc malè conſarcinatam fabulam, quam Pſeudo-Miniſtri Calviniani, quaſi de tripode Oracula pronunciantes, ſuis Sæctariis etiamnùm plenis buccis, inflatisque tibiis venditare ſolent.

Et primò quidem *Innocentium III.* Summum Pontificem nihil innovaſſe Sæculo Eccleſiæ decimo tertio in doctrina de Confeſſione Sacramentali, unico, ſed efficaciffimo evincam ratiocinio, miſſis aliis, ut brevitati conſulam, benè multis argumentis, quæ ex ſacris litteris, ex perpetuo Eccleſiæ uſu, cujus initii nulla memoria habetur, & ex Sanctis Patribus cùm Græcis, tùm Latinis depromunt Doctores Catholici Polemici. At enim negare haud poſſunt hæretici, vigere adhuc in Oriente apud Græcos Schiſmaticos Confeſſionis Sacramentalis uſum, ut manifeſtò conſtat non ſolùm ex Synodo Bethleemitica ann. MDCLXXII. ſub *Doſitheo* Hieroſolymitano Patriarcha celebrata, quæ cap. 15. ita decernit: *Pœnitentiæ Sacramentum, in quo & ſecreta includitur confeſſio, tunc tradidit* (Chriſtus)

cùm

cum dixit : quorum remiseritis peccata , remittuntur eis , quorum retinueritis , retenta sunt ; Sed etiam id apertè colligitur ex Orationibus , quas Græci Sacerdotes proferunt super peccatores pœnitentes , ut videre est in Euchologio Græcorum , quod doctissimis Notis illustratum edidit noster Goarus , Vir linguarum Orientalium peritissimus , & in Ritibus Græcorum versatissimus . In una ex his Orationibus hæc leguntur : *Ipse humane , & malorum tolerator Domine , exorare nunc quoque super servum tuum , & modum Pœnitentiæ , peccatorumque veniam illi concede ; condonans illi per me indignum famulum tuum omne delictum spontaneum pariter ac involuntarium . Tu enim dixisti , Domine , divinis & Sanctis Discipulis tuis & Apostolis : Accipite Spiritum Sanctum , quorum remiseritis peccata , remittuntur eis , & quorum retinueritis , retenta sunt . Et , quacumque ligaveritis & solveritis super terram , erunt ligata & soluta in Cælis .* In alia Oratione sic Sacerdos loquitur : *Deus , qui propter nos homo effectus est , & totius mundi peccata tollit , ipse suavissima sua benignitate cuncta hæc suscipiat , quæ coram indignitate mea enarraſti , Frater , condonans tibi omnia , & in præſenti sæculo pariter ac in futuro .* Et deinde in altera hæc pronunciat Sacerdos : *Ego absolvo te ab omnibus peccatis tuis , quacumque coram Deo & mea Indignitate confessus es .* Hunc Sacramentalis Confessionis usum vigere etiamnum apud Græcos Schismaticos , & apud omnes Orientales , probant noster jam citatus Goarus in Euchologio Græcorum , Joannes Morinus lib. vi. de Pœnitentia cap. 23. sed præſertim Eusebius Renaudotius , Vir clarissimus , & Linguarum Orientalium peritiâ apprime excultus

tus , qui anno MDCCXIII. typis Parisiensibus edit Tomum quintum de *Perpetuitate Fidei* , in quo à pag. 257. usque ad pag. 292. invictè contra Hæreticos demonstrat, vigere adhuc Confessionis Sacramentalis usum apud Græcos , Nestorianos , Jacobitas , & alios Orientales Schismaticos, ibidè quæ ostendit , quinam sit apud illos peccata confitendi modus , quæ forma absolutionis , quæ pœnitentia tùm Ecclesiasticis , tùm Laicis pro delictorum gravitate imponatur , quæ denique debeant esse internæ Pœnitentium dispositiones , ut juxtà Orientalium ritus percipiant à Sacerdotibus beneficium absolutionis . Negare itaque non possunt Hæretici , nisi in meridie cœcutire velint , Confessionis Sacramentalis usum vigere adhuc apud Græcos , & alios populos Orientales , qui ab Ecclesia Romana funesto Schismate sunt separati : Ex quo ipse peremptorium desumo argumentum, quo palàm evincitur, *Innocentium III.* non invexisse in Ecclesiam Sæculo decimo tertio Confessionis Sacramentalis usum , sicut blaterant Hæretici . Verùm enim verò, quis sibi persuadeat, Græcos, & Orientales Schismaticos adhuc retinere, & maximâ cum religione observare velle Confessionis Sacramentalis usum , si reverà ille usus , ut obstrepunt Hæretici , fuisset in Ecclesia Orientali à sæculis inauditus , & sæculo dumtaxat decimo tertio ab *Innocentio III.* Romano Pontifice esset inductus ? Quis, amabo, credat, Græcos Schismaticos, qui, ut in superioribus Colloquiis observavimus, post Schisma undecimo sæculo à *Michaële Cerulario* , Patriarcha Constantinopolitano, conflatum, multa exprobra- runt Ecclesiæ Romanæ , seu Latinæ , ut suum Schis-

ma

ma aliquo quæsito colore obducere possent, nunquam tamen Latinis objecisse hunc Confessionis Sacramentalis usum, qui tamen, si Sæculo decimo tertio, ut garriunt Hæretici, ab *Innocentio III.* in Ecclesiam Latinam invehitus fuisset, non levem poterat eis occasionem suppeditare Latinos accusandi, illisque insultandi. Postremò, Græci Schismatici, dum Sæculo XIII. seu an. MCCLXXIV. in Concilio Lugdunensi II. pacem ac concordiam inierunt cum Ecclesia Latina, suas quidem proposuerunt controversias, quas cum Latinis habebant de Primatu Romani Pontificis, de Processione Spiritus Sancti, de additione particulæ *Filioque*, de Azymo, & Purgatorio, sed de Confessionis Sacramentalis usu ne ullum quidem verbum dixerunt. Quod quidem argumento est, Græcos pro comperto habuisse, hunc Confessionis Sacramentalis usum, non ab *Innocentio III.* Pontifice Romano recens fuisse in Ecclesiam invehitum, uti pertendunt Hæretici, sed illum potius ab ipsis Apostolorum temporibus in Ecclesia Orientali ab omnibus Patribus Græcis continuâ sæculorum serie probatum, & ad sua usque tempora constantèr esse retentum; Cujus Sanctissimi usus in Ecclesia Orientali observati ipsi met testes oculati erant, illumq; ad posteros suos transmiserunt, qui hodie inviolabiliter ei adhuc adhærent, etiamsi diro Schismate ab Ecclesia Romana sint divulsi. Hoc unicum, sed efficax argumentum jugulum Hæreticorum petit, & abundè sufficit ad exsufflandum inane illorum figmentum de Institutione Confessionis Sacramentalis factâ ab *Innocentio III.* in Concilio Lateranensi habito anno MCCXY.

Eodem

Eodem itidem argumento evidentè demonstratur, *Innocentium III.* non procudisse Sæc. XIII. dogma de Transubstantiatione panis & vini in Corpus, & Sanguinem Christi, sicut calumniantur Hæretici. Græci siquidem etiam post Schisma, quo *Michaël Cerularius* undecimo Sæculo Ecclesiam Græcam à Latina sejunxit, transubstantiationem panis & vini in Corpus & Sanguinem Christi variis vocibus, quibus *conversio, transmutatio, trans-
elementatio* significatur, expresse-
runt; immò eam *μετεσώωσιν*, idest Transubstantiationē, disertè nominare non dubitarunt, nec etiamnū dubitant. *Theorianus*, Scriptor Græcus, qui Sæculo XII. sub *Manuele Comneno* Imperatore scribebat, sic mentem suam, eā de re aperit in Epistola ad Sacerdotes & Monachos, quam refert *Leo Allatius* Exercitatione XXI I contra Creyghthoum: *Divinus panis antequam consecratur*, inquit, *sive azymus sit, sive fermentatus*, indifferenter panis est, & dicitur à Divina Scriptura, ut ostendemus: postquā verò consecratus est, nec azymus, nec fermentatus est, sed Domini Corpus & caro eadem ipsamet, nec alia pro alia. Una si quidem est & ipsa, quæ ex incorrupta virgine suscepta est, inque Patris dextera sedet, & à nobis Orthodoxis mysticè accipitur. Unde *Mysterium* dicitur, ceū secretum, quod multi non percipiant. Si itaque divinum numen commutat proposita dona in Corpus, & Sanguinem Christi, frustra fuerit contendere, an id ex azymo vel fermentato fiat, aut albo, aut rubro vino, & ejusmodi stultas curiositates de tremendis mysteriis agitare. Quibus verbis *Theorianus* Transubstantiationis dogma apertè profitetur. Qui enim panem quemcumque consecratione sic mutari

tari in carnem Christi credit, ut neque jam azy-
mus sit, neque fermentatus, is profectò in ea
opinionem non est, substantiam panis post conse-
crationem remanere, adeoque *Theorianus*, qui
Sæculo XII. in Ecclesia Græca floruit, Catholicum
dogma, quod Latini Transubstantiationis voca-
bulo efferunt, hac in Epistola confessus est. Extant
inter Acta Concilii Generalis Lugdunensis II.
quod anno mclxxiv. celebratum est, litteræ *Michaëlis Palæologi*, Græcorum Imperatoris, ad
Gregorium X. Pontificem Maximum, in quibus in-
ter alia Romanæ fidei capita, & hoc quoque Im-
perator se admittere profitetur de pane non fer-
mentato, videlicet *panem in ipso Sacramento verè
transubstantiari in Corpus, & Vinum in Sanguinem
Domini Jesu Christi*. Litteras etiam Synodicas *Jo-
annis Becci*, seu *Vecci*, Patriarchæ Constantinopo-
litani, & Synodi Orientalis post celebrationem
Concilii Lugdunensis II. scriptas edidit *Odoricus
Raynaldus* ad annum Christi mclxxvi. in quibus
perindè testificantur, se certâ fide credere, *Azy-
mum panem* (ut & fermentatum) *verè transubstan-
tiari in Corpus Domini nostri Jesu Christi, & vinum
in Sanguinem ejus, per Sanctissimi Spiritus virtutem
& operationem*. Jam verò, cùm hanc reconcilia-
tionem Ecclesiæ Græcæ cum Latina à *Michaële Pa-
læologo*, Græcorum Imperatore, in Concilio Oecu-
menico Lugdunensi II., initam Græci Schismatici
deinceps nullis non modis detestati sint, eâque
de causâ Imperatorem istum, ac *Joannem Beccum*
Patriarcham Constantinopolitanum, hujus unio-
nis promotorem, acerbissimis quibusvis conviciis
prosciderint, hodieque proscindere non desinant;
cùm

cum adversus varia Confessionis illius ad *Gregorium* X. Papam missæ, necnon Synodicarum *Becci* Patriarchæ Constantinopolitani Litterarum capita, ac in primis adversus quatuor illa præcipua, quæ utriusque Ecclesiæ, Græcæ & Latinæ, præ cæteris obesse ajunt, videlicet Spiritum Sanctum, ex Patre Filioque procedere, animas Defunctorum, Purgatorio igne expiari, azymum panem legitimam esse Eucharistiæ materiam, Romanum Pontificem primatum in universa Ecclesia obtinere; quin immò, adversus peculiaria quæcumque, Latinæ Ecclesiæ placita ac ritus, virulento æstu deblateraverint Schismatici Græci, nihilofeciùs tantum abest, ut *Transubstantiationis*, Græcè *μετεσώρευσις*, vocem exhorruerint, nedùm ipsummet fidei Catholicæ caput, quod eâ voce significatur, ut eâdem deinceps Schismatici lubentissimè usurpaverint. Ad cujus rei confirmationem duo hic proferam luculentissima Græcorum Schismaticorum testimonia, quorum primum est *Georgii Scholarii*, Patriarchæ Constantinopolitani, qui interfuit Concilio Generali Florentino. Hic quippè in Sermonè in Parasceve Lazari, postquam asseruit, ejusmodi *μετεσώρευσις*, seu transubstantiationem, ita fieri, ut accidentia destructo subiecto remaneant, ostendit discrimen, quod intercedit inter Incarnationem & Eucharistiàm his verbis, quæ refert, & Latinè reddidit doctissimus noster *Michaël Lequien* in suis Notis in caput xlii. lib. iv. *S. Damasceni* de Fide Orthodoxa: *Illic enim, seu in Incarnatione, inquit Georgius Scholarius, neutrum in alterius naturam mutatum fuit, sed in Christi persona & divinitas & humanitas existunt: hic*
verò,

verò, seu in Eucharistia, *Creatura in Creatorem medio corpore transformatur, & quæ antea extabat substantia panis, Dei Corpus fit, ubi Christi Corpus efficitur. Majus equidem, ob rationes, quas adduxi, omnibus, quæ patraverit Deus, miraculis est transubstantiatio* (Græcè *μετεσώωσις*,) *panis in Corpus Dominicum, sed quæ impossibilis non censetur ab illo, cui perspecta potentia Dei fuerit. Alterum testimonium est Nectarii, nuperi Patriarchæ Hierosolymitani, qui, ut videre est apud nostrum Michaëlem Lequien loco mox laudato, librum contra Latinos composuit inscriptum, de Principatû Papæ, qui anno MDCLXXXI. Giasii in Moldavia editus est. In hoc siquidem libro Schismaticus ille Patriarcha pag. 205. narrat, hostiam quamdam, quæ nigrorem ex mucore contraxerat, cum in sacro disco acerræ imposita fuisset, insolito odore templum omne perfudisse. Tumque, juxta versionem P. Michaëlis Lequien, sic concludit: Hoc miraculum factum esse opinor ad evidentissimam magni illius, & immensi Mysterii demonstrationem, nempe quodd accidētia solummodò panis corrumpantur: substantia verò panis semel mutata, & invocatione Sancti Spiritus in veram Corporis Christi substantiam conversa, nullam prorsus sustineat corruptionem, sed incorrupta, permaneat, tanquàm verum propriumq; Christi corpus. Eandem denique doctrinam de conversione substantiæ panis, & vini in substantiam Corporis & Sanguinis Christi omnes etiamnùm profitentur Græci Schismatici, eamque mirabilem conversionem exprimunt hac *μετεσώωσις*, voce, quæ apud Græcos, ut norunt omnes, idem sonat, quod Transubstantiationis vox significat apud Latinos.*

Quæ

Quæ cum ita sint , vehementer mirari subit , quæ fronte Hæretici audeant asserere , *Innocentium III.* Pontificem Maximum, invexisse Sæculo XIII. dogma de Transubstantiatione , seu de conversione substantiæ panis & vini in Corpus & Sanguinem Christi, cum tamen ipsimet Græci Schismatici ante & post *Innocentium III.* ad hæc usque nostra tempora constanter propugnent , fieri in augustissimo Eucharistiæ Sacramento conversionem substantiæ panis & vini in Corpus & Sanguinem Christi, eamque conversionem efferant hæc μετασίωσις voce , quæ idem apud Græcos pollet, ac apud Latinos *Transubstantiatio*. Credibile autem non est, Græcos Schismaticos , qui Ecclesiam Latinam acerrimè insectantur, voluisse à fide majorum suorum circa Eucharistiæ Sacramentum discedere , & amplecti dogma de Transubstantiatione , seu de conversione substantiæ panis & vini in Corpus & Sanguinem Christi , si reverà illud dogma , ut fingunt Hæretici, ab *Innocentio III.* Pontifice Maximo in Concilio Lateranensi IV. habito ann. MCCXV. in Ecclesiam fuisset injectum . Facebant ergò Hæretici , suasque crassiori filo confutas fabulas tandem aliquandò decantare desinant .

D. Fuitne semper in Ecclesia Græca , seu Orientali, usurpata hæc μετασίωσις vox , & in Ecclesia Romana, seu Latina, perpetuo usu consecratum istud *Transubstantiationis* nomen ad significandam conversionem, quæ fit in Eucharistiæ Sacramento, substantiæ panis & vini in Corpus & Sanguinem Christi ?

M. Certum est, utramq; Ecclesiam tam Græcam, quàm Latinam non interruptâ serie à Christo

Domino ad hæc usque tempora semper credidisse, fieri in augustissimo Eucharistiæ Sacramento conversionem substantiæ panis & vini in Corpus & Sanguinem Christi, idemque dogma etiamnum, proferri non solum Ecclesiam Romanam, sed etiam omnes Orientales, tam Catholicos, quam Schismaticos, & Hæreticos, licet in aliis fidei capitibus à se invicem communionem disjuncti sint, ut in Jacobitis, Eutychianis, Nestorianis, Moscovitis, & aliis, qui per Orientem sunt dispersi, videte est, quos eandem fidem de conversione substantiæ panis & vini in Corpus & Sanguinem Christi adhuc retinere, Sole clarius demonstrat *Antonius Arnaldus* in suo Opere *De perpetuitate Fidei*. Cum igitur omnes totius Orbis Christiani Ecclesiæ in hoc fidei dogmate semper consenserint, & adhuc consentiant, ineptum omnino est, inquirere, utrum antiquitus Græci ad significandam conversionem substantiæ panis & vini in Corpus & Sanguinem Christi usi sint hac voce *μετεσώσις*, & Latini hanc *Transubstantiationis* vocem ante Concilium Generale Lateranense IV. usurparint? Sufficit quippè, ut antiqui Patres Græci in Ecclesia Orientali, & antiqui Patres Latini in Ecclesia Romana conversionem substantiæ panis & vini in Corpus & Sanguinem Christi, quam nunc Græci per *μετεσώσις* vocem, & Latini per *Transubstantiationis* nomen significant, aliis æquipollentibus vocabulis tradiderint. Porro, inter antiquos Patres Græcos *Chrysostomus* conversionem panis & vini in Corpus & Sanguinem Christi nominat *μεταρρύθμισιν*, Gregorius Nisænsis *μετασχηµατισµὸν*, Cyrillus Hierosolymitanus *μεταβολήν*, & Sanctus Damascenus *μεταποίησιν*, quæ omnia

nia vocabula significant *Conversionem*, *Transmutationem*, *Transselementationem*, eandemque planè habent significationem, quâ pollent istæ voces *μετεωρισμός*, & *Transsubstantiatio*, quarum primâ nunc Græci, alterâ Latini ad exprimendam conversionem substantiæ panis & vini in Corpus & Sanguinem Christi, uti solent, ut videre est apud jam citatum doctissimum P. *Michaellem Lequien* in suis Notis in Cap. XIII, libri IV. S. Damasceni *De Orthodoxa Fide*. Esto itaque ad exprimendam conversionem panis & vini in Corpus & Sanguinem Christi non semper Græci hac *μετεωρισμός* voce usi fuerint, & Latini hoc *Transsubstantiationis* nomen ante Concilium Generale Lateranense IV. sub *Innocentio III.* habitum non usurpaverint, inde tamen perperam inferunt hæretici, Transsubstantiationis dogma ab *Innocentio III.* fuisse Sæculo XIII. in Ecclesiam invehitum. Nam licet antiqui Patres, cum Græci, tum Latini, hæc voces, quibus nunc utuntur Græci & Latini, non usurpaverint, alias tamen æquipollentes, & eandem planè significationem habentes ad exprimendam conversionem panis & vini in Corpus & Sanguinem Christi adhibuerunt. Alioquin, si quid roboris haberet istud hæreticorum argumentum, dicendum esset, antiquos Patres Græcos & Latinos, necnon Christianos trium priorum Ecclesiæ Sæculorum non credidisse, Verbum Divinum esse consubstantialiale æterno Patri, quia non usi sunt hac *ὁμοούσιος*, seu consubstantialis, voce, quæ solum in Concilio Nicæno I. celebrato anno cccxxv. contra Arianos fuit in Ecclesia consecrata, & in usu apud fideles. Dicendum quoque esset, antiquos Patres Græcos & Latinos, atque

omnes Christianos non credidisse ante hæresiar-
 cham *Nestorium*, *MARIAM* Virginem esse *Dei-*
param, seu Matrem Dei, quia usi non sunt hac
 θετόκος, seu Matris Dei, voce, quæ tantum in
 Concilio Ephesino ad confingendam Nestorii hære-
 sim anno ccccxix. indicto apud Christianos fre-
 quentari cœpit. Certè norunt omnes, qui in Hi-
 storia Ecclesiastica sunt versati, Ecclesiæ Catholicæ
 solemne semper fuisse novas hæreseon pestes novis
 nominibus refellere. Sic Patrem *Ingenitum* appel-
 lavit. Sic nomen *Hypostasis*, nomen *Incarnationis*,
 nomen ipsum *Trinitatis*, in sacris licet litteris non
 usurpatum adhibuit. Quorsum ergo ad veritatem
 sacrosanctæ Eucharistiæ à Christo Domino tradi-
 tam, ab Apostolis prædicatam, à Sanctis Patribus
 Græcis & Latinis perenni traditione propagatam
 clarè exprimendam, & contra prophanas hæreti-
 corum novitates tutandam, non potuerunt Patres
 Concilii Generalis Lateranensis IV. ab *Innocen-*
tio III. convocati hoc *Transubstantiationis* nomen,
 solemni Decreto adoptare, & in Ecclesia Catholi-
 ca consecrare? Addo etiam falsum esse, istud *Tran-*
substantiationis nomen fuisse primum à Concilio
 Lateranensi IV. invecum, cum illius aperte memi-
 nerint *Stephanus Eduensis*, & *Petrus Blesensis*, qui
 Sæculo XII. vixere, quanquam tamen in usu fami-
 liari apud omnes non adhiberetur ante laudatum
 istud Concilium, quod prædictum nomen, ad inef-
 fabile illud mysterium explicandum perquam ap-
 positum, publico usu, ad obstruenda hæreticorum
 ora, consecratum in Ecclesia esse voluit.

D. Observasti in secundo Colloquio, *Joan-*
nem, vulgò dictum vigesimum secundum, qui Sæ-
 culo

culo XIV. Romanum Pontificatum tenuit, hæreseos infimulari à nonnullis, qui asserunt, hunc Summum Pontificem non solum ex animo propugnasse veterem quorundam erroneam sententiam, quòd Sanctorum Animæ ad supremi diem usque iudicii Visione Dei Beatificâ non fruuntur; sed eam, ut dogma Fidei Ecclesiæ credendam proposuisse. Hunc Summum Pontificem ab hac calumnia hic vindicare debes, quò certissimè constet, Doctrinam Ecclesiæ Romanæ Sæculo decimo quarto puram ac illibatam perstitisse.

M. Certa suppetunt monumenta, quibus facile evincitur, *Joannem XXII.* Pontificem Maximum nullo unquam decreto approbasse, nedum toti Ecclesiæ credendam proposuisse veterem & erroneam illorum sententiam, qui censebant, procraftinandam esse visionem Dei beatificam, hoc est Sanctorum Animas Visione Dei ante supremi iudicii diem non fruituras. At enim non potest melius nobis innotescere, quænam fuerit mens & sententia *Joannis XXII.* circa statum animarum post mortem, quàm ex eodem Summo Pontifice, qui sæpiùs declaravit ac professus est, ea, quæ de dilatione beatitudinis Sanctorum usque ad diem iudicii nonnunquam prædicaverat, ac defendisse visus erat, à se fuisse prolata tantùm ad veritatem indagandam, nec quidquam super hac re unquam definitum esse. Id primò disertè testatur *Joannes XXII.* in Epistola, quam anno mcccxxxiii. scripsit ad *Philippum* Galliarum Regem, in qua hæc habet: Propter hoc, ut veritas possit melius aperiri, Nos interdum in nostris sermonibus mentionem habuimus, non proferendo verbum de nostro capite, sed dicta Scriptu-

*re Sacrae, & Sanctorum: multique tam Cardinales, quam alii coram nobis, & alibi in suis sermonibus pro & contra, de ista materia sunt locuti, & necum in sermonibus, immò publicè, Prælati, ac Magistris in Theologia præsentibus, est in Curia pluriès quæstio hujusmodi, ut sic plenius possit inveniri veritas, disputata. Idem scripsit Joannes XXII. in altera Epistola, quam anno sequenti, seu mcccxxxiv. direxit ad Galliarum Reginam. Ex quibus duabus Epistolis, quas Odoricus Raynaldus ad annum mcccxxxiii. & mcccxxxiv. refert, manifestò constat, Joann. XXII. permisisse dumtaxat, ut hæc quæstio de dilatione beatitudinis usque ad supremi judicii diem, quæ tum temporis decretorio Ecclesiæ judicio necdum eliquata erat, & in dogma fidei transierat, in utramque partem ventilaretur, ut ex publicis Theologorum disputationibus pateretur veritas. At, cum nonnulli malevoli & iniqui obrectatores, quos inter erant Michael Casenas, Guillelmus Ockamus, Bonagratia, Franciscani, & alii, qui Ludovici Bavari Imperatoris Schismatici partibus adhærebant, inde ansam & occasionem arriperent sinistros rumores spargendi contra Joannem XXII. eumque palam calumniandi, quasi negaret Animas, quibus post hanc vitam nihil superest flammis piacularibus purgandum, potiri Visione Dei beatifica usque ad supremi judicii diem: tunc Joannes XXII. publicum Cardinalium Consistorium indixit die iii. mensis Januarii anni mcccxxxiv. in quo, Tabellionibus publicis etiam præsentibus, fidei suæ declarationem edidit his verbis: *Ne quis sinistrò interpretari possit, Nos sensisse aliquid, aut sentire, quod Sacra Scriptura obviet, aut Fidei Orthodoxa, dicimus & pro-**

protestamur expressè, quòd quidquid in quæstione, seu materia visionis animarum, videlicet an animæ à peccatis, & pœnis peccatorum purgatæ videant Divinam Essentiam illa visione, quam Apostolus appellat facialem; seu quacunque alia materia in sermonibus & collationibus nostris diximus, allegavimus, seu proposuimus, non intendentes aliquid determinare, vel decidere, seu credere, quod esset quovis modo Scripturæ sacræ obvium, vel contrarium Fidei Orthodoxæ, sed illud solùm tenere, & credere, quod & Scripturæ potest & poterat, & Catholicæ Fidei convenire; & si fortan in prædictis sermonibus, vel collationibus aliqua, squæ vel Scripturæ sacræ, seu Fidei Orthodoxæ quovis modo essent, vel viderentur obvia, ipsa præter intentionem à nobis fuisse prolata, dicimus & asserimus, eaque revocamus expressè, non intendentes illis adhaerere, nec ea in præsentì defendere, nec etiam in futurum. Quin, die III. mensis Decembris ejusdem anni mcccxxxiv. Joannes XXII. lethali morbo correptus, ac propediè moriturus, fidei suæ circa Visionem beatificam hoc reliquit testimonium, dicens: *Fatemur, & credimus, quòd Animæ purgatæ, separatæ à corporibus, sunt in Cælo, & vident Deum ac Divinam Essentiam facie ad faciem.* Utramque Fidei Joannis XXII. declarationem Benedictus, vulgò dictus XII. ejus in Sede Pontificia Successor, inseruit suo Diplomati dato Avenione an. mcccxxxv. quod ex MS. Vaticano integrum refert Odoricus Raynaldus ad annum mcccxxxiv. Prætereà Joannis XXII. mentem ac sententiam, circa statum Animarum post mortem, perspectam, ac exploratam reddunt tria ejus Diplomata, quorum unum dedit pro Canonizatione S. Thomæ Aquinatis, alterum

pro Canonizatione S. *Ludovici* , Episcopi Tolosani ,
 & tertium pro Canonizatione S. *Thomæ* , Herfor-
 diensis Episcopi , in quibus protestatur Summus
 ille Pontifex, Sanctos illos cum Christo regnare in
 Coelis , & Visione Dei beatificâ perfrui . His cer-
 tissimis monumentis apertè falsi convincitur im-
 postura Hæresiarchæ *Calvini* , qui libro *IV. Institutionum* cap. 7. hæc impudenter scripsit: *Expungant* ,
 inquit, è numero Pontificum oportet , *Joannem XXII.*
qui palàm asseruit, animas esse mortales , unâque cum
corporibus interire usque ad diem Resurrectionis .
Atque ut videas totam Sedem cum præcipuis suis ful-
turis tunc prorsus concidisse , nemo Cardinalium huic
se tantæ insanix opposuit . Sed Schola Parisiensis Re-
gem Gallie compulit, ut ad palinodiam hominem coge-
ret . Rex ejus communionem suis interdixit , nisi mox
resipisceret ; idque de more publicavit per præconem .
Hac necessitate adactus ille, errorem abjuravit , & ad
marginem ait: Testis Joannes Gerson , qui tunc vive-
bat . Hactenus petulantissimus ille Hæresiarcha ,
 cujus quot verba, tot putida sunt mendacia . Pri-
 mum mendacium est, dum ait, *Joannem XXII.* asse-
 ruisse Animas esse mortales , unâque cum corpori-
 bus interire usque ad diem Resurrectionis, cum
 tamen ex antiquis monumentis , & ex locupletissi-
 mis testimoniis probatæ fidei Scriptorum cœvo-
 rum certissimè constet, *Joannem XXII.* nunquam as-
 seruisse, animas esse mortales , unâque cum corpo-
 ribus interire usque ad diem Resurrectionis, sed
 illum duntaxat, ut Doctorem privatum, plus æquo
 fuisse sententiæ quorundam veterum Patrum
 circa procrastinationem Visionis Dei usq; ad diem
 supremi judicii , quæ tamen sententia tum tempo-
 ris,

ris, ut jam observavimus, necdum solemnī Ecclesiæ iudicio erat proscripta, utpotè quæ confixa solum fuerit in Concilio Generali Florentino habito anno mccccxxxix. quā tamen non obstante illius Concilii Oecumenici definitione, scelestissimus Hæresiarcha *Calvinus* eandem opinionem, ab Ecclesia licet ut hæreticam damnatam, obstinato animo propugnavit, sicut alibi ostendimus. Alterum mendacium profert *Calvinus*, dum affirmat, ne minem fuisse, qui huic sententiæ se opposeret; cum tamen Academia Parisiensis in Saltu Vincennarum congregata hanc sententiam de dilatione beatitudinis usque ad supremi iudicii diem damnaverit, suæque censuræ ad petitionem *Philippi Valesii* Galliarum Regis authenticum porrexerit Instrumentum, Magistrorum omnium subscriptione & sigillis munitum, quod integrum *Responsioni suæ ad mysterium iniquitatis* inseruit noster *Joannes Coeffeteau* Massiliensis Episcopus, illudque *Egassius Bulaus* tomo iv. *Historiæ Universitatis Parisiensis* ad annum mccccxxxi. iterum retulit, ac Originale in manibus Fratrum Prædicatorum se Lutetiæ vidisse testatur *Philippus Gammacheus*, Doctor Sorbonicus; in primam Secundæ, quæst. 4. cap. 2. Contra eandem sententiam de dilatione Beatitudinis usque ad supremi iudicii diem doctissimum scripsit Commentarium noster *Durandus à-S. Porciano*, Episcopus Meldensis, quod *Odoricus Raynaldus* ex Codice Vaticano descripsit, suisque Annalibus inseruit: Tertiò, mentitur *Calvinus*, dum scribit, quod *Schola Parisiensis Regem Galliæ compulit, ut ad palinodiam Joannem XXII. cogeret*; cum potius Academiæ Parisiensis Doctores, jussu *Philippi Valesii*, Galliæ

Rez

Regis, in Saltu Vincennarum, ut mox diximus, congregati, istud de Joanne XXII. testimonium Regi perhibuerint, dicentes: *Multorum fide dignorum relatione audivimus, quòd quidquid in hac materia (scilicet de procrastinatione gloriæ Sanctorum usque ad diem judicii) Sua Sanctitas dixit: non asserendo, seu opinando protulit, sed solummodò recitando.* Quartò, à vero omninò abhorret, quod subjungit Calvinus, dicens: *Rex (seu Philippus Valesius, qui tunc in Galliis regnabat,) ejus, seu Joannis XXII. communionem suis interdixit, nisi mox resipisceret. Hac necessitate adactus ille errorem abjuravit.* Id, inquam, à veritate Historiæ omninò alienum est, tum quia apud nullum Scriptorem còrvm legitur, Philippum Valesium, Galliarum Regem, communionem Joannis XXII. suis subditis interdixisse; tum quia etiam, omnes ad unum Scriptores, si excipias Guillelmum Okamum, qui Ludovici Bavari Imperatoris Schismatici stipendiarius erat, testantur, Joannem XXII. nullum unquam errorem propugnasse aut abjurasse, eò quòd sententia de dilatione Visionis Dei usque ad supremi judicii diem, inquam Joannes XXII. ut Doctor privatus, inclinare visus est, nondùm ab Ecclesia esset damnata, nec ullo solemnì Decreto ab ea definitum, Animas corporibus exutas, ac plenè purgatas, in Cælum mox recipi, & intueri clarè ipsum Deum trinum & unum sicuti est. Quæ tandem veritas planè dilucidata, & totius Ecclesiæ judicio in Oecumenica Synodo Florentina sancita ac firmata est. Non me fugit, Petrum de Alliaco, Cameracensem Episcopum, & postea S.R.E. Cardinalem, in quadam Oratione, quam habuit coram Carolo VI. III. Idus Decembris anni

anni mccccvi. affirmasse, Regem *Philippum Valesium*, Academix Parisiensis iudicio fretum, vehementissimas ad *Joannem XXII.* scripsisse litteras, in quibus rogem ipsi intentabat, ni suum revocaret errorem. Sed nullus dubito, quin *Petrus de Alliaco*, qui post annos dumtaxat septuaginta ab obitu *Joannis XXII.* id dixisse fertur, deceptus sit, perperam videlicet applicando personæ *Joannis XXII.* minas, quas *Philippus Valesius*, Galliarum Rex intentarat Ministro Generali Fratrum Minorum, *Geraldo* dicto, qui sententiam de dilatione Visionis Dei usque ad iudicii diem cum plurium offensione publicè Parisiis prædicaverat, cùmque *Philippus* Rex eâ de re per litteras ad *Joannem XXII.* directas conquestus fuisset, rescripsit Summus ille Pontifex, & sub juramento negavit, se præfatum Generalem Minorum Parisios misisse, ut sententiam de procrastinatione beatitudinis Sanctorum usque ad supremi iudicii diem in hac Civitate Parisiensi, sicut fama ferebat, prædicaret. Hanc Epistolam *Joannis XXII.* ad *Philippum*, Galliarum Regem, refert *Odoricus Raynaldus* ad annum mccccxxi. Præterquamquod, testimonium *Petri de Alliaco* asserentis *Joannem XXII.* in errorem imegisse, facili negotio falsi convincitur locupletissimis testimoniis, quæ mox laudavimus, ejusdem Pontificis *Joannis XXII.* ejusque successoris *Benedicti XII.* atque Academix Parisiensis, quibus addi etiam possunt testimonia nostri *Ptolomæi Lucensis* cap. 42. lib. 24. Historiæ Ecclesiasticæ, sæpius ab *Odorico Raynaldo* ex MS. Vaticano in Annalibus Ecclesiasticis laudatæ, & *Joannis Villani* cap. 19. lib. xi. Historiæ Italianæ scriptæ. Qui Authores, cùm *Joanni XXII.* corvi

fue-

fuerint, longè majorem, quàm *Petrus de Alliaco* in rebus Historicis sui temporis fidem merentur. Idem judicium ferendum esse censeo de *Joanne Gersonio*, Sacre Facultatis Parisiensis Cancellario, quem Hæresiarcha *Joannes Calvinus* omnium in *Joannem XXII.* mendaciorum suorum testem citat in margine his verbis: *Testis Joannes Gerson, qui tunc vivebat.* Qua in re *Calvinus* non minùs ignorantiam, quàm malitiam suam prodidit; ignorantiam quidem, dum ait, *Joannem Gersonem* eodem tempore vixisse, quo *Joannes XXII.* Ecclesiam regebat, cùm tamen certum sit, *Joannem Gersonium* longè post obitum *Joannis XXII.* natum esse. Mortuus quippè est *Joannes XXII.* anno MCCCXXXIV. ut testatur *Joannes Villani* libro XI. *Historiæ* cap. 19. *Joannes* verò *Gersonius* natus est anno MCCCLXIII. ut videre est apud *Trithemium* in libro *De Viris Illustribus*. Qui igitur, amabo, fieri potuit, ut *Joannes Gersonius* eodem tempore vixerit, quo *Joannes XXII.* At hic Anachronismus, etsi gravissimus, posset *Calvino* condonari, nisi ibidem suam malitiam apertè indicaret. Postquàm enim audacissimus ille Hæresiarcha infrunito ore asseruit, *Joannem XXII.* negasse immortalitatem animæ, & *Philippum Valesium*, Galliarum Regem, communionem hujus Summi Pontificis suis subditis interdixisse, aliaque non minus insulsa congeffit mendacia, citat ad marginem *Joannem Gersonium*, ut vadem ac testem omnium mendaciorum, quæ in *Joannem XXII.* virulento calamo scripsit, cùm tamen *Joannes Gersonius* nullibi dicat, *Joannem XXII.* negasse immortalitatem animæ, & *Philippum Valesium* Galliarum Regem interdixisse suis subditis communionem *Joannis*

nis XXII. Hoc unum dumtaxat, ut candidè fatear, asserit *Joannes Gersonius*, videlicet *Joannem XXII.* ut Doctorem privatum, propugnasse sententiam de dilatione Visionis Dei usque ad judicii diem, eamque sententiam à Theologis Parisiensibus fuisse damnatam. Sic enim in Sermone de Festo Paschatis, illud explicans: *Hodie mecum eris in Paradiso*, effatur iste Academix Parisiensis Cancellarius: *Propter quod insuper apparet falsitas doctrinæ Papæ Joannis XXII. quæ damnata fuit cum sono buccinarum coram Rege Philippo avunculo tuo per Theologos Parisienses, de Visione beata, & credidit potius Theologis Parisiensibus, quàm Curia.* Hoc Joannis Gersonii testimonium hic referre necessarium esse duxi, ut inde facilè intelligeres, falsò *Joannem Gersonium* citari ab Hæresiarcha *Calvino* tanquam testem omnium mendaciorum, quæ ipse de industria suo in cerebro conficta in *Joannem XXII.* sacrilego ore evomuit. Quamquam tamen, ut obiter dicam, nec ipsimet *Joanni Gersonio* fides adhibenda sit, non solum quia asserit, sententiam de procrastinatione Visionis Dei usque ad judicii diem fuisse à Theologis Parisiensibus damnatam cum sono buccinarum, quæ profectò circumstantia de censuræ Theologorum Parisiensium promulgatione facta cum sono buccinarum ab antiquioribus, & cœvis Scriptoribus omninò reticetur; sed etiam quia *Gersonius* innuere videtur, *Joannem XXII.* ex animo propugnasse sententiam de dilatione beatitudinis usque ad supremi judicii diem, cum potius ex antiquissimis Monumentis, quæ jam laudavimus, & ex disertis cœvorum, ac subindè *Gersonio* antiquiorum Scriptorum testimoniis haud ob-

scu-

scure colligi possit, *Joannem XXII.* propendisse dumtaxat in sententiam de dilatione beatitudinis usque ad judicii diem, eumque inquirendæ ac elucidandæ veritatis gratiâ, quæstionem hanc de Sanctorum Animarum beatifica Visione in utramque partem disceptari optasse, eam tamen auctoritate Pontificiâ nunquam definiisse, cum illius Pontificiæ definitionis nullum in hujus Summi Pontificis, seu dictis, seu factis, signum, aut levissimum repariatur vestigium.

D. Quænam in Scholis Sæculis XIII. & XIV. Theologiam docendi obtinuit methodus, & quæ potissimum Disciplinæ, Artes, ac Scientiæ excoltæ fuerunt?

M. Quamvis Sæculis XIII. & XIV. studium juris Canonici & Civilis maximè viguerit, in professione tamen Theologiæ Scholasticæ omnis ferè litterarum dignitas consistebat, præsertim postquam *S. Thomas*, Doctor Angelicus, Theologiam Scholasticam egregiis Commentariis, ac Summâ suâ tripartitâ plurimum illustrasset, atque Philosophiam obsequio fidei mancipasset. Huic quippè Sanctissimo Præceptori prima, ac penè una cura, fuit inquirere ac certò nosse, quid Scriptura, quid consensus omnium Sanctorum Patrum de quâque re doceret, ut, eo constituto tanquam inamoto fundamento, totam illi Theologiam adstrueret. Hinc *Doctōis communis* nomen assecutus est, quia, Duce verbo Dei, fugit diverticula, & tritam Patrum calcavit viam, à qua ne latum quidem unguem permisit sibi discedere. Omnes Scientias obsequio fidei subjecit, & ex philosophia eas sententias delegit, quæ ad fidei mysteria explicanda & pro-

& propugnanda conducere possent; verbo dicam, sicut vitæ origo & finis est à corde, quod primum omnium incipit, & ultimum desinit vivere, ita *S. Thomæ Aquinati* scribenti, & docenti fides instar cordis fuit, ab una fide & traditione cœpit, & in fidem desit. Theologica è doctrina Patrum, & principiis fidei hausit, in opinionibus verò philosophicis deligendis, inter hinc indè probabilia, unius fidei defendendæ rationem ita habuit, ut merito Doctoris illius Angelici Scripta appellare possim Christianæ Religionis Armamentarium, & quæcunque docet, sint vel confectaria à fide deducta, vel præsidia fidei & ad illam apparatus. Si vellem ad hujus rei fidem faciendam, quæ suppetunt, hic proferre experimenta, decurrendæ mihi essent omnes Theologiæ partes, quia ubique eandem methodum servavit. Hanc *S. Thomæ* in pertractandis quæstionibus Theologicis methodum, quæ ad veritatis discussionem nulla aptior, ad Catholicam fidem defendendam solidior, ad mores probè informandos securior esse potest, qui Sæculis XIII. & XIV. secuti sunt Theologi, à veritatis tramite nunquam deviarunt. At, proh dolor! nonnulli fuerunt Sæculis XIII. & XIV. Theologi, qui diversam à Sancti *Thomæ* methodo viam ineuntes, & in Theologia Philosophos agentes, in varios errores proruperunt, quorum temeritatem, superbiam, insolentiamque repressit Academia Parisiensis, sicut ostendimus in Colloquio tertio. Extiterunt etiam alii Academix Parisiensis Theologi, qui Sæculis XIII. & XIV. affectatâ ingenii subtilioris famâ, inutilium, & metaphysicarum difficultatum Concertationibus Scholas impleverunt, nodisque in-

intricatisſimis futiliū quæſtionum, quæ vix aliud quàm temporis jacturam, aut quod multò periculoſius, nec minus frequens malum accidēbat, pietatis ſaſtidium afferebant. De hoc graviffimo, qui in Theologiam Scholaſticam apud Theologos Pariſienſes irrepleſerat, abuſu, jure ac meritò conqueritur Joannes Gersonius, Facultatis Pariſienſis Cancellarius, in Epiftola, quam Brugis ſcripſit ad quemdam Prælatum, in qua, teſte Egaffio Buleo *tomo iv. Hiſtoriæ Univerſitatis Pariſienſis* hæc habet: *Reverende Pater, ſub veſtra, & Magiſtrorum noſtrorum correptione in Facultate Theologiæ videtur eſſe neceſſaria reformatio ſuper ſequentibus inter cætera. Primò, ne tractentur ita communiter doctrinæ inutiles ſine fructu & ſoliditate, quoniam per eas, doctrinæ ad ſalutem neceſſariæ & utiles deſeruntur, neſciunt neceſſaria, quia ſupervacua didicerunt, inquit Seneca. Secundò, per eas non ſtudentes ſeducuntur, quia ſcilicet putant, illos principaliter eſſe Theologos, qui talibus ſe dant, ſpreta Biblia, & Sacris Doctõribus. Tertiò, per eas (ſeu inutiles doctrinas) termini à Sanctis Patribus uſitati tranſmutantur contra illud Auguſtini: Nobis ad certam Regulam loqui fas eſt &c. Et non ſequitur velocior ſcientiæ alicujus corruptio, quam per hæc &c. Quartò, per eas Theologi ab aliis Facultatibus irridentur, nam idèò appellantur Phantaſtici, & dicuntur nihil ſcire de ſolida veritate, & Moralibus & Biblia. Quintò, per eas viæ eorum multiplices aperiuntur. Quia enim loquuntur, & fingunt ſibi ad placitum terminos, quos alii Doctores & Magiſtri non intelligunt, nec intelligere curant, dicunt incredibilia & abſurdiffima, quæ ex ſuis abſurdis fictionibus dicunt ſequi. Sextò, per eas Eccleſia & Fides*

des neque intus, neque foris ædificantur. Constat, quòd dant potiùs occasiones credendi, quòd Deus non sit omnimodè simplex, aut unus. Septimò, per eas multi ex Theologis tam activè, quàm passivè scandalizantur, nam alii vocantur rudes ab aliis, & alii è contra Curiosi, & Phantastici: Tales nunc currunt propositiones ex talibus doctrinis: infinitæ sunt durationes in divinis secundùm prius & posterius quamvis æternæ: Spiritus Sanctus liberè, contradictoriè, contingenter producit ex parte principii &c. Hactenus Joannes Gersonius, qui doctrinas inutiles, quæ his temporibus in Scholas invecitæ, germanæ Theologiæ faciem deturpabant, meritò improbat, monetque Theologos, ut abstineant à tractandis illis quæstionibus, quæ semper litigandi novam videntur subministrare materiam, easque solùm ventilent, quæ ad Scripturæ Sacræ, Historiæ Ecclesiasticæ, ac veræ Theologiæ notitiam conferre, aut fidelibus Christianæ pietatis semina instillare possunt. Hùc enim perfectò præcipua Theologorum cura intendi deberet, ut proscriptis, & ab ipsis usque radicibus evulsis ex hominum animis falsis opinionibus, præsertim illis, quæ lascivienti hominum libidini indulgent, sanam Theologiam ex Sacris litteris, ex Sanctorum Patrum Operibus, atque ex Sacris Ecclesiæ sanctionibus haustam traderent discipulis, easque sapius in Scholis necessarias disputationes, & exercitationes haberent, quæ intelligendi prudentiam acuunt, loquendi celeritatem incitant, artemque edocent hæreticos ferendi, repellendi, & tanquam machinatione aliqua in omnem partem contorquendi. Quâ in re impensè laudo nostri temporis Theologos, qui, eximiâ instructi differendi faculta-

te, benè multa, quæ antehàc aut conclusa, aut obscura erant, variis disputationibus tractata eruerunt, dilucidè exposuerunt, & ad altiorem sacram litterarum peritiam, ad meliorem Sanctorum Patrum doctrinam, quæstiones ad exercenda ingenia, ac diluenda contorta hæreticorum sophismata apprimè utiles providè atque sapienter adjecerunt.

D. Cùm non solum doctrinam Ecclesiæ, sed etiam Leges & Constitutiones Ecclesiasticas, quibus sancitur Disciplina, callere debeat Clericus, ne quidquam faciat, quod Patrum possit esse regulis contrarium; magni mea interest, ut hinc Disciplina Ecclesiasticæ, quæ Sæculis XIII. & XIV. viguit, speciem & formam adumbres.

M. Priusquàm Singularia quædam attingam Disciplina Ecclesiasticæ Capita, non abs re erit generales præmittere Observationes, spectantes Disciplinam Ecclesiæ, quæ Sæculis XIII. & XIV. sancita fuit, atque executioni mandata. In primis, observare debes, pluralitatem Beneficiorum Sæculo decimo tertio multis Clericis placuisse, eumque abusum frequentibus Decretis & Canonibus Summorum Pontificum ac Conciliorum damnatum esse, sed cùm nihilominus hæc pestis, præsertim in Galliis, latius grassaretur, *Guillelmum*, Parisiensem Episcopum, per triennium, hoc est, ab anno MCCXXXV. usque ad annum MCCXXXVII. hanc de Beneficiorum unitate aut pluralitate Controversiam jussisse à Theologis Academicæ Parisiensis disputari, an videlicet salvâ conscientia posset quis plura adire & habere Beneficia? Hanc quæstionem diuturno examine discussierunt Theologi

logi Parisienses , ac tandem plenis Theologorum Comitibus , quibus ex Familia Dominicana intererant tres , *Hugo à Sancto Charo* , Theologiz Professor , ac postea S.R.E. Cardinalis , *Guerrius à Sancto Quintino* , & *Gaufridus* , quorū suffragiis decretum est , nullum posse , sine legitima causa , pluribus Beneficiis potiri , si ex uno Beneficio annuos redditus ad honestam vitæ sustentationem sufficientes perciperet. Id disertè testatur noster *Thomas Cantimpranus* , qui tum temporis Parisiis versabatur , libro 1. *Apum* cap.xx. num.v. ubi hæc habet : *Volo* , inquit , *ut quicumque hæc legerit* , *sciat me anno ab Incarnatione Domini MCCXXXVIII. fuisse Parisiis* , ubi *Venerabilis Guillelmus Parisiensis Episcopus* , qui in *Theologia* rexerat , conventionem fecit omnium Magistrorum in Capitulo Fratrum Prædicatorum . Proposita ergo questione de pluralitate Beneficiorum , solerti , & valdè longa dissertatione probatum est , duo Beneficia , dummodò unum valeret quindecim libras Parisienses (quæ Summa tunc temporis in Galliis , ob monetæ penuriam ad honestum Clerici victum sufficiebat) teneri cum salute animæ non posse . Verùm , inter Scriptores Sæculi XIII. nullus , meâ quidem sententiâ , diligentius excussit , & clariùs atque securiùs hanc de unitate , vel pluralitate Beneficiorum Controversiam explanavit , quàm *S. Thomas* , Doctor Angelicus , Quodlibeto IX. Quæstione VII. Art. II. ubi primùm docet , quòd inter actiones de se indifferentes ad bonum & malum locum habere non possit plurium præbendarum , seu cumulatorum Beneficiorum possessio , cum hoc , quod est habere plures Præbendas , plurimas in se inordinationes contineat ; utpotè quia , non est possibile aliquem in plu-

ribus Ecclesiis deservire , in quibus est præbendatus , cum præbendæ videantur esse ordinatæ quasi quædam stipendia Deo ibidem ministrantium . Sequitur etiam diminutio Divini Cultus , dùm unus loco plurium instituitur . Sequitur etiam in aliquibus defraudatio voluntatum Testatorum, qui ad hoc bona Ecclesiis contulerunt , ut certus numerus Deo deservientium ibi esset . Sequitur etiam inæqualitas , dùm unus pluribus Beneficiis abundat , & alius nec unum habere potest .

Secundò , docet S. Thomas , Præbendarum , seu Beneficiorum pluralitatem esse in numero harum actionum, quæ absolutè consideratæ deformitatem, vel inordinationem quamdam important , quæ tamen, aliquibus circumstantiis advenientibus, bonæ efficiuntur ; Sicut occidere hominem vel percutere , in se deformitatem quamdam importat ; Sed si addatur , occidere malefactorem propter justitiam , vel percutere delinquentem causa disciplinæ, non erit peccatum , sed virtuosum . In numero harum actionum videtur esse , habere plures præbendas . Quamvis enim aliquas inordinationes contineat , tamen aliæ circumstantiæ possunt supervenire , ita honestantes actum, quòd prædictæ inordinationes totalitèr evacuentur ; ut putà si sit necessitas in pluribus Ecclesiis ejus obsequio , & possit plus servire Ecclesiæ , vel tantumdè , absens quàm alius præsens ; & si qua alia sunt ejusmodi . Et tunc istis conditionibus supervenientibus cum recta intentione non erit peccatum Si verò aliquis , subdit Doctor ille Angelicus , hac intentione plura Beneficia habeat, ut sit ditior , ut lautius vivat , & ut facilius ad Episcopatum perveniat in aliqua Ecclesiâ, ubi est Præbendatus, non tolluntur prædictæ deformitates, sed augentur , quia cum tali intentione & unum Benefi-

cium

cium habere, quod nullam inordinationem importat, esset illicitum. Denique, concludit S. Thomas: sine quibus circumstantiis tutum non est plures habere Præbendas, quantumcùmque Dispensatio interveniat; eò quòd dispensatio humana non aufert ligamen Juris naturalis, sed solum ligamen Juris positivi, quod per hominem statuitur, & per hominem dispensari potest. Ex qua S. Thomæ doctrinà manifestò colligitur, Beneficiorum pluralitatem, quæ his munita non est circumstantiis ab illo Doctore Angelico assignatis, illicitam esse, meritòque damnatam Canone XIX. Concilii Lateranensis IV. sub Innocentio III. anno MCCXV. celebrati, quem Canonem postea Sæculo XIV. renovarunt Summi Pontifices Joannes XXII. in sua Decretali, quæ incipit, *Execrabilis &c.* & Urbanus V. in sua Constitutione, cujus initium, *Horribilis &c.* Refert etiam Odoricus Raynaldus ad annum MCCCXI. fuisse Ecclesiæ Gallicanæ Præsulem Anonymum, qui in Concilio Generali Viennensi contra Beneficiorum pluralitatem acriter invectus est his verbis: *Hodiè, quod cum dolore referendum est, una persona, aliquandò minus idonea, quatuor vel quinque in diversis Ecclesiis obtinet Beneficia, idest, quinque vel quatuor dignitates, aliquando tres vel duas; Quin immò, quod non est minimum inconueniens vel absurdum, una persona, cui secundum statum suum una sufficeret Canonica vel Præbenda, decem vel duodecim in diversis Ecclesiis obtinet, & aliquandò plures, sicut vidi. Heu! aliquandò una persona tot obtinet dignitates, Personatus, vel Officia, quot ex eis posset quinquaginta vel sexaginta exercitatis & litteratis personis sufficientissimè provideri. Ex quo pernicioso abusu sequitur destructio Ec-*

clesiarum, defectus servitiorum Ecclesiasticorum, enervatio & dissipatio studiorum, quæ modernis temporibus ubique terrarum depereunt, propter hoc quòd bonis Scholaribus exercitatum ingenium habentibus provideri non potest per Prælatos &c.

Hanc generalem observationem de pluralitate Beneficiorum Sæculis XIII. & XIV. multis Summorum Pontificum & Conciliorum Decretis proscriptâ, altera excipiet observatio de Residentia, quæ Episcopis, Canonicis, & Curatis, omnibusque Beneficia curam animarum habentia obrinentibus fuit iisdem Sæculis XIII. & XIV. Sacris Ecclesiæ Canonibus imperata. Episcopi tamen à Residentia legitimè dispensati aliquandò censebantur, tum ob causam pietatis, quandò videlicet ad eunda erat Apostolica Sedes, ad reverentiæ, & obedientiæ significationem ei exhibendam, tum etiam ob causam necessitatis, nimirum quandò interesse debebant Conciliis Generalibus, vel adibant Concilia Provincialia, quæ Metropolitani singulis annis celebrare tenebantur, ut sanxit Concilium Generale Lateranense IV. sub Innocentio III. Summo Pontifice, Canone VI. ubi sic statutum est: *Sicut olim à Sanctis Patribus noscitur institutum, Metropolitani singulis annis cum suis Suffraganeis Provincialia non omittant Concilia celebrare. In quibus de corripendis excessibus, & moribus reformandis, præsertim in Clero, diligentem habeant cum Dei timore tractatum &c.* Hanc Conciliorum Provincialium celebrationem, quæ sensim sine sensu Sæculo decimo quarto in desuetudinem abire cœperat, imperavit Gregorius XI. Pontifex Maximus, in Epistola ad Petrum Archiepiscopum Narbonen-

bonensem, datâ anno MCCCLXXXIV. A' lege residen-
di in suis Ecclesiis Beneficiarios studentes, eorum-
que Professores dispensavit Sæculo XIII. *Hono-
rius III.* in Decretali *super specula; De Magistris*,
cujus hæc sunt verba: *Docentes verò in Theologica,*
Facultate, dum in Scholis docuerint, & studentes in
*ipsa, integrè per annos quinque percipiant, de licen-
tia Sedis Apostolicæ, proventus Præbendarum, &*
*Beneficiorum suorum, non obstante aliqua alia consue-
tudine vel Statuto, cum denario fraudari non debeant*
in Vineâ Domini operantes. Istam *Honorii III.* De-
cretalem Sæculo decimo quarto *Clemens V.* anno
MCCCVIII. *Joannes XXII.* anno MCCCXXXI. *Clemens VI.*
ann. MCCCXLI I. & MCCCXLVI. confirmarunt.

Clericos Beneficiarios bonorum Ecclesiasti-
corum dispensatores dumtaxat & Oeconomos, sed
non dominos esse, sæpiùs declararunt Concilia Na-
tionalia Sæculis XIII. & XIV. celebrata, quorum
Canones in Colloquio IV. laudavimus. Eamdẽ
doctrinam *S. Thomas*, qui Sæculo XIII. vixit, di-
fertè tradit *Secundâ Secundæ, Quæstione CLXXXV.*
Art. vii. ubi Episcopos bonorum Ecclesiastico-
rum dispensatores & procuratores, non dominos
esse docet his verbis: *Aliter est dicendum de propriis*
*bonis, quæ Episcopi possidere possunt, & de bonis Ec-
clesiasticis. Nam priorum bonorum verum domi-
nium habent. Undè ex ipsa rerum conditione non*
obligantur ut ea aliis conferant, sed possunt ea vel sibi
retinere, vel etiam aliis pro libito elargiri. Possunt
*tamen in eorum dispensatione peccare, propter inor-
dinationem affectus, per quam contingit quod vel sibi*
plura conferant, quàm oporteat, vel aliis etiam non
subveniant, secundum quod requirit debitum charita-
ti.

tis . Non tamen tenentur ad restitutionem , quia hujusmodi res sunt eorum dominio deputatæ : Sed Ecclesiasticorum bonorum sunt dispensatores vel procuratores Sunt autem bona Ecclesiastica non solum in usus Pauperum , sed etiam ad Cultum Divinum & necessitates Ministrorum expendenda si aliquid sibi retinuerit Episcopus de his , quæ sunt pauperibus eroganda , vel etiam in usum Ministrorum , aut in Cultum Divinum expendenda , non est dubium quin contra fidem dispensationis agat , & mortalitèr peccet , & ad restitutionem teneatur .

Clericos exactiõibus , procurationibus , ve-
tigalibus , pedagiis subdi passa non est Ecclesia
XIII. & XIV. Sæculis , etiam ratione patrimonii &
hæreditatis , nisi uxorati essent , vel mercaturam
excercerent , & Censuris Ecclesiasticis eorum immu-
nitatem defendit . Districtè quoque prohibuit Ec-
clesia , ne Clerici Laicum Judicem sibi constitue-
rent , aut ad Laicorum Tribunalia traherentur , ut
videre est in multis Conciliorum Canonibus , quos
in quarto Colloquio retulimus . Hanc Ecclesiarum ,
Clericorum , & bonorum Ecclesiasticorum immu-
nitatem , egregiè , ut alibi observavimus , *Petrus*
Bertrandus *Æduensis* Episcopus , & postea S. R. E.
Cardinalis , Sæculo XIV. totius Ecclesiæ Gallica-
næ nomine coram *Philippo Valesio* , Galliarum Re-
ge , tuitus est contra *Petrum de Cugneriis* Regium
Advocatum , pro Baronibus , & Sæcularibus Ma-
gistratibus perorantem , qui , licèt non diffitere-
tur , judicium de causis Clericorum ad Episcopos
de jure spectare , aliquos tamen excipiebat casus ,
scilicèt primò crimen furti . Secundò , Clericorum
conjugatorum delicta . Tertiò , si absque Tonsura

& veste Clericali essent in crimine deprehensi . Quartò, si de ipsorum conjugibus ageretur . Quintò, Clericos in terris Baronum à Ministris Ecclesiasticis capi non posse pertentedat . His exceptionibus Immunitatem & jurisdictionem Ecclesiasticam limitare ac elevare pro viribus studebat *Petrus de Cugneriis*, quem adeò nervosè confutavit laudatus *Petrus Bertrandus* Episcopus *Æduensis*, ut *Philippus Valesius*, Rex Christianissimus, libratæ æquâ lance hinc indè momentis, Immunitatem & Jurisdictionem Ecclesiasticam sartam tectam in suo Regno conservari voluerit, & *Petrus de Cugneriis*, qui eam impugnare ac labefactare ausus fuerat, in vulgi fabulam abiërit . Cæterùm, etsi Clerici Sæculis XIII. & XIV. ab exactionibus liberi essent, & Laicorum Judicum Tribunalibus exempti, interdum tamen Summi Pontifices, ob publicas Ecclesiæ necessitates, præsertim pro Expeditione Sacra, & ad bellum contra Hæreticos Albigeneses faciendum, legem imposuerunt Clericis Decimas persolvendi Regibus ac Principibus Laicis ad certum tempus præfixum, ut constat ex multis exemplis, quæ referuntur à Scriptoribus horum temporum, & quæ, brevitatis ergò, silentio prætermittito . Permiserunt etiam Summi Pontifices Galliarum Regibus, ut flagitiosos Clericos propter crimina homicidii, mutilationis, aut alterius enormis facinoris, vel etiam super hujusmodi criminibus publicè diffamatos, in carceres suos detruderent, non ut jus aliquod in eos exercerent, sed Præsulibus traderent, ne in effrænatam licentiam impunitatis spe prorumperent isti Clerici gravissimorum criminum notâ inusti . Hoc privilegium

Nicolaus IV. Pontifex Maximus concessit *Philippo III.* Regi Christianissimo, anno MCCLXXXVIII. ut videre est apud *Odoricum Raynaldum* ad hunc annum num. xxxvii. Idem Privilegium *Joannes XXII.* anno MCCCXVII. indulgit *Philippo V.* Regi Christianissimo, sicut ad hunc annum num. xlii. refert citatus *Odoricus Raynalus*.

Deniquè, circa Disciplinam Ecclesiæ, quæ in administratione Sacramentorum Sæculis XII. & XIV. frequentari solebat, generatim observare debes primò, viguisse adhuc Sæculo XIII. antiquum morem baptizandi per immersionem, sicut *S. Thomas*, qui eo Sæculo vixit, apertè testatur 3. Parte suæ Summæ Quæstione LXVI. Art. vii. ubi ait: *Quamvis tutius sit baptizare per modum immersionis, quia hoc habet communior usus.* Et in responsione ad secundum sibi propositum argumentum inquit: *Ad secundum dicendum, quòd in immersione expressius representatur figura sepulturæ Christi, & ideo hic modus baptizandi communior est & laudabilior.* Id etiam confirmat Articulo octavo ejusdem quænis, ubi docet, quod communiter observatur in Baptismo trina immersio, & ideo graviter peccaret aliter baptizans, quasi ritum Ecclesiæ non observans. Ast, sub finem Sæculi XIV. evanuit apud Latinos ritus baptizandi per immersionem, & obtinuit mos conferendi baptismum per effusionem, ut liquet ex omnibus Ritualibus, quæ à tempore Sæculi XIV. edita sunt, in quibus, omisâ immersione, solius effusionis in baptismi administratione, modus præscribitur. Cur autem Ecclesia Latina hunc antiquum per immersionem baptizandi modum in alium Sæculo XIV. immutaverit, multiplex

plex ratio à Theologis afferri solet. Prima est, quia Ministri, ubi in Ecclesiis desit Diaconorum copia, baptizandos, adultos præsertim, immergere vix potuerunt. Secunda, quia cum parvuli recens nati majorem constituerent baptizandorum numerum, periculum fuit, ne ex eorum immersione eorum valetudini aliqua labes inferretur. Tertia, quia Ecclesia tam ministrorum, quam suscipientium Baptismum pudori consulere voluit, cui quidem pudori, cum non amplius extarent Diaconissæ, quibus fœminas, quæ erant baptizandæ, immergendi cura olim incumberebat, difficili negotio consultum fuisset, si baptismus, fœminis præsertim, ut fiebat antiquitus, per immersionem fuisset collatum.

Præterea, circa administrationem Eucharistiæ, quamvis Sæculo XIII. antiqua adhuc vigeret consuetudo communionem dandi sub utraque specie, nihiloseciùs in quibusdam Ecclesiis communio sub unica tantùm specie, scilicet panis, populo porrigebatur. Hujus consuetudinis testis est locupletissimus S. Thomas, qui 3. Parte suæ Summæ Quæstione LXXX. Art. XII. hæc habet: *Ex parte autem summentium requiritur summa reverentia, & cautela, ne aliquid accadat, quod vergat ad injuriam tanti Mysteriorum; quod præcipuè posset accidere in sanguinis sumptione, qui quidem si incantè sumeretur, de facili posset effundi: & quia crevit multitudo populi Christiani, in qua continentur senes & juvenes & parvuli, quorum quidam non sunt tantæ discretionis, ut cautelam debitam circa usum hujus Sacramenti adhibeant, idèo providè in quibusdam Ecclesiis observatur, ut populo sanguis sumendus non detur, sed solum à Sa-*

à Sacerdote sumatur. Contendunt multi Viri eruditi post doctissimum P. Joannem Morinum, Congregationis Oratorii Presbyterum, in libro de *Pœnitentia*, formam absolutionis, quam Sacerdotes in tribunali Pœnitentiæ adhibebant, fuisse in Ecclesia Latina ad duodecimum usque sæculum, dumtaxat *deprecativam*, quali etiamnùm Græci utuntur in Sacramento Pœnitentiæ, sed non fuisse *indicativam*, seu his verbis conceptam: *Ego absolvo te à peccatis tuis*. At, ut ut sit de hac Patris Morini, & aliorum Theologorum sententiâ, quam hic discutere animus non est, certum est, Sæculo XIII. formam Sacramentalis Absolutionis in Ecclesia Latina non fuisse *deprecativam*, qualis est apud Græcos, sed *indicativam*, sicut nunc usurpatur in Ecclesia Latina. Hujus rei testem omni exceptione majorem proferam S. Thomam, qui in Opusculo XXI. cap. II. impugnans aliquem Scriptorem, qui Sæculo XIII. multa antiquorum Authorum laudabat testimonia pro sola deprecativa absolutionis forma in Sacramento Pœnitentiæ adhibendâ, sic respondet Doctor ille Angelicus; *Nunquid etiam si nunc viverent* (idest illi Authores citati ab illo Scriptore, quem refellit) *præjudicare possent communi sententiæ Magistrorum Parisiis regentium, qui contrarium sentiunt, decernentes absque his verbis: Ego te absolvo, absolutionem non esse per solam deprecativam orationem*. Prætermittere hic non possum observationem, quam mihi suppeditat idem S. Thomas circa Jejunium Quadragesimale, quod ad duodecimum usque sæculum in Ecclesia Latina vespere tantùm solvebatur, sed ineunte Sæculo XIII. mox ille antiquus mutatus est, & horâ nonâ

nonâ solvi cœptum etiam in Quadragesima jejuni-
 um, sicut testatur Doctor Angelicus Secundâ Se-
 cundæ Quæstione XLVII. Art. VII. in quo inquit,
utrum hora nona convenienter taxetur ad comedend-
um his, qui jejunant? At jejunium etiam tempore
 Quadragesimæ, quod, teste S. Thoma, Sæculo XIII.
 solvi dumtaxat poterat horâ nonâ, tandem cadente
 Sæculo XIV. hominibus majorem ad relaxationem
 pronis, ad meridiem solvi cœpit, & ad jejunium
 quadragesimale satis superque sufficere ui-
 sum est, si Officio vespertino circa meridiem per-
 soluto pranderetur, Ecclesiâ infirmitati hominum
 indulgente, ut cænæ mutarentur in prandia meri-
 diana, modò, quæ jejunio essentialis est, refectionis
 unitas servaretur, nec meridie pransi vespere
 cœnarent. Hinc meritò inferas Cœnulam serotinam,
 quæ *Collatio* vulgò vocari solet, sitque nunc
 tempore Quadragesimalis Jejunii, ex hominum
 relaxatione ortum habuisse, eique nec Sanctos Pa-
 tres, nec Conciliorum Canones suffragari, nec Ec-
 clesiam latâ lege consensisse unquam, quamvis eam
 toleret.

D. Placent mihi admodum generales istæ,
 quas hætenus in Disciplinam Ecclesiasticam Sæcu-
 lorum XIII. & XIV. præmisisti Observationes. Nunc
 particulatim percernere debes præcipua Disciplina
 Ecclesiasticæ capita, quæ spectant Jura & Officia
 Metropolitanorum, Electiones, & jurisdictionem
 Episcoporum, Ordinationes Clericorum, eorumque
 ad Ecclesiastica Beneficia promotiones.

Hæc erant Sæculis XIII. & XIV. Jura & Officia
 Metropolitanorum. Primò, absolvere poterant
 eos, qui excommunicati fuerant à suis Suffraganeis,

vel eorum Officialibus, si à sententiâ latâ ad eorum tribunal appellatum esset, illos tamen absolvere non poterant, qui ab Archidiaconis, aut aliis Subditis Suffraganeorum suorum erant excommunicati, quia horum Judices non censebantur, sed Episcopi, seu Metropolitanorum Suffraganei, ut constat ex capite *Venerabilibus*: in Sexto; Titulo *De Sententia Excommunicationis*. Secundò, Metropolitanì supplere poterant Suffraganeorum Episcoporum defectum ac negligentiam in Collationibus, Institutionibus, Electionibus, & Confirmationibus Beneficiorum Ecclesiasticorum, ut habetur in Capite *Licet*, lib. 1. Decretalium, tit. 10. *De supplenda negligentia Prælatorum*, quod est *Innocentii III.* Poterant etiam Metropolitanì, si vacante aliquo Episcopatu, Capitulum administrationem spiritualem aut temporalem Diœceseos negligeret, instituere, & delegare ad illam Cathedralē Ecclesiam vacantem aliquem Visitatorem aut Administratorem, sicut decrevit *Bonifacius VIII.* Pontifex Maximus, in Sexto, cap. *Ecclesiæ*, tit. *De supplenda negligentia Prælatorum*. Tertiò, Metropolitanì Provincias suas visitare tenebantur, quæ correctione indigebant, pastoralī sollicitudine emendare, & Synodos Provinciales convocare, ut adhuc vigentia sedulò tenerentur, retinerentur collabentia, prorsus collapsa renovarentur, & sacri ad instaurandam Ecclesiæ Disciplinam sanciti Canones, quos Summus Pontifex *S. Leo Magnus* Epistolâ 84. ait, *Spiritu Dei conditos, ac totius Orbis reverentia esse consecratos*, executioni mandarentur, sicque radicitus evellèrentur pravæ quædam inolitæ consuetudines ac corruptelæ, quas Episcopi divi-

vinâ

vinâ ad regendam Ecclesiam auctoritate præditi , & in quorum firmitate unum est collabentis Ecclesiasticæ Disciplinæ præsidium , tolerare sine piaculo non possunt , sed invalescentibus abusibus vehementius reluctari , & ad Disciplinam Ecclesiasticam instaurandam diligenti curâ , studio & contentione incumbere debent , quantum tamen patitur Christiana prudentia , quæ interdum nonnullas labe , majoris mali vitandi causâ , nonnunquam tolerari præcipit . Denique , Metropolitanis Jus assertum erat confirmandi Electiones Episcoporum , non secus ac Metropolitanorum electiones confirmandi jus ad Romanum Pontificem spectabat .

Episcopi ab Ecclesiarum vacantium Capitulis Sæculis XIII. & XIV. eligebantur , nec in eas electiones sese Principes Laici ingerere poterant , aut si in his suam aliquandò interponerent auctoritatem , tunc hujusmodi Electiones nullæ ac irritæ censerî debebant , sicut statutum est in Concilio Generali Lateranensi IV. Canone xxv. his verbis : *Si quis electioni de se factæ per secularis potestatis abusum consentire præsumpserit contra Canonicam libertatem ; & electionis commodo careat , & ineligibilis fiat , nec absque dispensatione possit ad aliquam eligi dignitatem . Qui verò electionem hujusmodi , quam ipso jure irritam censemus , præsumpserint celebrare , ab Officiis & Beneficiis penitus per triennium suspendantur , eligendi tunc potestate privati .* Hanc sacrarum Electionum libertatem S. Ludovicus , Galliarum Rex , Pragmaticâ Sanctione , quam promulgavit ann. mcccxlvi. asseruit his verbis , quæ habentur Articulo secundo : *Ecclesiæ Cathedrales , inquit , & aliæ*

aliæ Regni nostri, liberas electiones, & earum effectum integralitèr habeant. Et Art. 4. Item promotiones, collationes, provisiones & dispositiones Prælaturarum, dignitatum, & aliorum quorumcumque beneficiorum, & Officiorum Ecclesiasticorum Regni nostri, secundum dispositionem, ordinationem & determinationem juris communis, Sacrorum Conciliorum Ecclesiæ Dei, atque Institutorum Sanctorum antiquorum Patrum, fieri volumus & ordinamus. Hujus Pragmaticæ Sanctionis à S. Ludovico Galliarum Rege editæ si pleniorẽ notitiã habere desideres, leges Francis Pinssonii, Biturici, Parisiensis Advocati, eruditam lucubrationem, quã illam historicã Præfatione, & luculento Commentario illustravit. Translationes Episcoporum, solius Sedis Apostolicæ auctoritate, & ob Ecclesiæ commodum Sæculis XIII. & XIV. fieri poterant, ut docet Innocentius III. Cap. Cum ex illo: De Translatione Episcopi. At avaritiã levitatemque Sacerdotum, qui pravã cupiditate ex alia in aliam volebant transfundere Ecclesiã, gravissimis Decretis coercuit Ecclesiã, quia naturali lege prohibitum est, ut docet S. Thomas Quodlibeto 9. art. 15. ne quis in ministerio capeſſendo aliud quam Ecclesiæ utilitatem, & Christi gloriam intueatur: *Non sua querentes, sed quæ Jesu Christi*, inquit Apostolus, quã voce omnem omninò à Sacri Ministerii suscipiendi proposito terreni commodi consecrationem removeret. Quod si Ecclesiæ munera privatæ utilitatis gratiã suscipere non liceat, nihilò magis licitum censerì debet propter aliquod commodum jam suscepta non instabili modò, sed sordido ac fervili animo dimittere, & ad alia transvolare, quia pinguiora sunt.

sunt. Episcoporum cessiones sine causis Canoniciis, & citra Romani Pontificis auctoritatem Saeculis XIII. & XIV. fieri non poterant. Sex autem causas cedendi Episcopatu *Innocentius III.* Pontifex Maximus recenset Cap. *Nisi*: De renunciatione, cujus hæc sunt verba: *Intueri te volumus, quod hæc sunt illa, per quæ cedendi Episcopus licentiam potest postulare: conscientia criminis, debilitas corporis, defectus scientiæ, malitia plebis, grave scandalum, irregularitasque personæ, sed in his omnibus est observanda cautela.* Porro, Episcopi, qui semel cedendi facultatem à Romano Pontifice postulaverant, ad cedendum postea compelli debebant, si fortè, eâ obtentâ, Episcopatum retinerent, sicut statuit idem Summus Pontifex his verbis: *Quidam cedendi licentiam cum instantia postulantes, ea obtenta, cedere prætermittunt. Sed cum in postulatione hujusmodi, aut Ecclesiarum commoda quibus præsumt, aut salutem videantur propriam attendisse (quorum neutrum suasionibus aliquorum quærentium quæ sua sunt, seu etiam levitate qualibet volumus impediri) eos ad cedendum decernimus compellendos.* Episcopi, qui vel senio confecti, vel frequentibus, & quasi perpetuis infirmitatibus conflictati, aut aliis gravissimis causis impediti, pastoralis munere fungi haud poterant, sibi laborum socium, seu Coadiutorem, accedente tamen Sedis Apostolicæ consensu, adsciscebant, sicut decretum est ab *Innocentio III.* Cap. *Ex parte*: De Clerico ægrotante, his verbis: *cum Arausiensis Episcopus gravi, & incurabili morbo ferè per quadriennium laboraverit, ita quòd Pastorale Officium non potest ullatenus exercere; Princeps terræ illius, ac cives civitatis ejusdem à te postulant incessanter,*

ter, ut ipsis (cum sis Metropolitanus eorum) studeas providere. Verum, cum ipsum ad cessionem compellere non possis, nec debeas ullo modo, nec afflicto afflictio sit addenda, sed potius miserie miserendum, eò quòd idem vir bonus extiterit, & Ecclesiam salubriter sibi commissam gubernaverit: Nos volentes tam Episcopo, quàm Ecclesiæ providere, mandamus quatenus illi Coadiutorem associes virum providum & honestum, per quem tam Episcopo, quàm populo utiliter consulatur. Hoc Innocentii III. Decretum de Coadiutoribus concedendis Episcopis, qui senio aut valetudine corporali gravati, vel etiam aliàs impediti perpetuò, ut Officium suum nequeant exercere, confirmavit Bonifacius VIII. in Decretali, *Pastoralis*, in *Sexto*. Summa erat Episcoporum jurisdictio in causis Clericorum tam civilibus, quàm criminalibus. Clericos absque titulo Beneficii aut Patrimonii sæculis XIII. & XIV. ordinare Sacri Canones Episcopis prohibebant, & si quis Episcopus aliquem sine certo Titulo, de quo necessaria vitæ percipere posset, in Diaconum vel Presbyterum ordinasset, tamdiù ei necessaria ad honestam vitæ sustentationem suppeditare obstringebatur, donec in aliqua Ecclesia ei convenientia stipendia Militiæ Christianæ fuissent assignata, nisi talis ordinatus de sua vel paterna hæreditate subsidium vitæ posset habere. Clericis Beneficia Ecclesiastica conferebant Episcopi, modò tamen idonei essent scientiâ, moribus & ætate; nam pueros ad Beneficia Ecclesiastica promovere nefas erat, ut colligitur ex Epistola Innocentii III. quæ extat libro xv. & est ordine ccxxxv. in qua inter alias causas, propter quas Episcopi Melitani depositionem decernit, hanc

hanc assignat, quòd prædictus Episcopus nepotibus suis vagientibus in cunabulis, licèt ad plus vix valentibus balbutire, majores Præbendas tribuit, & Beneficia meliora: portantibus aliis pondus diei & æstus, & istis, ubi non seminaverunt, metentibus plena manu. Præbendæ Cathedralium Ecclesiarum interdum à solis Episcopis, quandòque à solis Capitulis, nonnunquam ab utroque conjunctim, secundum varios Ecclesiarum mores conferebantur; suoque etiam jure Patroni Laici Clericos ad Beneficia præsentandi fruebantur. Indignis conferri Beneficia vetabant Canones, eaque dignioribus esse conferenda propugnabant Sæculi XIII. Doctores, quos inter censetur S. Thomas, Doctor Angelicus, qui Quodlibeto v. Quæstione vi. Art. iii. hæc docet: contingit quandòque, inquit, aliquem esse meliorem simpliciter, qui tamen non est melior quantum ad hoc quod Beneficium percipiat: quia aliquis fortè potest Ecclesiam magis juvare, vel per consilium sapientiæ, vel quia servivit in Ecclesia. Non ergò Episcopus tenetur dare meliori simpliciter, sed tenetur dare meliori quoad hoc. Non enim potest esse quod unum præferat alteri, nisi propter aliquam causam. Quæ si quidem pertineat ad honorem Dei, & utilitatem Ecclesiæ, jam quantum ad hoc iste est melior: Si autem illa causa ad hoc non pertineat, erit acceptio personarum, quæ tantò est gravior, quanto in rebus divinis committitur. Unde super illud Jacobi Cap. i. Tu sede hic benè &c. dicit Glossa Augustini: Si hanc distantiam sedendi, & standi ad honores Ecclesiasticos referamus, non est putandū leve esse peccatum in acceptione personarum habere fidem Domini gloria. Quis enim ferat eligi divitem ad Sedem honoris Eccle-

sia, contempto paupere sanctiore & instructiore. Hanc Doctrinam sæpius in suis Operibus inculcat S. Thomas, præsertim, Secundâ Secundæ, Quæst. LXIII. Art. II. & Quodlibeto VIII. Quæst. IV. Art. I. Quid ergo, ut obiter dicam, sentisset Doctor ille Angelicus de his laxioris doctrinæ Theologis, qui non solum assererant, in collatione Beneficiorum minus dignos sine peccato præponi posse dignioribus, sed etiam docebant, licitum esse muneribus ac donis merè liberalibus allicere animum Episcopi ad impetrandum ab ipso Beneficium, vel ad assequendum aliquod Beneficium offerre, & dare pecuniam tanquam motivum, non tanquam pretium. Nullus dubito, quin has & similes opiniones ab avita Ecclesiæ Disciplina penitus abhorrentes, & viam ad Beneficiorum nundinationem exercendam aperientes totis ingenii sui viribus confutasset, ac proscripsisset Doctor Angelicus, sicut eas nostris temporibus Romani Pontifices, omnesque totius Orbis Christiani Episcopi censuris inultas diris devoverunt. Sed redeamus ad Ecclesiæ Disciplinam, quæ licet Sæculis XIII. & XIV. sæpius Sacris Conciliorum Canonibus sancita ac restaurata fuerit, tamen Sæculo XIV. præsertim tempore Schismatis, gravissimam labem in Gallia, quæ *Clementem VII.* Avenione sedentem pro legitimo Pontifice agnoscebat, in collationibus Beneficiorum contraxit. Tunc enim per collationes titulo *Commendæ* factas Archiepiscopatum, Episcopatum & Abbatiarum tam Regularium, quam Sæcularium, per Reservationum, Gratiarum expectativarum, & Pensionum accumulationem, latissimum ad Polygamiam spirituales, seu Beneficiorum pluralitatem, ostium apertum est.

D. Mo-

D. Monasticam, seu Regularem Disciplinam Sæculis XIII. & XIV. restauratam fuisse, ac magnum inde suscepisse incrementum, ex eo præsertim conjecturam facio, quòd multiplices in utroque sæculo emerferint Religiosorum Ordines, qui doctrinâ & sanctitate Ecclesiam plurimum illustrarunt, & etiamnum præclaris meritis, atque Apostolicis laboribus illustrare pergunt. De his itaque Religiosis Ordinibus, de eorum in Ecclesiam promeritis, & de Regulari Disciplina in illis præscriptâ singillatim disserere debemus, ut Originem, ac Disciplinam illorum Ordinum, quibus Ecclesia, sicut *Regina circumamicta varietatibus*, exornatur, exploratam habere possim.

M. Incipiam ab Institutione Sacri Ordinis Fratrum Prædicatorum, quem tamen, ne quis existimet, me nimio assentandi palpendique studio, à quo semper vehementer abhorruì, hic laudandum suscepisse; benè multa consultò reticebo quæ hunc præclarum Ordinem de Ecclesia optimè meritum commendare possent. Prætermittam Sanctissimos Pontifices, doctissimos Cardinales, innumeros Archiepiscopos & Episcopos doctrinâ & pietate insignes, quos hic celeberrimus Ordo Ecclesiæ dedit. Missa faciam Elogia, quibus Romani Pontifices hunc Ordinem, ac plures ex ejus alumniis Sanctorum Fastis solemnè Ecclesiæ ritu adscriptos sæpius laudarunt, ac prædicarunt. Nihil dicam de peritia Theologorum ejusdem Ordinis, de tot libris, quos ediderunt de rebus Theologicis, & de illorum in iisdem tractandis eloquentiâ, solidâ eruditione, linguarum, maximè Græcæ & Hebrææ, notitiâ. Nec referam librorum spiri-

tualium, quos lucubrarunt, copiam ac præstantiam, nec illustres Commentarios, quos in Sacram Scripturam adornarunt, nec Summas Morales, in quibus uberrimam sanioris Theologiæ Moralis doctrinam ex limpidissimis Sanctorum Patrum fontibus, & ex Sacris Conciliorum Canonibus haustam tradiderunt. De Imperatorum, Regum, Principum ac Magnatum Confessariis, egregiisque Concionatoribus, quos protulit hic clarissimus Ordo, in præsentia silebo. Denique, alteri Scriptori, seu nostro erudito *Jacobo Echar-*
do, qui propediem *Bibliothecam Scriptorum Ordinis Fratrum Prædicatorum* in lucem emissurus est, prædicanda relinquo singularia Fratrum Prædicatorum in Summos Pontifices, in Ecclesiam Catholicam, & in omnes Christianos merita, quibus totum Orbem impleverunt, seu vocatione infinitarum Gentium ad fidem, & ad Ovile Christi, seu victoriis de Hæresibus, Gentilismo, Impietate, improbitateque morum feliciter reportatis, seu instauratâ germanâ pietate, frequentiam Sacramentorum, Oratione mentali, aliisque piis inductis exercitationibus, seu validâ Sedis Apostolicæ contra protervos Schismaticos, Reges, Imperatores, denique adversus Inferi portas defensione. His, inquam, referendis omnino supersedebo, & eademtaxat, quæ ad exordium Ordinis Fratrum Prædicatorum spectant, & quorum notitia connexa est cum Historia Sæculorum XIII. & XIV. compendiosâ narratione perstringam.

Ordo Fratrum Prædicatorum institutus est à *S. Dominico* ex nobilissima *Gusmanorum* familia *Calarogæ* in Hispania nato sub finem Sæculi XII.
 hoc

hoc est, anno MCLXX. Patrem habuit Sanctissimus ille Patriarcha *Felicem Gusmanum*, & matrem *Joannam de Aza*. Studia, æquè ac pietatem à teneris annis coluit *Dominicus*, & à *Didaco Oxomenfi* Episcopo inter Canonicos Regulares ejusdem Ecclesiæ anno MCXCIV. adscitus, Venerabilem illum Antistitem Romani pietatis ergò profectum, & deindè ab *Innocentio III.* Pontifice Maximo ad Albigenfis Hæreseos expugnationem, & Hæreticorum conversionem in Gallias missum comitatus est. Immenso labores, quos eo in munere Apostolico exantlavit *S. Dominicus*, constantiam ejus ac zelum in exercendo sibi demandato Sacræ Inquisitionis Officio adversùs Hæreticos Albigenfes, qui viribus polentes, & potentiorum favore superbè elati, suos contumaciùs defendebant errores; insignes denique victorias, quas *Simon Comes Monfortius*, Belli Sacri Dux, *S. Dominici* precibus atque consiliis adjutus de Hæreticis Albigenfibus, multò licèt potentioribus, sæpiùs reportavit, satis in superioribus Colloquiis descripsimus. Unde, his prætermisissis, ne tibi iteratis repetitionibus fastidium creem, pauca dumtaxat memoriâ digna, quæ in evertenda Albigenfium Hæresi gessit *S. Dominicus*, hic referre non pigebit. In primis, occurrit ingne illud miraculum, quo *S. Dominicus* Fidei Catholicæ veritatem confirmavit, quodque *Petrus de Kalle Cernaij*, Ordinis Cisterciensis, Scriptor coævus, memorat capite 7. *Historiæ Albigenfium*, quam descripsit. Consenserunt quippè, teste illo Scriptore, hæretici Albigenfes, ut Scheda, in qua *S. Dominicus* Fidem Catholicam scripserat, in ignem projiceretur, sed eâ lege, ut si combureretur, vera esset

esset fides, immò perfidia Hæreticorum; si verò incom-
 busta maneret, fidem, quam prædicabant nostri, veram
 esse faterentur. Quid plura? Schemata in ignem pro-
 jicitur, sed cùm in medio igne aliquantulum moram
 fecisset, incombusta penitus ab igne resiliivit. Stupen-
 tibus qui aderant, unus cæteris durior ait illis: proji-
 ciatur in ignem iterùm, iterùm resiliit incombusta; quod
 videns ille durus & tardus ad credendum, dixit
 iterùm: Trina vice projiciatur, & tunc sine dubio rei
 exitum cognoscemus. Projicitur tertio, nec tunc qui-
 dem comburitur, sed integra ab igne resilit, & illaesa.
 Contra veritatem illius miraculi nihil effutire pos-
 sunt hæretici nostri temporis, cùm istud miracu-
 lum referatur ab Authore coætaneo, viro gravi &
 prudenti, quem verisimile non est voluisse mentiri
 in re ipsis hæreticis notoria, à quibus illico men-
 dacii coargui potuisset, quod ad Catholicæ Reli-
 gionis dedecus & ignominiam non potuisset non
 cedere. Eo miraculo confusâ Hæreticorum turbâ,
 nonnulli, ejuratâ hæresi, ad gremium Ecclesiæ Ca-
 tholicæ redierunt, sed novem præsertim nobiles
 mulieres, quas S. *Dominicus*, in Monasterio, quod
 Tolosæ extrui curavit, ac *Prullianum* dicitur, inclu-
 sit, ut in eo tutius illæ viverent, ac remotis pericu-
 lis, quibus inter hæreticos objiciebantur, sanctè
 pieque instituerentur. Hoc fuit primum Cæno-
 bium puellarum, quod condidit S. *Dominicus*, no-
 strâ adhuc ætate in tota Gallia celeberrimum, sa-
 cris Virginibus nobilitate ac sanctitate illustribus
 omni tempore insigne. Eadem pietate motus S. *Do-
 minicus*, Virgines Deo sacras Romæ in Monasterio
 S. *Sixti* congregavit, & illud fuit secundum Virgi-
 num Deo sacrarum Monasterium, quod instituit

San-

Sanctus ille Patriarcha; ex quo tamen translatis postea ob Cœli gravitatem Monialibus in Clivum, qui olim *Balnea Pauli*, nunc corrupto nomine vulgò *Magnanapoli* dicitur, aliud Cœnobium extructum est, quod ad hanc diem Romæ nobilissimum habetur, & in eo benè multæ puellæ, ex illusterrimis Principum prosapiis oriundæ, virginitatem suam, spretis Mundi illecebris, Deo consecrare summo sibi honoris loco ducunt. His duobus inclytis Familiæ Dominicanæ Monialium Cœnobis à *S. Dominico* excitatis tertium adjungere placet, seu *Possiacum*, quod in Galliis non multò post obitum *S. Dominici* Regiâ munificentia *Philippus Pulcher*, Galliarum Rex, extruxit & ornavit, quodque quàmplures Virgines ortæ ex Regia stirpe eximiâ pietate, & immortalis gloriâ illustrarunt.

Sed revertamur ad seriem rerum, quas *S. Dominicus* ad profligandam grassantem in partibus Tolosanæ Albigenisium Hæresim præclare gessit. Præter Sacræ Inquisitionis munus, quod *S. Dominicus* invictâ constantiâ, atque infatigabili zelo in Hæreticos Albigenes exercuit, Ordinem instituit *Militiæ Jesu Christi*, eo potissimum fine, ut hi, qui huic Ordini erant adscripti, Hæreticos coercerent, Ecclesiæ jura, libertatem, immunitates & bona ab Hæreticorum furore & invasione vindicarent ac strenuè tuerentur. Verùm, mortuo *S. Dominico*, & exterminatis penitus Hæreticis Albigenibus, cum ille Ordo haud ampliùs necessarius videretur, mutato nomine & Instituto, dictus est *Ordo Fratrum & Sororum de Penitentia S. Dominici*, à Summis Pontificibus haud paucis Privilegiis exornatus. Opposuit etiam *S. Dominicus* impietati Hæreti-

reticorum Albigenſium novam à ſe inſtitutam devotionem recitandi *Rofarium* B. Virginis Deiparæ, quam ſuis alumnis ita propriam eſſe voluit, ut ſapientiſſimus Doct̃or *Martinus Navarrus*, non dubitet aſſerere, *Rofarium Patrimonium eſſe Ordinis Dominicani*. Scio eſſe quosdam, qui clàm muſſitare audent, *Rofarii Inſtitutionem S. Dominico acceptam referri non debere*, eo ſolo nomine, quòd *Theodoricus de Appoldia* in *Vita S. Dominici* ne minimum quidem verbum faciat de hac *Rofarii Inſtitutione à S. Dominico factâ*, & *Thomas Cantipratenſis* libro 2. cap. 29. art. 6. & 7. tres Salutationum Angelicarum quinquagenas à quibuſdam B. Mariæ Virgini devotis recitari ſolitas memoret, de Authore verò hujus devotionis penitus ſileat. Eo, inquam, argumento petito ex utriuſque Authoris ſilentio moti quidam Critici, negant *S. Dominicum* eſſe Authorem *Rofarii*, ejuſque originem referunt aut ad *S. Benediſtum*, aut ad *Venerabilem Bedam*, aut ad *Petrum Eremitam*, aut ad alios, quos ſibi pro arbitrio fingunt. Sed proclive eſt oſtendere, moroſos illos Criticos hallucinari. Et primò quidem argumentum, quo nituntur, merè negativum eſt, ac ſubindè, juxtâ peritorum Criticorum Regulam, nullius momenti ac ponderis eſſe debet contra poſitiva diſertaque aliorum Scriptorum teſtimonia, contra avitam ac perpetuam traditionem, quæ à tempore *S. Dominici* ad noſtra uſque tempora in Ordine Fratrum Prædicatorum jugiter fuit conſervata; contra etiam Diplomata Romanorum Pontificum *Leonis X. Pii V. & Sixti V.* qui proſequentur, *S. Dominicum* eſſe Authorem *Rofarii*. Præterea, Originem *Rofarii* nec ad *S. Benediſtum*, nec
ad

ad *Venerabilem Bedam* referri posse, patet evidentissimo argumento, quod mihi suppeditat doctissimus P. Joannes Mabillonius Præfatione in Sæculum V. Benedictinum, quod est Ecclesiæ decimum, ubi ex omnibus antiquis Statutis luculentissime probat, *Ævo S. Benedicti*, aut *Venerabilis Bedæ*, necdum Salutationis Angelicæ in precibus recitandæ usum invaluisse, cumque Sæculo dumtaxat undecimo in Ecclesia frequentari cœpisse, ex quo palam sequitur, nec *S. Benedictum*, nec *Venerabilem Bedam* Rosarii Authores esse potuisse, cum eorum ætate nondum apud fideles esset in usu recitatio Salutationis Angelicæ, quæ tamen, ut omnes planè norunt, præcipua pars Rosarii censetur. Non inficias tamen eo, obtinuisse apud nonnullos, etiam ante *S. Dominicum*, usum recitandi certum Orationum Dominicarum, & Salutationum Angelicarum numerum, sed contendo, hanc precandi formulam, longè latèque discrepasse à Rosario, quod instituit *S. Dominicus*, quodque quinquaginta supra centum Salutationes Angelicas cum quindecim Orationibus Dominicis complectitur, adjunctâ quindecim præcipuorum humanæ Redemptionis Mysteriorum piâ meditatione. Hanc precandi Deum in honorem Beatæ Virginis formulam, quæ *Rosarium* dicitur, fuisse ante *S. Dominicum* à Fidelibus in Ecclesia frequentatam, nunquam probare poterunt Critici. Hujus itaque pii Rosarii Instituti Author est *S. Dominicus*, qui illud jussu B. Virginis Mariæ vulgavit, ut ejus illibatam puritatem tueretur adversus Hæreticos Albigeneses, qui multa impia sacrilego ore adversus illam effutiebant: ut Catholicorum erga eam cultum augeret ac propagaret, ut denique divi-

divinorum Myſteriorum , quæ in Roſario percenſentur, contemplatione piorum corda in Dei amorem magis ac magis accenderet . Nec eum ſanè feſellit eventus. Incredibile quippè dictum eſt, quantâ univerſam Eccleſiam utilitate cumulaverit , & etiamnum abundè ubique terrarum cumulet hæc pia Roſarii Sodalitas , in quam Imperatores , Reges ac Principes , omneſque certatim adſcribi geſtiunt , & ad Beatæ Mariæ Virginis patrocinium, corde contrito confugientes, tam in ſuis , quàm in publicis emergentibus Eccleſiæ neceſſitatibus per devotam Roſarii recitationem votorum compoſtes fiunt .

D. Quandònam , & quo fine *S. Dominicus* ſuum inſtituit Ordinem ?

M. Dùm *S. Dominicus* in debellanda Albigenſium hæreſi plurimum laboraret, & in partibus Tolofanis veſtigia relinqueret eximie ſuæ pietatis non preſſa levitèr ad exigui prædicationem temporis , ſed omnium ſermone celebrata , & ad immortalitatem gloriæ conſecrata ; voluit firmiſſimam adverſus hæreſes erigere Arcem , & perpetuo Eccleſiam adverſus omnes fidei hoſtes munire præſidio. Quocircà fundamenta jecit Ordinis Prædicatorum, quem *Baronius* appellat *illuſtre Sanctorum Seminarium* , idque vir ille immortalitate dignus reipſa erat demonſtraturus , ſi Eccleſiaſticos abſolviffet Annales, quos ad annum dumtaxat milleſimum centeſimum nonageſimum octavum perduxit, morte præventus . Ordinem Fratrum Prædicatorum à *S. Dominico* Inſtitutum confirmavit *Honorius III.* Pontifex Maximus apud *S. Sabinam* xi. Kalendas Januarii anni mcccxi. cum poſſeſſionibus,

nibus, Parochialibus Ecclesiis, & Decimis, & in Bulla Confirmationis idem Summus Pontifex appellat Ordinem Fratrum Prædicatorum *Ordinem Canonicum*, seu Canonorum Regularium: *In primis statuentes* (inquit Honorius III.) *ut Ordo Canonicus, qui secundum Deum & B. Augustini Regulam in eadem Ecclesia institutus esse dignoscitur, perpetuis ibidem temporibus inviolabiliter observetur.* Nullam aliam Regulam suis præscripsit S. Dominicus præter Regulam S. Augustini, quam ipse, ut Canonicus Regularis, profitebatur. Ad divinas laudes in Choro decantandas, ad prædicandum verbum Dei, & ad alia in Ecclesia obeunda munia, quæ Canonicis Regularibus conveniunt, Fratres suos obstrinxit Sanctissimus ille Patriarcha, eisque Constitutiones, ad quarum normam vitam exigerent, tradidit, quarum præcipua Capita ab Ordine Præmonstratensium, qui veri sunt Canonici Regulares, accepit, perpetuam videlicet à carnibus abstinentiam, nisi morbi necessitate, continuum ab Exaltatione Sanctæ Crucis ad Pascha jejunium, lineis indutiis ad carnem non uti &c. Post institutum Ordinem S. Dominicus, ejusque Fratres vestem lineam, seu, ut vocant, *Superpelliceum*, aliquandiu gestarunt; & quamvis postea, seu anno MCCXVIII. annuente Romano Pontifice Honorio III. Vestem Religiosam, quam nunc deferunt Fratres Prædicatores, Reginaldo Aurelianensi Decano Viro religiosissimo præmonstratam induerit S. Dominicus, eamque Fratribus tribuerit, inde tamen nec ipse, nec ejus Fratres desierunt esse Canonici Regulares, quia, ut observavimus in Colloquio sexto in Historiam sæculi duodecimi, Religiosi Præmonstratenses sunt veri Ca-

Canonici Regulares, etsi non deferant vestem lineam, sed solum cappam, quam itidem gestant Fratres Prædicatores cum hoc solo discrimine, quod Cappa Præmonstratensium alba sit, Prædicatorum verò nigra. Nec etiam Institutum Canoniorum Regularium dimisisse censendus est S. *Dominicus*, dum in Comitibus Ordinis Generalibus Bononiæ celebratis anno MCCXX. omnes possessiones abdicavit, seque ac suos Fratres ad arctiorem paupertatem, seu *Mendicantium*, ut ajunt, adstrinxit, immò potius Institutum Canoniorum Regularium ad majorem perfectionem provexit. Cum enim Canonici Regulares ex suo Instituto solemni paupertatis voto sint obstricti, & eò perfectius sit votum paupertatis, quò arctior est paupertas, non est dubium quin S. *Dominicus* Ordini Canoniorum Regularium, quem profitebatur, majorem perfectionem conciliarit, dum se, Fratresque suos arctiori paupertati, seu *Mendicantium*, addixit. Hinc in officio S. *Dominici*, quod recitant Fratres Prædicatores, de Sancto illo Patriarcha dicitur: *Sub Augustini Regula mente profecit sedula, Tandem Virum Canonicum auget in Apostolicum*. Sanè nemo negare potest, S. *Cajetanum* instituisse Ordinem Clericorum Regularium, & tamen constat, illum suis Religiosis injunxisse, ut abdicatâ rerum omnium sollicitudine, nec redditus possiderent, nec vitæ subsidia à fidelibus peterent, sed solis elemosynis spontè oblati viverent. Quæ paupertas, ut fatentur omnes, arctior est paupertate, quam profitentur Religiosi Ordinum Mendicantium, & tamen non derogat statui Clericorum Regularium, sed potius illum perficit. Si-

mi-

militèr Patres Societatis *Jesu* sunt veri Clerici Regulares, quamvis omnibus Juribus & Privilegiis à Summis Pontificibus concessis Ordinibus Mendicantium fruantur, ipsique Officia Religiosorum, Mendicantium, Eleemosynas videlicet à fidelibus petendo, palàm exercere non dedignentur. Quidni igitur dicere ipse possim cum doctissimo P. Joanne Mabillonio in suo secundo Scripto, quod Galli *Factum* vocant, Fratres Prædicatores veros esse Canonicos Regulares, etiamsi S. *Dominicus*, eorum Institutor, ac Canonicus Regularis, eos ad arctiorem paupertatem, seu Religiosorum Mendicantium, adstrictos esse voluerit? Cum Ordine Fratrum Prædicatorum cœpit Sanctæ Inquisitionis Officium, quod *Honorius III.* Pontifex Maximus, primum S. *Dominico*, & Fratribus Prædicatoribus præcipuè demandavit ad Hæreses exterminandas, quo Officio etiamnum variis in locis funguntur. Cœpit etiam cum Ordine Fratrum Prædicatorum Magisterium Sacri Palatii Apostolici, quod primus exercuit S. *Dominicus*, qui Romæ existens, cum animadverteret, quotidie occupatis cum Summo Pontifice Cardinalibus, eorum ministros in aulanugis tempus terere, vehementer indoluit, monuitque Pontificem *Honorium III.* turpe, & damnosum esse tempus à tanta multitudine in ludos ac res vanissimas absumi, sibi que utile futurum videri, si, dum Cardinales cum eo negotiis Ecclesiæ vacarent, quispiam doctus illos pietatis ac fidei rudimentis imbueret. Annuit lubentissime Romanus Pontifex, illudque munus demandavit S. *Dominico*, quod alacriter aggressus, Epistolas S. *Pauli* publicè in Palatio Apostolico interpretari cœpit, inde-

indèque hoc perhonorificum munus alicui Religioſo Ordinis Fratrum Prædicatorum ad noſtra uſque tempora collatum eſt, & quotquot S. *Dominico*, qui primùm hoc loco & nomine donatus eſt, perpetuâ nec interruptâ ſerie filii ſuccellerunt, Parentis cum munere fidem in Sedem Pontificiam exceperunt, nullus eorum ab officio amotus eſt, ſed omnes Magiſterio immortalis ſunt, præter eos, qui ſibi indè gradum ad altiora fecerunt. Hic autem debes obiter obſervare, Sanctum *Dominicum*, contemptis Philoſophorum figmentis, totum ſe dediſſe lectioni Scripturæ Sacræ, & ad illius ſtudium, ſæpiùs Fratres ſuos fuiſſe adhortatum, ſicut teſtatur *Theodoricus de Appoldia* in ejus Vita libro IV. cap. IV. his verbis: *Et quia ſine Sanctarum notitia Scripturarum perfectus Prædicator nemo eſſe poteſt, hortabatur Fratres S. Dominicus fidelitèr, ut ſemper in Novi & Veteris Teſtamenti lectione eſſent, atque ipſe quoque Evangelium ſecundùm Matthæum, & Pauli Epiſtolas apud ſe ferens, multùm in eis lætita-
bat, ut propemodùm memoria retineret. Evangelium enim & Apoſtolicam doctrinam & vitam amans & amplectens, Philoſophica figmenta non magni faciebat.* Author erat etiam S. *Dominicus* ſuis Fratribus, teſte *Flaminio* in ejus Vita, ut Veterum Patrum Opera aſſiduè verſarent, ab eis illibatam doctrinam haurirent, atque ab eorum documentis ne tranſverſum quidem digitum deſciſcerent. Noverat quippè Sanctiſſimus ille Patriarcha, Catholicam Religionem ſanâ, ſolidâque Sanctorum Patrum doctrinâ, ſeu ſacrâ anchorâ niti, & ex ea, velut ex munitiſſimo armamentario, tela depromi, quibus confodiantur Hæreſes.

Post

Cælestinus V. dictus est, indeque huic Congregationi *Cælestinorum* inditum nomen. Cœpit hoc Institutum in Magellana Apuliæ Eremito, multis ob famam *Petri* sanctitatis eò confluentibus, extructaque Ecclesia & Monasterio sub nomine *Spiritus Sancti* circa annum *mcclxx*. Confirmata est hæc *Cælestinorum* Congregatio, & amplissimis Privilegiis donata à *Cælestino V.* Pontifice Maximo, qui post quintum mensem, Pontificatu abdicato, pristina vitæ normæ retinendę cupidus, ad hanc Congregationem, à qua ægrè divulsus fuerat, rediit. Sequuntur *Cælestini* Regulam *S. Benedicti*. Sub eadem *S. Benedicti* Regula Congregatio *S. Mariæ Montis Oliveti* anno *mcccxi* instituta est à Beato *Bernardo Ptolomæo* nobili Senensi, qui Juris primum Professor, post usum oculorum invocatione *B. Mariæ* Virginis receptum, in Montem ejus nominis, in Aretina Diœcesi secessit, asperam vivendi rationem amplexus. Sed, instigante Diabolo, novitatis nomine Avenione apud *Joannem XXII.* accusatus, ab eodem Pontifice de ejus vivendi ratione ac Instituto certiore factus, absolutus est, suæque Congregationis confirmationem à *Clemente VI.* Pontifice Maximo anno *mcccxliv.* obtinuit, ac tandem, sæviente per Etruriam, immò, per totâ Italianam, pestilentia, dum Fratribus suis, quorum magna pars hac grassante pestilenti lue icta erat, solatium auxiliumque summâ charitate incensus afferre adnuitur, lethifero ipse morbo correptus ac brevi confectus ad vitam migravit immortalem. *xi. Kalend. Septembris anni mcccxlviii.*

Eremitæ Sancti Pauli Budæ in Hungaria, ex Instituto nimirum *S. Pauli* primi Anachoretæ, Authore

thore B. *Ensebio* Strigonenſi Archiepiſcopo , cœperunt cirà annum mcccxv. Sed eorum Ordinem annodumtaxat mcccxxviii. confirmavit , multisque auxit Privilegiis *Joannes XXII.* adductus precibus *Caroli* Hungariæ Regis, ut videre eſt in ejus Diplomate cā de re dato Avenione anno mcccxxviii. quod *Odoricus Raynaldus* refert ad hunc annum num. lxxxiii.

Sancta *Brigida*, vel *Birgitta*, Danię Regis filia, *Ulphonis* Neritię in Svecia Principis Vidua , Religioſum Ordinem S. *Salvatoris* circa ann. mcccclxiii. inſtituit apud Waſtenam in Svecia, ſub Regula S. *Auguſtini* , additis novis ſanctionibus , Chriſto , ut ferunt, dictante. Veſte & Chlamyde griſei coloris tam Viri,quā Moniales illius Ordinis induuntur , Cruce rubeā chlamydi intertextā , cum albo circulo in medio . Hunc habitum Monachalem non ſumpſit B. *Birgitta* , ſed Ordinis ſui confirmationem anno mcccclxx. impetravit ab *Urbano V.* Pontifice Maximo . Obiit Sancta illa Vidua , Peregrinationibus, revelationibus , & miraculis clara, Romæ x. Kalend. Auguſti anni mcccclxxiii. eamque primū Romani Pontifices *Boniſacius IX.* & *Joannes XXIII.* in Sanctarum numerum retulerunt . Sed ne iſta Canonizatio facta ab his duobus Pontificibus , quos , tempore Schiſmatis , univerſa non agnoſcebat Eccleſia , vacillaret , ad removendum omnem ſcrupulum , *Martinus V.* Pontifex Maximus factam à laudatis Pontificibus S. *Birgitta* Apotheoſim, ſeu Canonizationem, ultimò ſanxit ac confirmavit Conſtitutione datā Florentiæ Kalendis Julii anni mccccxix.

Hieronymiani , ſive Monachi S. *Hieronymi*, Auctore

Etore *Petro Fernando* Hispano, ejusque Socio *Petro Romano*, B. Augustini Regulam amplexi, Instituti sui approbationem à *Gregorio XI.* circa annum MCCCLXXIV. obtinuerunt. Hujus Ordinis caput est *Lupiana*, vulgò *Fanum Beatæ Virginis de Guadalupe* in Diœcesi *Toletana*. Testatur *Philippus Brietius* Societatis *Jesu* in Annalibus ad annum MCCCLXXIII. hos Religiosos Hieronymianos nunc in *Hispania* magni nominis esse, & *Sancti Laurentii Escurialis* inquilinos & custodes, atque Bibliothecarios. Alii Eremitæ *Sancti Hieronymi* à Beato *Petro Gambacurta* nobili *Pisano* fuerunt instituti sub annum MCCCLXXX. qui nullis initio votis adstricti, victum sibi manibus quærebant, & sublevandis pauperibus incumbabant. At *S. Pii V.* Pontificis Maximi autoritate Vota solemniter amplexi, litteris & concionibus operam dare cœperunt.

Denique, Ordinem *S. Ambrosii* dudum institutum, sed absque certa Regula à Sede Apostolica approbatâ, confirmavit *Gregorius XI.* sub Regula *S. Augustini*, cum potestate recitandi Ambrosianum Officium, Priorem eligendi, Verbum Dei prædicandi, Confessiones audiendi, & mortuos sepeliendi, sicut legitur in ejus Diplomate dato *Avenione* 3. Kalend. Decembris anni MCCCLXXV. quod extat Tomo 1. Bullarii Romani pag. 289. Caput hujus Ordinis est Monasterium *Mediolanense S. Ambrosii ad Nemos*.

Consultò prætermini Ordinem *Jesuatorum*, sic appellatum, quòd Sanctissimum nomen *Jesu* frequenter in ore haberent; quia licet hic Ordo à *S. Joanne Columbano* Senis in *Etruria* fuerit institutus,

tus, & ab *Urbano V.* sub Regula *S. Augustini* anno *MCCCLXVII.* confirmatus; attamen postea extinctus est à *Clemente IX.* Diplomate dato die *IV.* mensis Decembris anni *MDCLXVIII.*

D. Hi sunt igitur omnes Ordines, qui Sæculis *XIII.* & *XIV.* fuerunt instituti?

M. Præter istos Ordines Religiosos, quos hætenus percensui, alii Equestres Ordines Sæculis *XIII.* & *XIV.* fuerunt instituti, quorum primus circa annum *MCCXXXI.* conditus à *F. Bartholomæo*, patriâ *Vicentino*, Ordinis Fratrum Prædicatorum, dicitur *Ordo Equitum S. Mariæ Gloriosæ*, fuitq; confirmatus ab *Urbano IV.* Constitutione datâ *Viterbii* Kalend. *Januarii* an. *MCC LXI.* Horum Equitum, qui Regulam *S. Augustini* profitebantur, erat Viduarum, & pupillorum suscipere patrocinium, pacem & concordiam inter homines pro viribus promovere ac fovere, præsertim in his *Italiæ* civitatibus, quæ cruentis *Gibellinorum* & *Guelphorum* Factionibus, ac intestinis odiis, bellisq; conflabant. Tunicâ albâ, & subcinericiâ togâ induti, Crucem purpuream in campo albo, duabus supra positis stellis, præferebant, & vulgò *Fratres Gaudentes* appellabantur, quòd nullis Religionis solemnibus votis addicti, in ædibus suis cum uxoribus & liberis vitam agerent. Eodem Sæculo *XIII.* hoc est, anno *MCC LIV.* *Alexander IV.* Pontifex Maximus, Ordinem Fratrum & Militum Hospitalis Leproforum *S. Lazari Hierosolymitani* sub Regula *S. Augustini* confirmavit, eumque Privilegiis auxit *Clemens IV.* Alios duos Equestres Ordines Sæculo *XIV.* approbavit *Joannes XXII.* unum videlicet in *Aragonia*, dictum Ordinem *Montesiae* ab urbe Regni *Aragonii*, in qua

De Origine & Antiquitate Ordinis Carmelitarum non una omnium est sententia. Carmelitæ quippè ad *Eliam*, & *Elizeum* Veteris Testamenti Prophetas, & Montis Carmeli incolas, suam originem referunt. *Sixtus Quartus*, *Sixtus Quintus*. *Pius Quintus*, *L. Andres*. Societatis Jesu, alique non Carmelitæ, & magnæ notæ Doctores, idem asserunt. Ipse verò secutus consilium Apost. 2.3. Epist. ad *Timum* dicentis: *Genealogias, & contentiones & pugnas evita, sunt enim inutiles & vanæ*; vel, ut ait idem Apostolus 2. ad *Timotheum* capite tertio: *Sciens quia generant lites*; consultius esse duco, de Carmelitarum Origine penitus in præsentia filere, & ea tantummodo hic referre, quæ de Carmelitarum Ordine comperta habemus, atque à nemine in dubium revocantur. In primis, fatentur omnes, Beatum *Albertum*, qui Ecclesiam Hierosolymitanam ab anno mccciv. usque ad annum mccxiv. rexit, dedisse Montis Carmeli Eremitis Regulam brevissimam præscribentem divini Officii & Orationis quotidianæ pensum, constructionem Oratorii in medio cellularum, ubi manè per singulos dies ad audienda Missarum solemnia convenirent, perpetuam ab esu carnum abstinentiam, jejunium à Festo S. Crucis ad Pascha; solitudinem, fugam otii, Prioris electionem, &c. Hæc Regula, quam B. *Albertus* Patriarcha dedit Eremitis Montis Carmeli, fuit confirmata ab *Honorio III.* Pontifice Maximo anno mcccxxvi. eamque postea *Hugo à S. Charo* Tituli S. *Sabinæ* Presbyter Cardinalis ex Ordine Prædicatorum assumptus, & *Willelmus*, Anteradensis Episcopus, auctoritate ab *Innocentio IV.* sibi commissâ, declararunt, correxerunt, mitigarunt: quam declarationem, correctionem,

& mitigationem ipse Pontifex confirmavit, Diplomate dato Lugduni Kalendis Septembris anni MCCXLVII. sicut refert *Castillus* primâ parte suæ Historiæ, libro 2. capite 25. Præterea, constat *Honorium IV.* Pontificem Maximum, anno MCCLXXXV. dedisse Carmelitis pallium album, mutatis videlicet, ut ait *Spondanus* ad annum MCCLXXXV. Num. xx. eorum chlamydis, quæ ex albo panno latis fasciis pullis sive canusinis intertextis variatæ erant. Quam mutationem Bonifacius VIII. confirmavit anno primo Pontificatus sui. Denique, Religiosi Carmelitani cultum *B. Mariæ Virginis*, cujus se *Fratres de Monte Carmelo* appellant, longè latèque in Occidente propagarunt per piam Sodalitatem Mariani Scapularis, cui *Clemens X.* Diplomate, quod incipit: *Commissa nobis*, dato die VIII. mensis Maij anni MDCLXXIII. plures Indulgentias concessit. Testatur *Henricus Spondanus* ad an. MCCLIV. num. XII. *Simoni Stoch*, Anglo, Priori Generali Ordinis Carmelitarum (qui Burdegala in Gallia an. MCCL. mortuus est, ut habet hujus Urbis Chronicon, & quem uti Sanctum Ordo colit) primùm Beatissimam Virginem manifestè apparuisse, & sacrum Scapulare contulisse. *S. Ludovicus*, Galliarum Rex, dum Sacrum Bellum in Palæstina gereret, amissâ libertate, deleta peste & Barbarorum armis exercitu, magno pretio redemptus, in Gallias rediit, non Palæstinæ palmas, non Orientis pretiosos uniones, non gazam Regum secum deportans, sed horum omnium loco secum deduxit antiquos Carmeli Incolas, ut testatur *Petrus Matthæus* in Vita *S. Ludovici*, ex quibus, ut cætera taceam bona, quæ jam Ecclesiæ obvenerunt, una prodiit *Theresia*, ad quam *S. Ludovicus Bertrandus* Ord. Præd. Epistolam scripsit

pfit , quâ ei denunciavit, Sacrum Ordinem , quem ibat instauratum , intra quinquaginta annos futurum in Ecclesia omnium virtutum & laudum genere florentissimum , sicut opportuniùs ostendemus in Colloquio VI. in Historiam Sæculi XVI. Plura in laudem Ordinis Carmelitarum leges apud *Trithemium* in libro de Ortu & progressu Carmelitarum, *Lezanam* in Annalibus Carmeliticis , *Aubertum Miram* in libro de Origine & incrementis Ordinis Carmelitarum , *Philippum à sancta Trinitate* in decore Carmeli Religiosi, & in Historia Carmelitici Ordinis , & alios .

Haud minùs obscura est Ordinis Eremitarum *S. Augustini* Origo , quam alii accersunt à temporibus *S. Augustini* , quem hujus Ordinis Instituto-rem esse volunt ; & hos absque ullo veritatis præjudicio in suo sensu abundare permittimus . Alii, ut videre est apud *Spondanum* ad annum mclclvi. asserunt, *Alexandrum IV.* Pontificem Maximum, *S. Augustini* monitu sibi per quietem apparentis , multas Congregationes *Eremitarum* diversis Regulis, titulis & vestibus viventes , ad tollendam omnem confusionem in unam Ordinis & Regulæ *S. Augustini* observantiam , in uniformem vivendi ac vestiendi modum rede- gisse , atque huic Ordini præfecisse primum Priorem Generalem *Lanfrancum Septalanum* Mediolanensem . Quinque autem erant Eremitarum Congregationes , ex quibus coaluit hic Ordo Eremitarum *S. Augustini* . Prima dicebatur Congregatio Eremitarum *S. Augustini* , qui nullum Generalem habebant, sed parebant Episcopis . Altera erat Eremitarum Congregatio *Budrioli* in Cæsenate Diocesi instituta à *B. Joanne Bono* , & hæc à propriis Generalibus regebatur .

Tertia appellabatur Congregatio *Eremitarum de Briedinis*, quibus *Gregorius IX.* Regulam *S. Augustini* tradidit. Quarta vocabatur Congregatio *Eremitarum S. Guillelmi*, quæ tam latè propagata est, ut in duas fuerit divisa, quarum primæ caput fuit Monasterium in *Stabulo Rhodis*, quo in loco Vir Sanctus obierat; alterius verò *Eremitarum S. Guillelmi* Congregationis caput erat Monasterium *De Fabali Monte*, quæ Congregatio proprio Generali parebat sub Regula Sancti *Benedicti*. Porro, non abs re erit hic observare, Sanctum *Guillelmum*, istorum *Eremitarum* Institutorem, perperam à nonnullis confundi cum *Guillelmo IX.* Aquitanix & Pictorum Duce, cum tamen ab eo fuerit omninò diversus. *Guillelmus* siquidem Aquitanix & Pictorum Dux mortuus est in sua peregrinatione ad *S. Jacobum*, quam anno *mcxxxvi*. pœnitentiâ motus susceperat, teste *Orderico* libro *xiii*. *Historiæ*. *Guillelmus* verò *Eremitarum* Institutor, consilio *Eugenii Papæ III.* Hierosolymam profectus est, & cœlesti voce monitus venit in Tusciam, ubi sanctè vixit, & obiit anno millesimo centesimo quinquagesimo septimo, ut testatur *Albertus* ejus discipulus, qui Vitam *S. Guillelmi* *Eremitæ* cognomento *Magni* scripsit. Ejus mentio habetur in *Martyrologio Romano* ad diem *x.* mensis *Februarii* his verbis: *In Stabulo Rhodis* (quod nomen ejus Monasterii fuit) *in territorio Senensi Sancti Guillelmi Eremitæ*. Ad eandem diem *x.* mensis *Februarii* *Henschenius* Vitam Sancti *Guillelmi Magni* *Eremitæ* descripsit. Legendus etiam est *Joannes Bestius* in *Historia Comitum Pictaviensium*, & Ducum *Aquitaniæ* parte 2. ubi integrum Tractatum habet de mendaciis, falsitatibus, & anachronismis inspersis

Operi Joannis Haii, qui Sæculo præterito Commentarium Historicum edidit, in quo falsam illam opinionem, quæ duos illos *Guillelmos* in unum confundit, pluribus exponit ac propugnat. Hæc obiter observanda esse duxi, ut certam haberes notitiam harum Congregationum Eremitarum, ex quibus formatus est Ordo Eremitarum *S. Augustini*, qui Ordo adeò celebris evasit, ut *Joannes XXII.* ei tria in Romana Curia Officia, quæ conjunxerat, concellerit, videlicet munus custodiendi Sacrarum Pontificii, Bibliothecæ Pontificiæ, & Confessionis Pontificis pro tempore existentis audiendæ, sicut testatur *Pamphilus Signinus* Episcopus in Chronico Augustiniano ad annum mcccix. sed de Ordinis Eremitarum *S. Augustini* propagatione, Sanctis & Illustribus Viris plura legis apud *Jordanum de Saxonia* in Vitis Fratrum.

D. Perge, quæso, aliorum Religiosorum Ordinum, qui Sæculis XIII. & XIV. originem habuerunt, referre Institutionem?

M. Prætermitto Ordinem, qui Sæculo XIII. in Provincia Tarraconensi institutus est, dictusque *Pauperum Catholicorum*, qui, rebus omnibus abdicatis, pauperem vitam professi, & consilia Evangelica amplexi, jejuniis & orationibus, lectioni, exhortationi, ac disputationibus adversus Hæreticos sese consecrarunt. Hic quippè Ordo, licet ab *Innocentio III.* anno mccxv. approbatus, diu tamen non stetit. Prætermitto etiam Ordinem *Humiliatorum*, quem sub Regula *S. Benedicti* anno mcc. confirmavit *Innocentius III.* eumque postea abolevit *Pius V.* propter insidias *B. Carolo Borromeo* paratas anno mdlxx. Missis itaque his jam antiquatis Ordinibus, illos dumtaxat hic referam, qui

qui adhuc perstant, & Ecclesiam doctrinâ ac pietate illustrant. Omnium antiquissimus est *Ordo Sanctissimæ Trinitatis de Redemptione Captivorum*, qui institutus est à S. *Joanne de Matha* in Gallo-Provincia nato, Sacræ Facultatis Parisiensis Doctore, atque à Sancto *Felice* Anachoreta Vallesiano, in loco Diœcesis Meldensis, qui *Cervus Frigidus* dicitur, ubi adhuc Ordinis Caput, licet apud Maturinenses Lutetiæ ut plurimum degat Minister Generalis, qui semper Gallus esse debet, & cujus electio ad solos Gallos, & inter eos ad solos quatuor hujus Ordinis Provinciarum, Franciæ videlicet, Campaniæ, Picardiæ, & Normanniæ Ministros pertinet. Hic Ordo, qui captivos Christianos ab Infidelium servitute liberandi præcipuam curam habet, confirmatus fuit ab *Innocentio III.* anno *MCXCVI* 11. Pontificatus sui primo, sicut observavimus in secundo Colloquio. S. *Joannes de Matha*, hujus Ordinis Conditor Romæ obiit die *xxi.* mensis Decembris anni *MCCXI* 11. & in Ecclesia S. *Thomæ de Formis* sepultus est.

Ordo Vallis Scholarium institutus est à *Guillelmo* Sacræ Facultatis Parisiensis Doctore, & aliquot aliis ejusdem Academiæ Magistris, quibus sese adjunxerunt *xxxvi* 11. Scholastici, qui sub Regula S. *Augustini* Deo militare decreverunt ac voverunt in Valle, quam ipsis *Guillelmus Joinvillæus* Lingonensis Episcopus assignavit, quæ indè nuncupata est *Vallis Scholarium*, & hoc nomen etiam adhefit Ordini, qui confirmatus est ab *Honorio III.* anno *MCCXVII* 11. Huic Ordini *Vallis Scholarium* coævus fuit alius Ordo in Diœcesi pariter Lingonensi institutus à quodam *Viardo* sub districtiori Cisterciensium Instituto, cujus austeriorem observantiam

tiam describit , & commendat *Jacobus de Vitriaco* Cap. xvi. *Historia Occidentalis* .

Congregationem *Silvestrinorum* inchoavit anno mcccxxi. in Monte Fano , non longè à Fabriano , insigni Piceni oppido , B. *Silvester Guzolinus* Canonicus Auximas , ac deinde Eremita , qui famâ sanctitatis cùm multos Discipulos allexisset , eis Religiosum Vitæ Institutum sub Regula S. *Benedicti* præscripsit , abiitque è vivis nonagenarius anno mclxvii. Ejus Vitam scripsit *Andreas Jacobi* , ejusdem *Silvestrinorum* Congregationis post ipsum , quartus Abbas Generalis , quam apud *Surium* Tomo vi. posterioris editionis ad diem xxvi. mensis Novembris legere est . Hanc *Silvestrinorum* Congregationem confirmavit *Innocentius IV.* Diploma dato quinto Kalendas Julii ann. mcccxlvi. quod incipit his verbis : *Religiosam Vitam &c.*

Ordo Sanctæ Mariæ de Mercede Redemptionis Captivorum à Maurorum & Saracenorum servitute , monente Dei-parâ , Sancto Petro Nolasco , natione Gallo , S. *Raymundo Pennafortio* , Ordinis Prædicatorum , & *Jacobo I.* Aragonum , Regi conspicuam se præbente , institutus est Barcinone die x. mensis Augusti anni mcccxxiii. sub Regula Sancti *Augustini* , & certis Constitutionibus à S. *Raymundo Pennafortio* præscriptis , ut testatur *Clemens VIII.* in Bulla Canonizationis Sancti *Raymundi* his verbis : *Quare hi* (scilicet *Jacobus Aragoniæ Rex* , & *Raymundus*) *collatis inter se consiliis & consentientibus animis* , Ordinem B. *Mariæ de Misericordia* , seu de Mercede Redemptionis captivorum fundaverunt , cui *Beatus Raymundus* certas vivendi leges præscripsit ad istius Ordinis vocationem accommodatissimas . Hunc Ordinem Autoritate

Pontificiâ approbavit *Gregorius IX.* ann. MCCXXXV. Sanctus verò *Petrus Nolascus*, qui unâ cum *S. Raymundo Pennafortio* istius Ordinis Institutor fuit, obiit die XXIX. mensis Januarii anni circiter MCCL. ejusque vitam ex libro *Francisci Zumel*, ejusdem Ordinis, *De Vitis Patrum & Magistrorum Generalium*, descripsit ac publicavit *Bollandus* inter Acta Sanctorum mensis Januarii ad diem XXIX.

Ordini *Servorum B. Mariæ Virginis* initium dederunt anno MCCXXXIII. septem Viri nobiles Florentini, qui Regulam *S. Augustini* cum nigra veste ab Archiepiscopo acceperunt. Sanctus etiam *Petrus Veronensis*, qui postea Fratrum Prædicatorum Ordinem, & Ecclesiam suo Martyrio illustravit, pro *Servorum Beatæ Virginis* clarissimo Ordine egregiam navavit operam, & diligentissimè examinatis ac recognitis hujus Ordinis Religiosorum moribus ac regulis, de optima hujus Religionis institutione certiore fecit *Innocentius IV.* qui hunc Ordinem approbavit. Hinc Officium *S. Petri* Martyris habet Ordo *Servorum B. Virginis* sub ritu duplici in Constitutionibus ab immemorabili tempore celebrandum, eidemque *S. Petro* Martyri ac Fratrum Prædicatorum Ordini Religio *Servorum B. Virginis* summè se obstrictam profitetur, quâ de re videri possunt *Annales Servorum Centuriâ primâ*, libro secundo, capite quarto. Inter Generales hujus Ordinis *Servorum B. Mariæ Virginis* censetur *S. Philippus Benitius*, qui obiit die XXII. mensis Augusti an. MCCLXXXV. quo die ejus memoria in Ecclesiâ colitur.

Celestinorum Congregatio erecta est à *Petro de Morone*, qui propè Sulmonem Eremiticam vitam professus, ac postea Summus Pontifex creatus,
Cæle-

Post obitum *S. Dominici*, qui incidit in diem
 VI. mensis Augusti anni MCCXXI. ejusq; Canoniza-
 tionem solemnem Ecclesiæ ritu peractam à *Greg. IX.*
Pont. Max. III. Idus Julii an. MCCXXXIV. sanctissimas
 Leges ac Constitutiones condiderunt Comitia Ge-
 neralia Ordinis FF. Prædicat. quas Romani Pontifi-
 ces approbarunt, quos inter *Clemens VIII.* asserere
 non dubitavit, ad Religiosum ex Dominicana Fa-
 milia in Sanctorum numerum solemnem ritu referen-
 dum, sibi loco omnium miraculorum fore exactam
 suarum Constit. observantiam. Adeò huic Summo
 Pontifici sancta videbatur Disciplina, quæ præscri-
 pta est in Ord. Prædicat. Eâ Sanctissimâ Disciplinâ
 imbuti Dominicani suavissimum omnium virtutum
 odorem Sæc. XIII. & XIV. longè, latèq; diffuderunt,
 errantes veritatem docuerunt, dissiparunt carnales
 affectus, peccatores ad pœnitentiam & pietatem
 pellexerunt, atque Fidem Catholicam defendendi
 ardentissimo zelo accensi, adversus Hæreticos in
 Conciliis Gen. quæ his temporibus celebrata fuere,
 acerrimè disputarunt. In Concil. siquidem Later. IV.
 sub *Innocentio III.* habito anno MCCXV. *S. Dominicus*
 in Palentina Academia Magisterio donatus, & om-
 nigenâ litteraturâ instructus, *Almarici* errores
 profligavit. In Concilio Lugdunensi primo sub
Innocentio IV. anno MCCXLV. celebrato, *Hugo* Car-
 dinalis, Ordinis Prædicatorum, jura Summorum,
 Pontificum magno animi æstu tuitus est contra
Friderici II. Imperatoris tyrannidem, & ejus Cancel-
 larii *Petri à Vineis* Capuani, quantum illa Sæcula
 ferebant, Viri eloquentis libros. In Concil. Lugd. II.
 quod *Gregorius X.* convocavit anno MCCLXXIV.
 præter *S. Thomam Aquinatem*, qui, dum eò perge-
 ret,

ret, ad Deum in itinere migravit, interfuere tres Cardinales, triginta Episcopi ex Ordine Prædicatorum assumpti, & ingens ac valida Theologorum turma, sub Magistro Generali *Joanne Vercellensi*, qui eodem anno Lugduni Comitia Generalia celebrabat. Hos inter Dominicanos eminebant *Petrus à Tarentasia*, tum Cardinalis, postea Pontifex Maximus creatus nomine *Innocentius V.* & *Albertus Magnus*, quo potissimum Duce victi fuerunt in hoc Lugdunensi II. Græci Schismatici, & abdicatis erroribus atque Schismate, Romano Pontifici sese subjecerunt. Tandem in Concilio Generali Vienne[n]si, quod *Clemens V.* Pontifex Maximus anno mcccxi. habuit, Beguardorum, & Beguinarum errores ab *Eymerico*, & *Berengario*, Familix Dominicanæ Theologis, confutati sunt. Sic Dominicani in Conciliis Generalibus, quæ Sæculis XIII. & XIV. coacta fuerunt, edomandis Hæresibus toti incubuerunt, illudque ingenitum in Hæreticos odium, quod à Patre suo hauserunt, perpetuâ serie ad posteros transmiserunt. Sed longius me argumentum hoc abriperet, nisi in materia copiosissima mihi temperarem. Vela itaque contraho, nec plura dicam ad commendationem Ordinis Fratrum Prædicatorum, qui, ut omnes probè norunt, Rosario, Magisterio Sacri Palatii Apostolici, Sanctæ Inquisitionis officio, & Sanctissimi *Thomæ Aquinatis* doctrinâ, veluti quatuor fluviis, universam ambit, irrigat, ac fœcundat Ecclesiam.

D. Prodieruntne eodem Sæculo decimo tertio Ordines Fratrum Minorum, Carmelitarum, & Eremitarum *S. Augustini*?

M. Certum est, Ordinem Fratrum Minorum

rum Sæculo decimo tertio fuisse institutum à Sancto *Francisco*, qui Assisii in Italia ex *Bernardone*, professione Mercatore, natus est anno MCLXXXII. Vir fuit tam austeræ paupertatis, ut audito Evangelio de omnibus relinquendis, paternis bonis omnibus renunciaverit, & anno MCCV. sibi duodecim socios adsciverit, quibus vivendi normam arctiori paupertatis professione insignem præscripsit, in Lateranensi IV. Synodo Generali ab *Innocentio III.* atque iterum ab *Honorio III.* confirmatam. Eo Ordine, ut nullus pauperior, ita & fecundior fuit. Nam, testè *Matthæo Parisio* in Historia Anglicana ad annum MCCXXVII. Fratres Minores statim ab exordio sui Ordinis terram repleverunt, habitantes in urbibus, & civitatibus deni, & septeni, nihil omnino possidentes, de Evangelio viventes, in victu & vestitu paupertatem nimiam præferentes, nudis pedibus incedentes, maximum humilitatis exemplum omnibus præbuerunt. Præter Ordinem Fratrum Minorum, duos alios S. *Franciscus* instituit. Secundum nempe, Monialium, quas, Duce S. *Clara* Virgine Assisinate, congregavit in Ecclesia S. *Damiani*, unde *Clarissæ*, & *Damianæ*, seu *Damianisticæ* dictæ, quæ primæ Ordinis asperitati strictius inhæserunt, & ab aliis discrepant Monialibus, quæ *Urbanisticæ* appellantur, & quæ mitigationem Regulæ ab *Urbano V.* factam sequuntur, & prædia possident. Tertium denique Ordinem, seu *Pœnitentium*, instituit S. *Franciscus*, qui complectitur non solum in Claustris degentes Cœnobitas, qui & tertiæ Sancti *Francisci* Regulæ adhærent, sed etiam laicos viros & fœminas, qui domi suæ juxta ejusdem Regulæ præscriptum vivunt. De S. *Francisco*, & ejus Or-

qua hujus Ordinis Sedes præcipua constituta est. Obstringebantur novi istius Ordinis Milites, qui veste candidâ cum rubra Cruce erant insigniti, Cisterciensium Leges sub proprio Magistro servare, & Valentinum Regnum à Maurorum incurſibus tueri. Hunc Militarem Ordinem, rogante Aragonio Rege, confirmavit Joannes XXII. anno mcccxvi. & post biennium idem Pontifex alteram approbavit Sacram Militiam in Lusitania institutam, dictamque *Militiam*, seu *Ordinem Christi*. Hæc nova Militia in Lusitaniæ Regno ad propulsandos Mauros ac Saracenos constituta est, Cruce rubrâ, lineâ candidâ interfecante distincta, cujus Sedes principalis Castrum Marinum Silvenſis in Algarbiis Diœcesis, unde postea Tomarium hujus Ordinis Milites migrarunt, ut videre est apud Spondanum ad annum mcccxvi. Num. 3. De utroque illo Militari Ordine, videlicet *Montesia*, & *Christi*, legendus etiam est Joannes Mariana Soc. Jesu libro xv. *Rerum Hispanicarum* cap. xv. Mitto Ordinem Militarem *Equitum Navaliū*, seu *de Nave* dictorum quem Carolus Diarrachinus, Rex Siciliæ, ut rem maritimam, quâ multum indigebat, in Regno suo promoveret, anno mcccclxxxvi. instituit, cujus ipse Princeps esse voluit, electo in protectorem Ordinis S. Nicolao Episcopo Mirenſi, erectoque in ejus memoriam Templo, ut refert idem Spondanus ad annum mcccclxxxvi. Num. 3. Mitto etiam Ordinem *Periscelidis*, seu *de la Jarretiere*, quem Eduardus VI. Angliæ Rex, suo in Regno circa annum mccccl. instituit cum hac Gallica Inscriptione: *Hony Soit qui mal y pense*, occasione, ut vulgò dicitur, ortâ ex Periscelide defluenti Comitiliæ Sa-

isberienſis, quam Rex deperibat, & quam ei cum publica amoris ſignificatione reddidit, in cujus rei memoriam Rex hunc Equeſtrem, ſed non Militarem, *Periſcelidis* Ordinem inſtituit, qui etiamnum in Anglia magno in honore habetur. Mitto denique alium Equeſtrem, ſed non Militarem Ordinem *Stella* dictum, quem *Joannes*, Galliarum Rex, anno mccc. l. inſtituit in memoriam illius *Syderis*, quod Magos ab Oriente ad Chriſtum recens natum adorandum perduxit. Equites hujus Ordinis deferabant ſignum *Stellæ* torqui aureo appenſum, necnon veſtis conſpicuo loco *Phrygio* opere adtextum cum hoc Symbolo: *Monſtrant Regibus Aſtra viam*, ſed diuturnus non fuit hujus Ordinis ſplendor, quia ob multitudinem gregariorum, qui, ferventibus bellis, in illum admiſſi ſunt, adeo viluit, ut *Carolus V.* Galliarum Rex, *Joannis* filius, illum *Excubiarum Præfecto*, ejuſque Satellitibus dimiſerit.

D. In referendis Religioſis Ordinibus, qui Sæculis XIII. & XIV. fuerunt inſtituti, cumulatiſſimè mihi feciſti ſatis. Sed quid Sacri Canones circa Monasticam Diſciplinam in his duobus Sæculis præcipuè ſtatuerint, mox necèſſe eſt, ut paucis verbis attingas.

M. Nimius proſectò forem, ſi ſingula, quæ Sæculis XIII. & XIV. circa Monasticam Diſciplinam Sacris Canonibus ſancita ſunt, perſequi vellem. Rem totam igitur paucis abſolvam. In primis, pretium pro ingreſſu Monasterii, ſeu pro receptione ad Religioſam Profeſſionem exigere ſimoniz damnant Canones Conciliorum, quæ Sæculis XIII. & XIV. fuerunt celebrata. Si tamen,

(Mona-

Monasterium tenue esset , poterat absque simoniæ labe aliquid accipere pro victu personæ , quæ in Monasterio recipiebatur . Ita docet S. Thomas, qui Sæculo XIII. floruit, & Disciplinæ Monasticæ illius temporis testis lucupletissimus esse debet . Sic autem loquitur Angelicus ille Doctor in 4. Sent. Distinct. 25. Quæst. 2. Art. 2. ad 7. *Dicendum, quodd cum possessiones alicujus loci Religiosi non sufficiunt ad sustentandum plures , tunc potest exigi ab eo, qui in loco illo vult servire Deo , non quasi pretium Religionis , sed ut habeat Monasterium undè ei possit provideri, & idè non committitur simonia . Et in sua Summa Theologica Secundâ Secundæ Quæst. 100. Art. 3. in Responsione ad tertiam Objectionem , hæc habet : pro ingressu Monasterii non licet aliquid exigere vel accipere quasi pretium . Licet tamen , si Monasterium sit tenue , quod non sufficiat ad tot personas nutriendas , gratis quidem ingressum Monasterii exhibere , sed accipere aliquid pro victu personæ, quæ in Monasterio fuerit recipienda , si ad hoc non sufficiunt Monasterii opes . Parentes filios suos minores , ut constat exemplo S. Thomæ Aquinatis , Vitæ Monasticæ Sæculis XIII. & XIV. quandòque devovebant , sed tamen ad sæculum redire poterant , nisi anno ætatis decimo quinto Parentum Oblationem confirmarent , sicut expressè definivit Innocentius III. in Epistola cxvi. libri xv. ad Lugdunensem Archiepiscopatum datâ , ubi ait : *Cautum reperitur in Canone , ut minoris ætatis filii , qui oblati Monasterio fuerint , suscipientes habitum vel Tonsuram , si à Prælati suis anno quintodecimo requisiti , se in assumptæ Religionis proposito consenserint permansuros , pœnitendi licentia præcludatur , alioquin eis non adima-**

tur ad sæculum redeundi facultas, ne coacta præstare Deo servitia videantur. Inoleverat in Gallis Sæculo XIII. gravissimus abusus, quo Parentes, ut filios suos ab hæreditate arcerent, illos in Monasteria detrudebant. Contra quem abusum insatiabili Parentum cupiditate invecum *Guillelmus Parisiensis* Episcopus lib. de *Moribus* cap. ix. ita scribit: *Alii à Parentibus & Propinquis eo modo in clauastro proiciuntur, quemadmodum catuli & porculi, quos Matres non sufficiunt enutrire, ut videlicet mundo non spiritualiter, sed (ut ita dicam) civiliter moriantur, videlicet ut portione hæreditaria priventur, & ad eos, qui in Sæculo remanent, devolvatur, & quantum ad hoc Simoniaca est hujusmodi projectio, immersio, vel intentio.* Quapropter, ut obiter dicam, sicut meritò culpari debent parentes, qui filios suos ab ingressu Religionis, quandò vocantur à Deo, præpostero affectu, vel intuitu commodi temporalis deterrent, ità vehementer improbari debet ea insatiabilis cupiditas parentum, qui familiam à plurium liberorum onere liberare volentes, his liberis ingressum Religionis procurant, vel quod naturâ sint ad res gerendas inepti, animo hebetes, vel corpore vitiosi, vel ut aliis liberis, quos plus diligunt, istorum quasi ablegatione, ampliores relinquant opes. Certè, hunc abusum Statui Religioso, & Ecclesiæ valdè infestum deplorat *S. Hieronymus* in Epistola 8. ad *Demetriadem* his verbis: *Solent miseri Parentes, & non plenæ fidei Christiani, deformes, & aliquo membro debiles filias, quia dignos generos non inveniunt, virginitati tradere: tauri, ut dicitur vitrum, quanti margaritum.* Certè, qui religiosiores sibi videntur, parvo sumptu,

& qui vix ad alimenta sufficiat, Virginitati dato, omnem censum in utroque sexu secularibus liberis largiuntur. Quod nuper in hac urbe dives quidam fecit Presbyter, ut duas filias in proposito virginali inopes relinqueret, & aliorum ad omnem copiam filiorum, luxuriæ atque deliciis provideret. Fecerunt hoc multa, proh dolor, nostri propositi fæmina; atque utinam rarum esset exemplum. Quod quantò crebrius est, tantò istæ feliciores, quæ ne plurimarum quidem exempla secuta sunt.

Religiosos Viros, Ordinum etiam Mendicantium, Sæculis XIII. & XIV. ad curam & regimen animarum, ad Ecclesiæ munera frequentè assumptos, ad Cardinalitiam, Patriarchalem, Archiepiscopalem, Episcopalem dignitatem, immo, aliquos ad Summum Pontificatum fuisse provectos testantur Ecclesiæ, singulorumque Ordinum Annales. Religiosi tamen, qui ad Ecclesiasticas dignitates erant assumpti, sui Ordinis habitum deferre, & Regulam, Constitutionesque, quantum eo in statu fieri poterat, observare tenebantur, sicut S. Thomas, qui Sæculo XIII. floruit, apertè docet Secundâ Secundæ Quæst. CLXXXV. Art. 3. his verbis: *Dicendum est, quod si qua sunt in Regularibus Observantiis, quæ non impediunt Pontificale Officium, sed magis valeant ad perfectionis custodiam, sicut est continentia, paupertas & alia hujusmodi, ad hæc remanet Religiosus, etiam factus Episcopus, obligatus, & per consequens ad portandum habitum suæ Religionis, qui est hujus obligationis signum. Addit etiam Sanctus ille Doctor in Responsione. ad tertiam objectionem, Episcopum ex Ordinibus Religiosis assumptum proprium nullo modo habere posse, nec*

Testamentum facere . Si tamen ex concessione Papæ Testamentum faciat , non intelligitur ex proprio facere Testamentum ; Sed Apostolica autoritate intelligitur esse ampliata potestas suæ dispensationis , ut ejus dispensatio possit valere post mortem . Ordinibus Religiosorum Mendicantium Sæculis XIII. & XIV. multa Romani Pontifices concesserunt Privilegia, quæ in Galliis occasionem dederunt *Guillelmo à Sancto Amore* , aliisque ejusdem furfuris hominibus & Status Religiosi æmulis obrectatoribus in ruinam illorum Ordinum conspirandi . Contendebat *Guillelmus à Sancto Amore* in libro , quem edidit , *De periculis Novissimorum Temporum* , Religiosos Mendicantes , juxta illud Christi Domini dictum *Matthæi cap. xxi 11. Nolite vocari ab hominibus Rabbi* , sibi nullo pacto vindicare posse munus Magisterii , seu publicè docendi, prædicandi, Confessiones audiendi , aliaque Ecclesiastica munia obeundi , sed illos è commercio & societate hominum omninò semotos peccata sua plangere ac manibus operari debere . Contra hunc Religiosorum Ordinum impugnatorem Opusculum , seu Apologiam, pro Religiosis Ordinibus scripsit *S. Thomas* , qui fuit hujus persecutionis particeps . Probat autem Angelicus ille Doctor , Viros Religiosos munus docendi , ut ministerium suo statui congruum , suscipere posse , quia Viri Religiosi magis sunt ad docendum idonei, utpote qui rerum divinarum contemplationi plus cæteris vacant . Hinc multi Sancti Patres , qui Religiosam vitam professi sunt , publicè docuerunt , & ad Episcopales Infulas fuerunt sublimati . Si ergo Viri Religiosi Episcopale munus , quod est maximum in

Eccle-

Ecclesia, obire possunt, quidni docendi, & prædicandi Officium, quod minus est, exercere poterunt? Sanctum *Gregorium Nazianzenum*, licet Monachus esset, Constantinopolim adductum fuisse, ut ibi Sacram Scripturam doceret, Ecclesiastica narrat Historia, & Sanctus *Hieronymus* in Epistola ad *Rusticum* Monachum ait. *Sic vive in Monasterio, ut Clericus esse merearis, multo tempore disce, quæ postmodum doceas.* Non ergo ab Officio docendi, prædicandi, & Confessiones audiendi arceri debent Viri Religiosi, qui ad illud in Ecclesia exercendum sunt instituti, sicut Ordines Religiosorum Mendicantium. His, & aliis luculentissimis rationibus refellit Sanctus *Thomas* Status Religiosi impugnatores, & ad illud Scripturæ Sacræ testimonium: *Nolite vocari Rabbi*, quod *Guillelmus à Sancto Amore* obiiciebat, respondet Sanctus Doctor, per hæc Christi verba non prohiberi quemlibet Magisterii appetitum, sed præposterum dumtaxat & indebitum Magisterii desiderium, à quo abhorrent Viri Regulares, cum non appetant Magisterium, nisi propter publicam utilitatem, nec velint fieri Magistri Scholastici, nisi de consensu Prælatorum suorum. Demum, Viros Religiosos ad opus manuum non teneri, nisi sit Regulis & Constitutionibus Monasticis præscriptum, probat Sanctus *Thomas* contra *Guillelmum à Sancto Amore* multis argumentis, ex quibus hoc unum subiiciam: *Qui habent unde aliàs vivant*, inquit S. *Thomas*, *quàm de labore manuum, quia habent possessiones, quæ ad eorum vitam sustentandam à Fidelibus collatæ sunt, vel habent ministerium prædicationis sibi commissum, de quo vivere possunt,*

sunt , primæ ad Corinth. cap. 9. Dominus ordinavit his qui Evangelium annuntiant , de Evangelio vivere . . . Similitèr aliqui Religiosi sunt , qui Ecclesiæ deserviunt in divino Officiò , & de hoc etiam licitè vivere possunt. Unde dicitur primæ ad Corinth. cap. 9. Qui altari deserviunt , cum altari participant . Et adductâ auctoritate S. Augustini in libro de Opere Monachorum , subjungit S. Thomas: Similitèr sunt aliqui Religiosi , qui Sacræ Scripturæ vacant , & de hoc etiam licitè vivere possunt . Non ergò omnes Religiosi tenentur manibus laborare . Legendus est idem Sanctus Doctor Secundâ Secundæ Quæst. CLXXXVII. Art. I. ubi probat , Religiosos posse docere , prædicare , & alia Officia exercere in Ecclesiâ , & in Artic. III. ejusdem quæstionis docet , Religiosos , qui Scripturæ Sacræ studio incumbunt , vel prædicationis ministerio funguntur , non teneri manibus operari , sed potiùs ad procurandam salutem animarum debere à labore manuum omninò abstinere . Nec solum S. Thomas , sed etiam S. Bonaventura , splendidissimum Ordinis Minorum decus , Sæculo XIII. Guillelmum à Sancto Amore , Capitalet Status Religiosi hostem , confutavit tam in Opusculo de Paupertate Christi , quàm in Apologia Pauperum . Undè factum est , ut Romani Pontifices Ordinum Mendicantium causam Statumq; semper protexerint . Alexander IV. Pontifex Maximus proscripsit pestilentem librum de periculis novissimorum temporum , quem contra Ordines Mendicantium scripturierat Guillelmus à Sancto Amore , & in eorum gratiam quadraginta Pontificia Diplomata dedit . Clemens V. Religiosorum itidem patrocinium suscepit , probans eos à Deo & Ecclesiâ vocatos ad auxilium

lium regiminis Ecclesia, licet tardius quam de multis, etiam eos inter alios vocatos deberi merito computandos, ut refert Continuator *Guillelmi Nangii* apud *Lucam Dacherium* tomo xi. *Spicilegii*. Nec minus Religiosis Mendicantibus favit *Innocentius VI.* Pontifex Maximus contra *Richardum* Armachanum Archiepiscopum, & Hiberniæ primatem, sicut ad annum MCCCLV III. refert *Thomas Walsinghamus*, qui tamen hic & quavis datâ occasione virulento calamo Religiosos Mendicantes perstringit. Hæc pauca observanda esse duxi ad vindicandum Statum Religiosum, cujus tanta dignitas ac perfectio est, ut S. *Thomas* Quodlibeto III. Quæst. vi. Art. xvi. pluribus momentis evincat, Religiosos esse majoris perfectionis, quam sint Presbyteri Parochiales.

Non possum etiam, nec debeo hic prætermittere specialem Ritus, seu Disciplinam, quæ etiam nunc viget in Ordine Fratrum Prædicatorum, & ex qua imperiti quidam & malevoli homines ansam & occasionem temerè arripiunt celeberrimum hunc Ordinem calumniandi. Hic autem Ritus, seu Disciplina in hoc consistit, quòd Fratres Prædicatores intèr celebrandum Missæ Sacrificium sinistram manu Corpus Christi Domini sumant. Hunc ritum nonnulli maledici pœnam esse dictitant omnibus Fratribus Prædicatoribus à Romano Pontifice impositam, cò quòd *Bernardus Politianus*, ejusdem Ordinis, venenum in Eucharistia *Henrico VII.* Imperatori porrexisset, & sacrilegum ac parricidiale facinus perpetrasset. Verum, hæc putida calumnia est, tum quia certissimis monumentis, quæ in Colloquio II. adduxi, constat,

Hen-

Henricum VII. Imperatorem non veneno, sed naturali morte extinctum fuisse; tum etiam, quia Ritus ille, quem adhuc observant Fratres Prædicatores, dum sacrum faciunt, tenendi sinistrâ manu Hostiam usque ad Communionem, ab ipso Ordinis exordio invaluit, & ante *Henrici VII.* Imperatoris obitum, qui contigit anno millesimo trecentesimo decimo tertio. Vidi quippè ipse, dum Parisiis essem, antiquum Rituale, quod in Parisiensi Ordinis Fratrum Prædicatorum Conventu, & Collegio S. *Jacobi* asservatur, & quod an. *mccclvi.* manu scriptum est, in quo statuitur, ut Sacerdos Hostiam manu sinistrâ usque ad Communionem teneat. Qua ex Rubrica nullus dubito, quin hæc consuetudo, quæ adhuc apud Fratres Prædicatores obtinet, sumendi manu sinistrâ Corpus Christi, manaverit, cum Hostia sic fracta commodè ac decenter à sinistra in dexteram transferri haud possit. Hic autem ritus solis Fratribus Prædicatoribus peculiaris est, quia Sacram Hostiam super Patena non frangunt ac deponunt, ut facit solent sæculares Sacerdotes, & aliorum Ordinum Regulares, sed super Calicem frangunt. Id *ceremoniæ*, inquit *Bzovius*, Ordinis Prædicatorum, in *Continuatione Baronii* ad annum *mcccxi.* Sinistra communicandi manu datum etiam à Sede Apostolica Ordini Prædicatorum, propter triumphatam à Fratribus Berengarianam Heresim in contumeliam Sanctissimæ Eucharistiæ in Europa temporibus D. *Dominici*, & *Petri Martyris* reviviscentem, ut tum post Agnus Dei sinistra manu super Calicem elevatâ Hostiam teneant, tunc universo populo adorandum Christum Deum verum & hominem sub speciebus panis & vini præsentem exponerent;

nerent; tùm ipsi tunctione pectoris interiorem animi latrariam ostenderent in Sacro Sanctum pignus salutis. Hunc specialem Ritus ex singulari Privilegio Ordini Prædicatorum fuisse ab Ecclesia concessum, restatur itidẽm alter ejusdem Ordinis Scriptor Leonardus de Utino, qui floruit circa an. mccccxlv. & in suo Quadragesimali, Sermone 42. hæc habet: *In principio Ordinis nostri insurrexit quædam hæresis asserens, non esse verum Corpus Christi in Altari, nisi quandiũ elevatur. Cujus opinionis fuit Magister Johannes Wiclef. Ordo autem noster prævaluit contra hanc Hæresim, miro modo eam confutando, in cujus signum datum est Ordini nostro, ut in Missa post Agnus Dei ante Communionem tenerent Fratres Hostiam elevatam supra Calicem, ut sic adoraretur ab universo populo, tanquam verum Corpus & Sanguis Christi, & ne deponeretur post Communionem: Et, post pauca interjecta, subdit idem Scriptor: Plures Fratres nostri Martyrio coronati sunt ab Hæreticis, & dũ essem in Concilio Ferrariensi tempore Eugenii Papæ IV. relatum est, plures Conventus nostri Ordinis funditus everfos ab Hussitis in Boemia, & Fratres trucidatos ab eisdem. Ordo enim noster valdè insudavit contra Hæreses, ad earum extirpationem præcipuè circa hoc Sacramentum Corporis Christi. Sed hæc satis dicta sint ad hanc infamem propulsandam calumniam, quæ dissimulata & celeberrimo Fratrum Prædicatorum Ordini dedecori, & Ecclesiæ offensionĩ verteretur; Si tamen plura eã de re scire desideres, leges librum, quem ann. mdcxxxvi. edidit Marcellus de Cavalleriis, Ordinis Prædicatorum, inscriptum: *Statera Sacra Missam juxta ritum Ordinis Prædicatorum expendens.**

D. Expecto nunc pro coronide nostri Colloquii Synopsim Doctrinæ Moralis Christianæ, & hoc unum scire velim, an Doctrina Moralis Christiana suam Sæculis XIII. & XIV. puritatem ac integritatem retinuerit, quam in Sæculis præcedentibus obtinuisse jam vidimus?

M. Moralem Doctrinam Sæculis XIII. & XIV. avitam suam retinuisse puritatem, sat superque probant Opera *S. Thomæ Aquinatis*, qui Sæculo XIII. floruit, & in rebus, quæ spectant mores, tritæ Sanctorum Patrum viæ ita adhæsit, ut ab ea nunquam deflexerit. Infinitus profectò essem, si singula percurrere vellem, quæ Angelicus ille Doctor, præsertim in *Secunda Secunda* suæ Summæ Tripartitæ contra Usuram, Simoniam, Homicidium, & alia id genus vitia moribus opposita, methodo perspicuâ docet, ubique Ethices castissimæ suppeditando Regulas ac præcepta, quibus fidelium mores informari, corrigi & emendari debent. Quatuor dumtaxat, quæ maximè commendant doctrinam Moralem S. Thomæ, & ad ejus puritatem contra emergentes laxitates conservandam plurimum conducere possunt, hic generatim annotabo.

In primis, perpetuò docet *S. Thomas*, in rebus spectantibus mores, neminem excusari, si sequatur erroneas opiniones alicujus Magistri, quia in talibus ignorantia non excusat. Sic suam mentem dilucidè aperit Angelicus ille Præceptor Quodlibeto tertio, Articulo decimo his verbis: *Respondeo dicendum, quòd si stent diversæ opiniones Doctorum Scripturæ Sacrae, siquidem non pertineant ad fidem & bonos mores, absque periculo auditores utramque opi-*
nig.

nionem sequi possunt . Tunc enim habet locum , quod Apostolus dicit ad Romanos cap. 14. Unusquisque in suo sensu abundet . In his vero quæ pertinent ad fidem & bonos mores , nullus excusatur , si sequatur erroneam opinionem alicujus Magistri . In talibus enim ignorantia non excusat ; alioquin immunes à peccato fuissent , qui secuti sunt opinionem Arii , Nestorii , & aliorum Hæresiarcharum . Nec potest excusationem habere propter simplicitatem auditorum , si in talibus opinionem sequantur . In rebus enim dubiis non est de facili præstandus assensus , quin immò , ut Augustinus dicit in libro 3. de Doctrina Christiana : Consulere debet quis regulam fidei , quam de Scripturarum plenioribus locis , & Ecclesiæ autoritate percepit . Id confirmat S. Thomas Quodlibeto 8. Artic. 13. ubi quærit : An quando sunt diversæ opiniones , de aliquo facto , ille qui sequitur minus tutam , peccet ? Cui quæstioni sic respondet Doctor Angelicus : Respon- deo dicendum , quod duobus modis aliquis ad peccatum obligatur : uno modo faciendo contra legem , ut cum aliquis fornicatur : alio modo faciendo contra conscientiam , etiamsi non sit contra legem , ut si conscientia dicat alicui , quod levare festucam de terra sit peccatum mortale . Ex conscientia autem aliquis obligatur ad peccatum , sive habeat certam fidem de contrario ejus quod agit , sive etiam habeat opinionem cum aliqua dubitatione . Illud autem quod agitur contra legem , semper est malum , nec excusatur per hoc , quod est secundum conscientiam , & similiter quod est contra conscientiam est malum , quamvis non sit contra legem . Quod autem nec contra conscientiam , nec contra legem est , non potest esse peccatum . Attende , quæso , ad hæc verba S. Thomæ : Illud quod agitur contra legem ,

sem-

semper est malum, nec excusatur per hoc, quod est secundum conscientiam, quibus verbis Sanctus Doctor novum probabilitatis commentum, ex quo varii in doctrina Morali pullularunt errores Vaticanis protriti fulminibus, præfocavit. Sic S. Thomas Regiâ viâ incedens, certas tutasque sententias Patribus & Ecclesiæ communes delegit, eoque delectu sibi ac suis discipulis ab erroribus, à periculo, aut metu censurarum immunitatem comparavit, & proprium fecit veluti suæ Scholæ characterem. Voluit quippe Angelicus Doctor, ut sui Discipuli tam à laxis opinionibus & corruptelis doctrinæ Moralis abhorrerent, quàm à rigidioribus sententiis quorundam Theologorum, qui zelum habentes, sed non secundum scientiam, onera importabilia imponunt, asperiores reddunt viam salutis, & in quæstionibus ambiguis, in quibus de peccato mortali agitur, semper ad rigorem deflectunt, peccatorum mortalium numerum augent, ac nimiam asperitate peccatoribus aditum pœnitentiæ sic præcludunt, ut in causa sint, cur illi in desperationem suæ salutis adducti, se in præcipitium proripiant, & cum Juda fugiant ad infelicem laqueum. Hunc intempestivum in doctrina Morali rigorem improbat S. Thomas Quodlibeto 9. Art. 15. ubi docet, periculosè determinari quæstiones, in quibus agitur de peccato mortali: *Omnis quæstio*, inquit, *in qua de peccato mortali agitur, nisi expressè veritas habeatur, periculosè determinatur, quia error, quo non creditur esse peccatum mortale, quod est peccatum mortale, conscientiam non excusat a toto, licet fortè à tanto, Error verò, quo creditur esse mortale, quod non est mortale, ex conscientia ligat ad peccatum mortale.*

tale. Præcipue autem periculosum est, ubi veritas ambigua est &c. In delectu itaque opinionum, præceteris, qui Summas Casuum conscientię conscripserunt, sequere S. Thomam, & non minus à laxioribus, quàm à rigidioribus declina sententiis, quas in Scholas invexerunt, & hominum generi propinarunt recentiores Casuistæ. Utere etiam prudentissimo consilio, quod olim Cardinalis Bellarminus dedit Episcopo Theanensi nepoti suo in Opusculo quod ad ipsum direxit, ubi hæc habet: Si quis velit in tuto salutem suam collocare, is omninò debet certam veritatem inquirere, & non respicere quid multi hoc tempore dicant, aut faciant: & si rei certitudo non possit ad liquidum apparere, debet omninò tutiorem partem sequi, & nulla ratione, nullius imperio, nulla utilitate temporali proposita ad minus tutam partem declinare. Agitur enim de summa rei, cùm de salute aeterna tractatur, & facillimum est conscientiam erroneam exemplo aliorum induere, & eo modo, conscientia non remordente, ad eum locum descendere, ubi vermis non moritur, & ignis non extinguitur.

Alterum, quod circa Doctrinam Moralem. S. Thomæ observare debes, spectat magnum dilectionis divinæ præceptum, quod si totius Moralis Christianæ Compendium, Evangelii Summam; legis finem, & solidæ pietatis principium dixeris, à veritate non aberrabis. Hoc autem de dilectione divina præceptum adeò necessarium esse existimavit S. Thomas, ut 1. 2. quæst. 89. art. 6. doceat, teneri omnem creaturam rationalem in primo rationis diluculo ad Deum se convertere, illum cœli ultimum finem agnoscere, & primitias amoris sui

sui ei consecrare : tunc enim inquit Angelicus Doctor , *primum quod occurrit homini discretionem habenti , est deliberare de seipso .* Quibus verbis innuit S. Thomas , in illa prima rationis aurora Solem invisibilem , qui illuminat omnem hominem venientem in hunc Mundum , pias immittere cogitationes deliberandi de se , quibus intimatur , & veluti promulgatur lex naturalis ; cui legi obtemperans , *si ad debitum finem se ipsum ordinaverit , per gratiam consequetur remissionem peccati originalis ; si verò non ordinet seipsum ad debitum finem , secundum quod in illa ætate est capax discretionis , peccabit mortaliter , non faciens quod in se est .* Cum igitur homines , dum ipsis affulgere incipit rationis crepusculum , ad dilectionis divinæ præceptum obstringantur , necesse est , ut omnibus incumbat obligatio divinæ illius Legis : *Diliges Dominum ex toto corde , tuo , ex tota mente tua , & ex totis viribus tuis .* Sed quo pacto à nobis impleri debeat divinum istud præceptum , luculentè juxta ac solidè explicat idem S. Thomas opusculo 18. cap. 5. his verbis : *alio modo ex toto corde , mente , anima , & fortitudine Deum diligimus , si nihil nobis desit ad divinam dilectionem , quod actu , vel habitu in Deum non referamus , & hujus divinæ dilectionis perfectio datur homini in præcepto .* Primò quidem , ut omnia in Deum referat , sicut in finem , sicut Apostolus dicit 1. ad Corinth. cap. 10. *Si ve manducatis , si ve bibitis , omnia in gloriam Dei facite : quod quidem impletur , cum aliquis vitam suam ad Dei servitium ordinat , & per consequens omnia quæ per se ipsum agit , omnia virtualiter ordinantur in Deum , nisi sint talia , quæ ab eo abducant , sicut sunt peccata , & sic Deum diligit homo ex toto*

toto corde . Secundò, ut intellectum suum homo subji-
 ciat, ea credens quæ divinitus traduntur, secundum
 illud Apostoli 2. ad Corinth. cap. 10. In captivitatem
 redigentes omnem intellectum in obsequium Christi :
 & sic Deus diligitur ex tota mente . Tertio, ut quæ-
 cumque homo amat, in Deo amet, & universaliter om-
 nem suam affectionem ad Dei dilectionem referat .
 Unde dicebat Apostolus 2. ad Corinth. cap. 5. siue enim
 mente excedimus, Deo : siue sobrii sumus, vobis : Cha-
 ritas enim Christi urget nos : & sic Deus ex tota anima
 diligitur . Quarto, ut omnia exteriora nostra verba,
 & opera ex divina charitate firmentur, secundum il-
 lud Apostoli 1. ad Corinth. cap. ultimo : Omnia enim
 vestra in charitate fiant : & sic Deus ex tota fortitu-
 dine diligitur . Hic est ergo tertius perfectæ dilectionis
 modus, ad quem omnes ex necessitate præcepti obli-
 gantur . Eandem veritatem inculcat S. Thomas
 in Quæstionibus disputatis, quæstione de Charitate
 art. 11. ad 2. & in sua Summa Theologica, seu 2. 2.
 quæst. 44. art. 4. Disce itaque à S. Thoma, Scholæ
 Angelo, modum adimplendi divinæ dilectionis
 præceptum, cujus necessitatem clamat ipsa natura,
 & hanc naturæ vocem Sacræ Scripturæ paginæ al-
 tius insonant, omnesque historiarum, prophetiarum, figu-
 rarum, mysteria, minarum, & documenta nihil aliud
 agunt, quàm ut diligendi Dei præceptum omnium
 animis penitus infigant, doceantque, totum ani-
 mum nostrum soli Deo castâ ac gratuitâ charitate
 esse consecrandum . Hinc jure merito Romani
 Pontifices quasdam flagitiosas damnarunt propo-
 sitiones, quæ ad negandum maximum divinæ dile-
 ctionis præceptum apertè collimare videbantur .
 Alexander VII. anno MDCLXV. hanc propositionem

proſcripſit: *Homo nullo unquam vitæ ſuæ tempore, tenetur elicere actum fidei, ſpei, & charitatis, ex vi præceptorum ad eas virtutes pertinentium. Idem, opinionis monſtrum contrivit Innocentius XI. quando anno MDCLXXIX. probroſo ſtigmate confixit has propoſitiones: An peccet mortaliter, qui actum dilectionis Dei ſemel tantum in vita eliceret, condemnare non audemus. Item: Probabile eſt, nec ſingulis quidem rigorosè quinquenniis per ſe obligare præceptum charitatis erga Deum. Item: Tunc ſolùm obligat, quando tenemur juſtificari, & non habemus aliam viam, qua juſtificari poſſumus. Denique, Alexander VIII. Pontifex Maximus, anno MDCXC. hanc ſacrilegam damnavit propoſitionem: Bonitas objectiva conſiſtit in convenientia objecti cum natura rationali: formalis verò in conformitate actus cum regula morum. Ad hoc ſufficit, ut actus moralis tendat in finem ultimum interpretativè. Hunc homo non tenetur amare neque in principio, neque in decurſu, neque in fine vitæ ſuæ mortalis, Quæ propoſitiones, ut nemo non videt, totam ſimul Chriſtianam Religionem evertunt, Incarnationis conſilium deſtruunt, omnium myſteriorum fructum evacuant, delent Scripturas omnes, omnium errorum virus complectuntur, & cor ipſum Religionis invadunt.*

Tertia obſervatio generalis, quam hìc attexere animus eſt, & quâ præcipuè commendatur puritas doctrinæ Moralis S. Thomæ, verſatur circà diſpoſitiones, quas neceſſarias eſſe docet Angelicus Doctor ad conſequendam in Sacramento Pœnitentiæ remiſſionem peccatorum. Sic enim Sanctiſſimus Præceptor 3. part. quæſt. 85. art. 5. in quo in-

inquit: *utrum principium pœnitentiæ sit ex timore?* Statuit in quo sita sit vera pœnitentia: *Respondeo*, inquit, *dicendum*, quòd de pœnitentia loqui possumus duplici modo, quantum ad habitum, & sic immediate a Deo infunditur sine nobis principaliter operantibus, non tamen sine nobis dispositivè cooperantibus per aliquos actus. Alio modo possumus loqui de pœnitentia quantum ad actus, quibus Deo operanti in pœnitentia cooperamur, quorum actuum primum principium est Dei operatio convertentis cor, secundum illud Thren. ult. *Converte nos, Domine, ad te, & convertemur.* Secundus actus est motus fidei, tertius est motus timoris servilis, quo quis timore suppliciorum à peccatis retrahitur. Quartus actus est motus spei, quo quis sub spe veniæ consequendæ assumit propositum emendandi. Quintus actus est motus charitatis, quo alicui peccatum displicet, secundum se ipsum, & non jam propter supplicia. Sextus actus est motus timoris filialis, quo propter reverentiam Dei aliquis emendam Deo voluntarius offert. Sic igitur patet, quod actus pœnitentiæ à timore servili procedit, sicut à primo motu affectus ad hoc ordinato: à timore autem filiali, sicut ab immediato & proximo principio. Viden, Sanctum Thomam actuum pœnitentis seriem præformando expressè affectum dilectionis requirere, cumque charitatis nomine donare, ac subindè in Sacramento pœnitentiæ necessarium esse ad remissionem peccatorum actum initialis amoris Dei super omnia dilecti, sicut apertè declarat idem Sanctus Doctor 3. parte, quæst. 86. art. 3. his verbis: *Unde non potest esse verè pœnitens, qui de uno peccato pœnitet, & non de alio. Si enim displiceret ei illud peccatum, quia est contra Deum super omnia di-*

Actum (quod requiritur ad rationem veræ pœnitentiæ) sequeretur quod de omnibus peccatis pœniteret. Et sanè, ut homo sit verè pœnitens, debet primò dolere de peccato, ut est offensa Dei, injuria Deo illata, & privatio amicitiae ejus. Secundò, debet se convertere ad Deum, juxta illud Joelis Prophetæ cap. 2. *Convertimini ad me in toto corde vestro*. Denique, oportet ut ejus voluntas recedat à peccato. Porro hæc tria pœnitens habet cum Sacramento Pœnitentiæ per motum inchoatę dilectionis divinæ. Mens quippè nostra, ut ait S. Thomas lib. 4. contra Gentes c. 72. *debitè ad Deum converti non potest sine charitate*. Præterea, *Actus*, quo alicui displicet peccatum propter seipsum, est motus charitatis, ut ait idem Sanctus Doctor loco mox citato, seu 3. parte quæst. 85. art. 5. *Demùm, qui timore pœnæ ab aliquo peccato abstinet, non simpliciter ejus voluntas à peccato recedit, sicut voluntas ejus, qui amore justitiæ abstinet à peccato, ut inquit S. Thomas 1. 2. qu. 107. art. 2. ad 1. Non potest igitur juxta principia S. Thomæ fieri in Sacramento pœnitentiæ remissio peccatorum sine aliquo actu initialis amoris Dei*. Hæc doctrina de necessitate dilectionis divinæ in Sacramento Pœnitentiæ ad obtinendam remissionem peccatorum, connexa omninò est cum sententia S. Thomæ docentis, ut superius diximus, teneri omnem creaturam rationalem in primo rationis diluculo sese convertere ad Deum, ut ultimum finem, eumque diligere. At enim, si puer tenetur in primo rationis diluculo ad Deum sincere corde sese convertere (converti autem non potest ad Deum, & in illum se suaque omnia referre absque amore) à fortiori peccator, qui post patra-

ta flagitia novitatem vitæ inire vult, ad Deum astringitur amore converti.

Ultimò, circa Doctrinam Moralem S. Thomæ, duas potissimum Regulas observare debes, quas præscribit Angelicus ille Doctor ad dignè administrandum, vel percipiendum Eucharistiæ Sacramentum apprimè necessarias. Prima Regula hæc est: *Si peccatum est manifestum, debet denegari Eucharistia, sive in occulto, sive in manifesto petat.* Ita docet S. Thomas in 4. Sentent. distinct. 9. art. 5. in Respons. ad 1. quæst. Ex qua S. Doctoris Regula, sequitur primò, publicè criminosos, manifestèque infames à Sacra Communione arceri omninò debere, videlicèt meretrices, publicos concubinos, fœneratores, magos, sortilegos, blasphemos, histriones, & joculatores notorios, aleatores, & eos, qui choreas agunt, suisque gestibus & cantilenis ad libidinem se & alios provocant, necnon eos, qui odia & inimicitias exercent, vel qui in aliqua peccandi occasione versantur. Secundò, ex hac S. Thomæ Regula sequitur, mulieres, quæ impudicè & inhonestè se ornant, crinibus, coloribus, vestibus, non ut suis maritis placeant, sed ut adscititiis ornamentis oculos hominum in se convertant, eisque offensionis & damnationis laqueos parent, ad Sacram itidem Communionem admitti non debere. Hinc Innocentius XI. Pontifex Maximus, anno MDCLXXXIII. die xxx. Novembris Edictum Romæ promulgavit, quo districtè præcepit, ut mulieres, cujuscumque gradus & conditionis sint, in plateis, & in aliis locis publicis, sed præsertim in Ecclesiis, indutæ appareant non sumptuosas, non caudatis vestibus, non crinibus inaniter

intortis, non fuco ac pigmentis vultu illito, non pectore nudo, aut tenui velo obteſto, ſed ita veſtito, ut ne præter faciem quidquam cernatur, ſimulque prohibet Sanctiſſimus ille Pontifex Sacerdotibus, ne huiusmodi mulieres, quæ humeris, pectore, mammillis, brachiisve nudatis ad Euchariſtiæ Sacramentum accedere non formidant, conſtanti cordis robore ac zelo muniti, Divino Sacramento paſcant.

Altera Regula S. Thomæ hæc eſt: *Euchariſtiæ Sacramentum poteſt conſiderari ex parte ſumentis; in quo requiritur, ut cum magna devotione & reverentia ad hoc Sacramentum accedat, & ideò ſi aliquis ſe quotidie ad hoc paratum inveniat, laudabile eſt, quòd quotidie ſumat. Unde Auguſtinus, cum dixiſſet: Accipe quotidie, ut quotidie tibi proſit, ſubjungit: Sic vive, ut quotidie merearis accipere. Sed quia multotiès in pluribus hominum impedimenta huius devotionis occurrunt propter corporis indiſpoſitionem vel animæ, non eſt utile omnibus hominibus quotidie ad hoc Sacramentum accedere, ſed quotieſcumque ſe ad illud homo invenerit præparatum. Unde in libro De Eccleſiaſticis Dogmatibus dicitur: Quotidie Euchariſtiæ communionem accipere, nec laudo, nec vitupero; ita docet Angelicus Doctör 3.par.quæſt.80.art.10. ubi quærit, utrùm liceat quotidie Euchariſtiæ Sacramentum ſuſcipere? Ab hac Regula, in qua Doctör Angelicus, poſt Sanctos Patres, magnam animi ſanctimoniam ad ſacram quotidie percipiendam, Euchariſtiam requirit, & ſingularem diligentiam, curam, & reverentiam in parando ad ejus ſuſceptionem animo poſtulat, omniò reſceſſerunt moderni aliquot Caſuiſtæ, qui vel maxime indignos, & di-*

& divinæ gratiæ inanissimos homines ad Sacram-
 Communionem impellebant , ut patet ex hac hor-
 rendâ propositione , quæ ab *Innocentio XI.* Pontifi-
 ce Maximo anno MDCLXXIX. proscripta fuit : *Fre-*
quens Confessio & Communio, etiam in his , qui gen-
tilitèr vivunt, est nota Prædestinationis . Certè hæc
 propositio recentèr invecta , & toti retro antiqui-
 tati Patrum ignota , quæ quoslibet sui & Mundi
 amore tumentes, ac gentilitèr viventes ad tremen-
 dum mysterium per nudam peccatorum confessio-
 nem admittit, tantùm abhorret & distat à doctri-
 na *S. Thomæ*, quantùm lux à tenebris, à die nox, &
 Oriens distat ab Occidente .

Plura non dicam de Doctrina Morali , quâ
S. Thomas Sæculo decimo tertio Ecclesiam illustra-
 vit, quamque in sequentibus sæculis complexi Ca-
 tholici Doctores Theologiam Moralem illibatam
 conservarunt , exitialem morum depravationem
 profligarunt , ac maximâ sollicitudine caverunt ,
 ne benè fundata antiquitas scelestâ novitate subru-
 eretur , ne Superiorum instituta violarentur , ne
 rescinderentur scita Patrum, ne convellerentur de-
 finita Majorum, sed sese intra sacratæ atque incor-
 ruptæ vetustatis castissimos limites prophanæ , ac
 novellæ curiositatis libido contineretur . Hinc
Alexander VII. Pontifex Maximus , ut ostenderet ,
 quantùm detestaretur perversa quorundam laxio-
 rum Casuistarum dogmata , quibus mores & Di-
 sciplina Christiana corrumpuntur , & Evangelio
 penitus contraria invehitur morum dissolutio; ve-
 hementèr optabat, ut aliquis Ordinis Dominicani
 Theologus Doctrinæ Moralis Regulas non ex mo-
 dernorum Casuistarum libris excerptas , sed ex sa-

cris litteris, ex Decretis Romanorum Pontificum, ex Conciliorum Canonibus, ex Operibus Sanctorum Patrum, ex libris doctiorum Theologorum, SS. *Thomæ*, *Raymundi*, *Antonini*, & ex Instructionibus S. *Caroli Borromæi* haustas traderet, & ad eas omnes Theologi in dirigendis fidelium moribus communia Placita conformarent. Ut igitur in sana Ecclesiæ Romanæ morum doctrina sanus atque integer permanere possis, charissime discipule, uni firmiter adhære S. *Thomæ* doctrinæ morali, quam Summi Pontifices maximis elogiis commendarunt. Coaceruent sibi, qui voluerint, Magistros prurientes auribus: Tu sequere Sanctum *Thomam*, Scholæ Angelum, qui unus pro decem millibus computatur, similis huic Angelo, qui, ut ait Propheta *Daniel* cap. 10. v. 6. ita loquebatur, ut ejus verba viderentur à multis unâ loquentibus prolata: *Vox Sermonum ejus, ut vox multitudinis*. Vox siquidem S. *Thomæ*, Sanctorum omnium Doctorum vox est, quorum doctrinam sectatus est, exposuit, illustravit, roboravit, & ut verbis utar *Petri Labbei* doctissimi Societatis *Jesu* Scriptoris, collegit S. *Thomas* in sua *Summa* quidquid doceri potest, aut sciri. Inclusit *Ambrosios*, *Hieronymos*, *Gregorios*. Inclusit se ipsum, major se ipso & minor. *Epitomen* fecit alienæ *Sapientiæ*, & *Summam* suæ. Didicit omnes, qui *Thomam* intelligit, nec totum *Thomam* intelligit, qui omnes didicit. Vox itaque S. *Thomæ* est vox multitudinis, & dum eam audimus, Sanctorum omnium Doctorum vocem nobis audire videmur. Felicem te! Si inter tot discrimina, quæ passim in Disciplina morum occurrunt, Ducem tibi adsciveris S. *Thomam*, qui vias tuas di-

diriget, pericula deteget, salebrosa complanabit. Abſque eo Duce quàm periculofum fit arduam, iſtam alexæque plenam ſuſcipere provinciam, diſce exemplo multorum, qui in doctrina morum nullius Ducis & rectoris veſtigia ſequentes, per inextricabiles tenebras oberrarunt, & præeunte ratiuncularum fallaci fulgore deluſi, in varia præcipitiæ dilapſi, cæci facti ſunt & duces cæcorum: *Ducem & rectorem non habere malum eſt, & multarum calamitatum argumentum, nec non inordinatæ perturbationis & confuſionis principium. Quemadmodum enim ſi Coryphæum & ducem ſuſtuleris, non erit amplius Chorus concinnus & ordinatus; & ſi à phalange exercitus amoveris Imperatorem, non erit amplius ordinata acies; & ſi à navigio ademeris Gubernatorem, navem demerges: ita malum quidem eſt, atque everſionis occaſio rectore carere. Verba ſunt S. Joannis Chryſoſtomi Homil. XLIII. in Epistolam ad Hebræos. Quæ cùm ita ſint, Chariffime diſcipule, fac ut doctrina S. Thomæ non recedat ab ore, non recedat à corde, quia ipſam ſequens, non devias; ipſam cogitans, non erras; ipſam tenens, non corruis; ipſam loquens, non mentiris; ipſi ſtudens, ad veritatem pervenis, ut teſtatur Clemens VI. Pontifex Maximus in Sermone de S. Thoma, cujus thema, Ecce plusquam Salomon hic.*

D. Non opus eſt, ut mihi ſtimulos ſubdas ad ſectandam doctrinam S. Thomæ, quem tanquàm Magiſtrum audit, ac certatim præclaris encomiis exornat omnis eruditorum hominum natio. Hunc quippè Angelicum Doctorem, divinæ mentis fideliffimum Interpretem, cui quidquid ſcio lubens acceptum refero, Ducem, & in ſtudiis meis Re-

cto-

doctorem hæcenus secutus sum , & ejus doctrinæ as-
surgere , fascesque submittere semper gloriabor ,
eam in spem certissimè erectus , fore ut , quemad-
modum *Tobias* , Angeli ductu & ope adiutus, iter,
quod susceperat , auspiciatò confecit , & immanem
ex aquis erumpentem piscem impavidus vivum
arripuit ac exenteravit ; Sic ipse S. *Thomæ*, Scholæ
Angeli, præsidio fretus, studiorū meorum cursum fe-
licitèr absolvam, & munitus Sanctissimi illius Præ-
ceptoris doctrinâ, ex qua, ut legitur Cantici Cantic.
cap. 4. v. 4. *mille clypei pendent , omnis armatura
fortium* , omnia errorum monstra intrepidus con-
fodiam ; Faxit Deus , Optimus Maximus , ut se-
cundo S. *Thomæ* doctrinam , virtutes ejus æmulari i-
possim , vitam castissimam , Orationem assiduam ,
humilitatem singularem, charitatem heroicam, re-
rum humanarum contemptum , nihilque præter
Deum , quem Sanctus ille Doctor unice concupi-
vit , & feliciter consecutus est, desiderem, ac tan-
dèm solam Dei gloriam , & Ecclesiæ utilitatem
unicum mihi studiorum ac laborum meorum fru-
ctum proponam . Eò collineat votorum meorum
Summa .

Finis Tomi quinti.

M E N D A ;

Quæ irrepsērunt in Editionem hujus Tomi Quinti in Historiam Ecclesiasticam.

M E N D A

C O R R I G E.

Pag. 11. Lin. 22. succēssit

succēssit

29. 1. Rudolphus

Rodolphus

152. 22. MCCXVI.

MCCXXVI.

228. 9. Gregorii XI.

Gregorius XI.

235. 10. in quo

in qua

247. 27. propugnatos

propugnatas

263. 23. ac

ad

282. 27. melleus

malleus

Alia, si quæ occurrant, leviora menda, facili negotio inter legendum emendabis, tuæque humanitate, studiose Lector, ultrò condonabis.

ADverte etiam, benigne Lector, nonnulla in hocce Tomo V. Historiæ Ecclesiasticæ jam typis edito fuisse à quibusdam deprehensa, quæ hic correctione, aut explicatione aliquâ indigere visa sunt.

Primò, pag. 77. lin. 28. dico, *Innocentium III.* creatum fuisse Cardinalem à *Cælestino III.* Quâ in re, ut ingenuè fatear, lapsus memoriæ passus sum. *Innocentius* quippè *III.* non fuit creatus Cardinalis à *Cælestino III.* sed à *Clemente III.* Decessore *Cælestini III.* Cardinalium albo adscriptus est, ut videre est apud *Platinam*, *Ciacconium*, & alios, qui de Viris Romanorum Pontificum, & Cardinalium scripserunt. Sed *Opere in longo fas est obrepere somnum.*

Secundò, pag. 178. decem recensco articulos Concilii Parisiensis, quorum postremus his
ver-

verbis conceptus est: *Malus Angelus & Adam habuerunt, unde possent stare, etsi non unde possent proficere.* Quibus verbis prædicta Synodus innuere dumtaxat voluit, malum Angelum, & Adamum habuisse auxilium sufficiens, seu *auxilium sine quo non perseverare poterant, sed non habuisse auxilium efficax, seu auxilium quo perseverarent, uti docet S. Augustinus in libro de Correptione, & gratia Cap. XI. & XI I.*

Tertiò, pag. 397. dico, *S. Dominicum* Ordinis Prædicatorum Fundatorem, omnigenâ quidem literaturâ præditum fuisse, nullum tamen edidisse librum. Ast, nolens cum nemine super hac re contentiosum ducere funem, nec quidpiam decerpere de gloria Sanctissimi illius Patriarchæ (quem, ut meum amantissimum Patrem, impensissimè colere eximia felicitatis & summo semper honoris loco ducam) amplissimam Lectori potestatem permitto amplectendi sententiam eorum, qui *S. Dominicum*, de Ecclesia optimè meritum, inter clarissimos Sæculi XIII. Scriptores referendum esse censent.

Quartò, pag. 410. assero, *S. Thomam*, Doctorem Angelicum, cum è Castro, in quo à Matre, suisque fratribus captivus detinebatur, dimissus est; statim Coloniam missum esse, ut sub *Alberto Magno* Philosophiæ & Theologiæ operam daret, quod nullo pacto adversatur Breviario Romano, in quo ad diem VI I. mensis Martii legitur, *S. Thomam*, statim ac è Castro dimissus est, Lutetiam Parisiorum fuisse profectum, sed potius utrumque cum veritate Historiæ optimè cohæret. Nam *S. Thomas* liber è Castro dimissus Pa-
ri-

risios quidē à *Joanne Teutonico*, Ordinis Prædicatorum Generali Magistro, ductus est, non ut ibi Philosophiæ & Theologiæ studio incumbere, sed ut in Capitulo Generali eâ in Urbe celebrando ipsi de Collegio, seu de Studio Generali provideretur, quò factum est, ut Parisiis confestim secedens *S. Thomas*, Coloniam missus fuerit, ut sub *Alberto Magno* Philosophicis & Theologicis excoleretur Disciplinis, sicut testantur *Guillelmus de Toco*, testis suppar, & vitæ *S. Thomæ* Scriptor antiquissimus, necnon *S. Antoninus* 3. part. Chronicorum tit. 22. cap. 7. parag. 4.

Quintò, pag. 522. Affirmo post doctissimum *Mabilonium*, Salutationem Angelicam Sæculo dumtaxat Ecclesiæ XI. frequentari cœpisse, sed hoc intelligendum velim de Horis, seu precibus Canonicis, quibus antè XI. Sæculum post Orationem Dominicam necdum adjecta erat Salutatio Angelica, sicut ex antiquissimis cùm Monachorum, tum Religiosorum Ordinum Statutis evincit à me laudatus *Mabilonius*. Non eo tamen inficias, Salutationem Angelicam esse in Ecclesia antiquissimam, ac sæpius à Sanctis Patribus fuisse usurpatam, præsertim à *S. Cyrillo* Patriarcha Alexandrino, qui præfuit Concilio Oecumenico Ephesino contra Hæresiarcham *Nestorium* anno ccccxxx. celebrato.

Sextò, pag. 561. assero, omnes historias, Prophetias, Mysteria docere, totum animum nostrum soli Deo castâ ac gratuitâ charitate esse consecrandum; absit tamen ut his verbis excludere voluerim amorem spei, per quem Deum diligimus, cœu mercedem & objectivam Beati-

tu-

tudinem nostram , cùm S. *Augustinus* pluribus in locis amorem spei commendet, præsertim Enarratione in Psalmum 134. ubi hæc habet : *Sic amare debes, ut ipsum, scilicet Deum, pro mercede desiderare non desinas, qui solus te satiet, sicut Philippus desiderabat, cùm diceret : Ostende nobis Patrem, & sufficit nobis.*

Postremò, non solùm in hocce Tomo, sed in quatuor aliis prioribus, compello interdum cum aliquo honoris titulo aliquot Scriptores, quorum Opera fuerunt Romæ censorio stigmatate confixa, non quòd eorum mihi probetur doctrina, quæ ab Ecclesia proscripta est, sed quòd ex ipsis certa quædam possint hauriri documenta, quæ antiquitati illustrandæ, Catholicæ Religionis veritati asserendæ inservire, & Historiæ Ecclesiasticæ haud modicam lucem affundere possunt.

